




清代傳記叢刊·綜錄類 ⑪  
周 駿 富 輯

# 大清畿輔先哲傳

(四)

四十卷附  
列女傳

徐世昌撰



明文書局印行





賢能傳七

大清畿輔先哲傳第三十四

天津徐世昌撰

紀樹森

紀樹森獻縣人父暉性淡靜與弟昫篤手足誼爲文謹矩矱以諸生終樹森以知府分發南河奉委司總局出納皆核實卻歲所入數萬金大吏以爲迂罷之俾總理淮安揚州振務山陽知縣獻白金二萬兩力卻之遂觸同官忌命專理揚州已而查振委員李毓昌爲山陽知縣醜殺事聞 仁宗震怒誅山陽知縣淮安知府以知情絞死樹森理揚州振頌聲四聞調泗州某縣營卒焚縣署劫庫毆官大吏將劾知縣謝營卒僚屬無敢言者樹森曰第劾縣令而悍將驕卒置不問流弊尙可言耶大吏悟乃置營卒於法後守邳州有道士獻逆書內爲首者百餘人樹森俾偕家丁密訪得實

當重賞越二日以無實據覆樹森曰此書乃汝造與胥役同謀詐害富民耳道士龔服叩人喜訟每受牒輒數百樹森曰此息訟所致姦民誣善良以索賄善良懼拖累而曲嚴其欲以求解隸欲得罷訟之費官欲省聽斷之勞以妄訟始以息訟終姦民得志乃愈訟矣嚴誣告之罪不聽私和訟遽息大吏以其能移守忠州嚴佐貳擅受之禁訟亦息弟樹榮字桐豫嘉慶十六年進士官內閣中書著有積雪亭稿

齊正訓

兄正誼

齊正訓字鯁言號竹溪高陽人少有至性秉異姿稍長從兄正誼受讀兄以五色筆爲識初讀用某筆繼用某筆成熟又用某筆業日進中乾隆五十九年舉人嘉慶四年成進士授刑部清吏司主事鞫獄明允上官倚重之尋外授甘肅鎮番知縣其地資山水灌田

城西引春水水盛田多衝沒城東引秋水水寒而地鹵民逃亡殆盡虧賦纍纍初正訓思借城西餘水溉城東田畝開渠通之度費甚鉅縣瘠無所措發帑銀五萬交質庫取息供渠費聚商賈士民議其事眾狃於積習莫敢言正訓毅然任之赴渠所劃工段屬紳耆曰吾擅動饑銀以興水利是置身家度外矣爾若偷減工料敗吾事卽投諸渠中以謝百姓日宿渠上與眾同甘苦後費不足搜署中餘力以繼又不足百姓裹糧助之渠成歲大熟瘠地皆成沃壤鎮民立長生祠祀之回匪爲變大吏檄鎮番辦馬三百匹限以三日正訓適赴省正誼代爲錯置倉猝立辦民不知擾尋調平番庶民送者數百里外不絕數月遷皋蘭升洮州廳同知卓尼土司楊病故無子族人爭襲職正訓斷使胞弟嗣立漢番帖然委署甘肅州知府適欽使查辦通省官虧正訓權清查局惟以官之賢不肖



爲去取善則調護之貧殘庸劣者卽罷斥調肅州司嘉峪關治兵  
嚴整取武弁之有技勇者以備不虞境多盜嚴法治之數月後餘  
賊皆遠遁有夜不閉戶之風其地少雨導南山雪水溉田諸村堡  
動以爭水成巨案正訓劃定疆理以治鎮番者治之戶安其利總  
督松筠固原提督楊遇春皆奇其才以熟諳邊務薦之廷道光元  
年授雲南普洱知府兼護迤南兵備道正己率屬平反兩大案蠻  
夷安戢四年染疾卒年五十二正誼字矩行嘉慶三年舉人官獻  
縣教諭治振有勞以卓異薦道光八年教匪孫榮謀起事正誼偵  
知密告郡守禽之民賴以安十四年卒年七十四

魏煜  
李際春

魏煜字寶齋蔚州人魏象樞六世孫也少補諸生以行義爲鄉里  
推重嘉慶五年詔求賢良後裔有司以煜名達賜舉人由教習選



授知縣道光初歷署四川樂山威遠十一年補冕寧時教匪潛煽  
煜所至有捕獲功會猥夷擾邊當事檄督糧運從鎮兵討賊遊擊  
某前驅被圍煜選壯丁三百夜然炬爲疑師擾之賊解散旋就撫  
十三年夷復叛焚掠富林營火光燭數十里建昌大震楊遇春提  
兵至議痛剿特檄煜專主饒賊巢萬山中深溪溝牛木落尤險絕  
輒棄騎囊糗糧皮袋貯水人肩負以濟賊平論功以州同用調文  
川知縣年餘以治最擢巴州知州巴俗強悍健訟有苟氏者尤梗  
化煜鎮撫有方人憚其威居三年葺廟學設考棚俗彬彬稱文治  
焉母喪歸服除補劍州卒煜性明敏有綜核才長於聽斷大吏有  
疑獄必檄訊之爲政務實惠不求虛譽在蜀二十年歷十四州縣  
竝有治績同州李際春字嘯山諸生以優行貢太學道光八年舉  
於鄉選授保定訓導擢知縣歷署湖北公安漢川補孝感卒於官

際春少好學工詩性警敏有志操家窶授徒往來雲朔州牧陳嘉謀重其文行延爲師有大役必諮決之富人某以訟事奉五百金求緩頰際春時方絕粒遽卻之典衣糶米嘯詠自如魏煜故姻也將宦蜀重幣要與俱際春素與論學多異趣亦卻之其介類此率公安時定編戶牌法力除苛派在漢川築太沙嘴隄遏盛漲水不爲災孝感民有悔婚爭產者訟累年不決際春至一訊而服其爲學務實踐嘗刻李二曲反身錄輯先儒格言爲讀書法平生孤耿自信雖歷艱苦不少渝服官數年處之若寒素云著有嘯山初草

### 焦景新

焦景新字晴川號午橋天津人乾隆五十三年舉人嘉慶六年進士授吏部主事薦升郎中補授江南道監察御史京師凡犯竊者多刺字景新不刺初犯者或問故曰京師地大逐此匿彼徒利胥

役無益也民初犯竊猶有悔心刺字則捕役挾持不爲盜不得矣  
武清煤廠鎮有牙僧爲市場害奏請查辦民至今便之勒碑紀其  
事丁丑己卯兩充會試同考官道光二年出知江西饒州府有民  
婦子溺水死誣人謀殺久不成讞下車一鞫而伏餘干縣石虹山  
產煤眾爭利械鬪大府檄景新偕參將率兵往參將欲剿之爲已  
功景新止之曰此百姓私鬪非敢反也奈何妄殺邪曉以利害逮  
爲首者數人餘皆遣去郡屢旱禱雨輒應童試或以賂進謝之曰  
吾亦欲子孫讀書此何爲邪其人慚而退有僞投家書者左右請  
付吏置不問反厚贈之平生喜書倉卒不廢讀所著有多識類鈔  
同文拾瀋雜字姓函叶韻闕斑及詩集藏於家

### 王有慶

王有慶字餘齋號善舟天津人七歲受書勤苦倍成人稍長慨然



有志聖賢之學塾師嘗問讀書有得乎對曰學當以誠爲先孔子於易乾卦曰立誠以是傳諸曾子則曰誠意曾子傳諸子思以訖孟子則曰誠身師大奇之嘉慶六年舉鄉薦七年考補景山教習十八年豫東用兵有慶橐筆從軍以功保知縣十九年選授江南豐縣知縣擊斷明決猾胥束手不敢爲姦訪訟師治其罪有劉搭拉者死而未獲其尸公訪知陳郎頭佔其妻賈氏曰得之矣拘陳與賈至陳忽作劉語曰今見青天矣先是陳與賈通與其友張二謀乘劉醉坑之於途於是一鞠具服竝置諸法又許文豹者殺人數年不能具獄訪之古廟遇其黨乃得實遂定讞李大麻子者豐之巨族也有勇力善騎射癸酉教匪之亂禦賊有聲賊銜之其黨誣其與匪通總督百齡檄有慶緝之眾請以兵往有慶曰練勇以衛州里義士也宜無罪當善告之若懼之以兵彼必遁去是真驅

之爲匪矣乃變服至其家李出問姓氏有慶以實告且曰毋恐吾知爾必能脫汝於死也竝騎至縣繫送督轅鞫之無實遂釋歸豐故多盜密授捕役方略偵所在盜無不獲者山東教匪郭永清匿河南永城境乘夜猝至其地禽之鉅野大盜匿豐沛間積年不獲悉誘禽之無脫者嘗言欲弭盜先治捕治捕無他恩威竝用而已故蒞豐三年盜皆屏跡無所容督撫上其功擢知州二十三年調元和元和當都會之衝期會徵發肆應無暇晷胥吏往往緣爲姦積案纍纍無結期有慶至三月舊案悉清完無一宿牘有兄弟某相告訐有慶輒自訟德薄以天性愷諭之咸感泣而去其折獄原情定讞雖盛怒未嘗輕用刑時吳中連歲旱議振貸勸捐輸濬城河修學宮創義塾仿以工代振之法嚴懲博塞禁婦女遊觀朔望講鄉約籍游食無賴者跪而聽之其蠹鄉里及煽誘人子弟者則



痛懲不少貸在元和六年政蹟卓然大吏疏擢泰州知州會吳中復大水留辦災振事畢之泰州任總督以洪湖決口改海運特檄有慶往天津收米還加知府銜捐貲振水災嚴侵冒謹支放活飢民無算先是有慶嘗著救荒要論曰勸捐輸覆戶口定遠近勸捐之法必長吏親詣其門委曲開導加以優禮竝許以旌獎是卽周禮安富之道也覆戶口其法卽宋蘇次參各書其大小口數應請米若干於門其後余童第上中下爲三等是也定遠近分給之法近者給三日次近者給五日在三十里內者給十日三十里外五十里內者給十五日更遠者給二十日如此則先有定期不至徒勞奔走且不至荒其業矣其輯流移埋殍骸施藥劑諸法皆著有成說又謂施粥不如放米放米不如放錢而其要則歸於得人得人則隨其時地之宜而用之不得其人則良法亦歸於弊藪故有

慶辦振因地相時法無一定而不遺不濫實惠及民尤爲救災之  
圭臬云明年麥秀雙歧州人繪圖以獻一時士大夫爭題詠之升  
太倉直隸州知州未蒞任署松江知府會濬吳淞江總督檄有慶  
督治之初有慶宰元和時嘗論蘇松常三郡之水以震澤爲尾閭  
嘉慶年間開濬吳淞江費民錢二十餘萬迄未成功今吳淞江劉  
河皆淤塞成田獨湖水淺狹葑蕀蔽宜次第開濬疏瀹壅塞以  
資蓄洩而備旱澇制軍聽之而不能用至是奏請疏濬一如其言  
吳俗信巫覡而松郡尤甚有慶下車卽徧禁諸淫祀葺名宦祠拔  
節婦子徐繼榮繼達兄弟以示旌勸案牘皆手自清理法比精密  
吏民畏懷八年擢淮安知府淮安兼轄河務每聞報水過碇若干  
卽乘單舸沿河上下引流醜渠慎宣防嚴啟閉飭材料卹徒庸覈  
功辜信賞罰奉職據法一無所撓九年調蘇州蘇州商民輻輳易

藏姦夜輒變服出巡更深始返署手理積獄終日坐堂皇口占手  
判不假羣吏一日按察司獄不戒於火囚失八人立督丁役捕獲  
之以勞卒官年六十有慶生平簡肅厚重讀書不事章句喜誦宋  
儒書近時惟好湯斌李光地地方苞于成龍諸集三十年未嘗釋手  
性孝謹篤友于之愛不治生產有餘則與兄弟共之事兄如嚴父  
至老弗衰嘗誦李光地語曰蔑訓誥者無師滯章句者無得故取  
材不以一格丙子充同考官得士七人所薦丹徒嚴保庸上海曹  
樹奎長洲彭蘊章王嘉祿吳縣潘遵禮諸人皆東南知名士及卒  
梁章鉅歎曰江南郡守有經濟才者以李君葛峯王君善舟爲最  
今皆未竟其用惜哉

李大謨周鍾泰

李大謨字定園玉田人嘉慶七年舉人授山西絳縣知縣時有營



兵素頑悍新令至必嘗其刑大謨知其啖強藥也餓之乃鞫一訊而服後爲改行調太原值回亂大府檄取民兵大謨募無業健兒訓練之兵強而民不擾量移江西玉山時苦旱上官促啟漕大謨憤然以無禾報凡七促報如之卒罷其舉旋調石城有廖廣周者左術煽眾逾數千結寧郡李步高等蔓延諸郡大謨諭眾登陴陳戰守之策乃飛牘乞兵自募壯丁三百餘徇於鄉凡兵民皆爲手識驗無識者獲賊謀遂盡悉賊情賊引去遇伏於險大挫之李步高等先後悉被殲境賴以安時大謨衣不解帶者已四十日矣奏上仁宗嘉獎之調清江以卓異第一擢南昌府吳城同知吳城蕭家隄歲常衝決淹田禾民苦賦無出訴之有司皆以事關國課不敢言大謨奉檄履勘建議請豁免大府以吳城爲大謨舊治疑其私也覆勘始信卒如大謨議繼擢建昌知府未蒞任而卒聞者皆吳

傳三十四  
失聲大謨性亢直所治必得民望在官一如寒素或有諷以家且落者  
答曰不失清白吾所得多矣同縣周鍾泰字山甫以舉人官東鄉  
知縣性廉介聽斷明決人無所售其姦邑徵漕糧吏役百計吹索  
民病之鍾泰懸鉅於門許百姓自鳴聞聲卽出治漕弊以清年老  
致仕歸卒

### 張志廉

張志廉字周六號秋艇南皮人嘉慶六年拔貢授工部七品京官  
九年舉於鄉明年成進士選庶吉士改刑部貴州司主事二十三  
年典試黔陽得周良卿等四十人明年升陝西司員外郎記名御  
史道光三年分校禮闈黃士瀛池生春管道羣皆出其門時稱得  
人四年擢湖廣道監察御史稽查通政司國子監改補江南道旋  
掌雲南道稽查通州西倉戶部銀庫儲濟倉事志廉好獎拔寒賤



奏請容城鉅儒孫奇逢從祀孔廟士論歸之十年出爲雲南大理知府潔已率屬尤以愛民教士爲先因議封鹽井爲民力爭忤當道改四川龍安府未赴任除禮部鑄印司員外郎十九年卒官

### 張志詠

張志詠原名志靈字幼于號藕船南皮人幼穎異讀書能強記嘉慶十二年舉於鄉由內閣中書補廣西南甯府同知歷署南甯鎮安平樂桂林慶遠知府善折獄四川總督蔣攸銛至都語其父曰賢郎大好官聲平樂積年苗地案一訊而兩造服真良吏也蓋粵西循聲已播蜀中云大計卓異升補泗城知府延名儒修府志增設凌雲文武學額以培士氣郡人至今頌之道光十年丁內外艱服闋署貴州大定知府補都勻調署貴陽兼護貴東貴西道尋補貴陽府貴陽爲省會首都尤繁劇以鎮靜處之事無不舉卓薦升

湖南衡永郴桂道時未陽縣有糾眾抗糧之獄 上命嚴查巡撫  
陳鑾疏稱張志詠所定收漕章程士民悅服署按察使以律例刺  
字款未詳載乃參考成案分門別類輯刺字條款二卷刊之行世  
卸任以疾辭官僑寓通州三十年卒年六十有六

陳柱

陳柱字砥庵號聃史南宮人幼穎異爲文出語驚人年十五入邑  
庠嘉慶三年舉人十三年成進士以知縣發山西初宰懷仁以簡  
易治調曲沃又以勤能稱二十四年充鄉試同考官號得士未幾  
乞養歸服闋歷署襄陵崞縣改長治長治俗夸健扶孱鉏強束以  
禮義俗爲革比去父老感道泣爲實政錄記之上官嘉其能檄知  
曲沃老稚方歡迎而部議推擢雲南昆陽知州柱以年已老憚遠  
涉遂致仕歸前後爲令二十餘年政嚴而慈視民如家人父子先

是任懷仁值雹災柱往勘曰報災例止緩征且督郵往返費甚巨  
吾爲若稱貸如額明春若補輸可乎民咸諾及期完納無逋在長  
治有趙城曹順之變或謂宜閉城柱曰賊未至先自張是擾民也  
但嚴斥候待之卒安堵無恙柱性澹定好博覽載籍家居時輯縣  
志補家乘晚年居京師耽釋氏書著金剛經箋說咸豐三年歸里  
卒年八十

### 崔偲

崔偲字怡庭號茶農霸州人父承宗歲貢生以品學著聞學者稱  
蔚巖先生偲生而聰穎總角時母郝教以唐人詩竝爲言古人忠  
孝節義事卽能解其大義及受書攻苦乃倍於恆人誦習每至午  
夜不輟嘉慶九年舉於鄉十三年戊辰成進士歷任趙城永和臨  
晉知縣丁憂服闋復選湖南祁陽知縣調攸縣前後蒞官六任所



至以文學節吏治興利除弊振興學校數十年如一日當潞城之  
解任也士民赴省籲懇奏留者踵相接雖格於成例而大吏皆動  
容驚歎永和處萬山中僻陋甚民以訟至必爲之諄復勸勉多感  
泣不成訟而去鄰縣民乃或越境來訴善遣之弗止也臨晉頻年  
苦旱俛禱雨輒應境內舊有凍水河八十里日久淤塞因相度形  
勢會商上下游各縣挑濬之使水旱有所蓄洩一年內清理積案  
二千餘舉卓異去士民謳思弗輟彙爲去思吟二巨冊繪攀轅卧  
轍圖以獻其蒞祁陽也適湖北大祲流民麇至俛預爲之所及至  
則飲食寢處皆有所資是歲各送流民過境七萬餘人而合邑若  
無事者道光十二年江華逆猶滋事竄東安新田等處盤踞常寧  
皆與祁接壤縣人士紛紛議遷避俛曰賊未來而皇遽如是是自  
擾也乃聚鄉團修器械防要隘察姦民以爲不虞之備祁居水陸

衝楚兵剿賊者絡繹不絕彈壓有方凡八閱月凱撤逆匪無一人竄入祁境祁民亦無一人陷賊者調攸縣積勞卒官年五十三

張恪四世祖福蘊

張恪字佩庚南皮人四世祖福蘊家鉅富有田二萬畝宏宅大屋環城之垂崇禎時賊盜蠭起城西門少林寺僧慧印素通賊賊至南皮皆主慧印數苦縣人福蘊造寺叱慧印出擊之死赭其寺以其車甲械器輸之官遠近稱快順治元年清定京師某王將兵徇下縣民皆驚走福蘊止之曰有我在何害於是叩大軍營門大言曰南皮男子張福蘊願白事一見大王既見說王曰王奉天子令誅不道聞兵所過縣民或不知聖天子安民之意淆惑訛言竄伏饑餓而死者無算今南皮令棄城遁民惶恐不知所爲福蘊盡出家所藏黃金百二十白金千錢五千萬繒布五百匹米豆千石麥



藁具車二百兩馬羸牛羊彘各若干犒王師再拜獻大王麾下惟  
大王一聽福蘊飭軍士無怖驚民舉縣人實受大王之賜王未及  
應福蘊出所持鐵椎實案上重五十斤以要王福蘊長七尺餘鬚  
鬣怒張鐘聲偉視王已心重其人及聞言則益大喜曰坐壯士我  
聽而言王乃解佩劍授福蘊曰軍士有不聽令者劍斬之福蘊立  
起持劍以王令令軍中眾心大定爭持牛酒勞王師訖王師去南  
度二十餘日無敢入人家食田園蔬果者七傳至恪中嘉慶十三  
年舉人大挑以知縣用歷署山東博興博平冠高苑知縣旋爲館  
陶縣濱衛有隄工計畝輸資官府伏潦水至仍責之民恪悉卻民  
入錢以故歲所輸助民爲隄埽刻石縣門著爲令有寡婦告其子  
不孝恪召使其子給事縣中數月遣歸卒爲良子創陶山書院構  
瓦屋五十間建藏書樓度藏書三萬卷進諸生親爲講授館陶之

有書院始此以民俗媮媮親行縣郊力田者獎以銀幣荒蕪廢棄者眾辱其人貧不能自耕官假鑷鋌鈺不率作者罰有程抑豪擊彊屏絕姦蠹民毋敢側冠束衽挾籠烏睨衢肆閒尤嚴於捕盜獲之輒誅死署故有怪恪罷其祠怪亦竟絕不出聽訟能爲鉤距法疑難隱微應機斷決能得其情在平民有獄往往投牒大府願就訟理館陶人以青天呼之恪前去博興高苑博興高苑民扳留不聽去去冠博平冠博平皆立祠祀之及去館陶民扶老攜幼走泣送傾縣城恪旣以父憂歸杜門事母終其身不復出云

徐連

子雲龍

馮國楨

徐連字子達任縣人嘉慶三年舉人十四年進士授國子監學正改知縣選授四川冕寧冬春之交米價騰貴倣常平法開倉糶之至秋糶穀實倉穀無朽蠹患而糧價平縣民德之調西昌西昌田

水旱不均設法通其障塞者旱地悉變為水田凡數百頃道光十一年卒於官子龍雲字霖臣咸豐八年舉人居鄉有禦賊功直隸總督劉長佑特疏薦選湖北巴東知縣歷署黃安宣恩改甯晉教諭所至有政聲同縣馮國楨字殿揆廩生納貲為戶部郎中改知府道光二十八年署湖北德安府調鄖陽修書院課生徒優給膏火資文風蔚興士子立碑頌之歷知施南安陸諸府值粵匪之亂姦民所在嘯起國楨揀壯勇千人親教練之督同鍾祥知縣李棟捕獲巨匪郭大安馬騾子多名其黨相戒斂迹不敢犯屬境民建生祠祝之以功授荊州知府乞病歸卒於家

李培緒

七世祖楨

楨子士焜

李培緒字慶餘任邱人七世祖楨字用積明山西按察使告歸家居清兵至城下縣官棄城逃楨與罷職縣尹白慧元誓死以



守城陷白慧元死率子弟巷戰身受數槩而亡一門戰死十七人  
乾隆四十一年追諡忠烈子士焜明崇禎七年進士累官江南道  
監察御史工科給事中督漕中州值歲大饑疏請捐租振恤之遷  
刑科彈劾不避權貴出爲山西分巡兵備道攝分守時闖寇北犯  
士焜嚴守禦賊不敢犯出巡河干見中流浮舟百艘營將欲擊之  
士焜曰此難民非亂民也促招之營將不可士焜怒曰脫有變吾  
一身任之不相累民得附岸活者一千六百餘人甲申京師陷賊  
傳僞牌至署士焜拮碎之戮來使於衢吏民譁然恐召禍士焜岸  
然弗爲動入清以吏部孫襄等薦徵爲兵科給事中轉刑科都給  
事中疏言古帝王制律以防姦因情以定律增捐舊制輕重有倫  
其刑笞杖既有百十之數而大小杖又有圓徑分寸之等取其可  
以決膚而不欲其損骨也杖之外則有流徒亦各有等總不過苦

之遠之而已若夫罪大惡極乃入於死而又有絞斬之不同蓋絞仍全其骸骨斬則身首異處矣虞廷所以曰欲竝生哉又曰欽哉欽哉惟刑之恤哉兢兢乎民命如此其重也臣備員已兩月矣每捧讀紅本有罪者俱先決杖而後補贖非古制也稽之舊典旣設刑部以掌邦禁又設都察院以司糾察兼之問刑又有大理以專審錄三覆五奏必情法兩協乃敢刑焉儻有乖謬則科臣執白簡以隨其後法至善也今律例未定止有杖決之二法得無輕者畸輕重者畸重耶如有罪應徒流者杖之不爲失出決之不爲失入耶人之肢體斷者不可復續性命死者豈可復生伏乞蚤定律例援古酌今凡有罪者應居某科先期具奏必俟宸斷而後遵行庶法得其平刑必當罪矣疏上詔卽修定律例士燮又疏言今歲自春至夏雨澤未霑民窮財盡盜賊竊發必然之理臣備員刑垣日

讀紅本見挈獲盜賊駢首就戮者不可枚舉臣甚惻惻民不畏死  
奈何以死懼之耶伏乞哀此愚民速下蠲恤之詔沛解網之仁使  
民俯仰有資其尙有奪攘矯虔致煩聖明之宵旰者臣弗信也  
上優詔答之復詢蠲恤之方士焜奏曰方今三百里內有分地之  
舉其地之圈入東兵者穀種牛力業已付之東流其未經圈入者  
又復觀望疑慮若一體徵輸不至八口流離不止也乞敕部將三  
百里內分地州縣本年錢糧再行蠲免眾口嗷嗷所不保夕乞敕  
撫按動支倉穀設立粥廠以濟目前至於強盜律斬豈容姑息然  
竊與強不可一律大夥與脅從判在幾微書曰與其殺不辜寧失  
不經誠以人命至重恐干天和乞敕部凡情有可矜法有可疑者  
姑開一面之網以廣皇仁而答天意士焜又以國初斷決逃人割  
腳筋之法慘痛近暴奏請除之疏入留中數日人咸爲士焜危旣



而詔永罷其令士焜每抗疏不諱又論事恆與權樞忤降行人司  
司副稍進爲光祿太僕寺卿都察院左副都御史順治九年擢工  
部侍郎汰冗員減濫費監修三殿工賜幣馬慰勞甚至十一年出  
爲浙江布政使護理漕運總督攝巡撫致仕歸年七十二卒著有  
麟篆齋詩草培緒者其六世孫也登嘉慶十四年進士授江西瑞  
昌知縣下車除吏胥積弊有訟者一言解紛無留滯誤農時者兩  
值歲祲捐倉穀籌振卹民忘其災調豐城士民立生祠奉之道光  
六年再調龍泉歲荒米貴民饑將爲變培緒立平糶法使出境購  
穀而防其外溢攜民步禱數十里外祈雨四境獲安嘗以土習窳  
敗捐俸立雩溪鄉學教縣民之秀者貧民爭訟往往自出金錢和  
解之民感之訟爲稀九年課最第一擢知南昌培緒治獄不輕用  
刑求視民如子嘗曰愚民犯法者眾邑宰之過也披閱公牘輒徹

夜曰恐一不慎而失入也南昌爲郡首邑寄獄者多大吏讞定或他縣已決成案有吳四童者屈陷盜案傾其家培緒爭之不獲秋決禁囚知王王氏數人冤讞已成不能改檄監斬稱疾不起忤大吏乞解職歸二十年俸儲悉以予貧民無一取也大吏以此愈重之擢升吳城鎮分防同知以親老不欲遠出改順天府教授終焉培緒兩爲道光乙酉戊子江西鄉試同考官號稱得士及北歸畿輔士子從游者至室不能容年七十八卒

徐城

高祖孫森 嘉禾

嘉霖 祖汝槐 姪大鏞

父煒

孫思穆

曾孫嘉猷

徐城字印川世居浙江鄞縣高祖孫森隨其父鍾麟遷京師康熙十九年官山東長山知縣連歲值水旱奇災官振不給變產足之任三年設學校勸農桑開河緩征省刑薄斂民愛之若父母著有搖鞭草備載其去任攀留之狀後以事落職攜子學淵赴南河河

賢能七

臣倚重之署清河同知以勞卒學淵再由京師徙居天津遂世爲天津人祖金楷字端叔乾隆三年副貢生博學多文世所傳步青堂詩文集者也卒無嗣以弟汝槐子輝爲之後汝槐字面堂乾隆十七年舉人大挑分山西署潞城知縣改授磁州訓導山東王倫大名段文經之變防禦有功大吏力薦辭不赴告歸卒於家父輝字午園乾隆三十九年舉人歷任江西進賢宜黃高安新昌廬陵山東寧陽知縣王子鄉試同考官其攝進賢也值水災駕扁舟親勘諸難民緩征施振無濫無遺胥吏有以存留飯食冊費爲請者捐廉與之補新昌新昌多山蛟水沒民居捐造划船分四鄉拯之縣有溺女俗爲建育嬰堂收其貧不能養者舊俗遂變移廬建石陽書院立義學五區公暇親赴鄉講學衡文士風丕變南城外渡船詐索爲民患乃造官渡五艘勒石紀之以垂久遠江西爲財



賦藪取之有定制嘗曰吾不能剋百姓之肉貽子孫之殃也官民相習如家人訟獄爲之一空鄰邑有疑案輒檄輝往鞠委曲開諭得其情而後已從無以刑訊者王子充同考官所拔皆一時之彥愛賢禮士尤若性命於進賢訪功臣傅恆將軍曾孫詳請廕襲於高安訪朱文端公軾曾孫二人親教之於廬陵訪歐陽文忠胡忠簡文文山後裔助之貲使就學嘉慶三年檄採山陵木植鑿短價累民之弊徑赴兩湖購之事辦而民不擾父憂服滿選山東寧陽知縣值河南衡家樓決口災山東二十餘州縣勘河議振積勞成疾卒宦橐蕭然城生有異稟善爲文屢試不第納貲爲縣丞嘉慶十四年分浙江再改河南己卯庚辰以佐治決河有功補授滎澤縣丞薦擢知縣歷攝新安武陟湯陰汲滎澤所至以廉能稱以河督嚴烺巡撫楊國楨保薦補光山知縣至則相度陰陽倡修城池

建魁星閣城上築忠義祠益書院廩餼聘名宿爲之師是年舉於鄉者七人自是十餘年捷春秋兩闈者聯翩不絕邑皆水田路不能通車載城勸田者讓當路數尺捐貲修築之其溝渠則設石橋以通之蹊徑擴爲康莊商賈雲萃縣益富饒光故多捻匪出沒不常選幹役偵捕傾其巢盜悉斂迹俗尤好訟多輕生訟謀日數十紙城坐堂皇批訊自朝至於夜三鼓日以爲常土棍姦民不得施其技輒思中傷之會劉甲與李乙有隙誣指李爲盜劫其家城拘李至其妻懼而自縊旣訊知李誣狀釋之歸劉以其忿未洩也控諸京詭言李勒其妻死爲脫罪地竝誣城飾盜縱凶人上發交豫撫提訊審者以非刑迫李誣伏時城以獲鄰境盜首功調京引見事發不得行會新撫桂良至察知其枉再委員訊之事始雪旣北上以知州用仍回光山時議者以新撫袒城城不辨但曰此案

若無枉吾兒廉鐔今歲當成進士既而果捷是年調補南陽十七年莅任首先與營官約嚴束兵弁不得魚肉民有違法者痛懲之而又結之以恩化文武畛域始則民之畏兵甚於畏官後則兵之畏官甚於畏營長闔境肅然宛地爲雲貴通衢道路窪陷雨則車馬多顛躓姦民因以爲利城開道旁溝而高其轍雨水有所洩車遂安行無阻商旅便之爲之頌曰乘安車行坦途仗我太爺徐行坦途乘安車仗我徐太爺城南白河通樊城有留餘橋久傾圯重建之以利商賈葺河濱奎章閣興修文廟擇宛南書院諸生之穎秀者招至署教之文學士風蔚起督學使趙光案臨至宛以其規條下諸郡俾爲法焉時英人擾江浙調豫兵會征車馬儲待供張無暇晷而祥符又值河決奉嚴檄購糶料官吏梭織應之裕如無纖毫誤二十三年禽獲泌陽捻匪徐應青擢同知直隸州是年卒



年六十七子廉鐔字新菴道光十六年進士攝湖南晃州廳早卒

孫思穆

思穆字筆珊一字質夫幼警敏逾常人稍長益嫻世務善肆應侍其祖任所署中諸務皆身任之自賓舊族戚往還餽遺豐約悉中度程下至米鹽瑣屑鉤稽出納一身百役內外甚廢事城故清儉沒後橐無一錢而食指繁眾皆仰給於思穆道光二十二年以通判投効河工挑引河防大汛有勞加同知運同銜咸豐三年粵逆犯懷慶訥爾經額督師入豫檄思穆辦糧臺差竣攝黃沁同知權商虞通判七年補授中河通判以懷慶功升知府思穆殫心國事不顧身家其任中河也妻陳疾且革思穆以伏汛險要馳謁大府及歸妻病且不治越日而沒軍興國庫支絀河工款不時發思穆出衣物質錢或稱貸於親知之有力者瘁身毀家無稍吝惜容其

於宣防之事利病善敗剖稽驗決無絲毫爽與人誠懇諄至故樂  
爲之効往往用力少而成功大用是以治河名一時旣數權兩岸  
要缺同知他方有急大吏輒以思穆往督治之卒以勞致疾同治  
三年卒年四十六君子謂古所稱以死勤事者其思穆之謂乎思  
穆篤於昆弟官中河時兄弟同居官廨長姊亦攜子女以來共食  
分衣友愛無間工築隸善書慷慨喜施親朋來者賓接之無虛日  
或以急難告者空所有斥與之無毛髮顧惜意故身沒之日室無  
餘貲廩無餘粟所餘者圖書文玩而已次子嘉猷字翼亭號學孟  
援例以府經歷發河南檄入籌防善後兩局治文書習吏事當道  
深器之以荷澤塞河功升知縣宋慶率軍鎮旅順嘉猷任轉輸時  
復佐府縣官治獄長於聽斷民稱無冤代理孟津未數月調省垣  
清理開封詞訟開封故首要大郡訟牘繁沓司讞之員數十計凡

疑難重案悉以委嘉猷導室解紛應手而辦大吏益奇其才檄署  
甯陵知縣到官以廉隅自矢謝苞苴卹民隱甯陵爲省東衝區素  
多盜嘉猷下車後嚴堡守傳籤巡緝嘗嚴冬乘馬夜行鄉市閒居  
民獲安枕商旅自此無戒心以勞卒年四十五  
嘉禾字心耕號性臣嘉猷之從弟也光緒元年舉人以軍功保知  
縣選授湖北利川利川居萬山中距省遼絕令長權最尊胥吏倚  
其勢爲姦利愿民以訟傾家者歲不可勝計嘉禾禁民之假命案  
詐財者設因利局以除供張之累爬梳剔獄無遁情時以嚴法  
繩豪猾吏復擇其士之材者聚之學校而漸摩之以文教士風大  
振移鄖縣利川父老遮道乞留者亘三百里竝伐石紀德政事聞  
大府嘉其績未抵鄖移署大冶大冶界湘贛閒號難治士習刀筆  
工舞文嘉禾密偵巨蠹竄之法盡脫其無辜而訟繫者一邑情服



十六年漢水盛漲安陸府屬堤防盡決及冬議修築大府檄嘉禾  
督工鍾祥費廉而工速大府以爲能調補鍾祥鍾故繁劇民困裕  
役久嘉禾下車察其煩苛者盡蠲之有事皆官給其費民用大蘇  
復捐廉俸興學校行保甲歷十年士習民風翕然丕變二十二年  
權知江夏以最聞明年移攝荆門知州荆門爲老萊子故里乃築  
景萊別墅於城西撰文刻石以孝導其民二十五年再知鍾祥疏  
古州河興水利製水車民獲灌溉之益歲祲均輸平糶民忘其災  
庚子拳民之亂鄂省賠款議附於地丁嘉禾以民困請於大府所  
治得輕減其爲治持大體率類此時大學士南皮張之洞督湖廣  
直隸總督漚陽端方撫湖北交章薦於朝擢知府選授臨江入都  
覲見購置東西新籍百數十種馳送鍾祥學堂士人益謳思之及  
莅贛先權撫州郡饒農利嘉禾益殫心實業因勢以導之復釐定

學堂規制治行大著甲辰之臨江任先是郡有義渡因訟而廢嘉禾至平其爭俾復舊民利賴之三十二年移守南昌銳意新政勸工藝局建造紙廠構模範監獄提絜綱要以實行爲屬僚倡洪都中學故紕於費嘉禾實以資而恢廓之復就清節堂設男女兩等小學於是孤嫠子女無失學者南昌讞局爲全省裁判總匯之區嘉禾精於折獄不事鉤距能得其情有冤濫者必力爭於大府多所平反南昌教業起民勢洶涌不可遏嘉禾以鎮靜持之卒得其平郡人尤愛視之三十四年權鹽巡道大府以治狀聞於朝得旨嘉獎宣統元年卒年六十二弟嘉霖

嘉霖字叔雨號味癡少者貧力學日僅一餐而讀書無閒寒暑善書工畫聲稱於時光緒丙子丁丑閒歲大饑大河南北赤地千里嘉霖佐人理振務鉤稽精覈覓者益贊歎加禮焉二十年以知縣

需次江西歷署都昌德安餘干諸縣其在官以勤自矢謂百事之  
敝生於怠怠則神志弗屬而外物始得以乘之其察事接物悉本  
性真無一毫僞飾都昌民素悍好械鬪殺傷動以百計嚴刑治之  
多不效嘉霖躬蒞四鄉召長老詢其疾苦獎耕植之勞者導以睦  
婣任恤之道繼復爲之興學校修孝弟之本民大悅服期年澆風  
頓革終其任無械鬪案去之日縣人礮石記其政至於今稱之德  
安李新舟以抗糧集眾傷官毀衙署勢洶洶縣令以叛聞郡守將  
臨之以兵大府檄嘉霖往時值歲暮攜一僕星夜馳發行距縣城  
三十里天寒乏食輿人餓莫能興嘉霖籠鐙徒步天明抵縣城縣  
人以郡兵朝夕至羣遷避依李新舟爲負隅計嘉霖出示招逃民  
曉之大義郡兵已發未入境飛騎止之竝上書大府力陳德民非  
叛狀不數日獲首要置之法餘眾悉解散事定大府重其才檄權



德安德民感生全恩愛戴益至無幾微拂其意者移署餘干民思之甚於都昌光緒二十七年抵任未幾卒年四十八嘉霖善折獄鉛山縣有殺人者不得主名多誣繫破家更數官不能結大府檄嘉霖往鞫卒得正犯昭雪者凡七人當時同官率能道之云城之猶子有大鏞者字序東號蘭生道光二年舉人以知縣試河南勤明廉幹有吏才時開封讞局訟案山積大吏檄大鏞清理之疑案多平反人稱其神歷署偃師杞縣皆有循聲後罷歸僑居杞縣閉戶讀書著有見真吾齋集子鴻泰成進士以主事分刑部亦以能治獄著稱

楊承湛

楊承湛字闡仙固安人家貧力學夕就帳中然鐙自課頂爲之墨嘉慶九年舉於鄉十六年成進士以知縣分江蘇補靖江以母憂

歸服闋再補靖江調南匯南匯濱海西連申江幹河最要者曰閘  
港潮汐往來歲患淤墊自乾隆四十年以往久失修宰斯土者憚  
費鉅役重浚而塞者屢矣道光二年夏旱江湖不至浸成災承湛  
下車親蒞各鄉周覽形勢慨然曰地方首務其在斯乎力請上官  
疏濬之晨出暮歸賞勤懲惰歷五十餘日濬河三千數百丈深廣  
逾昔時工既竣海水盛漲兼颶風民居卒無恙鄉人額手交慶曰  
楊侯活我設祠祀之竝刊碑樹隄上八年調元和逾年擢海門同  
知未赴遭父喪北歸縣人思之值其誕辰繪鶴南飛圖賦詩賡和  
承湛次韻有北向哀鴻方戢影南飛孤鶴尙新年之句服闋再補  
海門同知調蘇州府海防同知青浦民因漕糧聚鬩數千人圍縣  
署大吏以承湛有德於南匯而青浦其接壤也檄之往承湛攜兩  
僕掉小舟易肩輿入城眾擁輿不得進告以委員姓氏曰是前宰

南匪之楊侯耶曰然眾謹呼曰楊侯來吾曹事得白矣相率散去承湛訊得其狀治其倡首數人餘悉不問眾帖然歷攝川沙同知常州松江江甯知府政績卓然卒年六十五

### 張鍊

張鍊字又甫號春潭南皮人曾祖乃曾山西孝義知縣祖怡熊浙江山陰知縣有政聲父廷琛漳浦東場鹽課大使鍊嘉慶十八年舉人以大挑知縣試貴州市銅雲南大吏稱其能授安化旋調貴筑擢古州同知宣宗聞其能特召對未幾權黎平府以能治盜兼攝遵義安順遷守興義有吏受賕寘於法一郡肅然未逾歲居繼母憂服除仍授興義道光三十年粵賊起窺黔邊鍊募義勇謹斥堠上書於巡撫請用李化龍八道進兵之策不果行會督師林則徐道卒賊益張有閩人南盤江者立禽殪之羅里河口賊數千



人宵遁吳文鎔新督雲貴舉劾屬縣胡霖澍且讓鎔鎔爲胡辯雪  
上團練方略萬言文鎔大奇之署紙尾曰東南事一以委君後以  
他人事註吏議文鎔同巡撫再疏復其官權貴西道時雲南東川  
回部爲變鎔出私財募士會剿馳赴行營陳密計大帥用其策東  
川以平事聞晉道銜以卓異薦進爵一級咸豐四年八月遵義楊  
鳳倡亂安南普安賊黨嘯起連陷數城鎔部勒士民分城攔守而  
自當其衝賊至趨家人登樓厝薪曰城陷卽自燔賊馮高礮丸如  
雨墮鎔登北樓坐胡牀指麾忽一人在坐後拔佩刀左右大駭禽  
而斬之而鎔凝然坐不移一步伺賊閒輒出死士斫其營賊張僞  
牒免租誘愚民鎔飛書告迫脇者勿論殺賊自歸者有功又揭示  
鄉團云能助戰者蠲本年租於是新城彭永興諸渠率斬其王涂  
令恆以降而爲賊脇者聞是令多解散相持十餘日援軍至畏蕙

不敢先鏃自將三百人出次普平團民至者三萬餘一戰破之禽其魁冉秉中李應龍李林春寘諸法境內悉平奏上以道員用予花翎明年鳳略安順以團練三千人往擊走之而遏之使不得入粵邊鳳旣誅鏃不自爲功且引疾會苗變請以破鳳兵乘勝擊之大府不聽旣而都勻圍急龍里貴定賊復蔓延勢甚張大府始悔欲以鏃代他將而鏃病適劇士民絡繹固請出江西富商宣言若鏃督師當輸家財之半助軍鏃立起與台司約兵五千募軍亦如之饒十萬誅賞進退皆唯我或曰卒少無見糧君方病且閒官無權變約奈何鏃不爲動當是時龍里貴定賊可二十萬諸路兵未集而鏃以新募五千議合他兵三道竝進一軍屯龍貴閒一軍扼舊縣一軍自貴定東出賊背都勻之圍當不戰自解將發台司違前議又旦夕趣戰行及雷打橋用火箭射殺一酋逐北十里許命

從孫桐攻栗木頂九不利鋌怒予之契箭一曰明辰不能攻下此地毋見我桐引數十騎先登大眾繼之抵貴定賊傾巢出眾數萬壓壘而前鋌開壁門縱六百人爲奇兵出不意擊走之偵者云賊將趨省垣而巡撫急檄鋌還民間鋌至龍里貴定平越壘安諸團分路出鐵廠堡順德關四面蹙之鋌下令滅兩縣賊復百姓今年租如興義約眾益驩鋌時權貴東道更遣吏持游劄數十徇鎮遠以南賊當之輒破走省會遂解嚴鋌數請進軍而勢孤權輕三省兵會者復驕蹇不爲用饒亦不時給憂積成疾盡貰衣物慰勞所部軍久之得請乃進軍鈔茶山湘子洞遂克甕朗虜其巨酋王登元楊重妹鄉兵之力爲多方解都勻圍而制府驟曰君老可撤還巡撫意不平未有以奪也兩縣民奔訴強留鋌而病已不起矣輿歸浹旬卒咸豐六年七月也年六十有四自鋌沒鄉團寢解都勻



古州等處旋陷沒吏民益思之鎮偉軀廣穎言論風發其在軍卑  
栖確食賞罰嚴明大小百餘戰嘗身爲軍先暇時興學愛士教子  
尤有法大學士之洞其最著也著有興義府志詩文集若干卷

周景巖

高守貴

周景巖字岱雲武邑人乾隆五十四年拔貢生選肥鄉縣訓導擢  
山東鄒縣知縣前官徵漕皆以巨斛取贏民苦之景巖平其斛嘉  
慶十六年白蓮教起河南滑縣鄒與滑逼人心大震景巖募勇守  
陣分布四境爲犄角勢賊不敢犯事平巨匪司和尚以邪術漏網  
設計禽斬之未幾丁憂以毀卒當時永年有高守貴者字杏梁嘉  
慶十八年舉人歷官安肅教諭葡州訓導順德府教授所至必繕  
文廟修庠序籌書院膏火以振興人文爲已任順天府聖廟圮捐  
俸葺之潔已奉公不名一錢先是任安肅時官禁邪教民多逃亡

守貴親往招撫眾賴以安東省大兵過境申章請嚴禁擾民兵至無不奉約束者咸豐八年旱饑土匪起大兵集順德剿之力請發振安民心借鄰倉穀七百石全活甚眾年七十九卒於官

### 王聯陞

王聯陞字步丹號小麟元城人嘉慶二十一年舉人以大挑知縣分四川署温江嚴戒苞苴善斷疑獄建萬春書院進其邑民之秀者教之調南溪置養濟院捐救生船建節孝總坊政簡刑清民戴之若慈母補陴縣重修開明杜宇祠捐辦夫馬以蘇民困勞農勸士百廢俱興去之日士民走送數百里外爲立芾思亭祀之家居十五年起授河南葉縣有殺賊功調祥符年饑開倉食之補睢州知州擒逆竄擾躬督團勇數百戰重圍三日夜賊大敗走請急回里以疾卒著有孤虛祕旨地理選擇諸書傳於世

靳廷鈺

靳廷鈺字謙谷行唐人父伯廩由舉人官天津訓導有行誼祀鄉賢廷鈺以拔貢舉嘉慶二十一年鄉試道光閒仕爲山西知縣歷宰臨晉太平平遙興嵐皆有治績平遙與徐溝文水交城三邑俱瀕汾數爭水利持械鬪不已廷鈺爲反覆開導明定章程眾翕然悅服興縣巨盜白騾子盤踞山南四出焚掠廷鈺率健卒數人禽之置諸法境內獲安改崞縣下車緝訟徒懲蠹役有通川八十餘村去治遠吏每虐之裏足相戒不入城糧賦稽期廷鈺繩吏以法單騎歷諸鄉諭以大義皆如約至尋權朔州一如官崞縣時撫軍梁某閱兵至崞崞人乞歸廷鈺及至朔朔人籲留撫軍皆慰之由是循聲震一時調陽曲政務劇繁處之裕如期年百廢具舉遷保德州知州權守寧武旬餘丁內艱歸咸豐二年服除復出爲奉天



新民同知以疾乞休卒祀鄉賢陽曲崞保德皆祀名宦祠廷鈺事親孝事叔父母一如所生叔父手患瘡遠行求醫親自吮膿無難色自處甚約而慷慨好施與族黨皆懷其惠性嗜學不讀無益書著有地輿星氣攻守戰陣醫藥諸書

孫述庭

劉慶元

孫述庭字謂明號遁山鹽山人幼失恃事繼母如所生弟芝庭早卒爲優撫其孤至性純篤鄉人稱爲孝子乾隆五十七年邑大祲絕爨火者數百家述庭時方少請於其父曰天津海船多與兒習往假糴其可父貸金與之至則徧說諸大賈輦粟而至因爲粥以食餓者所活無算述庭肆力於學嗜讀經世書嘉慶九年舉於鄉二十四年成進士以知縣試山東攝利津道光元年補卽墨以富教爲己任遇水旱禱輒應月吉課士具酒饌殷然以禮接士有子

氏兄弟構訟久未決述庭諭知其產落以訟挾弟翼日取狀投之  
曰汝奚訟弟爲命庫吏具數十金顧其弟曰吾爲汝明若兄弟感  
動泣下兄亦泣訟遂解逾年以病告歸邑人遮道不得行慰之曰  
吾暫去且復來皆欬歔垂涕追送數十里外始返家居年餘有踵  
門者卽向于氏兄弟也稽首曰邑之人思公甚苦因出袖中顙請  
牒述庭慨然曰民不吾負吾忍負民耶乃再出攝壽光會卽墨缺  
久不出遂謁歸不復出述庭性儉約無官私累語諸子曰儉非徒  
惜福之謂亦以峻廉隅裕進退也學遵朱子跬步皆以禮自繩云  
九年卒年六十一同縣劉慶元字景辛曾璇之子也嘉慶二十三  
年副貢生授四川納溪知縣調署資陽儀隴宜賓節夫馬局費裁  
陋規八九千緡獮匪擾宜賓慶元夜守閭王嶺揮兵擊之匪驚竄  
不敢復出巢演匪之亂先後捕獲賊謀置之法境賴以安儀隴久

無科第爲振興書院以教士子自是多登甲乙科者以川南防剿功擢同知直隸州卒年六十有六著有春壇詩草

張昀曾祖爲獲

張昀字林西號甸南景州人曾祖爲獲字升同歷官湖南桂東長沙山東淄川蘭山知縣濟寧州知州登州知府署登萊青兵備道所至有政聲牧濟寧時有三帽結黨爲民害三帽者紅帽謂快役白帽爲回回黑帽爲私販爲獲莅任以次除之有富民兄弟爭產數年爲獲剴諭以大義咸感泣求罷訟友愛如初歷任七縣訟無積牘以廉明稱昀嘉慶二十四年舉人授河南封邱知縣縣民某家素豐有役潛移死屍其田昀得移尸狀取役痛懲之一時稱神君道光丙申丁酉間豫患蝗昀躬捕之捐貲購蝗子禾不爲災無生老母案多株連昀力爲昭雪全活數百人值歲旱民之流亡未



歸者爲撫其家室任四年邑大治民戶祝之十七年以協防大汛  
功薦擢河工同知丁母憂旋里民具香芻哭送者數十里不絕服  
闋以祥符大工加知府銜補商虞通判時河決中牟舊例向以二  
壩護大壩昫併工大壩費省而功速徐築二壩以爲保障疏濬引  
河預防壅塞遂轉危爲安調下北同知終歲大汛不至眾相慶昫  
獨增築隄岸擇要工修補之河官咸指以相笑越歲河決數十丈  
獨下北無恙眾始服其先見請其故則曰凡水泛漲可借之刷淤  
積若終歲無汛淤積必厚大汛陡至橫決必矣眾大歎服安瀾人  
告擢沿河知府賞戴藍翎陞見 天子獎之甚至三十年署彰德  
知府所至卻供張杜饋謁郡俗悍好訟昫治官書恆至夜分案牘  
山積卒無留獄者及去任士民以詩畫酒榼餞行者道相望大吏  
密疏擢道員咸豐辛亥壬子充河南鄉試提調官三年署開歸陳

許兵備道時粵匪竄擾信陽歸德撫軍擣勁旅出防邊倉皇議戰  
守乃出資募勇與城民固守或勸其令眷屬出避昀不顧賊至朱  
仙鎮省垣益戒嚴有壯士率千人徧謁官署請投効皆疑閒謀弗  
敢用昀察其無他登之勇籍每夜縋城出殺賊皆是人也賊攻城  
急昀冒雨登陴與士卒同甘苦僕人以雨衣進屏不用有飛礮中  
右指仆地家人扶掖歸署昀曰此豈吾卧疾時耶次日繫腕於項  
巡守如故賊知有備解圍去事聞賞戴花翎特補糧儲鹽法道任  
七載除漕積弊立義倉濟貧民捻匪窺楚旺積糧八十年捻大  
至昀督諸縣嚴守衛賊計窮而遁昀精敏仁恕通達治體在官三  
十餘年以培養民氣振興文教爲己任所在務持大體不察苛細  
其積弊蠹民者除之必盡生平亢直敢言恥事權要竟以是去官  
家居修族譜立義塾刊張氏詩集置祭田八百畝族中貧乏者計

歲豐歉酌給薪米延師課諸弟姪月給膏火資親友以空乏告必周之無少吝先後捐助軍餉以萬計奏加景州文武學額各三名卒年七十三著有侍竿山房集行世

賀雲舉

父仁聲

兄雲鴻

賀雲舉字慎舟武強人祖琇性至孝有文督學使李光地第其文爲正定府屬三十六縣第一老爲鄉飲大賓父仁聲乾隆二十四年舉人及會試場內有割其文卷與互易者其人竟獲高第以去覺而祕其事不發仁聲有學行以振起人文爲已任部選當得官不出嘉慶元年與千叟宴賜御製詩及壽杖荷包赤烏綢緞諸事年八十三卒雲舉嘉慶二十四年進士歷知靖江鎮洋阜寧高淳四縣署江甯督糧同知在阜甯歲饑出貲振之有豪民聚徒數百強求食者雲舉密言於大府禽治之一縣謐然在高淳東西兩壩姦民



爲商旅害官不敢誰何雲舉至痛懲之縣宅傳有怪前令相戒不  
居雲舉命掃除而入怪亦竟絕在靖江淮北大饑流民來者日千  
百計雲舉計口給錢處之高燥地旁開溝渠命醫巡視疾者災民  
至靖江如歸其家大府下其法他州縣雲舉長於聽斷鄰縣有滯  
獄上官輒檄往讞讞得直者戶祝之兩爲同考官得安徽程葆憫  
其貧留之官所親教之卒成進士以道員全家殉賊難雲舉以老  
致仕歸裝惟圖書數萬卷至今畿南藏書家稱賀氏年八十五卒  
有兄名雲鴻乾隆四十四年舉人官陝西大荔知縣調富平成陽  
蓋屋澄城署孝義廳同知有政績嘗乞病會陝西教匪亂起父仁  
聲趣之起曰此豈人臣偃卧時耶又思親欲告養歸仁聲不可世  
稱其一門忠孝云

耿麟  
白佩行

耿麟字瑞符號雲亭阜平人嘉慶二十四年進士歷官湖北漢川江陵漢陽知縣其初歷江陵也適值水災麟單騎往勘日行泥淖中親歷災區振濟之無失所者復革除宿弊十餘事去官士民送者皆流涕爲立生祠漢陽有趙魁者巨盜也橫行江漢閒吏不能捕麟以德化之趙魁因自投請死收爲捕役獲著名賊無漏網者四境宴然升隨州知州丁父艱服闋授雲南路南州知州升普洱府威遠同知其地與景東接壤景東人强悍累占威遠地人莫能爭先有謠云牛耕田馬食穀我買田產人作主幾時撥霧見青天一照羣冤不困苦麟至任廉得其情平反七十餘案民皆大歡曰今日撥霧見青天矣任滿訟無宿案獄無罪囚擢順甯知府卒於官同縣白佩珩字珍楚嘉慶十三年由廩生取膾錄入國史館鈔書工竣議敘正九品加鹽大使銜道光十年選授兩淮石港場

鹽大使十二年兩淮大旱飢民多嘯聚劫掠爲患佩珩奉檄治振捐銀五千兩爲士民倡共集銀十九萬四千兩設局分四路擇方正紳耆董之日微服周歷村落閒凡十閱月民賴以生全無敢爲非者事畢餘銀萬兩置產分入養濟院育嬰堂及文正書院各置田七千兩大府上其勞奉 旨候升十五年母喪服除選授雲南黑鹽井大使以卓異薦歷署通海元謀知縣二十七年調補板井大使二十九年檄解顏料赴都回抵湖南黔陽鸕鷀灘舟覆與妻劉同沒於水事聞 賜葬祭廕一子入監

張印塘

張印塘字鑑湖一字雨樵豐潤人嘉慶二十四年舉人道光十五年以大挑官浙江景寧建德知縣署海寧州補桐廬未之官署仁和縣二十一年海上有警將軍至徵索無厭裁以制耕市宴然巡



撫劉韻珂薦其能 宣宗召對詢夷務退復召入陳海防要害諭  
勿跪時稱異數焉署石浦同知再署杭州知府二十八年嘉興豪  
倪錫林抗漕戕兵役知府不能制巡撫吳文鎔檄印塘署嘉興府  
倪就縛疏州縣浮徵及知府所得漕規上巡撫盡汰之漕弊一清  
二十九年補温州府特授安徽寧池太廣兵備道留治嚴紹嘉湖  
四府振事全活數萬人抵任剔蕪湖關稅弊察吏胥不爲利奪兼  
攝安徽按察使咸豐元年吳文鎔督雲貴應詔舉人才薦授雲南  
按察使會粵賊竄湖北安徽戒嚴巡撫蔣文慶留印塘印塘調客軍  
選將領鑄火器籌兵食練鄉團扼要害文慶以聞總督陸建瀛劾  
文慶張皇不果尋移廬州三年安慶陷暨護巡撫僑置行省廬州  
調安徽按察使行縣至集賢關賊蔽江下掠安慶印塘合鄉兵攻  
復其城巡撫李嘉端素忌印塘以府縣罪坐之用是註吏議尋有

旨仍署按察使嘉端罷江忠源撫安徽沙河師潰賊犯廬檄四出  
徵援兵印塘軍先至合壽春鎮總兵玉山師攻賊奪十餘壘玉山  
沒於陣印塘收殘卒與編修李鴻章鄉兵往來擊賊時它援師多  
不至至亦無一言戰者更二十餘日圍益合舒興阿和春猶爭權  
相傾印塘方言戰大忤和春意城破忠源死之旣斂印塘卽坐次  
責和春罵之和春怒欲收其軍印塘曰若謂我戀此官耶不謝投  
劾而去道出徽州浙江軍方防徽浙撫強留之終以憂憤致疾卒  
年五十七

康懋敷

康懋敷字勉齋涿州人道光元年副貢生由教習官內邱縣教諭  
升授四川長寧知縣履任值滇匪竄蜀陷筠連高縣慶符三縣近  
逼長寧懋敷會鄰境分守要隘捕劫賊三人斬之內姦旣鋤賊遂

巡不敢犯境乃集紳富勸完城備捍衛上書大府寬諸雜捐城守遂堅六月賊犯境懋敷督團勇截諸途賊引去大吏徵軍饟急懋敷爲民請命不得以憂勞致疾易簣之夕猶力疾訊結七案而卒

蔣敘倫

子慶筭

蔣敘倫字蕉軒玉田人生而孝友強記善悟通經史工詩古文辭嘉慶十三年舉於鄉道光二年成進士以知縣分江西明年權興國潔已愛民案無留獄去官日老幼餞數十里四年補崇義崇義地界廣東湖南叢山數百里三省盜匪出沒其中人懷利刃攻劫以爲常歷任官率攜印詣省待量移敘倫蒞五年清積牘剔挾盜藪時入山捕匪重治之有陳姓者同族爭利殺人潛逸久之稍稍返拒兵毆役者數矣尸屬環泣於庭敘倫夜率四十人往黎明持火器相抗移時焚其巢乃奔散追獲數人審實論如律五年充鄉



試同考官撫軍成格奇其學行列第一榜發得饒觀化等七人皆名士也八年調署贛縣以勞致疾卒於官年四十有七子四人慶筍字黼華以副貢官代州州判恪謹循職解饒高郵路穿賊巢身受十餘創卒達大營上官以其能屢委權州縣有循聲引疾歸卒年六十六慶第自有傳

### 陳鳳圖

陳鳳圖號樸亭阜平人父琪以行誼著鄉里長老見鳳圖蚤慧成曰有陰德者必食其報琪之報其在此子乎鳳圖幼受父訓經學詞章皆得其途徑未弱冠卽有聲庠序閒嘉慶二十三年以拔貢舉於鄉道光三年成進士授河南內黃知縣先是漳河決三台沒村聚二十四不毛者十餘年鳳圖督民穿渠引潞水入漳民始復業六年歲大旱復教民開渠灌田高者以桔槔引之河北姦民遇

歲歉輒煽眾略奪富家倉粟名曰均糧至是有匪民持械橫鄉里鳳圖聞之率一僕一役馳往或請以兵從不許至則剴切以利害諭之眾皆環跪泣聽命鳳圖取爲首者十三人繫以歸餘悉慰遣之時鄰邑遇是變者以兵民相格殺官弁皆望吏議而內黃冥然史玉堂者邑大猾也樹羽黨爲民害會縣試夜大風鳳圖潛出率健役疾馳四十里抵其巢禽之并其黨一人諭曰閉門者不問餘黨皆閉門以三人歸置之法豪強由是屏息邑民德之爲繪繁陽治蹟圖咏歌其事道光七年父喪歸服除改廣東歷任普寧揭陽新會諸縣所至民愛戴之十四年卒於官年四十三鳳圖天資孝友少喪母哀毀幾滅性家貧授徒養親奉父母必豐備琪性愷悌喜施與鳳圖能曲承其志無敢違其宰內黃也事皆稟命後行若受書家塾時扶父柩旋里徒步匍匐哀感行路及之官輿東父之

衣履手澤皆謹緘行篋每展閱輒對之流涕有女弟三適人後皆厚資給之而子孫衣食往往不能備或怪之曰吾以清白遺子孫不已厚乎

### 才宇和

才宇和字壽堂原名連會昌黎人道光五年拔貢除安徽泗州州判歷署鳳陽懷遠績溪等縣知縣有循聲課最升靈璧知縣靈璧連歲荒歉請帑金振之復捐廉煮糜以濟不足民不知饑咸豐三年粵匪竄臨淮距靈璧百餘里宇和募勇籌餽械賊知有備不敢近大吏奇其才移署宿州甫下車巨捻張洛行嘯眾十數萬圍其城宇和躬督義勇開東門突出殺賊數千人圍立解以功升潁州知府時淮北土賊麻起練匪苗沛霖勢尤猖獗宇和每戰輒身先能以少勝眾皖省八府多陷賊而潁州獨全宇和之力也欽差袁



甲三上其功賜花翎授廬鳳兵備道加按察使銜以病乞歸旋卒

趙桐

李登洲

趙桐字鳳樓南宮人性敏慎道光六年進士以知縣分廣東巡西河獲巨賊大吏嘉其能委署定安知縣興學勸農以勤幹名年餘補授陽山陽山俗悍好鬪治以法民不敢犯鄰境博羅嚴藪盜爲民害計禽三千餘人賊悉其黨犯陽山界桐躬率兵勇削平之繼署清遠有殺人不知主名者檢驗時獲一人一訊而服人稱爲神十七年卒官同縣李登洲字瀛橋少有偉志豪放不羈年十九以貫授安徽祁門知縣調懷遠以卓異升亳州知州爲治尙嚴厲吏胥咸畏之而遇士民則一出於坦易樸誠往往脫略冠履循摩煦嫗如家人父子才性機警善禦變亳有盜數百白晝持刃殺人攫貨吏不敢誰何登洲變服訪其姓名里居簿記之潛發健卒按簿

掩捕無一脫者巡撫周天爵稱其有幹勇通兵機咸豐初粵西賊起天爵移督兩廣特疏調赴廣西提兵擊賊元年踣賊於象州二年靡賊於長沙三年蹙賊於鳳陽初登洲赴粵時簡賴臺壽三州走卒健勇者自隨能得眾卒心故所向輒捷督師李嘉端羅繞典臚其功於朝加知府銜賞戴花翎尋以病歸家居奉親值賊匪北竄擾縣境治團練守城賊逼城下登洲手炮擊之退城獲無恙年五十五卒

崔光笏

子鍾善

崔光笏字正甫慶雲人詩人崔旭之子也弱冠舉於鄉年二十七成進士授山西襄寧知縣有惡僧清照踞山寺爲民害光笏率眾禽之置諸法道光十八年調陽曲利弊之事一意興除蒞任三年擢代州知州尋升松江知府大吏以鎮江承大亂後調署鎮江辦

善後事宜條畫三月事悉就理二十三年丁母憂復遭父喪服闋起授九江知府升雲南糧儲道咸豐二年檄赴長沙襄治軍有功加按察使銜署雲南按察使時東川馬二花糾眾作亂光笏督兵攻八甲斬捕數百人獲首犯馬鵬程誅之馬二花旋就禽正法在任六年卒於官年五十四子鍾善字子萬咸豐九年納訾爲郎同治七年捻匪擾畿南回籍治團練以禦賊功保擢知府再以河防功擢道員光緒十六年署萊州知府平度高密素多盜鍾善仿古保甲遺意創聯捕法躬捕積匪孟小人鄭某誅之四境以寧郡舊有北海書院久廢圯捐廉修葺之增士子修脯士人紀之以碑二十六年拳匪亂起鍾善著釋惑錄禁民入其教明年卽墨民怒稅重糾眾圍城檄鍾善往僅攜數騎馳入城開諭之禽首犯譚錫麟散其從者事以大定縣民爲立生祠三十年檄總理河工事高密



知縣某以河南北岸人民相械鬪牒請威以兵鍾善力爭不能得  
德國膠州都督沛祿者亦發書力阻之曰有鍾善在高密勿庸兵  
往也三十四年署鹽運使裁汰陋規尤以保商爲先務樂陵鹽店  
鄭氏案久訟不能決鍾善檢舊冊公剖之案遂定人稱神明年六  
十七卒官著有聽雨樓詩草

### 劉清華

劉清華字仲實靈津人道光十一年貢生以教習選授萍鄉知縣  
禁開礦之毀田廬墳墓者時湖南歲荒饑民數千入境糾煤匪搶  
掠拘倡首者嚴治之餘遣送回籍闔境肅然調靖安資送逃兵出  
境咸豐四年五月土匪數千來犯大小數十戰督兵擊退之尾追  
至境外破其寨禽偽司馬夏令粹等十一人寘之法復懲鹽梟之  
滋害者境賴以安民建生祠祝之六年調玉山時賊圍廣信縣民

多驚逸清華謁總兵饒廷選陳遠攻近守之策遂進軍戰破之解廣信圍清華招流亡築城堡治團防人恃以安八年補德化以防剿功擢知府加道銜委署南康旋改山東治河有功再加運使銜光緒元年署沂州泰安等府卒於官年七十三

崔侗

崔侗字同人號葛民霸州人道光十一年舉於鄉明年成進士授吏部主事分考功司每平旦趨公無閒寒暑案牘不能遍閱者攜至私寓細心考校晝夜無倦容取吏部則例察其與廢辨其沿革比較而剖析之卽例所未載者偶遇一事亦皆旁推曲喻務使以律相比附吏胥不得上下其手遷文選司郎中丁憂服闋復故官杜苞直絕干謁持愼秉公風裁峻厲同鄉某捐納知府知侗窶狀不敢公餽遺出京時侗入直以數百金委諸司闈而去侗回寓

遣人追還之是時司中公項空匱累欠銀二千餘兩侗捐廉濟之  
未一載悉豁清刑部郎中某者傷斃使女投之并事發以侗隨尙  
書文慶審訊侗不深究其致死之由祇以擅殺奴婢抵罪尙書歎  
曰上不虧國法下不拂人情矜慎忠厚兩得之矣其遇事務持大  
體率類是 文宗御極以京察一等擢廣東韶連兵備道未抵任  
遷按察使時粵東賊氛四起督兵會勦事平賞花翎咸豐四年授  
布政使賊復起逼省垣兵饑浩繁侗捐銀一萬五千兩備支發省  
垣賴以無恙積勞卒官年六十二

裴寶鏞

弟寶芳

子德長

裴寶鏞字韶甫一字苟菴河閒人道光十二年進士二十二年選  
授河南延津知縣二十五年敘中牟治河功以同知用二十七年  
調河內咸豐元年權祥符二年復還河內用助軍饟加運同銜三



年六月朔粵賊數十萬自會城渡河而西圍懷慶城民七萬餘戶倉卒見賊不知爲計或請卜之寶鏞叱曰守土官義與城存亡卜不吉走乎擲其書於地有秣馬城下者寶鏞見之曰此走耳斬其馬計糧數器械若干料民籍多寡戶出一丁守各門選壯士千五百人登陴陰以兵法部勒城中回民有謀亂者輒誦得之賊舉礮轟城丸出耳左右屹不動反以礮擊賊賊爲少卻自後賊日出游騎擊之卽退寶鏞覺其異曰此將爲地道也囚有爲煤炭業者特出其罪令伏地視見有氣如縷出於隙乃於城中央穴地置大甕坐以聽之準聲所起亦掘道掘愈遠聲愈近至能辨人語引水驟灌之破地道三十餘處賊隨破隨掘地道發城陷十餘丈身埋甕土中如有掖出者遇黃衣賊持旗率眾突煙燄以上手巨磚擊之中其顛顛眾駭退填塹拒之時泥沙塞耳目猝不可視聽民爭舔

其目曰復覩兩耳遂勸民請休寶鏞不顧地道再發再塹之先是料軍糧慮貧民乏食貸之富戶書數於冊賊退徵償之至是糧盡城中曰暮且饑潰寶鏞飽肥犬斃之潛棄城外賊割其腹而嘻又以城堅不可拔慮援兵至一夕遁去凡守懷慶六十日以功擢懷慶知府戴花翎加道銜母喪去官卒於家年八十一入祀河內名宦祠弟寶芳字書懋少有氣略中道光二十三年舉人教諭寧晉咸豐三年賊破臨洺關寧晉大震知縣他出遂主城守賊退擢州判十年需次河南會城以南羣盜麻起民賊相混不可辨陳大僖者據霍莊等寨巡撫聞寶芳守寧晉功檄知尉氏旋調正陽二縣當賊衝寶芳輒練鄉兵與賊戰挫之陳大僖平擢同知賞花翎在官八閱月未嘗解衣卧以勞卒贈知府子德長字文延山東吏目偵賊霍莊被獲死之予雲騎尉世職

裘寶善

卷三十四

裘寶善字華南又字菊泉河閒人道光十二年舉人二十年選授安徽貴池知縣值水患姦民宋學詩聚眾萬餘要免漕或請以兵臨寶善曰脅官耳兵往則速之反矣單騎赴之眾擁人民舍露刃相向寶善諭曰是偏災也漕可緩不可免欲反則先殺我官一命爾萬命足以相抵若非反聽吾言毋譁眾曰學詩學詩氣懾眾退寶善索飲食眠民舍中明日周歷各村察所苦出五百緡振之民相扶送曰好官好官歸發倉穀諭民詣縣自領學詩至禽之縣境肅然是時吏治弛廢盜賊充斥淮俗尤强悍不易治巨蠹大猾任俠作姦聲氣通胥吏持官短長動息無事則民豪有事則盜魁日尋匪皆讐殺劫掠習爲故常有司莫敢誰何者二十三年調懷遠謁巡撫謂曰縣有大盜未獲君行當告之寶善微服往覘市塵



聚羣少皆紅帕繫刀中一人騎馬至有所指揮眾帖帖唯諾私詢市人曰此姚紹孔鳳穎豪也姚窪乃其家又潛至偵知某日會飲卽詣縣視事率徒役如期掩捕出不意立禽以歸會巡撫密檄至卽紹孔也閤境驚爲神餘黨倪陶倪佩康聚博順根山衛刀戟於門寶善從僂道往奪門徑入陶方卧揮刀斷其臂佩康挺矛來刺羣踣之竝縛至縣斃大杖下又獲羣盜王告等置之法時周天爵寓定遠歎曰吏盡如裘某百姓開戶卧矣二十六年調合肥合肥大盜耿四聲勢亞於紹孔屢犯殺人罪亡命匿迹寶善密偵其處元曰冒風雪猝禽之股匪盧洪亮徐兆基合掠竹林關率鄉勇擊獲之竝捕殺鄰縣擒賊王大紅等羣盜皆相戒不敢犯境二十九年調壽州知州壽俗官蒞任無賴者故犯罪試刑占官強弱兩少年鬪於堂破額傷臂寶善懲之皆杖折其脛民有砍刀會令曰

持刀者斷手及出持刀如故卽斷其手血淋漓與刀懸縣門明日  
出猶有持刀者又斷之凡斷四五人縣無持刀者環江以北四府  
七州二十九縣諸盜聞寶善名咸震懾多遠颺者寶善所蒞州縣  
先集吏役選其豪購民悍勇者爲耳目或計招賊黨任用之其捕  
賊必親往雖危險不少避以故盜賊先後皆禽治大府推薦升泗  
州直隸州知州周天爵撫廣西奏調襄理軍事成豐元年抵桂林  
天爵已去位大學士賽尙阿督師素聞寶善名欲留之不可二年  
還安徽上書巡撫言粵賊獷悍飄忽勢趨東南宜亟堅壁清野爲  
防守計巡撫韙之事甫施行賊已攻長沙陷武昌前鋒及九江安  
慶廬州以次淪沒團練大臣呂賢基巡撫江忠源皆殉難遠近震  
駭望風瓦解寶善趨回泗州部署防事實善前在泗州所用吏民  
識其才鄙怯勇至是悉召用之修牆壕具槍礮塹要隘誓死守城

賴以完五年土匪李三開孫蘭芝聚眾朱山捕之不能得重賞賊  
謀審知匿土穴中竄火藥轟之眾焦爛焉尋調鳳陽知府鳳陽新  
劄於賊土匪充斥日擄民子女偵之藏孝陵中驟往捕之禽賊目  
七得婦女百餘悉還其家鳳民大悅泗民惜其去也互爭於行省  
會北賊遷擾臨淮泗事益棘巡撫福濟檄邊泗益兵兩營營城外  
與城上守兵相犄角立城團鄉團家出一丁分巡城上下柝聲鐙  
火徹夜不絕賊知有備遁去許家莊者盜藪也潛與賊通匿其魁  
黨伺機竊發寶善率兵夜入寨獲賊三十餘人斬之論者謂安徽  
連年大亂羣盜如毛皖南北郡縣鄉鄙皆殘缺一無完善者泗州  
獨獲保全寶善之功居多寶善以能治盜得名而尤勤民事初貴  
池殷家匯蛟水壞田督民築長隄六百丈至今賴之合肥旱馳騎  
謁巡撫言其狀得緩本年租及歷年逋賦邑西南岡田乏水寶善



相度泉脈濬塘灌之歲獲大熟泗州大旱盡發倉穀以振民不知  
饑洪澤湖東南巨浸濱湖州縣十歲九淹寶善荆開溝洫多處分  
洩水勢並墾湖田千餘頃明年湖水漲溝洫受之田不爲災鳳陽  
被賊後猶供軍精力請免之聽斷多平允民愛信之奉爲慈母泗  
州監獄圯吏請兵衛寶善不可坐堂皇召羣囚至賜酒肉人粟一  
鍾告曰將築牆汝勿逸築時羣囚負土運輒助之工竣無一亡者  
攻草溝集擒賊鄉勇失利反爲賊乘寶善急召民團數千人至會  
天暮昏黑中呼曰官安在先衛官再殺賊寶善面之眾歡呼奮擊  
賊大潰奪獲財貨牛馬無算寶善常曰使吾得爲江浙官縣無盜  
賊一意治民益有以自效也尋因母年高乞歸養泗民走數十里  
泣送肖像釋迦寺祀之同治十二年卒於家時年七十六

王兆松

王兆松字公卜撫寧人道光八年中鄉試第一十三年成進士由翰林庶吉士改工部主事補屯田司掌硝磺庫丁外艱服闋升員外轉郎中監督黃木廠咸豐三年補山東道監察御史轉貴州道巡視南城升兵科給事中稽查通州西倉轉禮科掌印旋擢鴻臚寺少卿兆松在官數十年由部屬歷升卿貳所至皆有賢聲其掌硝磺也革諸行省解費金斥吏書之勒索者積弊以清官戶科時聞通州一年內添設油漆鋪百數處奏請搜查姦宄後大沽果有變悉如所言上嘉之屢蒙廷召嚮用方殷遽以母喪請會捻匪竄畿疆奉旨督辦團練辭弗獲因慨然曰守土亦分內事也乃糾合縣紳倡辦鄉團募兵籌餼晝夜不懈者數月餘境賴以安尋以勞致疾同治五年卒年六十五

武汝清

兄澄澄清

武汝清字酌堂永年人道光二十年進士以主事分刑部歷充江蘇陝西雲南諸司主簿辦秋審任提牢皆以公正著囚糧米食牢頭嘗以惡者易之而差其數汝清定製一圓器宿弊頓除三十年補奉天司主事升四川司員外郎咸豐元年隨將軍薩迎阿查西寧番案抵甘境總督琦善數請見弗許噉以重金卻之至西寧集番眾悉心推鞠盡得其誣罔狀據實以聞薩曰君真正人宜何子貞太史之見推也子貞者紹基字也因出紹基書極言其剛正不可干以私然汝清初不識紹基也嗣入都察琦善者多銜之計圖反噬侍郎曾國藩以正論折之事乃寢 上由是知汝清名嘗諭某大臣曰武員外清正若輩不及也以母老乞養歸里主講磁州書院同治初詔舉賢能相國倭仁首薦之辭不就畿南土匪起朝命隨侍郎桑春榮辦團練郡縣請留籍治防守設團練局城內



籌經費置器械城守具皆備教擒諸匪累入境而郡城屹然卒無  
恙事平保加知府銜七年擒匪張總愚北犯湘陰左宗棠督師畿  
輔函請贊戎務凡三四至卒以母老辭宗棠以城團有功奏加三  
品銜賞戴花翎廣平知府楊毓枬聘掌清暉書院重修蓮亭濬濠  
池植荷種柳日與諸生論文讀史其中及門弟子多務實學成才  
者多光緒十一年乙酉重赴鹿鳴賞二品銜年八十四卒汝清性  
孝友潛心性理之學主講書院四十年刊孫奇逢畿輔人物考四  
書近指諸書以教士子著述宏富學者稱酌堂先生兒澄清字霽  
宇號秋瀛道光十四年舉於鄉又十年大挑選樂亭縣教諭咸豐  
二年成進士授河南舞陽知縣縣有巨姦李進爲害地方捕之禁  
諸獄鄰縣泌陽角子山擒匪聚其中下車卽練壯勇聯鄉團入山  
剿捕先後獲巨擒李八千碎李四能人曹太元數名又獲鄰縣要

犯岳善教三人咸置之法會擒首張文成糾眾攻城澄清督民勇  
登陴固守危而復安旋隨南陽鎮總兵緝文成餘匪殄滅殆盡事  
聞賞戴藍翎加同知銜時皖匪孫葵心擁眾十餘萬環攻舞陽勢  
猖獗澄清率眾防守乘夜出奇兵誘賊賊疑懼而逃大吏嘉其能  
調升信陽州以母老乞歸養辭士民立石城東關以誌其思歸里  
後修縣志築城垣建書院立義塾凡諸義舉悉以身任之性嗜學  
老而益篤尤究心象緯術數於梅江焦阮諸家之書多所考證年  
八十五卒

張金管 兄金奏

張金管字湘東號石生磁州人道光十七年拔貢生二十六年以  
直隸州州判分陝西時林則徐爲巡撫雅器其才招之入幕咸豐  
元年補乾州直隸州州判留襄省局二年升選福建古田知縣時

粵賊起陝境戒嚴巡撫張祥河疏留陝治防堵四年以直隸州知州發河南又明年署陳州府通判駐周家口地當水陸衝商賈輻輳鴻溝以東芒碭以北一都會也擒匪覬覦久奪三河尖船舶將來龔金管集商民諭以大義兩日集錢三千二百餘緡遂起六十街街團調鄉勇屯沙河兩岸九月賊竄淮甯土匪蠶起而境內回民素慄悍與漢民不相能時虞內變金管募回勇千名召阿渾約束之皆感悟聽命十月賊分路來撲金管親督團勇扼隘禦之擒匪屢來窺皆以有備得無恙先是有賊謀僞爲茶商事覺遞去遺千金裝或以爲獻金管悉令充饑不私也商賈百貨所集向有應官費金管悉卻之絲毫不取去官之日行李蕭然十年署獲嘉地瘠值年饑民多失業金管下車禱於神雨立沛復親巡四境問父老疾苦教以鑿井樹藝之法如父兄之教其子弟又請於大吏



征新緩舊竝暫緩新賦十之二大吏以格於例不許力爭之卒如所請縣有富室以爭繼事啖以重金金管卻之反復諭導訟以寢有梁某自稱武官奉檄募勇立旗鄉鎮中多應之者金管大駭立禽之解於府逮金管去任而李占標等復來募勇遂大亂人始服其先見焉同治初元檄筦軍需局四年請告歸里逾年卒年六十八金管工書畫旁精篆籀摹印之學所著有敬簡堂遺詩生平躬儉約遇人之急傾囊無吝色性尤孝友與兄金奏金樹相恭愛鄉人尤奉爲家法云

金奏字夏甫州學生由主簿歷擢知縣隸河南咸豐三年權永寧捕巨猾程祥嚴治之境內肅然富人張某因訟進千金揮之去大吏察其廉檄赴彰德讞獄五年率祥符鄉兵剿新鄉彰德會匪身臨行陣手治軍書整暇若無事以首獲湯陰林縣逆匪岳起凡論

功稱最擢同知七年權知孟津善折獄案無稽牘九年四月卒於官年六十三金奏官十八年及其沒也以牛車歸葬見者泣然

### 王璐

王璐字佩之號鞠村文安人父秋元嘉慶十三年舉人大挑發山東屢宰大邑補清平有惠政生子三璐其仲也弱冠補弟子員明年援例授大理司務道光三十四年舉於鄉粵寇起出家財助軍饑賊據獨流距其里勝坊三十里督師慶祺帥師至以蘆葦叢密不敢進璐棹小舟迎之坐蘆葦中陳地勢兵畧慶祺遂進紮獨流之西大兵乃合圍鄉人有土匪授僞檄者禽之斬以徇閭里獲安寇退以知州之官湖北署棗陽知縣粵寇竄湖北燧燧達邑境羽書日數至民心洶懼璐嬰城塞要隘禽斬近邑土匪之導賊者暇則理訟獄勸農桑興文教恩威竝施督師楊霽上治狀賜藍翎調

署黃陂道出襄陽襄陽道羅遵殿以襄嚴邑留之權邑篆時武昌未復撫藩皆僑駐襄城政繁訟多措置裕如有以蜚語誣之者督帥察其枉倚信益堅尋丁父憂服闋署理房縣房山邑幅幘縱橫千餘里號難治璐興廢舉墜百物畢張咸豐十一年春寇犯棗陽布政使嚴樹森知璐夙得民復檄之署理適寇陷德安璐修城繕備懍懍若敵至或迂之璐曰棗陽未蹂於寇稱完善區賊涎久矣且由德至襄孔道也弗備必敗夏寇果大至見城守固不可下乃去德安始復巡撫胡林翼以其能俾攝府事至則招集流亡籌善後策總督官文上其功賜戴花翎會詔舉循吏堪勝道府者林翼以璐應格於部議奉 特旨破格用之同治元年補襄陽知府旋署安襄鄖荆兵備道二年以兄喪請歸省母大府堅留之三年鄂境肅清提督江長貴以全省糜爛襄樊間獨無賊蹤璐之力實多



謀疏薦之力辭乃止尋請咨引見明年抵家遂告終養五年丁母  
憂毀甚逾年而卒年五十三璐爲吏和易有幹畧亂後與民休息  
不輕用刑而治盜賊甚嚴勇而善謀號知兵民倚如長城生平嗜  
篆刻著有松霜閣印集古近體詩集無雙譜樂府若干首宰楚守  
襄皆有日記藏於家

賢能傳七終

大清畿輔先哲傳弟三十四

集三十四

四

201-086

賢能傳八

大清畿輔先哲傳第三十五

天津徐世昌撰

楊福五

楊福五字介堂保安州人道光十九年舉於鄉明年成進士初知山東莘縣改官福建宰羅源長泰移詔安詔安俗強悍動以睚眦相報復持械互鬪長吏無如何佃戶輸租業主業主弱則抗不如約良民賦無所出羈囹圄受鞭榜者纍纍福五至集鄉老族正而誠諭之示以利害反覆懇摯不悛者坐以法期年政教大行邑邇潮州多盜福五親率健卒捕治之境內肅然鄰盜皆聞風遠遁咸豐七年歲饑福五出俸金糴穀平糶復令四鄉殷民集貲轉運如法行之一時穀價頓減民不知荒未幾擢知府權延平會粵逆陷汀州土寇蠡起福五治城隍募壯勇士民安堵如常以勞瘁卒官



同治十一年入祀詔安名宦祠

吳惠元

父景周

吳惠元字霖宇天津人父景周字錦洲嘉慶十八年副貢生以騰錄議敘補授江甯理問大吏重之道光八年署鎮江通判有以金進者峻拒之歷署秦興六合知縣聽訟不用鞭扑士民頌之曰兩月青天吳父母兩存卓異咸豐初調江西以年老引疾歸里卒年七十有九著有強識擇言二卷詩文稿若干卷惠元道光十一年舉於鄉二十四年成進士改庶吉士授編修擢山東道監察御史轉湖廣道歷升工科吏科給事中改授禮科掌印給事中轉甘肅寧夏道調署雲南鹽法道歷官中外所在有聲其掌湖廣道也時國家行使大錢商民交困乃上變通錢法一疏略謂事機難緩則取效貴速必於一轉移間使大錢通行無滯惟有庫收大錢之

一法現在各鑪鼓鑄需銅甚鉅銅無來源專恃收繳採買今收繳業已寥寥採買亦匪易易以多方之籌畫鼓鑄大錢及散之民間不能行使非民間之敢於抗違也上不寶貴而欲民間寶貴此必不可得之數也從前庫款出入皆以銀故人皆重銀今所發者錢而所收者仍以銀為主而錢不與焉新例交庫之款現銀與寶鈔各五成未聞議及於錢也現在捐銅局章程以實錢壹千五百文作銀一兩所謂實錢者乃寶鈔一成官號錢票二成是名爲實錢實則鈔與票而已今擬請交庫之款寶鈔仍按原定成數至五成之銀則令搭交官錢二成交捐銅局之款其二成官號錢票則概令改交官錢每錢一十文當百大錢二文當五十大錢四文當十大錢二十文當五大錢四十文制錢二百文均勻搭配出入皆準此爲例如此分別辦理臣料示諭一頒大錢必驟然通行蓋旣庫

收大錢商民乃知大錢不復停止再加以交納庫款之人各處尋覓大錢則始所患其壅滯者旋已立見其流通矣庫收之後即以收款爲發款多收百串即可省百串採買之資多收千串竝可省千串鼓鑄之費收而復發發而復收出入循環周流無滯不惟有以儲不竭之源而操縱有權久之銅斤可期漸裕局鑪可議酌減當務之急計無有便捷於此者也疏入皆報可及轉禮科以長蘆鹽課凋敝爲預籌補救之法上疏略云長蘆鹽課俸饗所關不容虧短臣聞京引與近畿之通州舊州采育兩營三河昌平順義房山良鄉等處鹽商皆以大錢賸累有無力辨運之勢緣前數年每銀一兩值京錢四五千文近年銀價漸長至七八千文近畿一帶竟至十千以外然銀貴而百物之價隨之故一倍至數倍可以意爲低昂至鹽價乃奏定章程分文不能加增其距京較遠之引地



俱以制錢交易尙無銀貴之累惟京引與近畿數處引地所售鹽價一律皆係大錢再以錢易銀交課名爲五成而暗中虧折與交全銀無異再益以搭鈔搭錢商人一引之鹽價不敵一引之課款積年賠累力有不支以至不能辦運夫運不能辦必致誤課不過將商人參革而已惟是參一商則一商之引地虛懸而課亦無著矣查長蘆參商引地數年以來已虛懸至七十餘處之多無著課款計亦有數十萬兩之鉅若不及早補救此數處商課恐又無著矣伏思京師根本之地民間生計日艱豈可再有淡食之虞且商力不能運鹽私梟必乘而起此則尤可慮者前以錢法壅滯諸臣奏請設法疏通議以順天直隸各屬錢糧與長蘆鹽課俱準搭交大錢三成業已奉諭允行乃旬月以來仍不稍見流通者推原其故總由大錢不能驟然行遠故民懷觀望若再因循坐視恐過此

以往補救愈難臣以爲法無積久而不變政貴因時以制宜查京引與近畿各商所售鹽價既全係大錢賠累亦由於此莫若因其勢而利導之卽令將銀款改交大錢則所售鹽價無庸來京易銀必全數轉運於津而不疾而速如謂於撥解之款有所窒礙然此數商不及長蘆十分之一交款亦不及全課十分之一蘆綱留支之項甚多儘可以錢項抵發於撥解之款未必遂見絀也蓋急則治其標救變之法不得不爲權宜一時之計如果一二年後錢法暢行銀價平落再體察情形仍復舊章易易耳總之直隸之行大錢與否以天津爲斷天津之行大錢與否以鹽務爲斷而京引與近畿各商尤爲轉移至捷之關鍵如此量爲變通與錢法兩有裨益奏上下部議行商民便之惠元歷任多所建白興除利弊必究本源時捨匪竄天津士民守城殉節者惠元爲疏請旌獎尤有關

於風化云

王政令

劉穀萬

王政令字均齋號嘯漁趙州人由貢生授府經歷試次廣西攝維  
容知縣地瘠而衝獍狺雜處號難治政令平獄訟絕苞苴傾橐佐  
供億民困以蘇道光三十年髮賊陳洛全嘯黨肆焚掠政令率眾  
一戰殲之咸豐二年秋唐元秀李大醜擁徒眾三千餘踞馬平象  
州兩界閒政令討之連戰皆捷賊盡殪政令以兵火餘民薄賦輕  
刑與之休息值代者至父老大恐守臺門不使去大吏俞其請任  
五年官民如一家容縣者賊窟也渠魁四五各糾眾千百伏密箐  
邃谷中而自良墟尤悍黠大吏以政令能辦賊俾攝之至則簡丁  
壯繕戈矛朝夕訓練之首攻自良墟冒刃入推鋒搏戰梟其俊積  
半載次第削平踰年母壽日村氓皆捧觴稱祝都數千人六年寇



復熾城多失守政令乞援高廉道某率師至政令爲前驅七戰七捷垂克矣某潛師宵遁慮政令以情告譖諸督帥褫厥職撫軍勞重光察其枉復其官歷權修仁昭平以疾卒無歸櫬資有爲流涕者嘉道中稱循吏者以同州劉穀萬爲最穀萬登吳廷琛榜進士選庶吉士改臨潁知縣十餘年移知洛陽伊洛兩河灘地圯入水者納糧如故穀萬毅然申其狀於大府大府重穀萬名輒得請民至今賴之嘗以衙蠹害政白大府曰朝廷之治自州縣始州縣之治自胥吏始清其源革其弊請自某始大府稱善者久之先是穀萬之父宰秦中以廉仁得民會巡撫檄買穀萬石亟請不獲免邑人士恐觸巡撫怒重累宰乃爭負擔輸穀贏其數而穀萬適生因以名而字曰粒民紀實也

王肇謙

祖錫培

王肇謙字琴航深澤人祖錫培字篤生乾隆四十五年舉人以知縣試山東善斷疑獄大吏倚如左右手嘗署長山惠民黃姓母子牆壞壓死其子腿骨斷如截旁鐵鋏一有血跡經十官不能得正犯檄錫培勘之死者有癡兒年十五六供云時見雷火光中兩鬼踰垣去西垣外乃其兩堂姪家向與死者有隙者也錫培呼兒示以鋏兒曰吾家物也旋鞫其兄弟曰若何得殺人色戰慄遂供乘夜殺以鋏復然火藥爲雷殛狀獄成未刑一人其善於研鞫多類此丁父憂歸廬墓側修宗祠買祭田重訂家譜服闋署魚臺適大水親駕扁舟拯溺者爲請振監放之無濫無遺又導積水涸田出購薺麥種之民得不飢補淄川會大旱蝗起懸重賞督捕之禾無傷者民感之如慈母焉三充鄉試同考官升東平州知州母老致仕卒年六十六肇謙道光二十六年舉人授福建海澄知縣廉隅

自飭事親夔夔若不克勝任居官則果敢強執遇事所不可輒侃  
侃爭雖忤當道意不少挫以是有聲海嶠閒尤善捕賊署上杭嘉  
應匪竄入境直搗其巢禽十七人以歸時漳州陷賊鎮道皆亡走  
大吏檄赴漳剿撫士民攀轅不得行且額上請留有仁人不可失  
之語先是肇謙以審漁山盜陳雙喜案升同知直隸州至是補永  
春州知州地經閩賊林俊亂土匪丘獅扒古起而應之橫行於鄉  
下車八日卽禽之調署漳州漳浦賊虜聚石堡中官軍圍攻三閱  
月不能克肇謙馳往剿之博山人趙印川時令龍溪約同討賊先  
覓敢死士入堡爲內應夜率勇潛襲之勇首畢定邦緣梯入內應  
起譟而出堡立破生禽其魁蔡全上嘉之擢知府賞戴花翎趙  
印川後升按察使畢定邦歷官副將皆死於戰論者稱肇謙爲知  
人善任云守漳三載百廢具舉羣目爲漳南一柱肇謙嘗以父母



春秋高請歸省卒不得歸及擢延建邵道而賊亂益亟制府金萬  
青戰亡檄肇謙統領諸軍擊順昌賊賊伏嵐下沿山槍礮林立勢  
張甚肇謙屯軍隘口督軍四面攻之賊不支倉皇潰走聲若壞隄  
生禽四百七十人斬馘無算粵匪復由杉關竄入邵武時承平久  
城守皆不完危如累卵肇謙致其家書誓以死報國鳩集郡人製  
器械籌糧餼詰姦宄登陴堅守人始有固志時趙印川督軍赴建  
寧肇謙以舟師合擊三戰於洋源溱濱馬鞍山皆捷師抵大幹晨  
會食而賊突至北岸賊與之犄礮墜舟中如雨肇謙督軍對擊  
分軍從上游潛渡出賊後腹背攻之賊大奔而印川軍亦解建寧  
圍移軍會擊立復其城連克建太二縣事聞加道銜肇謙官閩十  
年所歷皆巖疆整修殘破少就緒輒檄調他往未嘗一息安及受  
道篆身在行閒饑匱兵疲所統諸將率階級相等且有過之者統

馭之難身心交瘁成豐七年八月竟以勞卒年五十一賜祭葬贈光祿寺卿廕一子入監讀書

劉其年

劉其年字芝泉獻縣人生三歲而孤幼篤孝友生母黃嗜飲醉輒怒其年必長跪以請顏霽乃已稍長從兄書年讀書年教授郡邑所至必以其年從其年之優於學與仕者承兄教也道光十七年舉於鄉二十七年成進士授庶吉士尋遷御史時髮捻未靖統兵大員多懦怯勝保以經略治軍淮上侍朝右多與援觀望尤甚諫臣合疏劾之吳台壽獨申救其年抗疏論勝保溺職玩寇諸罪狀竝劾台壽黨援勝保顛倒是非略謂台壽疏云 文宗崇上廟號指旨以豐縣之捷稱武功首夫豐縣之役其視僧格林沁殲滅馮官屯之賊胡林翼肅清湖北全省曾國藩肅清江西全省爲功孰

多易知也特以奏績在先故敘次居首況國家命將出師豈得執一勝之功遽爲鐵券此次勝保得罪糾劾出自諸臣而逮問出自皇上台壽斥言者以証先帝之罪縱不爲言者地獨不爲皇上帝乎其悖謬一台壽又云恪遵前旨科罪陷君不義有累聖德夫給事中趙樹吉雖有參劾勝保之疏朝廷竝無卽行正法之旨台壽待定讞失平而後疏論未爲晚也何以汲汲申救惟恐不及其爲阿私死黨彰明較著矣而况憑空臆斷竟以累德不義等語指斥乘輿其悖謬二台壽又云朋黨阿桂等獲咎逮問旋復起用無論勝保之才略器望非阿桂等之比卽阿桂等之獲咎豈嘗驕恣欺罔跋扈貪劣如勝保乎國家刑憲自有權宜其赦宥者非情有可原卽功浮於罪者也英親王戡定中原可謂功矣而幽死年羹堯削平青海可謂功矣而縲首張廣泗開闢苗疆可謂功矣而



大辟一意姑容竊恐無此政體今台壽甫當對簿之初卽爲杖鉞之請膽大妄爲乃至此乎其悖謬三台壽又云勝保有克敵禦侮保衛地方之功無喪師貽誤大局之罪臣尤所未喻勝保始爲欽差大臣而賊長驅入直辦皖豫髮捻而皖北糜爛辦陝西回匪而三輔爲墟臣不知其所克者何敵也喪師敗績勝保恆事然此猶爲將之常耳至苗沛霖毛羽未豐原非難制勝保一意縱容倚任而今成江淮腹心之患矣髮賊餘黨陳德才自狗逆被禽以後眾止數千狼狽西竄勝保逍遙於潁州太和之間數月竝不遏擊至令人關大掠回匪乘之而起今陳逆盤踞山南禍猶未艾又直東教匪本非勁敵上年勝保督辦不剿而撫苟且塞責至今寢成燎原近畿殘爛以上三端而曰未嘗貽誤大局臣不知所謂大局者何事所謂貽誤者何等也其悖謬四台壽又云各省將帥爭奮功

名使朝廷殘害功臣下寒將士之心上成君父之過竊謂此次參劾勝保之疏大半皆外省督撫統兵大臣交章入告百口一詞不知更緣何故爲此寒心其悖謬五台壽又云借星象風占以誅戮大臣此端華肅順嫁禍柏棧之故事以二凶斥趙樹吉比擬尤屬不倫其悖謬六台壽又云黨援之說歐陽修朋黨論辨之甚明烏得以一己之偏詞隔天下之公論然則台壽之不諱爲勝保之朋黨明矣夫歐陽謂爲君子有朋故八元十亂之屬皆目之爲朋台壽以此自比是目勝保爲君子矣將推勝保爲臯陶庭堅而自附於仲容叔達乎抑推勝保爲周召而自附於望散乎無恥極矣其悖謬七台壽又云陸贄言曰叛者得以爲詞平人亦爲懷愍臣不知其所謂叛者宋景詩乎苗沛霖乎宋景詩狼子野心苗沛霖鼠首觀望本未嘗甘就範圍就令終歸決裂亦與勝保無與若此所

云是朝廷轉受制於將帥自今以往不敢逮一臣誅一將矣其悖  
謬八總之台壽自知強詞奪理清議有所不容非牽引先帝無  
以箝皇上之口阻言者之氣非造爲陷君不義有累聖德殘害  
功臣諸邪說無以脅會審諸臣使之不能議重典而其所挾制朝  
廷者則尤在將帥寒心叛人藉口二語臣謹按春秋之法君親無  
將將則必誅今台壽不過以兩宮孤嫠皇上幼冲遂爲此誣  
罔誕妄之言意存禁嚇使朝廷不敢不聽律以無將之義臣知其  
無所逃罪矣朝廷若置此不問不獨黨局旣開此輩益恣睢無忌  
而督兵將帥皆玩視戎行恐東南軍事永無肅清之日矣疏上未  
浹旬而逮勝保之命下卒從吏議置之法嗣後統兵各大臣爭相  
用命所向有功論者謂中興偉績實其年一疏啟之是時直聲震  
天下而遭忌愈眾未幾以知府改官蜀中所至以廉節稱同治九



年再權雅州卒於途身後蕭然幾無以斂巡撫吳棠賻以千金始獲治喪繼妻沈氏仰藥以殉事聞於朝旌焉

袁開第

父詵

袁開第字杏村玉田人父詵字桂巖道光十七年拔貢生授河南中牟知縣歷權沈邱信陽鄭州裕州所至有聲在信陽值髮賊擾鄭陽以籌防功擢同知其宰沈邱單騎入捻老巢賊列槍守砦門詵咤責之酋震懾就禽民繪圖勒石記其事著有籛翠軒詩集開第道光二十九年拔貢生官內閣中書同治二年以同知簡發貴州明年署水城通判時照磨某護理水城擁兵於外多不法開第至劾去之廳苗之變且十年其魁踞阿夏數以萬計開第率民團三千進軍阿札分調兵團紮募泥克紅岩爲三路進攻計會號匪陷大定開第馳回城備防守同城某遊擊馬逆舊將也某調其黨

數百來廳助剿賊開第阻之不可乃密檄諸團嚴防之獲其戚徐  
姓竝馬逆所授偽職文札事既敗某益銜之有道員鄧某舊部胡  
雲龍見龍兄弟者率滇練二百餘人入城謁開第皆短衣草履帕  
首背刀手月琴琵琶傲然踞上座開第恐久居城爲腹心患檄移  
紮募泥克舊營胡氏兄弟忿忿火其壘而去旋與團民廷將大開  
開第單騎馳往是處團民不見官三十餘年矣閉塞不得入久之  
秀才葉豔春始迎入寨中寨臨河河外礮聲隆隆作詢之則某與  
某鬪也開第因謂豔春曰吾當爲若輩判之因傳檄諸鬪者次日  
渡河駐山麓古蘭若中越一日訟牘積尺許皆數年燒殺舊案也  
中一案則數月前殺死兄嫂一家四命而奪其產者先一夕士紳  
關說願以五百金助軍餼請貸其死開第姑領之次日集訊團丁  
數百人麻布長衫冠雉尾左右立堂下犯至曰汝殺人乎曰殺曰

願助軍餽乎曰願因顧士紳曰爾等願保若人乎曰願保曰爾等有弟兄乎有產業乎僉曰有乃拍案正色告曰若是則爾輩之死無日矣殺人奪財卽以其財貸己罪而利其餘尤而效之殺無已時人人自危祇飽官橐耳左右立者皆戰慄遂置犯於法懸其首於竿遠近駭然曰世上乃真有不要錢之官耶先是曹連友者遊擊某義兒也某挾徐姓嫌嫉連友擁眾數百以護送某弟爲詞且撲城開第回署或請圍遊擊竝誅之開第徐思之曰得矣急入內束帶執馬策出隨一僕二役馳至遊擊所投刺入良久始啟門燭光徹内外人聲隱隱如蚊聚開第入門大呼曰聞曹某在此胡不出見我遊擊失色少定喚曹出見因指遊擊曰若爾義父余若兄也爾爲若子卽吾姪吾不可不實告汝曹伏地唯唯開第曰今城內惶恐職汝故一城之責惟我與爾義父耳功名性命須自愛此



地不可久留明晨其速出爲我訪黑塘殺人案但不得妄累良民也曹殼鯨叩頭蹴之起轉謂遊擊曰老實人也余未晚餐曷爲我具食因命觴淺酌縱談往事諷喻之漏盡始歸署黑塘案者曹所刦殺也懼罪入城藉營員自固事機稍緩則變且立至矣比晨曹颺去偵所歸路檄比德團嚴永熙禽而誅之並戮其目十三人餘匪各散走函首至某遊擊泣一晝夜目盡腫事聞遊擊撤任時永寧鎮盜黔西清鎮相繼失守興義新城之回畢節猪拱箐之苗所在鼎沸無寧宇而郎岱大岩脚苗匪回竄比德眾數萬貴西道畢某以重兵剿之賊悉歸水城老巢或請閉城募練爲戰守計開第曰賊未逼城閉之搖眾心而示弱食不足而募練是亂道也會賊患疫伏不動探知賊中有李泰交者謀士也得其詩一章獎勸之傳入賊中泰交感激願投誠自効文諭往還凡數十賊果悉眾降

開第輕裝往從二十人比入阿夏界槍幟夾行笙吹前導絡繹三十里抵館舍苗首僞西林王竺二堂負固不出夜擊金鳴礮集眾議欲有所脅越日竺苗始出見因責之以大義諭以禍福利害咸感泣伏地曰小苗得見青天矣反手翹足以拇指拄地三跪三叩頭起立肅而退以功授威靈州升知府時僞九定王黃金印竄安順境裹下河苗岩大五結六合叛團勢張甚貴西道督剿無功以開第代之水城土民留之不使行乃改署仁懷廳以林福培署水城水城民及新撫叛苗拒新官境外不得入勢洶洶開第自請暫留允之大吏憫其勞苦飭監收仁懷廳稅以資津貼開第以非政體辭用阿夏降苗招回黃金印撫之令歸業有龍楨匪者始於客籍大姓發喪爭擡柩遂以龍楨名與土目爲敵動輒數千人奪田爭佃殺人如草芥大定境之張油客余銀發廳境之王大潰謝三

火礮朱三大王李六大貢諸匪皆各據洞寨地險絕重兵剿捕輒挫敗開第次第殲之張油客謝三火礮爲害垂二十餘年余銀發尤大定巨憝郡守待爲上賓莫敢誰何者也八年春下河苗岩大五突至焚場市圍城擊退之賊撲普安廳城大軍會剿圍解再竄廳境黃金印與土匪朱了頭復叛開第購諜聞之五日誡黃金印首俘其妻孥戮於市岩大五轉竄比德密諭李泰交相機制之賊掠喃吡寨屠其民苗首何玉堂聽李泰交計奔大定之納雍岩大五竄歸巢境肅清授黎平知府加道銜賊踞納雍官軍攻之久而不克乃議撫賊揚言曰非水城廳主來不能降也時開第已卸任大定知府陳鴻翕馳書約之乃如期會於大兔場苗來營繳械投誠府廳并坐堂皇受之開第諭之曰汝輩雖就撫姑聚勿散散則爲團民戮吾不汝理也洪翕恚曰招撫使勿散烏用招爲開第曰此



正所以堅其散之心也賊之聚也如氣之在胞捶之不消一針可破耳事畢急馳回署甫就寢賊大至見有備退踞場壩次日戰城下五鼓解去陷威靈復回踞德烏距城僅二十里時練勇僅百人閉城嚴守以待援師十年元旦有幼丁劉二自賊中來縋城入而鞫之言有廳城黃姓者與賊約謂官不在城可乘虛襲取也適開第先賊半日至見有備復約初三日破水城開第拘屠戶黃五斤至使劉二識之曰卽此人也立斬之開第策賊志不在城必遠颺重賞募死勇伏城外初三日黎明賊果大至伏起斬悍賊麻將軍城上連礮擊之賊退走伏卒竝起斃其鬼師奪所擄財物子女無算賊大受創竄郎岱之黑塘而援軍鄧有德適至一戰破之黔省上游苗患自此息移署銅仁龍桑坪紅苗戕銅仁知縣朱思榜開第設計散其脅從獲匪首樊七誅之累功以道員補用光緒元年

永從縣屬六洞苗變陷永從下江各城奉檄討平之二年莅黎平府任躬歷六洞四腳牛各寨謂永從縣治失地勢議改建城於樂鄉移洪州吏目於水口以便控制通商賈大吏可其議允行之黎平西山千三各寨苗屢撫屢叛懼開第威名投狀獻千金助饗立斥之派員紳至其地對眾焚所投券出示禁姦民苛斂取稔惡者誅之設局清田產設義塾平訟事苗民大歡黎平爲三省邊要籌穀實倉廩兵荒之後民不知饑守巡撫韓超屯田養練之法踵胡林翼養育山蠶成績躬倡導之禁苗俗同姓爲婚跳歌坐月陋習四年丁父母憂歸士民刻石紀之服闋至黔歷署糧儲貴東貴西兵備道總辦營務處兼統中路十二營練軍大吏前後保薦上嘉獎之交軍機處存記歷充乙酉戊子己丑辛卯文武鄉試監試官癸丑甲午文武鄉試提調官十七年剿平下江廳逆苗誅普安

縣匪首劉燕飛賜二品冠服二十一年授貴東兵備道下車清姦  
充建書院禁燒戶勸種植整飭保甲誅林佩山吳老牛滕耀亭滕  
海山高文清石老將楊春亭諸巨盜扶弱抑強闔境肅然二十三  
年兵商交鬪一言解之在任八年防匪振荒未嘗請一兵一粟皆  
先事備之調署按察使知粵匪將爲患密與總兵計先遣一軍屯  
古州與賊戰盡殲之二十九年湖南巡撫趙爾巽以文武兼資薦  
之三十年擢雲南按察使明年擢貴州布政使未幾卒

李吉言弟審言

李吉言字藹堂永年人道光二十九年拔貢明年成進士授江西  
上高知縣禽巨盜朱實兄弟四境晏然調萬載粵匪陷城禡職請  
於巡撫以克復自効設局籌餉萬載士民輸三十餘萬緡募瀏勇  
數千立同信二營與弟審言領之屯大橋距城四十里賊聞官軍



至整隊出至河上吉言戒曰勿動俟其渡擊之賊呼噪舉大木爲橋以濟未及半火機齊發賊多溺水中尋偵知賊大隊將至吉言乞師於湖南巡撫駱秉璋援師次珠樹潭次日戰鐵山吉言合擊之邊決直前賊大敗追奔數十里禽三百餘人遂復其城再與援軍克袁州大捷樟樹鎮以功升知府巡撫檄守袁蠲租緩賦招禮賢士咨治之民獲安堵郡人立碑頌之尋授建寧知府首建義倉增穀數千石捐俸修文廟增書院膏獎儲書課藝文風丕興絃歌之聲不絕於境浦城會匪吳顯漢謀亂捕獲多株連吉言推鞫平允僅置首犯七八人於法光緒二年以母老告歸卒於家弟審言多才畧克復萬載袁州皆有功薦升知府同治八年分浙江辦理戴鎮二汎翁家埠念里亭尖山石塘各工海昌士民戴其德祀之湖神廟側後權守衢州處州二府懲姦折獄有神明之稱年六十

卒

王繼庭

王繼庭字筠軒武清人道光三十年進士授吏部文選司主事記名御史咸豐十年出爲山東青州知府莅任值歲饑繼庭倡捐振濟存活饑民數萬巨匪李金鼇勾結捻賊窺青州繼庭捕獲之夜斬之大堂下遲明金鼇餘黨團聚欲篡取之示以首眾駭然散當是時賊蹤飄忽無常蔓延徧東省青州雖解圍而民心惶恐常慮賊再至適繼庭因公被議解官幕中人額手相慶勸繼庭速去危城繼庭曰官之於民猶父之於子也焉有子罹患難而父託遠行以避之者於是募勇丁脩城垣籌糧械竝捐千金助練勇費繼任潘駿文意繼庭旣解任青州城守必虛馳至則設施嚴整乃大驚是年秋賊果大至而州城堅且有備賊遁走繼庭之力也巡撫知

繼庭能奏留襄軍事賊平始歸里以功復原官薦升道員同治五年特授兗州知府以疾辭不復出十三年卒青州人祀之宋十三賢祠

### 劉毓珊

劉毓珊字鐵村大城人以廩貢生歷官東鹿棗強東明涑水訓導咸豐五年署高邑教諭以古學教士子黌序閒奉爲嚴師同治三年捻匪宋景詩侵趙州犯高邑知縣畢世榮咨禦賊策毓珊請乞師臨城賊至勿與戰俟兵至內外夾擊必大敗之外委瑣某以城殘不可守擊之爲便世榮兩從之命乞師臨城自與外委率師迎戰戰久力不支皆陣亡土匪蠶起典史姚某棄城遁毓珊見事急密令人梟獄中死囚首懸諸街謂土匪曰畢公已勝賊斬首回城矣土匪覘之信且疑適臨城援兵至毓珊收合兵勇與營將杜崧



年協力守城匪知有備不攻而去崧年以毓珊功陳之知州陳鍾祥毓珊不受鍾祥歎息曰劉君志不在名也嗣以年老告歸邑人士餞行者數十里不絕年八十二卒於家

李長華

父泰

李長華字夢胥號蘭泉望都人父泰字東屏嘉慶二十四年進士道光十三年選授山西和順知縣引見時有選江蘇東臺縣者東臺號煩劇上以泰年力強有才貌特調補之邑多移戶陷人漁利下車痛懲之風頓息鄰縣差以刃殺人官以自戕聞大吏檄泰往審檢尸非自戕訊得其情平反之人稱神明長華咸豐二年舉人以團練功保知縣分山西署太原知縣民爭水漑田糾眾持械斃人長華詳勘爲定規條民自是無爭去任邑民數千詣大府懇留旋補懷仁懷仁近邊塞強悍喜剽掠長華以士爲民望至則先

修書院教士子以禮捐俸設四鄉馬勇晝夜巡防之境內獲安縣東南諸村堡皆沙漠五穀不生民困於賦長華申請減丁銀二千餘兩教之樹木民獲其利其差徭之不可已者設斗秤稅濟之民建生祠以祝再調壺關懲富民之以賄訟者政簡刑清幾於無訟會回匪竄潞安練勇千人防大河口賊屢犯不得入移署靈鄉值大祲振之不足者籌款繼之不假胥吏手活民無數再署山陰光緒十五年卒年五十一

龐際雲

父朋

龐際雲字省三靈津人父朋字君錫以字行更字百朋少而篤行幼學嗜宋儒程朱之說咸豐三年粵匪渡河北竄朋建議阻運河而守可省勁兵數萬籌畫垂定會鄰縣爽約計不行而靈津卒屹然無恙年七十六卒際雲咸豐二年進士選庶吉士旋改刑部主

事精明幹練侍郎曾國藩倚重之國藩督師皖省以際雲參其軍金陵克復奏留江蘇保花翎授江甯鹽巡道時餘東商竈爭草蕩相持久不決際雲剖判明允竝清丈其地商民德之同治八年署兩淮鹽運使加按察使銜光緒四年授淮陽海道值運河盛漲水且七尺應啟閘際雲念啟閘宣洩則裹下河稻田悉漂沒堅持十餘日水漲至丈餘始啟閘稻已登場過半矣六年遷湖北按察使創立清理積案局舊牘一空疑獄多平反蒞任一年結案九千餘起七年升湖南布政使值湘軍凱旋米值昂貴際雲調輯撫綏卒就安謐十年署湖南巡撫奏捐緝私經費萬餘金優詔褒之旋調雲南布政使抵任廉得銅務積弊力除中飽以積勞成疾卒際雲服官中外四十餘年剛正不阿尤留心人材每接見僚屬以言動窺其心術高萬鵬李有棻以材德著獨識拔之臨湘知縣徐邦光



有惠政沒於官親臨其喪並上其政績好讀書尤善爲文著有十  
五芝山房文集藏於家

劉恩濬

劉恩濬字蔗泉吳橋人祖廷瑞父碩膚性孝友樂善急義鄉里以  
盛德稱碩膚生三子長恩溥字百泉以進士改翰林擢諫院有直  
聲歷主江西四川江南鄉試戊戌會試知貢舉累官總督倉場戶  
部右侍郎三子恩澍早卒恩濬其仲也咸豐二年舉人同治元年  
考取內閣中書升侍讀光緒元年外授貴州貴陽知府署銅仁民  
強悍健訟莅任甫三月判決積案四百餘滯獄一清捕獲梵境山  
巨盜二置之法餘匪解散閭里獲安調補鎮遠地經匪亂賦籍燬  
於兵吏胥因緣爲姦利恩濬鉤稽釐定著爲令民困以蘇四年以  
憂歸服闋授廣西思恩知府惠政愛民一如守黔時尋調梧州梧

居潯桂下游商賈駢闐廠稅多陋規稱弊數恩濬一切廓清之歲  
益庫帑二十五萬金大府嘉其能檄辦粵東六門鹹務杜絕中飽  
離綱爲之一振調署平樂建義學裕倉儲捐俸二千餘金爲善後  
經費邑民藍妙管者苦土司苛虐嘯聚萬餘人有司請臨以兵恩  
濬力阻之手書往諭妙管感其誠隻身來謁泣訴土司諸虐狀恩  
濬再三諭遣之眾立解迄受代耆民泣送數十里途爲之塞十年  
法越釁啟大府檄赴龍州督餉兼理東軍前敵營務時潘鼎新以  
湖南巡撫署廣西克復北甯諒山恩濬以密畫有功加鹽運使賞  
花翎桂省論治行者以恩濬爲最順直拯災捐巨金賞二品頂戴  
晉道秩入覲病卒年五十五恩濬砥行勵名尤究心經世之學著  
有孝經註解拙盦詩存功過格郡國利病諸書

席樹馨

席樹馨字枝仙懷來人咸豐三年進士授四川長寧知縣縣接壤雲貴民俗刁獠爲羣盜藪樹馨募勇健勤緝捕盜爲之靖邑有夫馬局供軍需往來軍撤而局如故黠者築穴其中民間攤費視正供加倍莠民不堪命樹馨蒞任三月立除之同治初邑遭粵匪石達開屠殺樹馨至始築城垣籌守具會雲南竄寇擾敘永諸縣多焚掠惟長邑獨完識者服其先見樹馨素以經濟自命洞悉民生利弊世情險夷而尤以作育人才爲急歷權我岷南溪修書院設義學延名師教士子所至人文蔚興爲諸邑之冠卒年七十有三著有代箋錄古文文筆金丹選註諸書

賀錫福

賀錫福字楷仙清苑人幼穎悟好學束躬端整十四入邑庠有神童之目道光二十三年舉於鄉咸豐三年成進士改庶吉士座師



陶樑潘曾瑩激賞其文曾瑩竝爲作墨蘭一幅題詩以歎詠之爲之延譽時天下兵擾民生日艱嬰嫠多棄養無所歸錫福丁憂籍居爲倡設育嬰全節兩堂存活者歲千百計服闋選授河南羅山知縣奉母之官羅山當南北之衝捻匪往來颺忽錫福集紳耆謀守禦策捐廉募鄉閭子弟昕夕訓練之旬日成軍數戰賊輒勝賊憚不敢窺羅境城賴以存大吏以卓薦調權輝縣初錫福在羅山捐金募勇其母盡鬻衣飾以助餽糈焚香告天爲百姓祈福撫畜之如家人母子民故爲盡死力至是居僻縣且有蘇門百泉之勝賊未嘗一至錫福一意與民休息訟至輒決無稽留邑有富室劫於盜盜誣良民某且數其家人甚悉已定讞矣錫福下車錄囚察某懦遽叱之曰汝通賊法當死立命堅縛以待決其家人聞之號哭奔至堂下錫福顧謂盜曰此爲某何人盜猝不能答錫福笑曰

豈有汝熟其家而不識其子女者其爲誣攀無疑盜懼服具言某  
役唆使狀立釋某寘役與盜於法閭邑稱快自是奸民悉斂迹無  
敢試法者尋丁母憂歸里祖餞者塞途多泣下者會捻首張總愚  
自山西竄直隸省垣戒嚴大府以錫福有能名屬募鄉團守城布  
署甫畢賊大至以守禦嚴不得逞東趨山左事聞授四品京堂大  
府捉之出錫福曰昔之仕爲娛母耳此後雖萬鍾祿不逮養矣遂  
閉門不復出以詩奕自娛閒游狼峯抱陽諸山與友朋唱酬無虛  
日光緒七年卒年七十初錫福少時嘗授讀某宦家一夕掩卷假  
寐宦婦入室拍之醒笑相向錫福給之出門遽嚴扃整衣危坐達  
旦託病解館歸錫福善教士在羅山得丁振鐸謂其後必大同治  
元年甲子科分校河南秋闈得士稱盛田我霖鄭思賢端木榮尤  
傑出爲一時之選著有海棠書屋奕存蓮舟酬唱集秋蟲吟諸集

郭長清

郭長清字學琴號廉夫臨榆人道光二十三年舉人咸豐初粵匪  
擾天津土賊乘機竊發縣城幾危長清集邑紳籌餽募勇得八百  
人邑西南白塔嶺居民數百家皆郭姓也長清曉以大義集資教  
練復得壯丁五百乃扼聯峯山鳳凰店諸隘設墩置燧聲勢大張  
鄰賊偵其防守嚴成屏迹境內晏然無事六年成進士授刑部主  
事八年海疆有警隨大學士桂良吏部尙書花沙納赴津與夷使  
會議凡數十往返悉得其平十三年充提牢廳視囚有威惠事無  
鉅細必躬親作恤囚十事詩竝請囚糧倍給雙飯以符舊例旗民  
某繫獄久且病長清訊之則以輕罪寄監待質者立釋之去得不  
死其年八月囚有越獄者是人適經獄牆外見而尾之急走白長  
清捕之果獲長清精力過人用心尤縝密虛衷研鞫多所平反嘗



曰獄至於刑部盡之矣有枉而不爲理復將何所控告乎又謂以錢計贓之法宜詳爲分析以昭核實所謂贓銀一兩謂實銀也京城計贓之案其以錢作銀者當時行使制錢二千易銀一兩是以計贓亦如之自行使當十大錢而銀價日貴近日實銀一兩竟易當十大錢十二千以上則京錢二千止抵實銀一錢六七分爲數甚微今格於成例凡遇計贓之案仍按京錢二千坐銀一兩謹守而不敢變竊贓一百二十兩以上常人盜倉庫一百兩以上例皆擬絞而以今日當十京錢計贓一百二十兩以上者實銀不過二十兩若使盜得實銀止應杖罪耳乃以得錢計贓之故意與盜實銀一百二十兩以上者同擬縲首執法者平情酌理常覺杌隉不安而莫之能救今欲稱物平施以昭公允所有京城案件應照順天府每季奏報錢價隨時核計外省亦各照州縣詳報之錢價酌

中辦理則情法持平亦無虞有上下其手之弊如或議者謂制錢指日復舊銀價可平此例未便遽議更張亦當因時制宜以見明慎用刑之意除外省銀價不齊另行核議外擬請辦理京城計贓案件於進呈黃冊暨咨題稿內均令分析聲明實銀例銀字樣以昭核實庶可於核覆時量爲末減則於定例之中寓矜恤之意亦慎刑之一道也光緒二年補山西司主事五年升員外郎疊充秋審處兼行減等總辦各差六年升郎中尋卒年六十八長清性嚴毅敦實行居家孝友好讀宋五子書著有性理淺說小學淺說二書謂極重難返乃周子上下古今之論當其勢之甫積豈無識微見遠之臣然或陳說而莫悟其言或疎逖而莫參其議此天下所以卒至於危且亂也識其重而能反之者古亦不可多覩然必如諸葛武侯文信國之鞠躬盡瘁始可歸之天意否則貪庸縱恣養

傳三十五  
三  
難遺患以成不可反之勢者亦豈得歸咎於天哉故曰天平人也  
何尤又曰聖人法天以政養民以刑治民此春溫秋肅之義然刑  
者民之司命則利見者以剛得中宜玩夫天水之占也利用者以  
動而明宜觀夫火雷之象也不然情偽微暖其變干狀何以持天  
下刑獄之平乎其學問志業之可見者如此

劉澐年

劉澐年字樹君大城人父毓瑤官四川石泉知縣道光八年卒於  
官扶柩歸里時年七歲從母元讀書一覽輒成誦年十八補博士  
弟子道光二十九年己酉登拔萃科咸豐四年從參贊大臣僧格  
林沁軍以軍功選授完縣教諭九年舉於鄉明年成進士改翰林  
院庶吉士授編修同治四年乙丑會試充同考官記名以御史用  
五年升侍講八年轉侍讀外授廣東惠州知府惠民強悍多不法



淮年履任張諭曉示之實既往懲將來其不悛者輒繩以法府役  
林麻旺私交洋匪謀爲亂淮年禽斬之民皆懍懍畏法三年無盜  
劫案暇則與士紳重修府志文獻賴以徵焉十一年調署湖州鏟  
除姦蠹殆盡創設義塾數十所教之禮義悍鷙之俗爲之一變嚴  
飭屬吏清釐積案月稽而旬察之十二年檄署廣州淮年爲政務  
持大體不以操切爲能在惠潮作詩歌勸民使民絃誦之竝泐諸  
石光緒五年改道員卜居揚州十七年卒年七十著有二十二蘭  
亭室詩存十二卷約園詞四卷

### 高思愨

高思愨原名玉泉字漱岩南皮人官山東定陶縣典史署萊蕪盛  
暑治獄灑掃冀除囚無薰蒸溽溼之患會捻匪薄城預以石灰作  
五尺帶徧置睥睨閒賊不敢登城賴以完署石島巡檢日偕水師

營卒巡獲商船同治元年宋景詩寇直東價格林沁督師東昌檄解饟銀十餘萬適值河決連日出入賊隘中無失事以勞嘔血斗餘而卒

陳世綸

陳世綸字煥之青縣人明敏有識略勇於爲義以拔貢爲縣山西始至大府令鞫訟連決大獄由是得名代理崞縣補潞城署萬泉調滎河夏陽曲薦卓異升直隸州知州署忻州補授絳州用舉者以知府用歷六縣兩州皆有能名潞城民苦兵繇有徵調貧富皆病世綸爲立章約汰煩杜濫嘗給毋乏而民不擾其在夏捻匪自陝西東渡河世綸斂官民所蓄刀矛火器旗幟之屬以千百數嚴守禦誓與死守賊距城數十里蹂四鄰殆徧夏獨獲完賊旣去周城爲塹親引繩丈雜民操作刻日而就及在絳值歲大荒人相食

姦民聚眾劫掠飢民脅附者多境內大擾世綸突往掩捕禽其渠  
置之法眾遂解拊綏咻噢三年民忘其饑病作猶扶疾力行不已  
光緒四年卒大學士閣敬銘巡撫曾國荃上其事贈道銜廕一子  
入監潞城夏皆刊石銘德而絳人感之尤深立祠祀之

張若陽

劉書畬

張若陽字辛齊盩厔人貢生由訓導改授山西五寨知縣邑近山  
盜賊穴林木中出沒爲民患若陽嚴保甲治團防禽首盜七人真  
諸法盜迹遂絕邑北山宿堡當孔道急使來往責供騾馬歲爲例  
吏假威苛派多擾民乃立騾櫃擇公正紳耆董之民皆稱便縣有  
河頭村水漲沒田廬捐廉數百金繚村築圍隄障之且獲漑田之  
利有翟姓者喜佛誦經仇者誣以白蓮教控諸府上官檄兵往若  
陽微服察之得其情立白其誣光緒三年歲大旱徒步禱烈日中



兩立沛秋獲大熟至今人慕思之同邑劉書畚字肅堂咸豐九年  
納訾爲知縣發江西十一年署德安有靖盜功同治三年復調石  
城值土匪起練丁勇修城堡先事備之得無患丁憂服闋署蓮花  
廳同知時有白蓮教匪聚黨煽眾勢蠢蠢欲動書畚偵知之親督  
團兵禽誅逆首十餘人闔邑肅然事聞加運同銜再調石城父老  
聞其至歡呼迎謁於途者數十里不絕云

### 全士錡

全士錡字仲榮涿州人同治二年進士以戶部主事改官知縣歷  
官山東嘉祥章邱歷城知縣德州知州擢知府士錡性峭直其爲  
治折豪強扶貧弱侃侃自將雖上官不能回其意以是見稱於時  
其治嘉祥也有盜高金榜者充沂曹濟道長廢必欲得而死之士  
錡禽至庭數其罪責以改行爲請免死比境盜聞而革心者逾千

人其治章邱有瘼與僕私而訴其子不孝者士錡廉得故杖僕而貸其子其治歷城獲巡撫與夫於博所輿夫假巡撫刺乞免卒杖之時爲語曰不畏撫院畏全知縣而士錡尤以能治河著聲嘗奉檄查勘金隄工金隄者西南起濮州之高家隄東北至東阿之張秋鎮綿亘一百二十里餘歲久失修黃流屢爲害士錡條上八事大旨主於剔舊弊埤新工其所計畫綱維具張當事者以其費煩屏不用時有議棄北隄者士錡爲作北隄不可棄說譬之屋金隄其堂階而北隄其門戶未有門戶不守而堂階無恙者其後光緒九年黃河決侍郎游百川奉朝命視河請以士錡往時士錡已被疾家居聞命力疾赴河上踉蹌沙莽中規畫凡數千言卒以疾乞假歸遂不復出當清道咸之際四方多難山東地接京師不被兵革官吏習爲侈靡爭飾廚傳供張之好吏治不良民俗曰媮自閤

敬銘爲巡撫首斥貪墨吏數人風氣一變丁寶楨繼之一用其成  
法吏多爭自濯磨以求表見士錡其一人也士錡嘗言古循吏吾  
愧弗如所自信者不使百姓受苦耳故在官民服旣去思之不置  
云士錡少喜爲詩文所輯著有味鐙叢書味鐙墨話味鐙詩草蜀  
游紀程歸棹集淮游草其詩善寫性情有晚唐風性尤愛才在山  
東分校省試得士八人皆有名於時卒年僅四十九不竟其用時  
論惜之

祁德昌 李待時

祁德昌字星閣永年人同治二年進士以知縣分江蘇四年權寶  
山縣學海書院久廢圯捐廉葺之有黠婦謀害其姑訊之得其實  
治如律海岸遭潮汐衝決請國帑修築佐之以廉濬劉河之淤淺  
者水有所洩不爲災邑人賴之洋人議由上海造馬車路至寶山



吳淞口礙民田力阻其事蒞任二載立義塾修善堂興利除弊百廢俱舉去之日士民立生祠祀之補丹徒縣逼枕大江盜賊出沒爲民害德昌募勇數十人晝夜嚴緝之盜風始戢泰興有某生入耶蘇教者魚肉鄉里德昌因事痛懲之司教者以其理直不敢校也親老乞養歸服闋署靖江補丹徒署荆溪所至有政聲荆溪亢旱暑月禱雨受酷熱卒於任年六十五同縣李待時字珍聘咸豐九年舉人以禦賊治河功獎知縣分河南奉檄修賈魯河黃河壩工署西平縣飛蝗入境具牒禱城隍廟蝗盡去民以爲神調孟縣歲大饑停征請振設粥廠四十餘區民不知災流賊吳金貴擁眾窺孟境率兵丁禽其渠誅之餘解去旋丁母艱歸里父老攀轅泣留焚香哭送者十餘里建生祠尸祝之服闋復署孟縣百姓跪迎於境外署滑縣河曲淤田數百頃歷官收爲私利待時詳請升科

歸之公署武安補闕鄉政簡刑清善折獄民稱神明年六十四致  
任歸逾二年卒

李清平

李清平字樂亭東鹿人幼聰慧家貧母胡質簪珥購書史教之讀  
艱苦奮學文名斐然咸豐元年舉於鄉同治十年以大挑分江蘇  
蘇省例月課吏清平輒第一所議改吳中田賦科及勸農墾荒水  
利諸策多見採納其辨海運查荒鄉剔釐積弊大吏尤左右之光  
緒十年授儀徵知縣縣值髮逆亂後民生凋劫又南瀕大江水時  
漲發稻田多被淹清平撫循和輯攜童僕一二人周視圩隄招鄉  
父老懇切說利害增卑培薄水不能災其地甌婁汚邪悉登穀一  
鍾民繪柳陰勸農圖以紀其事十四年大饑捐俸倡商富竝稟大  
府鳩集數萬緡冬春計口授錢米昧爽赴振所躬親檢視日午歸

卽坐堂皇決訟獄曰以爲常其聽訟不輕答人遇給辯者薄披頰  
或掌懲之人詰其寬曰人受笞爲終身大辱不可與治盜同也其  
整頓義倉及諸善堂改築男女犯監獄鄰縣皆奉以爲法有大盜  
某者久爲民害捕之置諸法闔境肅然縣多巨室士習囂競清平  
月季課文以實學倡導諸生嚴正文體士爭師事之任七年以勞  
卒官商民哭罷市喪出執紼者祖祭者絡繹十數里不絕清平惇  
厚寬和耿介自持不苟爲異同友朋畏敬之性尤孝友初父病喘  
晝夜侍左右雍背嘘煖衣不解帶者數月父卒哀痛首觸地至血  
出閉門讀禮每飯設奠如生時家貧讓產於弟至困乏復給予之  
其官江蘇歲必一歸省自家居讀書至卒官之年日有札記藉以  
自檢省平生尤精於易著有周易審象直解理象兼資學者奉爲  
津筏又筆耕存愚課餘聞見錄公餘聞見錄課餘詩存宰真日記



凡若干卷論者謂其書多名言讜議皆有關世道人心云

胡景桂

胡景桂字月舫永年人同治十二年舉於鄉光緒九年成進士改庶吉士授編修十四年授甘肅學政潔介嚴明號稱得士數上疏言防事謂海防以礮台爲重沿海各口宜建明暗礮台礮手宜定經制海港汊口宜擇要杜塞海上有事宜調腹地制兵不可臨時招募烏合之眾沿海七省兵輪宜歸併北洋中洋南洋三支互爲策應兵輪管駕宜慎簡授請飭各省督撫提鎮標下之武弁年力精壯者選入武備水師學堂學習三年深明水師機宜者方准奏補輪船兵額不宜過多器械可參用洋法不必定用洋式至於陸路邊防宜修建礮台增置碉卡膏腴之地竝宜興辦屯田以省邊費其論新疆邊防善後也畧謂伊犁新疆每年協餼三百六十萬

兩不可常恃請於無事之秋用裁兵存饒之法每年酌減三十萬兩仍飭各省照舊協解十年之內即可存三百萬兩再四分餘平每年以十四萬兩核算十年亦可存一百四十萬兩從此有備無患而內省協饒十年外即可照所減之數永遠停解既裕邊儲又省轉運此一舉兩得之道也其應裁之兵勇請各給屯田資本擇地開墾以每人二十金計之三十萬金即可安置一萬眾編造冊籍各設屯長督率稽查二三十年後生齒日繁邊計民生兩有裨益至應屯之地以布倫托海爲最宜溯烏龍古河而東察罕河布拉干河兩岸土肥草茂可耕可牧瑚圖斯拉產金尤旺此處若設官經理招人開墾或以兵作屯不特塞俄人入新之路而塔城及新疆後路保護嚴密卽科布多西南又添一大屏蔽矣新疆南北兩路中界天山煤鉛銅鐵金玉諸礦宜招商開辦馬廠駝廠宜籌

欵振興晶河爲新疆省赴伊犁之要道西北距俄國界僅百里據此可斷伊犁後路庫爾哈喇烏蘇爲新疆省赴塔爾巴哈台要道西北沁建蘭地方俄人及哈薩克出入於此據此可以斷塔城後路此北路要害宜防也南路喀喇沙爾城西珠爾都斯山有通伊犁要道其西那薩特達巴罕可以扼守珠爾都斯山回環千里泉甘土肥可以屯田阿克蘇東北有通伊犁之冰嶺天險可守烏什西北畢底爾卡外緊接布魯特牧地北與俄國之阿里瑪圖只隔一山西南經布魯特闢展地方有通喀什噶爾之捷徑關繫甚重宜駐重兵於烏什而於畢底爾巴什雅哈瑪兩山口嚴設碉卡又阿克蘇西南入葉爾羌境有通喀什噶爾之瑪刺爾巴什地方爲葉喀兩城分道處亦宜駐兵此南路東四城之要隘宜防也西四城自喀什噶爾東北巴爾昌卡倫起至葉爾羌南奇靈桑珠等卡



倫止沿邊與布魯特連界其中以喀什噶爾之喀浪圭烏帕爾英  
吉沙爾之圖不魯克等卡倫最衝要宜擇地勢窄處設碉卡寬處  
設碉堡以扼之此西四城之要害宜防也伊犁將軍現在之城距  
俄國新界僅九十里霍爾果斯河盈盈一水夏流冬涸既無山川  
之險而兩國犬牙相錯擊柝相聞俄人現築鐵道一旦有事風馳  
雨驟有迅雷不及掩耳之勢無論新疆兵饟一時不能接濟卽將  
軍巡撫函商調度之文書亦難速達若將軍呼應不靈只有坐困  
而已臣擬伊犁將軍宜仿照熱河都統之例統轄伊犁文武遇有  
營伍廢弛之員地方貪酷之吏專摺參奏庶事權有藉指臂相聯  
鎮道以下各官由將軍就近察核亦可補巡撫耳目之所不及實  
於邊防吏治大有裨益又論伊犁四旗游牧宜培養分疆勘界宜  
慎重學校宜便通整飭通商稅關設在甘肅肅州有名無實宜將

新疆北路通商歸伊塔道員經理南路通商歸喀什噶爾道員經理新疆銀賤錢貴伊犁尤甚原任伊犁將軍色楞額因俄國錢帖充斥內地每年以數十萬金易俄國百萬張之紙票受虧甚大開設官錢局以救之而定價太昂每銀一兩僅換制錢五百文俄人復乘隙運錢收買內地之銀而官錢局遂虧閉不通俄帖仍散行內地爲今之計惟有招商設局出票以攘其利一面採銅開鑪鼓鑄以杜俄票內充銀幣外散之弊其論甘肅駐防屯田也畧謂靈夏涼州莊浪三處駐防旂丁馬甲兵額約有三千餘名每年俸饌馬乾約需銀二十餘萬兩糧料共需四五萬石朝廷費如許之帑金以養旂丁旂丁有室家而無恆產生齒日繁仍恐日久難以爲繼甘肅荒田甚多若遵此次諭旨計口授田馬甲一名授田百畝或八十畝防禦領催酌量增加卽派協領佐領各員督率興作

自授田之日起三年以內仍照舊支發饑需以資經理三年裁減饑銀十分之七仿德國練民兵之意每年令將軍都統挑選旂丁三百人操練純熟三年放歸務農再選三百人輪流操練每年冬季通調大閱一次如此變通不特旂丁生計日裕國家饑需日省卽甘省之沃壤亦不致久爲荒田駐防之旂丁庶幾緩急可恃洵一舉而三善俱備也十八年旋京尋丁父憂服闋補御史僅四月章十數上皆切中時弊嘗疏陳甘肅回情狡詐宜妥籌善後永杜亂萌同治初年陝甘叛回始皆誤於主撫此次河湟回變經董福祥大軍痛剿趁此兵力若將河州大東鄉循化八工諸回族勒限遷諸塞外肥美之地設立堡寨作爲屯田援照左宗棠收撫陝回安置清水化平故事旣可隱消內患亦可稍慰民心至內地良回亦宜嚴禁新舊教名目及教首阿渾之稱如有犯者照邪教惑人



律治罪聞狄道州教首馬維翰河州教首馬永璘每人所轄回民至十餘萬之多均宜嚴行禁止蓋勢分則力弱疏徙則患消也又言山東河工宜責成河道總督經理總河衙署本在山東濟寧州城內故至今仍名河東河道總督其在河南省城者乃總河行館巡防之所自咸豐五年銅瓦廂決口黃河改由山東入海而河道總督僅轄上游七廳三百餘里其下游經直隸山東七八百里專責之山東撫臣名實遂不相顧今仍令河督移駐山東督工以符舊制則管河道員仿照河南用本省責任道員兼管廳汛各官仿照直隸用瀕河之責任同知州判縣判丞等官兼管是官不加增而費可核減帑不虛糜而工可核實再近年河工罰輕賞重諸弊叢生尤宜規復舊例嚴定罰章委員侵蝕者革職查抄河隄潰決者革職追賠枷號示眾庶人知儆懼不至以河防之塞決爲升遷

之捷徑矣。上以景桂熟悉邊事，特簡甘肅靈夏知府。靈夏擅黃河之利，漢唐清惠四渠爲萬民性命所關。舊設水利同知專司其事，同治閒始裁缺，改歸知府轄理。歷時既久，積弊叢生。委員渠長互爲姦利，而大弊尤在罰夫一事。景桂莅任，周咨博訪，躬歷諸渠，條陳利害，嚴定規章。上之大府，竝裁署內一切陋例及百數十年上下侵漁之弊，渠流暢旺，民獲更生。又以平羅縣昌潤渠上中下三段爭水纏訟，親往履勘，以河徙口淤改，從上游通貫。堡東六七里王家河溝，開挖新渠，竝建橋三座，以利行人。嚴追猾吏劣衿吞噬渠工諸款，立三堡義學以教窮民子弟。實心實政，課最爲廉能。第一擢靈夏道，剔蠹利姦，百廢俱舉。未及一年，升山東按察使。持法平允，刊明刑管見書，帥諸僚屬，疊靖民教巨案。時築高密鐵路濠里處，窪下阻絕，水道村民忿甚，思暴動。景桂往勘，函致德公司

移道而北修築柳溝河五龍河界河水道以衛濠田百姓悅服立  
解散二十六年調補湖南按察使未到任署山東布政使稽核庫  
款革除河工積弊官吏肅然二十七年聞母病卽告養歸旋丁母  
憂直隸督臣奏派總司學校三十年服闋授陝西按察使明年沒  
於邯鄲道中年六十景桂歷官十餘年勤於吏治興利除害不遺  
餘力屢蒙召對所陳皆民生國計之大者辛丑迎 駕廣平賞賚  
優渥人皆歎爲異數初景桂官御史時嚴劾項城袁世凱十數事  
及陳臬山東世凱適移東撫景桂懼禍擬乞病歸世凱聞之曰言  
各有職吾不能假公以報私也親造其署慰留之且爲奏署藩司  
事事皆咨決而行拳民亂作景桂幾罹不測世凱力爲辨白始得  
解論者尤服世凱之量云

許涵度



許涵度字紫純清苑人同治十三年年二十二成進士光緒二年  
補試殿廷以知縣分試山西五年補授鳳台知縣七年丁父憂服  
除補忻州在任十六年遷潞安知府二十六年拳匪亂起調守太  
原值 兩宮西狩以捍衛功擢冀寧道署布政使聯軍犯晉籌備  
整完境內得無恙二十七年調補陝西延榆綏道踰年入覲改武  
昌鹽法道均未赴擢陝西按察使權布政使與撫臣不相能量移  
四川藩蜀三年調陝西而又與當道不合乃草疏乞骸骨適 兩  
宮哀詔相繼至痛哭而去當是時青年士夫銳意建新政仇視滿  
人八旗貴族乃徧居內外津要以防其變於是天下益側目而不  
軌之徒日嘯召朋黨遠近馳說以謀一逞涵度知大亂將作入都  
後遂杜門謝絕世事不復出涵度明練強毅有幹畧初筮仕卽爲  
晉撫曾國荃所推重其爲守令所至以才能著稱而牧忻爲最久

善政亦惟忻最多故去之日士民攀送者數萬人皆相向而哭其  
爲潞安太守也晉撫毓賢縱拳匪仇殺教民涵度力爭不能得則  
隱爲調繫彌縫以救其失以此保完者甚多在陝西任臬司數月  
完積年巨案數千百事定清訟章條守吏相顧愕眙不敢以散法  
嘗試署藩司數月謹出納裁冗煩庫儲溢銀至二十餘萬四川總  
督錫良向與涵度爲同年生密疏調四川至則一以治秦之法治  
蜀三年節餘銀三百萬時新政紛紜用倍徙曩歲涵度應之裕如  
寧遠馬夷煽亂秦寧寺喇嘛及瞻對土番陰翼之爲虐西征之師  
蠶起鱗碎涵度輓輸芻粟如探之囊中無少稽缺然不喜措克擾  
民之舉所拔用皆端人潔士杜中飽祛糜費以此少年新黨多妬  
之以爲不便及調陝西又以其策與撫臣齟齬卒坐是去官涵度  
性坦直嫉惡有不如意事或匪其人往往白眦相睨怒罵刺譏出

以戲謔其遇權貴尤不肯稍貶屈以是落落不容於世宣統三年革黨變作倉猝避居津門逾二年卒年六十二

### 陳文駿

陳文駿字仲英號南孫先世爲江西德化人號義門陳氏明成化間再遷祁陽至父謨寄籍順天遂爲大興人協辦大學士兩廣總督名大受者文駿之高祖也咸豐六年謨以經歷從鹿邑知縣顏懷忠擊捻陣亡於安徽亳州之百尺河文駿時年十七聞耗走亳覓遺骸不得號哭歸汴梁境益窘貧力學豫藩聘爲記室文行爲一時所推同治九年舉於鄉十三年成進士改翰林院庶吉士授編修充武英殿纂修擢提調 穆宗聖訓告成加五品銜賞孔雀翎分校庶吉士得朱祖謀等十人光緒十年外授浙江金華知府十四年調杭州以海運勞保道員加鹽運使銜母憂服闋授臺



灣知府署臺北權臺澎道兼按察使銜二十年臺灣亡內渡授安  
徽太平知府調補廬州二十八年以道員督辦皖北牙釐總局三  
十年卒年六十有五文騷之在官也事無鉅細必躬必親鞠獄尤  
矜慎不假手僚吏獄囚翻供者例發回原縣覆審文騷謂發回原  
審官往往惡其狡展加嚴刑必如原讞覆上之徒苦囚耳輒坐堂  
臬自訊其有疑者則檄原審官同訊而細核之原審誤則令更牘  
上不遽加之罪指示訓戒一如嚴師其守金華手清積案百數十  
起有訟至三十餘年者以數語決之罔不帖服金華縣民婦以姦  
殺其夫偽爲虎食又有誣他人殺害者訊實立寘諸法人驚爲神  
八堡山盜窟也地當金台兩郡之間劫掠無虛日文騷懸賞購謀  
躬督兵入山捕誅積匪有年七十餘人復請大府增設營汛置都  
司改永康縣丞爲永仙縣丞移駐之臺灣番夷雜處西洋教堂尤

林立教民倚勢欺平民官吏多袒教民勢益橫文驂持平訊斷禁  
教士干請有教士某庇一屠牛者與縣官抗大府將撤縣官任謝  
教士文驂執不可移書領事爭之卒徙教士去中日之戰文驂權  
道篆巡撫唐景崇檄率防軍守南路日討士卒訓練之講成割臺  
文驂遂北還太平遭粵匪亂後民氣凋傷布政使欲復亂前賦額  
立程限爲州縣吏考成按察使以州縣詞訟月報率不實別頒一  
格飭如式造報均檄府監督之文驂以濱江地瘠民貧賦額不宜  
復戒屬吏勿徒顧考成詞訟月報必如式亦具文飭依實呈報有  
猾吏以未足賦額勒圩董輸之不之應則械而收諸獄一縣大譁  
交驂立揭之且痛言病民狀布政使不悅按察使以縣報詞訟不  
如式責之文驂力陳其式不足杜欺飾詞極抗直接察使手書謝  
之移守廬州值北方拳民亂作文驂嚴禁秀民翼教士衛之出境

創治團練興保甲奸宄無所容屬縣復值水災濱江湖隄垸皆潰無爲州尤劇文駮籌款修捍之以工代振民獲更生所至以興文教爲務重鑄金華四先生遺書修治呂成公墓以楷士林書院課士必手校閱時召諸生提示之延湯壽潛主講姑孰書院仿經義治事遺法分齋課之改廬陽書院爲學堂以李國筠牒大府薦登經濟特科居恆常以學說靡雜引爲隱憂曰亂天下者必此輩也莅官三省大吏皆倚之爲重浙撫劉秉璋閩督卞寶第臺撫邵友濂皖撫鄧華熙王之春皆先後疏薦其賢而文駮澹於榮利不欲驟超晉又連遭骨肉之痛哀鬱而沒論者惜之文駮性孝友其父戰死亳州具衣冠招魂棺斂值父母忌日祭輒垂淚兄弟尤怡怡沒後思之常不食諸姑伯叔皆倚之以養族姓有遠來投者衣食之如所親必教之成材而後已還祁修高祖祠宇捐產爲祭田設



義塾其中以教族子其先世子孫貧不能自存或無後者爲置產立嗣奉其宗祧高伯祖有春濤者歿於蘇州之橫塘失其墓跡得之贖其地以歸伯祖某歿湖州爲葬十餘棺撫其女如己出其仁厚多類此著有養福齋集易說諸書

### 秦澍春

秦澍春字雨亭遵化人同治十三年進士改庶吉士授編修累官至翰林院侍講學士時承平久京朝士夫習於奔競澍春處喧若寂獨以清慎結主知三膺廣西甘肅山東視學之命時人以爲異數輶車所至減供應裁例規風軌肅然而尤以釐積弊拔眞才爲己任文體斥詭異重典雅府縣試有倖收者必擯棄之幕友襄校所取或不當必密爲搜遺武試亦精校慎取不以武夫存鄙薄竣試輒先期竣曰吾以恤寒峻也在甘肅裁明經士費在山東試四

氏有持上公函入者爲暴諸堂皇叱而驅之試兗州疾卒士子聞之皆號慟喪過濟南諸縣生徒聚白繪爲繖署其名舉以赴弔衢巷爲縞至今齊魯之士猶豔稱之著有志喜齋詩集四卷

張元翰

張元翰字達生號良甫南皮人性孝友喜讀書家貧父嗣陶館於外王母病痿痺元翰侍奉甚勤歷三年如一日王母卒迺一志於學與弟元來以文行相切劘弟病禱於祖考請損己年益之光緒五年舉於鄉官獲鹿縣教諭尋擢知縣丁外艱服闋署澠池知縣縣境比歲荒旱又罹風雹大災元翰上狀當事請蠲租不許再請發倉廩振之而收租如故元翰不獲已除官所資民力之米豆四千斛芟藁百二十石以及絮醪酒肉麩糶醬鹽鼓茶紙十餘事損己寬民縣人大歡時 德宗狩西安道路轉輸皆仰給州縣澠池

故事用民車有大運小運小運者以官馬九十匹畜之民有事則以官錢僦之用馬在九十四匹以上爲大運其費則取之民而小運僦馬之費錢以五百爲緡者僅日出八十緡得車八輛馬二十四匹耳不足用則益以私財多或至數百緡官苦其累輒以小運爲大運元翰曰此巧取民財也獨仍故事無改 天子東還供張無一誤而法外齎求皆拒之不應故中牟靈寶孟津偃師新安宜陽諸縣皆以征調苛擾聚爲變澠池獨冥然無事元翰奉法不撓屈疾之者多又數拂上官意河南知府文悌屢有求不獲怨之尤深縣大猾崔鴻升貪狠橫行元翰捕治盡得不法事以死論巡檢某素爲知府所信鴻升賂之構其事於知府適過縣使鴻升妹控訴知府責以故人死罪元翰抗辨士民知之聚千人守行館門言鴻升當死狀知府懼不敢詰則撫他事誣之大吏使代者按驗之



代者承知府意窮竟其事終不得毫髮私縣人又爭白其冤乃調  
權密陵元翰故以捕盜著聲密陵賊渠華三聞其至自縊死盜風  
頓息縣例歲報秋災得緩征其已征者則官私有之歲獲千餘金  
元翰謂侵國帑力除之拒法國教士安西滿楊熙凝非禮之求杖  
其徒張錫庚呂明禮等自是入教者皆屏息鄉里賴以安元翰爲  
治專務實惠利民不多設施以此虛譽常獨行村落閒周咨民隱  
尤勤聽斷獄無冤抑者所至皆歌頌之去官後奉母居汴母卒大  
慟日夜悲號遂得疾越百餘日死母柩旁年五十三平生好爲詩  
歌轉饒甘肅有輶車日記若干卷藏於家

張銓

張銓字衡齋清苑人同治十二年擾貢生考取臚錄入實錄館光  
緒五年舉於鄉十一年實錄館告成以知縣分雲南歷署晉寧武

定石屏鎮南元謀祿勸楚雄保山諸州縣巧家廳同知補定遠知縣調昆明初任晉寧征糧設櫃大堂不假手書吏任巧家廳有土目爭襲事訟數年相攻殺銓請改土歸流收絕產作書院義學費廳地方數千里漢蠻夷獯雜居盜賊出沒時蠢動擾民銓率勇躬搗賊巢獲其渠親歷諸土司撫綏安輯二年未請一兵四境帖然或問其術曰不生事不畏事不貪功而已在昆明遇庚子民變劫洋人行篋毀教堂銓理喻威懾連數晝夜亂始定二十七年權鎮南州值改科舉興學堂銓倡築學舍延名師購書籍手定規制創立龍川學堂躬爲督課又廣設蒙養學堂立教育始基雲南之有學堂自銓始銓歷任所至必訪士紳之賢者咨詢利害興革之宜以實心行實政愛民如子慎重獄囚而約束丁役則不少假借嘗言爲治之道貴乎就人治人不可存成見就民之柔懦者而扶持

之就民之強橫者而懲創之就民之秀而文者栽之培之就民之  
 愚而頑者化之教之令行禁止如水之就下沛然而無所阻也銓  
 精敏過人遇事勇為平時每以勤自勸又曰官與民相接惟耐煩  
 為要不可輕動聲色蓋一人吃半分虧民間沾百分益不止也二  
 十八年升補威遠同知引見回籍遂不復出三十一年卒年六十  
 八銓嗜學終身未嘗釋卷每日皆有日記積十三册歷二十餘年  
 未嘗稍閒著有恆齋文集四卷詩集二卷公牘存錄四卷條約類  
 編十二卷官滇紀程一册觀光游記一册學務筆記一册

賢能傳八終

大清畿輔先哲傳第三十五



忠義傳一

大清畿輔先哲傳第三十六

天津徐世昌撰

宋永譽

李芳徵

袁生芝

宋永譽字葆恥號汗霜永平人幼承家學淹貫博洽闢精舍於洛水聰明山下以詩酒自豪明崇禎十五年舉於鄉順治二年謁選授陝西郿縣知縣郿俗素悍且近終南稱盜藪時賀珍蓄異志久豫戒城守具躬率邑人畫戰守策民以兵少皆洵懼永譽曰臣子之義誓與此土共存亡耳尋賊黨持牌誘降給之以重祿永譽立碎其牌禁錮之賊怒薄城下攻五晝夜勢不支城陷賊執永譽溫言勸之降挺立而罵索印不予賊手刃之總督孟喬芳上其事追贈陝西按察司僉事廕一子入監同時殉賀珍之難者又有李芳徵字銀槎永平人拔貢生官漢中府通判賀珍來寇關南道胡全

才誓眾固守芳徵佐理軍需擢知鄜州王永強亂作竭力拒守遣人蠟書乞援為邏者所得賊怒急攻之城破不屈死贈按察司僉事袁生芝良鄉人明崇禎九年舉人順治三年官陝西商雒道山寇賀珍遣其黨劉體純率眾數萬攻商州生芝誓死守城破自經其父亦戰死闔門盡節者三十三人

崔封

王顯

夏謨

劉澤厚

崔燦

張鷟羽

劉璇

趙丕承

李

崔封字天柱號琢墟長垣人生而穎異有至性祖尙書景榮獨鍾愛之授書讀輒心解明崇禎十六年年二十三舉於鄉順治三年成進士授山東蒙陰知縣縣為古潁夷邑孤懸萬山中曠邈鮮人迹封單車赴任飲食悉取之家儲庭不聞鞭朴聲民愛之若慈母未幾青兗盜起郡邑皆望風潰封募民兵晝夜蒐簡鼓厲之家保戶譏姦宄無所容賊屢挫戒勿犯四年夏臨淄陷封徧歷諸要隘

製銃礮備樓櫓嚴斥堠日馳驅箐篁霧閉未嘗一夜尋寢民時  
乏食出簪珥濟之竝解裘衣其寒者人皆感泣誓死守十二月十  
九日馬步賊悉壓境對環甲登城告於眾曰東爲要衝吾當之宿  
東樓尉臧士英當其南士紳秦琮秦璿當其西部署井然惟居民  
稀少僅當城堞什之二三不足備分守賊乘夜來攻對冒矢石策  
應賊稍卻相持一夕賊增數千騎薄城下四鼓城陷對躍馬疾呼  
兵民無應者乃望闕稽首曰臣力竭矣左右聞之使逸對抱印馳  
縣廳事前投井死賊入署掘地搜金惟圖書數卷俸米數斗而已  
妻王氏負重傷仆於地賊不顧急出對井中顏色如生目張眦裂  
賊不敢復入駭嘆而去年二十八祀名宦鄉賢祠嘉慶元年予恩  
廕著有苧蘿詩一卷

王顯字衷微望都人明崇禎十二年副貢生遇變棄妻全母人稱



其孝順治二年除金谿知縣土寇未靖軍騎入賊巢降其渠蔡姓者境內獲安後金賊破城遇害弟度字衷虛事親孝母死哀毀逾禮廬墓三年

夏謨字沃宸平鄉人明天啟七年舉人順治初知崇仁縣黃堯八倡亂將攻城謨率鄉勇往賊設伏三山廟被執脅降不屈死之家丁劉梅五李奇之等三十餘人同殉事聞各賜贈卹如例七世孫尊聖官大名鎮中營千總剿賊江南咸豐六年戰江浦陣亡

崔燦南宮人

雍正志載燦棗強人

明舉人國初授萊陽縣知縣順治五年土寇

起燦率僕役挾矢戰矢盡被執不屈死事聞賜卹張鶚羽字爾薦南樂人縣學生山東榆園賊攻韓張堡守堡縣丞募鄉兵使鶚羽率之拒賊連戰皆捷縣丞逐賊陷伏中鶚羽出入賊陣求之不得手刃數十人自刎死

劉璇永年人副貢生順治中知沁源縣升鄖陽府同知叛賊王光泰陷城被執不屈死贈按察司副使藁城趙丕承順治五年以貢生知鄖縣王光泰寇鄖陽下荆南道丕承率眾禦之城陷被執不屈死事聞贈按察司僉事廕子入監

李清定與人順治二年知甘肅渭源縣政尙平恕轉臨洮同知未任五年有回逆之變倡議守城姦民爲賊內應被執罵賊爲所殺事平贈按察司僉事廕一子

劉澤厚字枚菴吳橋人明諸生年十五隨母省外王父於河南值闖寇陷城負母逃走刃下創徧體卒脫母於難父大晟死晉中冒兵燹返柩葬之順治十六年成進士授四川江安知縣多善政土寇白應龍等焚劫城郭澤厚率友人周天球家丁息自階八人鳩民兵出城戰一晝夜眾寡不敵死之事聞贈按察司僉事祀鄉賢

雍正二年祀忠義孝弟祠

馬勝龍

胡養素

馬勝龍字雲生宣化人明總兵大川士麟長子也崇禎時武舉人清初累官廣西桂林遊擊時闖賊餘黨李定國聚眾數萬犯桂林勝龍集部卒閉門固守糧盡城陷攜仲弟從龍奮勇巷戰殺賊百十人遂遇害繼妻郭聞之自刎事聞詔賜半葬季弟武舉人猶龍走萬里拾其遺骸歸而葬之康熙十一年祀鄉賢胡養素字肖池冀州人順治初以歲貢授河南內鄉知縣值兵燹後招逃亡民多復業者二年闖黨劉二虎圍鄧州內鄉去鄧九十里主簿夏士登勸其暫避養素正色曰吾為朝廷命官守此城卽有危難死耳賊至戰不勝城陷被執罵不絕口遂遇害

賈士璋

李承鑛

王任杞

李之實



賈士璋延慶州人順治初以貢生授宜君知縣流賊劉登樓攻城士璋以城圯保雲陽寨賊環攻之寨破索印士璋曰印朝廷所授孰敢索又孰敢與耶躍起大罵賊殺之巡撫上其事贈按察司僉事子宏霖以身蔽父賊射之死

李承鏞宣化人順治四年進士授湖廣房縣知縣土寇圍城堅守數日乞援不至城陷被執支解之祀鄉賢

王任杞大興人明崇禎舉人順治中知辰州府黔賊竄境內戰克之擢兵部副使越二年賊大至力屈城陷闔門殉焉事聞詔贈太僕寺卿廕子

李之實延慶州人順治初以貢生爲江南睢寧訓導流賊海時行陷城之實不屈死事平贈國子監學錄

杜懋哲

張鵬翼

劉湛

杜懋哲寶坻人順治初以貢生知長治縣除驛馬積弊清勤能得  
 民民歌曰漢有召父繼杜母我公之來邑安堵遷岷州知州值回  
 變被執脅之降不屈遂遇害事平贈按察司副使昌平州張鵬翼  
 順治四年分守甘肅涼莊道參議廉明有政聲五年亦死回難  
 劉湛通州人監生官甘肅靈遠知縣以迴避調陝西定邊縣所至  
 有政聲升同知權靈州知州檄赴靈夏抵靈朔猝遇賊湛督兵役  
 力戰殺數人而死家丁房吉同時殉焉事聞賜卹予雲騎尉世職

郜炳元

王應星

何衡泗

温可掬

童士勤

郜炳元字虎振號飛虹長垣人順治二年舉鄉試第一明年成進  
 士授湖廣孝感知縣時楚方用兵雞籠山紅旗賊久不下炳元單  
 騎入山諭以大義解弓刀呼酒劇飲既醉就卧賊壘中賊大感悅  
 既出降制府奇其才檄令收復餘黨先是有吏侵漁庫金炳元窮

治之吏窘走賊中爲間賊信之反兵來攻炳元與典史郎元振集鄉勇守禦賊內應夜半火起城陷炳元歎曰我受國恩將以圖報不幸爲鼠子所給命也遂死之妻李氏紉衣百結亦罵賊死

王應星大興人官湖南桃源縣典史順治間土賊印象鼎掠鄉堡應星偕知縣鄭朝肅禦之高橋賊蜂擁至應星死之

何衡泗文安人明崇禎時舉人順治四年知湖南武岡州武岡初關城野荒蕪衡泗撫災黎布治有方士民賴之五年賊郝搖旂黨陳友龍來攻城衡泗與守備賀雲拒守三月餘糧盡城垂陷語雲曰倘有不測頸血豈可污賊刃耶城破自焚死

溫可掬順天人官南康通判順治五年江西總兵金聲桓據南昌叛其黨分陷南康可掬死之

童士勤宛平舉人授竹山知縣順治三年總兵王光恩結流寇叛



士勤時以事至襄陽被執不屈死

胡其侯 吳盡忠 姚永燾 竇豸 王國用 劉祿 杜豹

胡其侯大興人順治三年武進士初任山東登州府成山衛守備

兼管屯務遷江西提標左營中軍都司升四川撫標中軍遊擊署

松潘副將會蜀寇郝承裔降而復叛據雅州肆侵掠大軍分兩路

進一嚴總兵出嘉州一鄭提督出新津其侯率撫標兵從提督為

左右翼兩軍未合鄭先趨切雅界寇大至圍之數日其侯單騎入

手刃數十賊挾鄭出其侯中槍傷死於陣年四十二時順治十八

年正月二十八日也事聞贈參將廕一子

吳盡忠任縣人官山海關都司順治初土寇竄任縣乘夜擊走之

城賴以安六年賊再至騎掠郊外盡忠追至邢家灣單騎入賊圍

馬蹶被執唾罵不屈死事聞議卹如例

姚永燾宣化人父熙吾官陝西興安州知州值洵陽失守民爭避興安亂于永燾練勇衛之參將康國安薦其才擢興安中營都司順治三年叛賊孫守法倡亂率眾禦之賊攻兩月不能克糧盡援絕姦民內應啟門納賊被執不屈死焉

竇身吳橋人眇一目善騎射順治初土賊蠶起遊擊梁某被圍身率壯丁二十餘援之圍解梁使練鄉勇身教以技擊騎射法屢設伏敗賊賊畏之不敢犯秋大雨賊忽至卒數人往矢盡繼以短兵中矢死有司爲請卹立碑兄麟代其眾誓復仇賊屢敗懼而受撫王國用順天人劉祿昌平州人皆官把總順治九年李定國犯桂林城陷國用與祿巷戰死

杜豹大興人廣東遊擊順治十一年夏李定國陷高明豹被執不屈羈之舟中踰年大兵至定國敗走其部將恐豹內變乃殺之崖

門投戶海中事定議血有加

傅進忠河閒人順治十二年任廣東徐聞營遊擊時海賊陳奇策乘李定國之亂率舟犯廣州殺遊擊劉良卿十四年偕其黨鄧耀糾眾數萬劫麻涯村麻涯者徐聞所轄也進忠聞警疾馳剿之道遇水漲策馬先渡賊蠶至遂遇害詔贈騎都尉

王嘉楨字周維宛平武舉人歷任興化府遊擊順治十六年海寇擾仙遊率兵往援之戰輒捷賊切齒傾巢出嘉楨力戰死之事平賜卹廕同縣賈質官太平右營遊擊順治十六年海寇犯鎮江竄瓜洲質率眾禦之陷陣亡

何瑞字信孚元氏人武進士任廣東博羅城守備營守備順治十八年增城流寇蕭都等劫博羅瑞率兵禦之被刃傷猶殺三賊而死大府以狀聞賜雲騎尉



靳秉璋

王家珍 趙居中 王存智 郝時言

劉之屏 馬維熙

李雲起 張國賢

王昌運 梁國棟

曲良貴 張國纓

靳秉璋字伯升號鶴沙寧晉人  
 生而穎異十歲能文十三通古文  
 詞世父純元每館課擊節曰必亢吾宗  
 秉璋性純孝率子弟左右就養承歡  
 門內自相師友文望家聲為三輔重  
 明崇禎十五年舉於鄉順治三年成進  
 士授長治知縣以城民寥落行戶多賢  
 遷於鄉乃徧申上官革行戶以招商賈  
 又令鄉父老率子弟月吉讀法兼佐勸  
 農桑選民之俊秀立社學文風大興會  
 姜瓖叛雲中兵薄上黨秉璋與鎮道府  
 廳分當一面鎮兵內變殺知府開門迎  
 寇入秉璋巷戰被執逼授偽職痛罵之  
 下之獄士民保至城隍廟秉璋絕粒求  
 死士民羅拜泣曰潞安失守罪在總兵  
 公何死為秉璋曰事敗委咎於人非人  
 臣之義士民又泣謂曰殺身成名不如  
 殺身

成事秉璋曰殺身成事奈何一士附耳曰約潛出城迎王師某爲  
內應秉璋遂疾出事泄死之時年三十八嘉慶三年賜卹如例  
王家珍字季玉容城人幼能文以節義自雄順治二年由貢生授  
朔州知州五年總兵姜瓖叛守土者多竄逸家珍勵眾固守之守  
備張某爲內應開門延賊家珍奮力死戰被執不屈支解之每割  
一瓣問曰降乎血肉淋漓猶大罵不絕口全家殉焉亂平贈山西  
布政司參議邑人作孤忠傳記其事云

劉之屏字方伯萬全人順治三年進士授山西夏縣知縣會大同  
總兵姜瓖反中條山寇張武應之初武橫於鄉里之屏捕之力至  
是率眾犯夏境士民逃匿山中守禦者僅僕役數人或勸之避之  
屏叱曰我讀書三十年貧常絕食一旦受國恩來爲令城亡與亡  
避何忍爲遂埋印土中朝服坐北城上賊至索印不應擁至城隍

廟殺之事聞贈按察司僉事廕一子迎皓爲上林署丞時同死姜  
瓌之難者昌黎李雲起順治三年進士任山西黎城知縣沙河王  
昌運貢生任山西鄉寧縣知縣獻縣曲良貴貢生任山西興安州  
知州乾隆五十年追錄難廕雲起昌運世襲恩騎尉良貴贈布政  
司參議廕雲起子維階入太學廣昌趙居申順治五年舉人抗節  
不屈死樂亭馬維熙字天御順治初由拔貢生官忻州同知攝偏  
關廳事姜瓌叛被執不屈遇害贈忻州知州宛平張國賢字良輔  
明崇禎九年舉人順治五年官山西太原府同知戰不克死之其  
以武節著者大興梁國棟官陝西遊擊順治六年追賊入於隘賊  
黨四合被殺同縣張國纓偏關參將姜瓌變作時國纓已告疾聞  
變不去官出戰死之涿州王存智寶坻郝時言皆陝西守備順治  
六年姜瓌據大同賊黨攻榆林城陷存智時言巷戰賊執之不屈



死

楊三知

楊三知字知斯一字筠伯號茶庵長鄉人生而穎異能言見書卽索之讀九歲能屬文年十三補弟子員順治三年成進士除榆次知縣縣當省會衝要軍旅往來供應無虛日三知力爲撐柱民賴以紓五年大同總兵姜瓖叛連陷州縣攻榆次三知募鄉勇城守偃旗鼓示羸狀賊蠶擁薄城三知麾眾發矢石斃賊無算夜遣死士斫其營賊憤甚益兵圍之相持逾六月會親王尼堪援兵至賊敗走時主兵者俘別縣婦女百餘三知捐囊金贖之置廢所給衣食傳諭其家引歸完聚晉陽人感泣立祠祀之內擢兵部主事升郎中遷四川按察司僉事備兵松龍道丁內艱服闋補四川上東道地遭張獻忠亂慘戮居民百不存一二三知撫殘救弊開闢峒

籌招徠千三百家築堡渝東集爲安宅名其地曰楊公堡會裁天下監司歸僑居中州康熙十年分巡陝西神木道地界朔漠漢番互市時多斂數事三知推誠示信蕃目讐服宴安者三載十三年吳三桂叛雲南提督王輔臣邊將朱龍應之延安吳堡葭州相繼陷三知方入覲還至保德或止之無渡河曰死生命也余至則人心可戢脫不瀆城亡與亡而已抵鎮繕城隍修斥堠日夜爲守禦計賊騎薄城下三知登陴督眾守將孫崇雅開門納賊猝執三知命之降不從眾拔刃相擬脅取印敕又不與賊擁之至署三知給賊出趨妻妾子婦悉投井中自躍一井賊縋之出左肱已折幽之日夜誘降三知大罵不絕口賊怒闔扉驅人出其卒在門外聞掙擊聲殷殷震牆屋久之寂然啟扉視之三知死矣室無完器而身無傷痕人咸怪之十五年事平贈光祿寺少卿廕一子特予祭葬

蓋殊典云

王札

王札字又季一字皜青平谷人少聰穎讀書有夙悟學射藝絕傳  
偶慷慨尙意氣有機警順治五年由拔貢生爲襄陽知縣有巨盜  
六人爲害官府無敢誰何札率健卒捕之禽其二逸四人疾馳追  
及之盜反身以拒札掣佩刀斷一賊臂墜馬餘爲從者所執寘諸  
法論功遷甘肅靜寧知州靜寧地界秦蜀時平西王吳三桂蓄異  
志緣邊鎮將多私黨札憂之乃教技士儲器械署中養壯士五十  
餘人廐馬二百餘匹出入羽衛自從康熙十二年冬三桂果反踰  
年陝西提督王輔臣叛應三桂巡撫某議剿之札倍道馳謁巡撫  
謂輔臣部將刺殺經略激之變非輔臣志札請身往諭之可不煩  
甲兵定也巡撫頷之札以孫紱託舊吏李秉純誓死入秦見輔臣



曉以禍福反覆開導輔臣不聽札羈外館賦臨難詩四章自明序  
云余入仕途二十餘載晉階四秩圖盡職報國今遭逆亂罹俘馘  
之羞雖然主憂臣辱主辱臣死之訓不敢忘也聊賦短章以抒感  
憤次日賊黨脅之降不屈遇害事聞詔贈按察司副使廕一子入  
監

高顯辰

姚廷佐

劉派久

高顯辰字欽思灤州人順治五年舉人授德安知縣有膽略善理  
繁劇以迴避再補南寧郡丞升雲南知府時吳藩跋扈麾下倚勢  
虐民大吏莫敢誰何顯辰獨移文責諸將遇諸途則面折其過同  
僚爲之惴惴規以勿持虎鬚顯辰怒曰吾輩天子命吏何可詭隨  
異姓王之帳下兒耶尋吳逆變起逼授偽職顯辰不屈吳縛杖之  
發永昌軍安置乃服毒死妻戈自經女適滇臬李興元子毓秀亦

同時受害事聞贈太僕寺卿廕一子入監

姚廷佐字公良青縣人順治二年副貢生授河南布政司經歷署  
陳州原武宜陽息確山知縣以清慎名宜陽士民以豁除河地雜  
徭立碑頌德升騰越知州吳三桂變廷佐泣諭副將周元守備蘇  
輔臣等十七人練兵爲守禦計兵敗被禽舉家禁永昌吳逆平始  
脫於難

劉派久字繩顯威縣人順治五年舉人知永興縣值吳三桂兵圍  
城派久率兵晝夜捍禦有黨逆者說之降派久曰此吾致命時也  
益奮勵登城憤極氣塞仆地以死子麟昇櫬走兵燹中卒歸葬時  
謂臣忠子孝云

魏樾祥

魏樾祥字高意號麗榆柏鄉人大學士魏裔介之族叔也順治八

年以拔貢考授廣西桂林府通判管儲倉事出入公平檄修城池  
築營房五百間不勞民力升河東運副使革陋規修鹽池隄堰掣  
放鹽劬疏通引目巡鹽使者察其廉能委署鹽運使兩載國課無  
虧擢江甯府江防同知康熙十年旱蝗道殣相望捐俸振之江甯  
里甲併之均其役民便之升廣東潮州府知府修城濬隄造浮橋  
於鯤江滄長眉河直通城下商舶雲集檄屬縣革火耗釐錢糧積  
弊十三年會總兵劉某與續順公沈志祥有隙激之變設偽官使  
人誘榷祥脅以刃榷祥曰任爾所爲我惟一死報國耳徙居他宅  
鬱鬱成疾日拍案大罵十指血盡出卒以不食死祀鄉賢

劉嗣俊

姪延祉

馬宏儒

馬孔任

劉嗣俊字秀乾宣化人順治十五年武進士任湖南天柱營守備  
其姪延祉康熙六年武進士任湖北南漳守備吳三桂叛襄陽總



兵楊來嘉通賊遣人招降延祉延祉怒斬使焚書十三年八月戰賊土地嶺力竭陣亡明年逆兵逼長沙賊黨王守備李把總者持某千總書脅嗣俊降嗣俊率家丁環攻之手斬僞守備及從賊三人李擁眾逃追擊至白里洲遇逆援兵至圍數重戰久不得出被創而死時十二月二十五日也其家丁劉信田訪亦從擊賊同被害事聞賜祭葬祀鄉賢

馬宏儒字醅公宣化人明死難總兵馬爌子也順治十八年武進士授江西南昌衛守備陞雲南都司恤軍愛民多惠政吳三桂之變脅與叛不從以鐵椎椎其齒齒盡落終不屈羈城南貴豐街以兵守之不食死

馬孔任字肩尹東光人工詩善騎射好言兵中順治十一年武舉人任貴州威靈鎮守備滇南吳三桂叛隨總戎營江上戰十晝夜

賊屢敗三桂慕其勇謀招致之詭與總戎和一夕大風雨有舟泊營側孔任出視一卒曰總戎召君往議事甫登舟內出數健卒執之去三桂迫之降不可令執賤役居數載娶妻生數子密語妻曰我大清臣不能誅賊久羈此非人也妻曰當徐謀之值重陽夜攜梯城具登之躍下入江中浮沉數里遇救獲歸總戎命復舊官以老辭吳逆平妻攜子至東光已沒矣

趙登舉

胡鑣

鑣九世孫良臣

張善繼

趙登舉宣化人順治初從征流賊拔把總累遷江西南瑞鎮標遊擊康熙十三年耿精忠叛遣逆黨寇江西登舉赴袁州防守三月吳三桂犯湖南其黨康永綱潛窺袁州登舉邀禽之五月賊結湖南土寇攻袁州饒州參將程鳳叛從逆勢張甚安親王岳樂發大兵討之登舉守踏塘賊乘夜來犯伏於隘伺賊過半起擊之斷賊

爲二斬數十人禽十六人餘遁走巡撫董衛國上其功 上嘉獎之十月隨援進賢瑞州陣斬僞都督左棠榜十二月援奉新完其城十四年春大兵復饒州程鳳遁走衛國疏言饒州當兵燹後宜擇守令撫遺氓請擢登舉爲饒州參將以資捍禦 上從其請登舉乃偕知府郭萬國知縣王萬鑑繕關廂招流亡勤撫恤勢稍定五月賊圍廣信急登舉奉檄赴援行一日程鳳偵饒州虛潛出僞道薄城登舉聞警還救衝賊營而入禽前隊數人轉戰而前遇伏死之

胡鏞字日馭南樂人幼嗜書史軍興棄舉子業習劍術騎射順治九年成武進士除涿鹿守備招軍戶開墾荒田時與僚友習射賦詩有儒將風升貴州遊擊從征水西定黎苗稱首功封懷遠將軍再轉寧波府康熙十四年耿精忠遣逆黨窺寧波鏞駐大嵩衛謹



斥埃嚴巡緝屯隘口寇不能犯乃由温州海道出水師提督常進  
功檄鏖進剿次海門鏖以孤軍深入血戰潰圍而出台州石浦諸  
軍皆散走鏖獨當之接以短兵賊帥朱飛熊誘使降張目叱之放  
矢傷其額飛熊攻益急手刃二十餘人裹甲赴海死事聞贈參將  
廕一子九世孫良臣咸豐十一年署南樂城守營把總東匪竄境  
良臣與千總張鳳亭敗賊城外翌日賊大至眾驚散良臣戰死鳳  
亭格鬪刃數賊力竭陣亡子雲騎尉世職

張善繼磁州人幼習儒博覽羣書長爲孫吳學康熙六年武科鼎  
甲第二人八年授潮州城守營遊擊十三年吳耿變起善繼赴省  
謀討逆潮帥劉進忠陰遣腹弁楊希震赴閩獻款耿逆授僞盜粵  
將軍印翦辮歸與進忠謀以善繼剛方固執得眾心恐梗其事急  
分其所部眾改隸王承業李雲陳璉諸軍善繼歸麾下竟無一卒

乃謁進忠曰公不聞晉王敦乎武昌犯順直抵江寧威勢未嘗不  
赫然兵敗身死發瘞斬屍自古未有叛國而克令終者若至旄麾  
之下繫頸求活晚矣進忠怒幽之馬王廟有進士林應璧者亦被  
羈善繼與談古忠孝事相得甚歡日披覽史書不輟進忠屢遣人  
諭降終不屈每曰生難誅賊死當爲厲鬼復讎卒遇害事聞贈參  
將賜葬祭卹子守備

李進臣

王進忠

趙進禮

蔚之煥

李進臣宣化人任湖廣守備管彝陵鎮標水師後營遊擊康熙元  
年西山賊李來亨分據歸州巴東諸隘進臣逆戰龍馬溪賊敗走  
賊黨聚香溪隔江轟擊進臣渡江扼之焚其柵百餘歸州巴東盡  
復其城二年春來亨踞七連坪進臣冒險奪其隘賊退踞譚家寨  
通茅麓山周數十里三年春從總兵金萬鎰攻茅麓山中路山梁

奪木柵三石梁二直抵頭關山峻險賊以滾木播石拒之進臣受傷殞於陣樂亭王進忠官襄陽鎮前營遊擊康熙初同剿西山寇抵賊隘伏起中礮死順天趙進禮官黎靖協都司剿茅麓山賊有功再戰鄖西之黃龍山山峻險賊合圍轉戰三晝夜力盡死之大興蔚之煥官安陸府經歷轉運軍糧至興山縣七連坪賊來犯執之去脅降不屈支解死事定均賜卹

李興元

張國彥

劉士英

李向榮

傅桂芳

李興元字若始遵化州人從大兵入關以功授永平知府康熙十年授雲南按察使方正執法抑藩兵禁違禁牟利及準折民間子女士民德之會吳三桂變脅授偽職不從杖之下於獄尋拘禁蒙化府六年終不屈死子蔭秀奇秀從死卹贈太常卿廕一子入監陝西提督王輔臣邊將朱龍叛應三桂時大興張國彥官延綏中



路副將嬰城固守十四年賊黨數千至魚河逼國彥獻印不屈自  
刎國彥字翼公順治十五年武進士也事平賜祭廕一子河閒劉  
士英官邊營守備朱龍之亂弁兵皆降附士英不屈賊怒下士英  
獄已而令出與家人計議士英至家積薪舉火悉取衣貲投火中  
家人從之遂自剄未絕復擲身入火死妻郭妾李俱死之後康熙  
二十六年三桂將譚宏復叛冀州李向榮知四川劍州脅之不屈  
死大興傅桂芳官竹山營遊擊宏犯鄖陽拒戰死之

### 李崇道

李崇道字撫理清苑人官江西饒州稅課司大使康熙十三年遭  
耿精忠變城陷賊迫之降不從索其金詭曰解我待爲爾探吾囊  
賊信之崇道抽衣底小刀猛刺賊不中遂被害投尸江中事聞詔  
贈江南金山衛經歷賜祭一壇廕子郁監生

張朝臣

張朝臣字鼎望樂亭人康熙十五年武進士由萬金左衛守備歷遷浙江處州右營都司四十八年衢賊犯境與協都司孫奇豹前後夾擊兵潰遇害事聞贈安遠將軍廕子衛千總祀忠孝祠

李躍龍

王宗武 張芝馨

李躍龍順天人官把總康熙二十二年賊首劉國軒遁臺灣大兵進討國軒率賊二萬戰艦二百屯牛心灣山頭諸處環築礮臺勢甚張大兵出銅山抵澎湖與賊相持躍龍中礮死後康熙五十一年天地會匪林爽文倡亂臺灣遵化州王宗武官臺灣都司爽文攻彰化督兵力戰陷陣亡明年賊據嘉義南皮張芝馨時官臺灣淡水廳竹塹司巡檢守鹽水港力戰死之事聞均賜卹

姬登第

陳猛

傳三十一  
三  
姬登第邢臺人官監夏廣武營遊擊雍正元年青海羅藏丹津叛  
莊浪謝勒蘇番據卓子碁子兩山西監加爾多寺諸番應之二年  
上命四川提督岳鍾琪分路進剿登第出西監黃勝關擊賊碁子  
山賊敗奔乘勝逐北深入卓子山沒於陣登第家丁陳猛西域人  
也憨猛多力能倒曳奔馬躍而登城賊當之輒披靡登第死亦戰  
沒事聞登第賜廕一子祀昭忠祠

### 章倫

章倫清苑人保定衛學生員雍正十年署雲南普洱府同知以事  
赴省垣途遇思普等勾結元江苗人爲亂倫挺身往招諭之賊不  
聽露刃相向倫正坐罵之被害雲南總督上聞賜卹如例加贈知  
州入忠義祠子本仁廕縣丞乾隆六十年諭其曾孫耀宗世襲恩  
騎尉罔替



周大綸子琦 僕陳德 史謙

周大綸字理夫天津人乾隆二十年由貢生以訾爲鹽課大使分  
福建丁母憂服闋補平海縣丞廉慎儉樸官服皆破敝塵垢十月  
猶衣紗葛上官以爲迂以貧遣妻子歸孑然一官特立無偶尋調  
彰化邑民頑梗大綸日憂慮之時見於辭色任滿例引見辭於縣  
縣令見衣惡出所服贈之大綸以手揮曰蓄此所以飽賊也謁臺  
灣道告以民將畔狀道欲往察大綸不可曰驛馬船具足以擾民  
吏役假官勢科於縣縣復科於民是速其畔矣道怒假公事滯大  
綸於諸羅未幾賊匪林爽文果倡眾犯城遞至諸羅大綸憤然挺  
身入縣署縣令適與幕客對飲大綸至斥曰此何時尙飲酒耶令  
以無力遏賊辭惟待死而已大綸張目髯倒立睨縣令曰賊烏合  
眾諸羅民素尙義城雖孤以死力守之未必陷也朝廷建官命能

守不命能死坐致民逆死以塞責小丈夫耳恨恨出趨居民葉友伯家謀禦賊計是夜城陷賊入據縣署有突見大綸者呼以爹縛去敬其賢不忍殺勸之降大綸且罵且諭賊以掌摑頰大綸哭曰此顛爲賊污以首觸柱額裂血淋漓賊猶欲脅其從囚之其僕陳德日左右不少離揮之涕泣不去副賊何北海百計以勸大綸罵愈甚北海抽刀刺其乳德急抱持以身蔽賊擊之蹶大綸遂遇害德奪刃奮斫大聲呼曰吾與賊不兩立力格之斷德右臂亦支解死時乾隆五十一年十二月八日事大綸狀長八尺餘豐準口橫闊面火色鬚髯如蝟磔性坦直無顧忌以微職遊歷海疆垂二十一年洞悉利弊人以廉吏稱友伯嘉應州人商諸羅敬大綸剛直素敦好賊囚大綸獄中友伯冒危至懷二橋餅勸食既被害負其尸藁葬逮賊平掘之內骨蝘食盡心具存赤色炎炎大府上死事狀

予祭葬賜職雲騎尉長子琦材質穎異善騎射精力過人痛父骨  
未歸葬以廢官讓弟渡海至諸羅家故貧忍瘁逾險阻哀毀以卒  
大綸死時年五十一琦年三十八父子忠孝論者方之晉卞壺云  
史謙字昭和號牧庵宛平人生三歲失恃稍長謹飭若成人母沈  
病謙永夜侍左右藥餌必親嘗以進叔父知義嘗指謂戚友曰此  
吾家佳子弟乾隆二十八年由兵部則例館効力期滿選福建永  
安縣典史廉潔奉職凡縣有疑獄委以訊數語輒中要領不事鞭  
朴民德之蒞任二十年調臺灣鳳山縣老幼炷香送者百餘里不  
絕五十一年林爽文王芬倡亂陷彰化攻諸羅破之蔓延淡水淡  
水者鳳山屬地謙時攝巡檢事鳳山雖有參將守備諸武職所轄  
兵不過千餘平時分鎮淡水山豬毛都司者十之三防汛者復十  
之四守城者僅四百餘人城自康熙中隸版圖高不踰五尺又土



築不可恃賊且至境事急謙涕泣跪母前曰兒竟不克事老母終  
天年乎願老母自愛強飯無以兒爲念復顧其子善載曰吾食祿  
二十餘年力不能滅賊惟一死以報國爾母老矣在子惟吾在孫  
惟汝汝奉大母走匿西門外打鼓山義民吳世芳家其家濱海相  
時航海而北可也汝素謹愿當益勉爲成人孝事大母繼予未逮  
吾死瞑目矣謙既遣子奉母走匿遂與知縣湯大奎督民壯鄉勇  
同守城乘隙率眾擊賊賊大敗走謙與大奎追十餘里日中賊復  
集潛迤東而北猝攻北門殺千總丁得秋城遂陷謙持短刀巷戰  
賊蠶擁至不敵趨入縣署與大奎著朝服北行三叩禮未畢賊大  
至大奎自刎賊拔刀脅謙降謙大罵不屈遂被害賊怒謙擊賊力  
擲首於署外數十武百姓義謙者竊埋之時十二月十三日事也  
年五十三賊平善載啟棺改斂朝廷予葬祭銀賜世職雲騎尉

忠義傳一終

大清欽定四庫全書  
忠義傳卷三十六

忠義傳卷三十六

三三三

三



忠義傳一

大清畿輔先哲傳第三十七

天津徐世昌撰

孫維龍

羅載堂

常紀

倪鵬

周國衡

孫維龍字助堂宛平人乾隆二十五年進士選授黟縣知縣調鳳陽與卓異以罰俸銀未清部議降調引見仍以知縣用三十八年金川用兵發四川隨木里木營初索諾木之留僧格桑也陰使小金川番目出美諾溝煽故降番復叛攻陷提督董天弼營潛兵襲木果木時營兵尙萬餘會運糧夫役數千爭避入營將軍溫福堅閉壘不納轟而潰聲如壞堤軍心益震賊四面採入將軍以親兵百人搏戰與提督馬全牛天界皆死焉維龍出營門路壅塞不可以騎與家丁四人相扶而出且鬪且行至松林溝夜半月落賊然火照之維龍踞倚崖壁脫帽付其僕福兒曰我死於此矣汝持此

帽歸報主母知之遂拔刀自引決同死者合州吏目宛平羅載堂  
崇慶州知州常紀按察司照磨倪鵬秀山縣主簿周國衡納溪縣  
典史許濟游擊李棟綿而維龍死尤烈云維龍髯而工書嗜學若  
性命官黜縣時能以儒術爲治平訟寬征民有過犯僅予笞未嘗  
以惡相加公餘樂與士人談文藝邑志久失修加意蒐輯以成其  
書又博采邑中自宋迄今人之詩名樵貴谷詩選版行之其調鳳  
陽也明鳳陽太守顏容暄死流賊張獻忠之難賊焚其屍血漬石  
成人形民葬石獨山失其處維龍多方訪求竟得之自爲文勒碑  
以表其墓道人尤稱之事聞贈道銜

常紀字銘勳號徽廷承德人乾隆二十二年進士選授西充知縣  
修孔子廟葺學宮創建關帝祠宇邑故有晉城書院紀擇士之秀  
者自教之優給廩餼三人秋闈皆分校禮經稱得士而決獄尤明

敏有神君之頌再權南充遂寧其治一如西充三十六年金川番  
部叛侵沃日諸土司大府檄紀理糧餉供支三載無秋毫私以功  
遷崇慶州知州駐昔嶺仍理軍需初金川兩部酋長爲甥舅相脣  
齒我兵攻美諾溝覆其巢僧格桑竄走陰通索諾木謀再舉六月  
朔潛入美諾溝約降蠻合擊我師轉掠至木果木紀知不敵麾從  
者去提刀手刃數人賊圍刺之身被十餘創口不絕罵以死從者  
皆同殉無一遁去者時三十八年六月十日也年四十六大吏以  
狀聞贈中憲大夫恩卹道員給葬祭銀入祀昭忠祠廕子入監總  
督復建專祠於浣花溪岸祀同死事者額曰慰忠西充人哀思之  
不忘爲肖像神武廟旁哭祭之紀長於詩博覽好蓄古籍尙義立  
然諾重節概豪飲善射至今猶嘖嘖人口云

倪鵬臨榆人金川之役以四川縣丞借補按察司照磨督運軍餉



乾隆三十八年定邊將軍溫福屯木果木提督董天弼分屯底木  
達六月索諾木陰遣小金川頭人七圖安堵爾出美諾溝煽故番  
之降我者攻天弼戕之越山後劫木果木礮局斷水道運糧夫避  
入大營聲如沸軍遂潰溫福戰死鵬攜一書吏賊刃之無完膚賊  
去吏割其髮懷之事聞文武殉難者皆建祠鵬贈鑾儀衛經歷三  
十九年大兵征金川秀山縣典史盛河周國衡委赴澤耳多炭廠  
賊番圍之衝出至登春山梁遇害詔賜葬祭贈主簿入祀昭忠祠  
廕一子入監

李棟綿豐潤人乾隆二十八年武進士藍翎侍衛三十二年授山  
西殺虎口都司三十八年擢遊擊隨討金川六月賊窺簇拉角克  
山梁擊退之而木果木師大潰棟綿突圍出遇賊乾海子手刃三  
人中礮傷亡事定賜卹廕守備于衍祚襲

許濟東安人官四川納谿縣典史乾隆間大軍征金川調赴科多木果木之變濟與知縣程蔭桂分壘固守夜半賊從西山撲壓糧站以火攻之濟聞變挺長矛從後山出斃賊六七人將渡河賊曰此長人能殺人當先去之矢刃交下遂遇害

計宏謨樂亭人乾隆二十二年武進士官山西陽和營都司擢湖北竹山營遊擊從將軍阿桂征金川死於陣初乾隆十二年死金川之難有孟臣者宣化人官陝甘督標守備隨西安城守營參將沙亮往剿金川十二年五月攻格什戎岡奪其碉卡踰年春戰會達死之賜卹如例

賈慶檀

吳一鳴

酒天培

焦連登

陳傳虞

張奇

趙

賈慶檀字櫟園永清人舉乾隆三十六年武闈第一歷官河南王祿店營守備嘉慶元年調征川楚教匪戰荆門白雲山襄陽七里

山穀城沈家岡南漳倒座廟及蜀界畫石溝功最著四年四月戰藍號賊張漢潮於竹谿屢蹙之賊擾別營別營來乞援皆畏賊勢張不敢往慶檀獨請行帥卒三百人與武舉楊占偕途遇潰卒告以賊氣銳必勿往其親卒控馬諫曰我爲援師彼奔矣將誰援人眾我寡進必無功徒取辱耳慶檀叱曰援師殺賊耳彼奔賊固在奈何不見敵而返耶疾馳與賊遇眾且萬餘慶檀揮佩刀督三百人戰賊不敢攖其鋒潛出兩翼裹我師楊占戰死師遂潰慶檀施火器藥盡左右射矢盡掣佩刀刃數十人透圍出佩刀折率從卒三人將由閒道歸至九里岡復遇賊遮鬪之慶檀謂從卒曰吾死矣汝等速去他日收吾骨焉瞋目大呼徒手搏賊死之翌日三卒一得歸率其伍尋得尸以衫袂蒙面有創自胸達於背眾皆哭昇歸具冠服斂之年五十二事聞贈卹有加予祭葬入祀昭忠祠



吳一鳴字聞九灤州人乾隆五十一年武舉人授山東曹州營守備嘉慶元年陝西教匪起防黃河蘭陽口二年隨興安軍剿賊漢陰鎮身爲前驅賊敗走體受重創四年傷愈引隊出遇賊孟石嶺躬率步騎三百人殊死戰殺傷過當賊眾卻會大雨援絕賊嘯眾擊之遂遇害贈四品服賜銀卹葬入祀昭忠祠世襲雲騎尉食半俸

酒天培正定人由外委累遷陝西建安堡都司嘉慶初從征教匪賊竄甯陝廳折而東遁餘賊出夫子關北竄老魚壩將渡江提督慶成擊退之匿黑溝乘夜風雨逸出我兵分路追捕殺之殆盡餘賊匿林箐天培至猝受矛傷而死事聞賜卹如例給雲騎尉世職焦連登長垣人乾隆四十八年武舉人官江蘇衛運糧千總嘉慶十八年連登偕族弟孟林莫義勇戰教匪毀其巢禽賊首羅文治

賊怒擁眾大至連登益林皆戰死族人諸生玉峯武生福德監生連科皆被執不屈死

陳傳虞字祚隆邢臺人少貧勇敢年二十爲武生乾隆六十年湖北教匪亂與鄉人張奇趙三變同入軍伍隸將軍慶成陷陣先登授行營外委慶成還都改隸將軍恆瑞失軍機褫職傳虞思立功自贖角逐盜首王三槐齊二寡婦鎗傷其領負痛戰益力尾賊至大鵬寨陷於陣遂沒賊平賜祭葬附祀昭忠祠

張奇勇敢有氣節乾隆六十年教匪之亂奇與陳傳虞趙三變俱爲慶成所知而奇爲之冠戰賊河南鄧州授行營外委又戰於鄆陽有卻敵功會慶成還都更隸將軍恆瑞嘉慶三年賊竄入川將軍移軍逼之奇先登殲賊奪其械而背負矢傷鏃深入將軍爲出之談笑自若再戰應山縣大神山傷首剝甚將軍痛甚不復生卽

授行營都司親爲易冠頂未幾病愈復從戰靜邊寺迫賊於險殺  
數人賊首王三槐逸賊由是隱識之後戰黃渡河對山而軍馬蹶  
被執賊愛其勇欲降之奇罵之不從賊怒置之大釜中遂遇害時  
七月十日也是役也賊畏官軍甚立山頭僞張聲勢至夜空寨而  
遁將軍命覓奇尸得之大釜中賊平賜祭葬入昭忠祠

趙三變武生慷慨有大志湖北教匪起曰此人生立功會也嘉慶  
元年十一月杪隨慶將軍戰於竹林橋有殺賊功授行營外委賊  
識其勇邀促之於張家集被數創奮身不顧手刃數人至李家集  
賊眾麇集圍之兵盡力竭沒於陣事聞賜祭葬祀昭忠祠

章潮字東源天津人以國學生納訾授四川長壽縣典史恤囚捕  
盜有賢聲嘉慶二年冬教匪滋事竄縣境勢猖獗莫能制潮曰區  
區小醜何懼爲同守備夏繼先率兵禦之士民皆願從潮眾軍戰



不能敵賊蜂擁至虜潮去迫之降潮怒詈曰勿多言速殺我速殺我繫行三十里潮罵益厲賊榜之劊其腹出腸掛樹上死死之日顏面不改如常時事聞賜祭葬入祀昭忠祠世襲雲騎尉

### 董凝川

董凝川撫盜人乾隆四十八年武舉選貴州鎮遠鎮守備升湖北襄陽鎮都司六十年隨副都統福凝剿苗匪以偏師扼其後大敗之賊擾高村凝川分兵設伏躬率精卒突之賊驚潰伏發斬獲殆盡擢湖南永州鎮標遊擊嘉慶元年擊賊於辛女谿有功賊復踞旗鼓寨謀撲營凝川擊卻之賞花翎九月馬山逆苗掠田禾凝川禽其魁餘黨悉降獲輜重無算以功升湖北興國營參將教匪林之華踞黃柏高嶺頭諸要隘凝川隨總兵慶溥迎擊賊大潰二年出天池口襲雷家坳遇黃柏山匪伺謀渡河而逸截之殲其黨

三百人慶溥攻王家灣凝川偕守備周定界分兵夾擊克之林之  
華遣其黨襲守備李光晟營凝川馳往援戮賊目一人餘悉遁賞  
健勇巴圖魯名號三年隨副都統額勒登保進剿終報山登峯奪  
隘揮兵魚貫進獲其渠賊竄巴東凝川率兵截擊賊不敢前乃屯  
軍白雲山賊兩路來犯與副將廣福分擊之賊大潰走張漢潮糾  
黨攻荆門留其半踞石橋凝川倍道赴援賊敗而南竄巡撫景安  
伏兵禦之凝川適踵至後港賊爭渡礮擊之退走丁家集遇伏狂  
奔逐北數十里捕斬過當四年張添倫率眾撲開楊坪邊隘凝川  
率援兵至坪已破矣衝其後隊賊竄龍王壩撲竹谿縣城凝川追  
至戰兩日礮斃賊酋眾潰乘勢蹴之敗諸潘口十轉山上優獎  
之賊有高均漙者竄雲路溝擊敗之奔梓桐壩凝川出峩坪迎擊  
殲二百餘人進追潰匪抵梓桐壩叢林中匿賊棄馬而奔凝川徒

步從之賊磨眾反鬪手刃十餘人力竭死於陣事聞賜卹如例世職雲騎尉

### 陳元燮

陳元燮易州人乾隆間武進士授廣西守備積功至游擊隨總督孫士毅出征安南身為軍先直抵富良江攻黎京克之以賊情反覆隨士毅回鎮且戰且走七晝夜行二千餘里擢參將乾隆六十年湖南苗匪石柳鄧作亂福康安命率三千人當前敵元燮身先士卒無戰不克苗疆既定隨剿貴州南籠府狃苗道廣西任所不入星馳赴軍攻破洞灑當文賊穴獲苗首王囊仙七絡鬚諸匪染瘴卒於軍奉旨入祀昭忠祠著有軍營紀略

### 高舉

金廷勳

金克俊

李鍾

高舉大興人乾隆閒官湖北襄陽府通判改宜昌嘉慶初教匪張



正謨踞老巢不出舉隨都統惠齡督兵搗其穴禽獲無算敘功擢同知二年留守黃龍鋪護軍統領阿桂薩朗偵知賊竄陝西鎮安縣率兵迎剿困於賊舉率子堯馳救之被戕死事聞賜卹如例子雲騎尉世職同縣金廷勳嘉慶初官建陽巡檢教匪之亂率民勇捕之被害金克俊乾隆四十五年舉人知湖北房縣大府委辦糧臺戰賊死高澗河李鍾官襄陽司獄亦辦糧站死均州之周府菴

張發祥

張德飛 崔陞

王武年 劉揮

武文玉 楊開第

閃煜龍 李廷彪

傅成明 王宏信

溫振

賢

張發祥宣化人官張家口協右營千總嘉慶初奉檄剿陝寇悍賊馬五竄堰口發祥隨副將李天林出土地嶺進擊之殲百餘人斃賊目數人賊伏林莽間突出搏戰力竭死於陣事平賜卹如例世職雲騎尉子琮襲時同死教匪之難者同里張德飛宣化鎮左營

忠義二 七

千總嘉慶元年奉檄征湖北教匪殉於襄陽雙溝王武年官遵化營把總嘉慶四年從征陝西禦賊於漢潮兵潰而死萬全武文玉昌平貫市汛把總嘉慶三年征四川陣亡賜贈如例世襲雲騎尉延慶州閃煜龍乾隆四十年進士授侍衛歷官陝西寧羌營遊擊嘉慶元年從軍湖北力戰死易州傅成明武進士歷官參將嘉慶元年剿賊孝感縣境遇伏陣亡廣昌崔陞官把總嘉慶元年從征四川教匪戰死沙溪灣慶雲劉揮乾隆五十八年武進士任甘州守備時教匪竄入陝甘揮隸大軍捕賊有斬獲功護理遊擊嘉慶三年戰於鞏昌什州鎮盤龍山陣亡詔賜祭葬蔭一子祀昭忠祠涿州楊開第字名元乾隆五十四年武進士授山西平坦營守備嘉慶元年從軍陝甘死於陣密雲李廷彪嘉慶元年以千總從征陝西教匪有戰功遷守備踰年擢忠順營都司六年賊張添倫竄

監羌州提督慶成督兵剿之賊奔流河坡廷彪偕參將吳亨衍奮  
勇衝突捕斬百數十人賊大潰七年賊踞略陽沔縣老林檄廷彪  
往平之乘夜進猝與賊遇力戰沒於陣事聞賜卹如例世職雲騎  
尉承德王宏信官河屯協守備嘉慶三年宏信隸經畧勒保軍從  
征四川以戰功晉遊擊賜巴圖魯勇號一日平明勒保薄賊壘覘  
虛實宏信以數騎從遇伏困垓中奮擊衝突翼保出賊大至馬躓  
矢鏃蝟集猶手刃數賊力竭而死事聞賜卹如例祀昭忠祠同時  
死難者凡二十五人樂亭溫振賢倂城汎經制外委嘉慶元年從  
征川湖教匪戰敗被執不屈支解死均賜卹崇祀忠義祠

### 王鴻儀

王鴻儀字雲衢天津人嘉慶六年武進士累官烏魯木齊中軍參  
將道光六年逆回張格爾陷喀什噶爾城英吉沙爾葉爾羌和闐



三城相繼陷戕兵民燬廨舍偪渾巴什阿距阿克蘇八十里烏什庫車戒嚴阿克蘇辦事大臣檄鴻儀率屯田兵六百拒賊于都齊特台賊以四千騎往來馳驟鴻儀力戰捕斬六百餘人彈藥竭沒於陣八年平蒙贈卹

李廷煥

弟廷燮

李廷煥字鑿泉遵化州人嘉慶十八年以副貢生補雲南廣西直隸州州判權牧令丞倖者七嘗謂滇境鄰苗疆戢暴卽所以安良故所至以捕盜爲第一急務道光間文山儂匪叛戕縣丞大府檄廷煥署丞篆率眾掩捕中途賊伏起兵役潰走廷煥死之先是廷煥獲盜沈某廉其情釋之沈感泣改行及聞變誓復仇攜數十人直搗賊巢禽其渠餘黨盡伏辜廷煥有弟廷燮字梅叔道光十二年舉於鄉大挑一等以知縣分陝西咸豐二年運鑲道嶠函山水

暴發溺死疆吏上其事兄弟同膺賜卹予世職雲騎尉

駱六  
耿德芳

駱六寶坻人幼爲編修陶樑僕嘉慶十八年六侍主人文穎館校書時仁宗秋獮木蘭逆賊林清勾結內監張泰王福祿劉德才爲亂京師大震適數賊入文穎館六藏主人複室中扃其戶而自索器謀拒之苦無械乃折棹足持與鬪賊削以刀斷四指暈而仆賊入室虛無人遂去時隸役數人伏草中出而閉館門樑與諸人共守之須臾城內外兵大集賊鳥獸散樑在館與隸數人日食糜一餐已三日矣聞有叩門者出見駱六殊未死移歸寓漸蘇厚待之樑後每陸見宣宗輒問義僕駱六尙在否陶養之終其身六嘗曰我一細民徒以一時報主之誠遂忘其身設當日者畢命草莽與螻蟻何異也乃屢蒙天語垂詢而主人又象養之不以僕隸

視我其榮多矣六誠樸無機械變詐習年七十卒於家有田二頃  
 皆樑所賜也後四十年有耿德芳者三河人肥鄉知縣楊毓楠家  
 人也忠誠英敏毓楠練勇使領隊御軍嚴整得士卒心隨道員祝  
 壇藩司王榕吉屢立戰功保把總加六品銜同治二年六月戰宋  
 景詩於甘家屯沒於陣附祀昭忠祠

鹿丕宗

從子傳斌

石均

鹿丕宗字杰人號簡堂定興人鹽運使奎之子也嘉慶十八年拔  
 貢授知縣道光二十年揀發貴州到黔七日適開州有逆案囚未  
 得前牧獲罪無敢代大吏委丕宗至不逾月囚就禽前官免戍大  
 吏以功歸他人丕宗至卒不言功補授施秉知縣霖雨為災居民  
 漂沒丕宗發倉施粥全活萬計署桐梓縣甫下車斷一疑獄闔邑  
 稱神時溫水邪教初發密捕之賊不敢犯巡撫賀長齡奏擢平越



州知州代償前任官虧七千餘金權台拱廳事台拱居亂山中素  
爲盜藪丕宗微行密訪獲巨盜數十百人悉杖殺之苗民駭伏二  
十四年升都勻府知府三十年粵西髮逆陷河池思恩諸郡將寇  
勻荔波獨山六硿平浪等屬均戒嚴丕宗馳往度形勢修碉卡練  
鄉兵更誘降人爲偵遂禽逆首朱三何大及凡百餘人賊東竄境  
獲安同官貪功丕宗以實上幾獲譴咸豐二年護貴東兵備道秋  
教匪游二踞山穴中糾眾千人謀通粵寇丕宗潛率兵擣其巢掩  
捕之生執匪首游二林鳳儀五年遵義賊楊鳳由安順竄攻麻哈  
丕宗督兵往援賊聞宵遁丕宗追及黃平州之重安江賊急渡多  
死亡鳳就禽奉旨賞花翎是年下游苗叛台拱巡撫議撫丕宗請  
曰撫非計也不若以破楊鳳之師還擊之勝則諭以大義使獻其  
首而免其餘如此則逆黨可平而黔地可安也今彼方聚眾肆行

而遠言撫不惟不知恩反以我爲怯必不受撫待其不受而用兵則曠日持久羽翼成矣不納苗果不聽殺招安二官勢益熾巡撫始悔急徵兵兵未至賊連陷數城咸豐五年七月逼都勻鄉團與戰不利時城中兵僅二百餉亦匱苗擾於西龍里貴定教匪起於東合攻府城丕宗設守備更募民訓練之令一軍駐城外與城上相犄角登城督戰左右多中礮死不爲動設哨城東山上伺賊動靜屢出奇兵擊之輒大勝賊不能攻乃分眾據谷硎絕糧道援兵不能進城中食且盡死亡相繼丕宗以忠義激勵士民眾咸願死守六年七月被圍已歲餘矣援兵始至總督恆春惑人言疑其虛張謂勻境無賊遂檄援兵他往丕宗請留兵兼陳賊勢爭之再不聽且摘其任後十八日賊乘夜急攻城遂陷丕宗與其妻蕭氏焚死奴婢從死者六人提督孝順巡撫蔣霽遠奏入特照三品例議

卹恩給騎都尉世職國史立傳勅建專祠祀京師保定都勻昭忠祠諡壯節從子傳斌字儀軒有氣節咸豐三年從兄傳洵爲河南信陽知州粵逆犯境傳斌率勇迎擊或止之傳斌曰吾爲忠節後得致命王事夫何憾力戰死之同治初詔旌卹入祀昭忠祠明年知府石均亦死於難

石均字竹生灤州人授朗岱同知苗人困城三月均率眾登陴力禦食且盡適某參將兵過境賊疑援至解圍去巡撫蔣蔚遠以守城功保升知府檄署都勻謂曰都勻衝要地苗破城屢矣非君不勝任均以無兵辭不允託妻子於巡撫慨然抵官未逾月苗匪亂作城陷罵賊死時咸豐七年八月朔日也長子鏊聞耗往尋父屍不得數日遇柝卒指示鼓樓旁以蘆席蔽者啟視之果均尸也體無完膚左手失四指口無舌惟面目如生鏊見狀痛幾絕具棺斂



葬事聞賜卹予世職整竟以毀卒

### 史鵠

史鵠肥鄉人習韜鈴精騎射中嘉慶十九年一甲第二名武進士由侍衛授高州鎮標遊擊署欽雷二營參將雷州北虎傷人鵠單騎馳逐一箭射之殪患遂絕軍民建祠祀之道光十二年湖南猺匪竄廣東調赴連州防守遇賊余高汎殺數十人槍傷其股陣亡事聞賜祭葬世襲雲騎尉職同治二年入祀忠義祠

### 魏亨達

劉西園

周鳴鹿

魏亨達昌黎人嘉慶二十四年舉人歷官江甯知府咸豐三年髮賊陷城死之贈太僕卿世襲雲騎尉

劉西園字爽庭靈津人道光三十四年舉人咸豐三年以知縣試安徽兩署南陵涇縣知縣八年卸事旋甯國府理糧臺兼治團練

賊大至捕斬三百餘力竭被執罵賊死府南門外其父尋其尸亦  
遇害光緒五年給雲騎尉世職次完時給予恩騎尉世襲罔替  
周鳴鹿南和進士知瑞昌縣建義倉興學校設粥廠振飢民勸望  
與民讀法講忠孝大義政聲翕然咸豐三年粵匪下漢江窺豫章  
大府檄往省防守賊抵望仙鄉率眾迎擊戰一晝夜援絕死之事  
聞議卹如例祀江西昭忠祠

徐培

字式璟

田彬

喬書年

金本

徐培字芳田天津人道光二年舉人官內閣中書外授江西袁州  
府同知改廣西梧州同知咸豐元年署泗州知府賊陷西林犯府  
城培扼要以守城賴以全以軍報遲革職留任調署太平知府四  
年賊擾府屬杭州廳培馳往擊之賊敗走乘勝渡河遇伏賊刺其  
馬培墮地躍起揮刀殺賊一人眾矛叢刺之殉焉巡撫勞崇光疏

聞優卹世襲雲騎尉職朱式璟字心石亦天津人道光九年進士授刑部主事擢員外郎總辦秋審升郎中外授福建延平知府署汀州同知咸豐七年江西賊竄入閩陷邵武圍建寧總督王懿德集兵守汀州未至城陷式璟攜一子一孫投河死贈太僕寺少卿世襲騎都尉咸豐十一年同縣田彬任江西瀘溪知縣奉檄往江蘇四月蘇城陷彬殉難死了席珍女三姑孫女多姐妾張氏同遇害喬書年任山東沂水縣丞八月率勇戰敗受重傷陣亡彬字小農道光十五年舉人又同縣有金本者湖北漢陽府通判咸豐四年武昌陷被執不屈死贈卹如例

金光筋

田履安

金光筋字念直號濂石天津人父鎔官江南光筋奉大母胡就養廨齋留心吏治箋注律例成帙爲法家所服以例得通判發甘肅



署巴燕戎格通判回番向爲民害官不敢誰何光筭獨往捕之傷  
臂久之改安徽知縣會大水青陽令虐民督賦急民且變巡撫檄  
光筭往視之單騎至呼父老以大義曉之事頓解署定遠縣故多  
盜不時巡鄉雖甚寒暑若小疾無間捕治者多鑪橋土匪陳小喚  
子暴鄉里手刃之民大快移壽州讞繫囚旬日結案九十餘獄一  
空咸豐二年旌德呂賢基薦其才命赴廣西軍大吏以寇逼江淮  
留之明年安慶陷壽州姦民謀亂光筭方巡部馳歸夜漏三下入  
城獄囚有逾垣者手戮數人詰旦集士庶議團練數日戰守之具  
皆備陸遐林者定遠巨盜也幽安慶獄粵賊破城出之歸結黨爲  
北路諸郡應人呼之爲陸王巡撫周天爵時爲欽差大臣檄定遠  
令葛某禽之令辭曰遐林糾逆黨數萬某庸懦無能爲必欲禽者  
其壽州金刺史乎天爵飛檄召之將行壽州士民請曰使君旦去

則壽州多以亂光筋曰欽差檄不可違當親往謝之數日即歸無慮也至則天爵命將三千人往討光筋曰退林眾巨萬三萬人亦不能克也天爵大驚光筋曰公無慮當往取之啞某者光筋之戚也不能言獨負奇勇名淮上嘗被短褐匿二刃飛行取人首莫敢嬰其鋒光筋捕羣盜輒呼啞者俱盜聞啞者來戰慄不敢動輒就縛光筋乃偕啞者直抵賊巢至賊重濠大柵門内外刀戟聲相摩光筋給言與退林有舊請入見直入室見八人卧榻上大呼曰陸王安在退林震其聲立起曰我是也則啞者出不意繫之七人者皆大驚爭拔刀擬光筋首光筋出其頂戴置案上大言曰我壽州知州金光筋也奉欽差命召陸王周公謂陸王豪傑薦諸朝將大用之繫者啞某此朝廷法非有他也敢動者斬退林既情光筋威又習聞啞者勇力已繫吭矣動輒死私幸欽差召且薦遂聽命

焉於是遐林父子五人及其黨四十餘隨陸王蒲伏行轅門外天  
爵聞光筋至突出抱持之褫其冠易以花翎藍頂曰遐林巨憖言  
慮其南連粵匪爲大患故星夜督兵來君乃探囊取之吾復何憂  
哉專疏薦於朝已而賊連陷臨淮鳳陽懷遠距壽皆百餘里光筋  
率鄉勇堵防兩河口以東植竹籤立水營八公山北雜張旗幟嶺  
腰木杪徧設疑兵分列礮石於羣山之隘州人談家寶鳳台張茂  
黨眾數千皆降賊當前驅爲效死是冬廬州陷江忠源殉焉四年  
六安繼陷寇勢甚張烽火四面達壽州正陽關者淮南北門戶也  
距州城六十里光筋念守城不若守關乃據關爲屯迎擊之戰酣  
兩大至火器不能然賊別軍突自旁出光筋歎曰天也欲死之左  
右曰公死城必陷宜速退守城城陷死未晚也光筋然之乃設疑  
陣且前且卻退阻小河無舟不得渡頃之居民拏舟來曰小人有



母妻及子買此舟以避難也子號哭不行而止天殆遺此舟以渡我賢父母乎遂全師而濟賊先後五攻輒敗退不得逞大軍攻廬無後顧憂者光筋力也時于家圍匪季學盛聚眾數千而馬四馬五陳季四汪履祥吳雲程尹傳貴等出沒州境糾合定遠六安霍邱合肥諸賊數十黨黨皆數千人討之兩年皆破滅五年大軍復廬州大府檄光筋爲州守壽民請留不得夜分輕騎出城燈火熒熒見其去皆大哭失聲光筋亦淚下旣至廬則益嚴斥候討軍實一夕火起馳救之令曰譁者斬一人譁禽之又縛跣足婦四人皆賊謀也合肥匪顧四匿城中陋巷夜潛至其處誅之無知者民咸以爲神六年大旱蝗赤地千里光筋歎曰淮南羸敝極矣胡克堪此乃設局平糶下其法無爲廬巢巨匪王亮彩鄧三虎煽飢民爲亂勦滅之全活流民十萬計巡撫福濟列治行以聞譽廬鳳穎道

當是時粵寇新破江南軍淮上擒大燬向榮卒和春代爲帥巡撫不能軍袁甲三再起軍淮上擒益趨而南淮南大震光筮甫至臨淮擒首張洛行已破周鎮王莊犯三十里鋪光筮渡河背水爲陣令曰進則生退則死死於敵不勝死於水耶乃三其軍手然大礮誤擊地地陷齧指血祭之再發血流二三里賊佯走光筮曰此詐也令勿追賊旋從左右兜圍之光筮率中軍截擊賊後隊踵至今左右軍合擊之呼聲動天地無不一當百賊大敗死者不可數是役也賊數萬騎縱橫四十里光筮兵僅八百人無一傷者頃之賊復陷無爲巢縣明年撫部檄守柘臯柘臯廬之屏障也會疾作回臨淮二月蘇擒龔擒大掠正陽關光筮興疾出師半日行七十里至霍邱戰賊於郊呼援城中無應者迺退師城遂陷而粵寇陳玉成復出桐城破六安水陸竝進直抵關眾大驚議退保臨淮全廬

州後路光筭曰是怯也吾守壽州賊必懼我躡其後若不支有死而已遂入壽初和春去廬州淮南將咸出光筭下巡撫遂命統廬軍爲特將屯戍旣廣戲下裁千人父老望見旌纛歡呼聲滿山谷光筭慰曰無恐吾與此城存亡耳壽故多壯士皆攘臂登陴輸芻糧治守具賊圍之數日置地雷光筭用地聽法破其術地聽者掘塹橫鉦水甕上以瞽者聽之穴至鉦漾水作聲蓋墨子法也一日藥庫火從容偵獲數十賊謀斬之城上多列旗幟數數更易亂賊目更募死士李士甲等夜縋城出斫賊營取賊首級以歸賊輒驚沸有聲光筭曰懼我矣圍城之八夕雲霧漫崖谷銜枚出設伏八公山分三道襲賊營舉火爲應賊驚潰自相踐踏戰一夕鏟賊壘悉平遲明見積尸滿野遺履百餘車敘功加按察使銜遂進攻正陽殲滅唐家店枸杞圍諸賊禽逆首吳守剛張定邦楊得應等



屯師三十里鋪令知縣劉錫齡守備黃鳴鐸遊擊成桂吉昌率水師會於黃天澗毀賊營四十餘座捕殺四千餘人淮水盡赤環攻五晝夜三登三卻夜復正陽關賞鏗色巴圖魯勇號值張洛行敗三河尖益東犯光筭屯淮上拒之粵賊偵其出潛師復陷正陽聞警馳還賊立營於沫河口屠家寨一鼓下之直擣北關會督師勝保抵八里塚隔河而軍議造浮橋未成賊突至光筭居洲中左持矛右握纛一躍登岸兵僅千人自辰至未戰不利勝保忌其功坐視不爲助必欲致之死左右奪光筭胄請走不許轉戰歿於河時咸豐七年閏五月四日也年四十二尸屹立水中顏色如生弁兵護之歸壽民皆縞素哭失聲先州有童謠云老將勝小將天西風吹斷壽陽橋至是果應事聞 上嘉悼命視布政使陣亡例賜卹予諡剛愍祀昭忠建專祠世襲騎都尉光筭忠孝本於天性常謂

弟思度耀庚曰時事日棘吾必死雙親春秋高侍養事汝二人任  
之言訖淚下正陽陷時與幕賓汪榮桂曰吾自英兵起便以身許  
國何待今日耶平生節儉廉潔守正不阿軍興廳事不設譙妻子  
或彌月不相見在軍食藜藿藉草辱與士卒同甘苦蠲一切陋規  
所至卻供張曰我取於彼彼取於民民方倒懸不能解轉累之乎  
大帥行營相距數十里不通一柬以是失勝保心在壽州道某巡  
河從者求站費欲置諸法乞哀乃釋之守廬州時和春卒奪民財  
治以法慎舉僚屬謂中人以下無不以得失爲心稍靳之使有所  
羨斯可盡其力用兵善持重多勝少敗追賊正陽關外所過隘口  
賊皆紛書畏服君威幸勿窮追字賊中以黑虎目之再入壽州賊  
酋陳玉成聞之跌足曰事不濟矣令其下裹糧而宿夜聞風葉聲  
輒起視然光筓每勝歸輒愀然不樂曰死者皆民也甘心爲賊者

十之一二耳忍以民命爲功耶其論兵嘗曰上則操必勝之術次則立不敗之地上雖高於次次實要於上兵法所謂先爲不可勝以待敵之可勝也又曰大兵宜攻不宜守郡縣吏宜守四境不宜守孤城識者歎爲名言軍暇時時賦詩道其志有古名將之風焉死之前夕大星隕屯北光筋懼詔諸將戒之及是光筋竟當之柩出臨淮五河送祭者凡數千人逢其誕日闔境焚香熟酒以誌遺愛自光筋沒淮上無大將苗沛霖遂圍巡撫反壽州捻益熾故士大夫尤悲之云同縣田履安從光筋久歷戰以功薦升副將記名總兵賜果勇巴圖魯咸豐六年正月戰賊湖北天門縣尹滢河受重創數十陣亡年三十二事聞優卹如例

李右文

子傑

弟偉文

從弟載文

李右文原名佩文字伯蘭通州人父如瑗以孝友稱右文道光十



一年舉人咸豐三年選湖南東安知縣適髮逆犯天津留辦團練五年赴官以弟偉文官浙江迂道往視抵浙聞湖南道梗其仲弟翰文自天津馳書勸阻季弟亦苦留皆不聽毅然之任檄署新寧其邑兩經寇亂戶口流亡右文招集撫循凋敝復振七年以最調祁陽時從弟載文守粵西殉難死仲弟又勸歸慨然曰死生命也使得捐頂踵報國是得死所也何慮爲復回東安任士民相慶謂賢父母至矣八年春湖南境賊退右文謂眾曰賊敗他竄耳不可恃訓練民團置倉穀數千石備不虞費不足則出廉俸助之政聲日起九年賊酋石達開由江西竄湖南所過皆望風遁數日逼東安新寧士庶數百人來迎請避之右文曰我去誰爲守此土者賊至復請護家口出境又曰是爲民倡也卻其請竝遣之去眾依依不忍去助之守城三月初六日賊屬集城卑四面皆山賊環瞰之

勢岌岌援兵抵境前鋒挫不得前右文督團勇登陴力禦新盜土  
眾亦揮淚誓師眾皆哭誓死敵右文親冒礮石七晝夜目未交睫  
斃城下賊甚多十三日城陷巷戰受重創手刃數賊力竭死時年  
五十八子傑及舉家男女僕妾皆從死幼孫本立匿民間得免新  
盜數百人亦先後戰死賊銜右文轟殺燻其尸事定僅得脊骨  
歸葬焉上聞視道員例賜卹本籍建祠祀之隨殉諸人竝附祀  
傑原名慶護字小蘭幼好弄廢學及長有幹略侍父湖南襄督練  
勇能任艱鉅父倚其力爲納粟就縣丞以其勇敢改名傑敘功擢  
知縣賊逼東安右文知不免作書與兩弟訣命傑齋往蓋欲生之  
也傑不忍去又不忍逆父命潛匿署左右觀變及賊至率練勇登  
城守南門賊陷東門入聞警趨父所未至遇害死尸亦焚焉年三  
十一

傳三十一  
偉文字右卿邑諸生屢試不第納粟爲縣尹咸豐六年權浙江烏程縣有循聲十年粵逆犯杭州上官委辦軍需家人勸之去偉文曰旣仕烏能逸募畫工狀其貌付妻孥曰此我遺像也二月城陷自縊家人奔救復甦罵曰我清白吏肯污賊刃耶今得死所將從伯兄於地下矣卒縊死年四十六

載文字潞帆少力學好馳馬擊劍性坦率務大節不事小察侍二親疾能先意視聽人稱孝子道光二十四年舉人試禮部不第適粵亂且劇選人畏之載文慨然出應發廣西以知縣用廉直自矢不肯脂韋從俗大吏知其才多畀以難事署馬平縣時粵逆洪秀全犯桂林馬平賊李志信聚眾爲應載文悉力勤捕與賊齟齬久賊懸十萬金購載文首巡撫勞崇光上其功得旨以同知用尋調平南地濱江爲梧州門戶毗連潯藤柳慶艇匪有大鯉魚大頭羊



者最凶獷時出劫掠五年由梧上竄陷潯州分擾平南載文禦之  
渡口轟沈其船匪退泊三角背由磐石平田進撲南北兩岸載文  
潛兵襲其後乘勢蹙之殲斃無算敘功擢直隸州賞戴花翎六年  
匪復集水陸環攻礮台十有二悉轟毀載文搜城固守會積雨水  
暴漲城不沒者數板賊艇薄睥睨載文乘城三戰皆捷久之饑匱  
兵力不支困重圍者七十餘日告急文數十上大吏置不問載文  
忤事不濟遣親僕從閒道裏印出屬曰若繳印大吏卽報我殉國  
矣乃益激厲兵勇與賊相持千總方源開城私遁賊乘隙竄入載  
文巷戰手搏賊右骹傷忍痛力戰礮斃百餘人力竭自剄不殊被  
執賊謂好官脅之降大罵不已賊割其舌猶含血嘆賊面乃死年  
三十八士卒從死者七十餘人縣民皆巷哭事定贈太僕寺卿世  
襲雲騎尉諡壯烈入祀粵西京師昭忠祠竝建專祠原籍祀之

### 呂蘭昌

呂蘭昌字馨洲長垣人道光十一年武舉人咸豐十一年捻匪竄縣境蘭昌令子懿率勇二千守縣城親禦之王家隄夜半馬賊圍城蘭昌回援路斃賊多名乘勝追擊會天大霧眾莫辨蘭昌棄馬步鬪戰自辰至午殲賊千餘人賊益嘯眾屬集戰不敵陣亡子經凱誓復仇併力奮擊不克死之弟武生蘭亭武舉人蘭華姪武生標誠武童靖皆陣亡同治元年奉旨議卹建專祠同時死難者均附祀

### 張遇祥

兄遇清

張遇祥字瑞麟號林源新樂人生時有星如半月落屋上祥光繞庭室或曰此景星祥也因名遇祥年十五能開兩石弓以第一名冠童子軍道光二年舉武鄉試十五年以第七名魁會榜殿試二

甲授花翎侍衛乾清門行走二十一年選浙江衢州城守營都司清廉公正能得士卒心閩浙總督顏伯燾以楓嶺營山嶺險峻界兩省叢盜擾民檄署楓嶺游擊躬入賊穴禽其渠魁境肅清二十六年總督薦升廣東撫標右營游擊引見以親老仍回衢州有府役張興開賭場遇祥捕之出萬金求免揮之不受卒寘於法有噬軍饟銀者分遇祥十萬亦不受二十八年以事降調逾年選授山東梁山營都司咸豐二年調署壽張營游擊粵匪林鳳翔李開芳率髮賊數十萬圍懷慶山東巡撫李德檄遇祥從征會同經略勝保分路攻之遇祥身爲士卒先五十餘戰所向賊披靡勝保嘉其勇借之助戰遇祥益感奮夤夜渡河戰自寅至申久不返李德恐有失立河北岸傳三令招之回勝保驚歎再三欲致已麾下三年秋賊竄山西遇祥率兵回濟南值曹縣捻匪亂起巡撫檄遇祥往



剿擄親兵百人駐曹縣擒首陳九千歲張四大王各擁眾數千出入城市間無敢攫者遇祥曰不入虎穴不能得虎子但宜以智取不可力爭遂密令士卒伏兵於外變服隻身入賊巢僞言有事相委託賊優禮迎之入夜分酒酣遇祥驟起蹴賊首於地以足踏之腦迸裂死賊眾驚悟羣起持械鬪遇祥刃數賊且戰且走出賊巢伏兵四起賊眾皆駭散偵知張四大王所在僞稱有病不能出暗傳軍士夜出城疾馳百餘里突入賊室挾之出見其英武釋不誅留之帳下卒收斬伐之效適巡撫李德病沒未及疏報是年巡撫張亮基檄防德州四年春擊匪二十餘萬出安徽犯山東連陷數十城攻圍臨清張亮基調赴臨清防剿至則率部卒二百人夜斫賊營而入殺人如刈草黎明收隊還而別寨賊蜂擁來援其所部五十餘人被圍不得出遇祥匹馬入賊陣中往來衝突斬健賊五

出入重圍者三百卯達午攜五十餘人俱出圍無一失者遇祥右  
腿受矛傷血汨汨出復裹傷經二十餘戰賊不敢當後受風溼創  
劇不能起家人張榮狀其事且爲告病巡撫親至營驗之信諭令  
歸養而新撫崇恩適至營疑其規避奏參視職竝令解赴山東五  
年冬遇祥起病赴縣縣宰楊本厚遽收之獄時逢歲試二子皆入  
庠而河道總督李鈞兩湖欽差張之萬河南巡撫英桂耳其名爭  
馳書招之郡守飛符提之出獄命赴山東六年秋到標崇恩始知  
其誣慰勞備至冬命往兗沂曹濟緝土匪行抵曹州皖賊會捻匪  
來犯金鄉魚台嘉祥費縣鉅野鄆城城武七縣同失陷曹州鎮總  
兵郝上庠留遇祥助剿遇祥立招舊部得六百餘人自爲一隊出  
奇制敵一月斬賊渠四人立復七城皖賊皆奔散捕斬擒首陶八  
胡四高山興李山扛王四鐵胳膊王三托盤嘴餘孽悉平七年夏

返省巡撫臚其功奏復原官八年創復發再請病回籍調養十一年山東延家營教匪糾結回捻諸匪陷四縣渡運河北犯直隸廣平大名邊勝保屯軍威縣屢戰不得志知縣張灼薦遇祥義勇能辦賊勝保素知其忠勇卽肅書聘之且令募勇自隨情詞懇摯遇祥感荷知己連日招募鄉中子弟五百人竝出家貲購置軍器備糧糗力疾星馳至勝保營卽命帶隊前驅一戰而捷賊敗走勝保南移館陶復次尖莊十月二十六日士卒乏糧凍餒無渙志十一月四日賊屬集尖莊南士民請援兵勝保命遇祥馳救賊大敗奔民爭奉糗餌漿粥軍中始得一飽督隊回尖莊勝保已退守館陶矣遇祥夜趨館陶日已東上賊大至欲渡河而北勝保縋城下令命往堵河口遇祥曰士卒昨日只一飯枵腹至今焉能戰耶勝保曰汝速往吾卽遣人執釜餽從汝後也遂率隊趨大河士卒覓食



不得賊已先渡遇祥匹馬陷賊陣戰至日暮下馬而搏天明回顧所部止餘鄉中子弟數十人急揮之去曰同死無益吾身經數百戰未曾一挫今勢至此不斬賊渠不生還也卽斫鞍斷轡令馬自逸以示不返士卒益感奮誓同死遇祥執弓左右射當者皆殪賊以長戟鈎斷其絃乃舍弓提刀戰至下堡寺日近山血淋漓滿身不復能辨從者只餘六人忽見大纛下賊渠至聳身刃之戰兩晝夜勺水未入口腿疾臂傷皆發中矛數十處力竭遂沒於陣時咸豐十一年十一月七日也事聞賜卹世襲雲騎尉三次恩騎尉世襲罔替入祀京師昭忠祠張榮奔戰場得其尸而歸同治元年威縣館陶臨清諸村堡爭建祠以祀兄遇清字芳辰道光十四年武舉人官廣東化石營都司廉州游擊剿賊於石康縣泉塘諸處生禽賊首李士俊賞戴花翎調安徽游擊賜號龍阿巴圖魯升欽州

參將總督徐廣緒調赴新興奪其城權河頭營都司自攜糧草攻克賊壘獲賊首孫隴安復端州署督標參將檄援廣西平南縣城內兵單糧竭遇清守南門知縣李載文守北門賊破北門入執載文遇清提刀巷戰鬪一日賊以槍刺其腹腸出曳腸而戰賊復折其刀手執木凳戰至北城見載文急往救賊攢擊死之事聞賞加副將銜世襲雲騎尉平南士民建坊立祠祀之

王萬齡

王萬齡字嵩三涿州人道光十五年舉人二十五年進士以知縣分河南權涉縣下車卽禽獲巨盜陸某暨其猶子置於法補獲嘉縣有惠政以父憂去官咸豐二年粵匪北竄奉檄防堵黃河之柳營口以同知直隸州用時值連莊會匪起爲亂懷慶知府高映奎與議撫剿之策萬齡曰此愚民也撫之易耳單騎往不借一兵亂

立平攝溫縣賊無敢入境者七年擒匪竄嵩縣大吏檄萬齡攝縣事縣城小乏兵乃捐俸錢募勇製器械敗賊於伊陽之田湖鎮陸渾嶺諸處逐北至閭莊賊竄山溝無出路萬齡與知府樊某約夾擊萬齡出戰而樊援不至賊困而鬪萬齡受重創陣亡事聞賜銀二百兩加道銜贈卹如例

### 袁績懋

袁績懋字厚安原籍常州之陽湖乾隆初有遊京師者補宛平諸生遂隸籍宛平久俊道光九年進士宰河南有政聲績懋幼承家學讀書精考證年未及冠通羣經之學辨晰疑義往往爲先儒所未發爲文宏博壯麗能自成一家一時名公鉅卿若林則徐慶麟皆雅重之推爲偉器道光十七年舉於鄉二十七年成進士殿試以第二人授翰林院編修朝爭以得人賀願性强直落落不能



事權貴人權貴人多銜之及散館當道某故抑其文而上眷素優  
仍以編修擢用咸豐初元試正大光明殿尙書祁雋藻拔其卷置  
第一執政以他事喉言官劾之改主事分刑部旋丁父艱遂奉母  
扶櫬南旋主講暨陽書院以實學教士子分課經史詞章經濟金  
石諸門再主河南彰德書錦講舍教亦如之以母憂歸里值洪楊  
亂起東南糜爛無完土績懋慨然以澄清天下爲志閩中大吏屢  
書徵召績懋乃援例以道員赴閩時漳泉初下好事者欲多殺以  
邀功而清查叛產尤多誣陷人心恟恟將復叛總督慶端檄績懋  
往治其事至則集眾於庭取叛冊焚之脅從者皆獲免人情大安  
皆曰使君活我事竣委赴延平府會辦軍事卽令署延建邵道粵  
匪時竄邵武勢甚張績懋親督軍士夜撲賊營賊驚潰追斬悍酋  
數名賊大憤鳩眾出僞道陡截之我軍旣寡又軍實未備戰不支

乃退守順昌防軍僅數百名相持月餘有勸之棄順昌守延平者  
績懋曰順昌爲省垣屏蔽順昌不守則賊長驅直逼省城大勢去  
矣且數萬生靈視我進退爲存亡敢輕去耶於是守益堅賊不得  
逞乃潛隧城實火藥地道發城陷賊蠶擁進績懋知事去躬率死  
士戰西門連刃數賊賊以騎突之仆地引刀自刺不及賊執而去  
刃亂下醢而死時咸豐八年九月十二日也事聞優卹贈按察使  
入祀京師及陣亡地方昭忠祠世襲騎都尉世職光緒三年常州  
順昌奉特旨建專祠祀之初績懋戰沒越二日而援兵始至論者  
謂順昌爲人省門戶績懋以數百疲羸之卒當悍賊數萬之師櫓  
柱月餘而省垣卒得宴然無賊蹤者績懋一人之力也至今閩人  
戶祝之至比之張巡許遠之守睢陽云績懋性通敏書過目輒成  
誦在館時與合肥李鴻章以道義文章相切劘號稱淹雅著有諸

傳三十七

三

經質疑十二卷通鑑正誤十卷漢碑篆額考異二卷皆燬於兵惟  
味梅齋詩草四卷傳於世

忠義傳二終

大清畿輔先哲傳第三十七



忠義傳三

大清畿輔先哲傳第三十八

天津徐世昌撰

張中寅

張中寅字古虔大興人幼穎異讀書逾常人稍長能文尤研究性理諸書謹言慎行一以古人爲法道光十五年舉於鄉咸豐元年詔舉孝廉方正當事以中寅應力辭不就四年考充鑲黃旗官學漢教習七年引見以同知用九年授四川松潘廳同知究心吏治裁決如流下車復江源書院延師儒捐膏火令諸生習業其中曰此閒强悍可廢詩書耶松城接壤野番中寅察其情屢勸謀守備九年秋野番果傾穴來犯距城十里屯焉中寅率壯勇登陴守禦謂總兵聯昌曰吾城居番地中形如釜底祇小河汎一面不當敵且通饒道乃全城要害也爲今之計惟有扼守小河汎堅壁以

待令其久而自困舍此不可保矣議定上書乞援不報相持數月眾環跪請自爲計中寅慨然曰朝廷命我守此土撫此民生死以之無他計也眾感泣誓死守逾年四月賊奪小河汎餽道梗絕警報不通中寅書木牌告急塗以油逐流而下仍不報糧盡至雜煮牛馬皮充食賊知城之不可下也詭令喇嘛前致辭僞爲降者聯昌開門受之賊乘不備突入中寅遽上馬奮擊身受重創而死時年六十二

盧金第

楊均治

武世昌

盧金第字印橋豐潤人道光十七年舉人大挑以知縣發四川署墊江有政聲咸豐二年粵逆亂運饟赴廣西道全州猝遇賊死之事平賜卹如例

楊均治字熙績蔚州人官潞城典史咸豐八年檄運饟湖南抵官

塘值岳州陷乃入武昌封饗於庫協力助守城十二月武昌破或勸之行不可罵賊死之贈卹如例

武世昌字鳳占遵化州貢生以軍勞荐升知縣咸豐十年運饗至霍邱遇賊死之賜卹如例

寧會綸

父蘭森

弟會笏

寧會綸字理堂樂亭人父蘭森字香汀嘉慶二十四年舉人官禮部主事洊升郎中改甘肅甘州府知府署平慶涇鹽法兵備道以賢能著稱會綸道光十三年舉於鄉二十年成進士授工部主事咸豐四年升員外擢郎中授山西道監察御史疏言內外大臣子弟雖有雋才多歸敗德宜嚴爲約束預防習染以養其廉恥奏上人皆畏懼之五年轉禮科給事中明年外授四川東道丁母憂服闋改福建督糧道十年升江蘇按察使旋調浙江會粵匪竄浙



傳三十一  
二  
境或勸之勿行曰効死疆場分也及杭州陷援軍不至投纆死事  
聞賜卹祀昭忠祠弟曾笏候選知州以兄曾綸殉節力請投効剿  
賊上命往浙江交左宗棠差委在幕數年佐理軍政克勤厥職宗  
棠深器之檄權慈谿知縣未幾卒

俞昌烈

劉咸

俞昌烈號鴻甫宛平人監生工書法能學東坡道光時鍾人傑之  
亂從勞光泰入通城堵賊有功擢知黃岡縣聽斷明決後宰江陵  
以盜案削職寓居鄂城手輯兵書數萬言粵匪破城死之同時有  
劉咸者大興人嘉慶二十四年舉人知蘄州以病去官旋被誣檄  
返楚削職勞光泰屢勸二人出城鄉居咸唯唯昌烈則曰予一家  
五口城陷當死之不能去也昌烈旣遇害其妻女及少子皆自縊  
死咸亦投纆旅席中

秦虎翼

常奇珍

李信

張鳳春

陶景武

彭天相

秦虎翼字飛熊沙河人道光二十一年武進士授侍衛選陝西綏德協紅德營守備咸豐二年粵匪渡湖赴商州防武關有功調赴懷慶戰賊以身先礮傷其首陣亡

常奇珍肥鄉人道光二十五年武進士由侍衛授開建縣守備地界廣西賊至禦之殲二千餘人咸豐七年賊再至城破力戰死叔父連捷武生亦從死事聞賜雲騎尉世職同治二年入祀忠義祠李信晉州人道光二十七年以一甲第一人武進士授侍衛咸豐二年出爲湖北漢陽府遊擊粵逆犯長沙東下圍漢陽信嬰城固守相持旬日賊大隊至城陷力戰死之事聞蔭卹如例

張鳳春寧晉人道光二十一年武進士授三等侍衛差滿出爲湖北提標都司禦賊隨州有功賞戴花翎升鄖陽營游擊以病去官

病痊投劾神機營同治七年統護軍防南路博野之戰力竭陣亡  
事聞給予世職雲騎尉

陶景武廬龍人咸豐三年髮賊踞懷慶景武偕董萬陞以外委從  
征首登木城賊開門遁矣大隊不繼賊見之返攻景武砍黃巾者  
一人落馬而賊自後橫砍之萬陞亦力盡同死丹河鋪西 上賜  
雲騎尉恩騎尉世職

彭天相藁城人道光閒武進士授藍翎侍衛咸豐六年補貴州普  
安營守備八年回亂敗之大坡鋪華家屯九年戰樂民里斃賊甚  
多攻華家屯賊眾不能敵陣亡賊支解之咸豐十一年給雲騎尉  
世職

穆大本 張秉銳

穆大本字立齋天津人道光二十五年武進士選授四川綏定營



守備訓練嚴明號稱勁旅咸豐元年從征廣西禦賊於桂平之新墟斃賊目二賜花翎賊竄永安連日戰皆捷二年追賊至大洞仙鶴嶺殲三千人賊出僻道圍桂林大本陣小西門外擲火彈焚其壘尸橫如阜賊驚潰竄全州道州剽掠諸所屬邑進距長沙豹子嶺九月戰斃悍匪二百人馘四百賊下竄踞武昌大本攻破紅山賊營十三座賊棄武昌走江寧尾之而進提督向榮多其功奏補四川阜和右營都司御賜白玉四喜搬指四年擢四川督標右營游擊統領川軍戰七橋甕破賊營四座七月賊窺上方橋連建六營向榮檄大本扼通門燬賊二壘賊出洪武門撲七橋甕大本迎擊卻之策馬河干有黃衣賊舞刀來撲大本猛刺之失足落水死年三十一事聞以參將例優卹予雲騎尉世職同縣張秉銳字進修道光十七年武舉人補千總擢易州營守備咸豐三年粵

匪北犯秉銳扼天津城西得勝口迎擊之槍斃賊首賊大敗奔再  
敗之東鹿阜城從勝保軍復臨清尾賊至江南豐縣轉戰三省所  
至皆有功咸豐四年九月攻賊高唐州秉銳先登受礮陣亡事聞  
贈卹如例入祀昭忠祠

葉濟英

劉東書

鄭沅

平源

葉濟英字枚生滄州人貢生歷官廣東豐城知縣道光二十六年  
升義寧知州俗獷民悍捐廉立塾延師訓之任十年有政聲咸豐  
二年薦卓異赴都行次江城瀏陽土匪起署義寧知州李世琦請  
留州防堵三年粵匪撲江西省城濟英率武生藍如春督八鄉義  
勇號赤足兵者來援闖入賊陣賊不戰而走遂解其圍世琦解任  
濟英權州事四年賊入境竄城下糾集義勇登陣守禦城賴以全  
奪獲軍裝器械無算事定升知府賜花翎五年匪首鍾延生突圍

州城舉炬熱西垣撲礮臺手火器擊退之殪數十人投瓦石斃賊無算濟英子圭萬率精銳二千出城戰殺萬人賊攻西南青雲三門力戰卻之城內泉忽竭具衣冠虔禱風雨暴至池滿井溢是夜賊暗運火藥覆以油紙逼城下城上礮石不能傷濟英以木桶實火藥傾城下燒之噴桶火箭齊發賊眾半灰燼賊於西門壩壘土牆傾巢出濟英集精銳駐鳳巘城樓夜分賊大眾撲城北隅以有備得無恙賊攜煤火燬城南門復引水灌息之賊旋攜火具雲梯分集城下以連環槍礮迎拒賊大挫而攻者益眾相持至兩旬鄉團劉益萬葉廣金等至五里坳失利陣亡勢益孤濟英齧指血爲書求援兵且曰濟英死不足惜所可惜者城中十餘萬生靈與江省門戶耳撫軍卒不應賊穴地轟城陷數十丈蜂擁入士民巷戰死十萬餘人濟英戰不利急入署與長子圭萬幼子潤死之孫三



人孫女二人妾二人媳婦二人同殉焉州紳李炎至廣信道羅澤南營請兵凡三戰復州城得濟英尸愛蓮池中人士哭祭者數千無不失聲事聞贈太僕寺卿建專祠義益州州人祀之池上

劉東書號薌圃唐縣人拔貢分發安徽歷署黟縣霍邱知縣有政聲調宿松修築規林涇江等隄河水漲宿境得無恙道光末年歲大饑東書泣請大吏緩征加振振至不假胥吏手復倡義穀設糜廠收棄嬰贖質婦施衣藥棺槨活人無算大府以卓異薦升安慶同知未及行粵匪東下寇皖省焚掠沿江城郭無完土東書浚溝築隍置器械練鄉團誓死守禦咸豐二年八月賊薄城下斬馘數十禽渠魁十七人置之法宿賴以全四年二月賊犯風齊驛督勇往援父老乞守北鄉砦堡十月援師集克復太湖賊由黃梅回撲州牧博勒霍布檄東書助剿東書以太湖宿松連境義當往乃與

博勒霍布太湖知縣張寶鎔攻賊於太湖城內路家巷轉戰數時傷左肩自知不免揮次孫怡去之曰我死職也汝有孀母其速行盪決直前手斫數十賊身被刺無完膚遂遇害其甥崔南階家丁張恭胡宣及練勇柳勝等皆從死事聞賜雲騎尉世職祀昭忠宿民亦立惠民祠祀之

鄭沅大興人由舉人以知縣分安徽咸豐十年署泗州泗州地當賊衝警報無虛日沅集團練嚴防守以兵勇三百人當數萬賊出奇誘戰屢卻之民賴以安當事上其功擢直隸州知州十一年擒匪犯泗州沅偕副都統德春督兵迎剿斃賊三百餘人賊大至沅力戰大呼殺賊身受十餘創死之事聞賜卹如例給予雲騎尉世職

平源大興人咸豐三年正月署懷遠縣典史先是安慶大吏備兵

防粵賊實無城守志兩江總督陸建瀛退九江至安慶使人謂巡撫蔣文慶曰賊至矣公等速爲計於是城聞之皆逃徙十七日賊至布政使李本仁署按察使張印塘總兵王鵬飛參將虞晉泰知府傅繼勳知縣許垣總理軍需局務同知劉丙知縣周葆元皆去巡撫出巡城遇賊轅門外死之源聞警歎曰一城盡走如君臣之義何予職雖卑然不欲與諸公同生也冠服坐堂皇賊至大罵死之或曰死於獄門

谷景昌 谷杏林 馬鳳超

谷景昌字慶雲鉅鹿人道光三十年武進士授侍衛歷官山西平垣營遊擊咸豐十一年髮賊擁眾數十萬竄河南民避河灘景昌撥船渡之賊譙擁至欲北渡景昌曰彼眾我寡當以計卻之迺沿隄樹幟綿亘數十里夜然芻張燈火光燭天賊疑有大軍不敢渡



而遁民感德立石建生祠事聞賜花翎擢澤州營參將督辦河防  
加副將銜同治六年十一月馳防吉州一夜黃河冰結數百里賊  
分路長驅而進景昌以孤軍轉戰賊圍之數重身被重創歿於陣  
上命以總兵例議恤加總兵銜賜諡忠貞立專祠予騎都尉世  
職同族谷杏林咸豐十一年戰教匪屢有功賊薄城登陴固守覷  
其怠出城擊破之追斬數百人獲器械輜重同治元年馬賊起戰  
辛莊獨率精騎三人搗賊營獲其魁奪馬數匹賊竄走四年赴山  
西補西洪汎把總六年隨澤州營參將防吉州龍王山賊踞冰北  
渡杏林殺十八人力竭陣亡議卹賜世職鉅鹿又有馬鳳超者字岐  
山道光二十五年武進士授藍翎侍衛咸豐六年擒匪爲亂率兵  
赴河南府防陳亳者城調署王祿營北鎮右營守備代理陝州都  
司九年提調軍營擊賊有功十月戰鹿邑賊死者相枕藉次日復

陣韓家窪賊眾掩至鳳超突圍不得出馬跌陣亡奉旨世襲雲騎尉賜諡忠孝入忠義祠

楊嘉運

楊士箴

王其昌

楊嘉運字石麟涿州人咸豐初知湖北宜昌縣遷隨州粵匪陷武昌嘉運督兵拒之漢口以功擢知府四年圍潰遇害外委王治國守備陳德順皆戰死

楊士箴通州人道光十一年舉人授福建建寧知縣咸豐中粵匪陷建陽崇安諸縣守土官皆望風遁士箴募壯勇治戰具誓以死抗賊結土匪為內應城陷被執不屈死之子繼賢救父亦遇害王其昌號運舫通州人諸生考取教習分河南知縣歷署洧川延津有治聲善聽訟剖決如流有青天之號咸豐十年調閩鄉同治元年捻匪陷城投河死事聞贈道銜予雲騎尉世職

蔡中和 王順曾 高學易 馬長欽

蔡中和號香谷大興人官清江典史邑瀕河患水民乞築隄捍之  
籲於守令不允中和持民議力爭弗能得民赴闕訴卒如中和議  
以卓異擢信豐知縣抉弊剔奸民咸稱善再遷上饒適髮逆襲廣  
信時城中僅縣丞洪立成所部二百人眾情洶懼中和矢志固守  
倉卒募士卒設守備部署未定賊驟至環城數日中和發巨礮殲  
其渠賊冒死梯城上會大雨礮不然城陷巷戰被執怒罵以殉大  
府疏於朝蒙賜卹典建專祠同縣王順曾字益菴咸豐閒官江西  
景德鎮同知大府檄理糧饟一毫不自私十一年春賊攻景德被執  
不屈死高學易官金谿縣丞咸豐六年春權樂安知縣視事甫半  
月賊入境募勇卒扼要以守十一月賊大至進撲城下學易率勇  
奮擊之陷陣死馬長欽咸豐三年解南昌圍有守城功六年權新



城縣丞七月城陷遇害事平賜卹如例

王保庸

王保庸字寶符號湘舟臨榆人以諸生援例就通判咸豐元年選授江西吉安府通判時粵匪擾荆南偏江省議者多阻其行保庸獨毅然往二年抵任楚氛警至奉贛南道周玉衡檄協候補知府林懋勛防堵蓮花廳永興縣諸隘秋林沒玉衡以蓮永爲江右門戶且路徑幽僻賊蹤出沒無常時請於撫軍檄保庸總其事九月賊東竄茶陵攸縣擾蓮永保庸統漕標兵二百收拾鄉團先勘地勢據險置防還駐蓮花廳居中調度備戒募嚴賊不敢逼北竄岳州三年吉屬解嚴遂旋署秋七月泰和土匪由萬安撲郡城知府王本梧銳欲戰保庸請固守觀釁而擊之本梧不聽沒於陣玉衡檄保庸權府事日夜登陴守禦視賊動靜擊之八月朔羅澤南援

師至破賊曰鷺洲圍解撫軍以保庸守城功聞於上賞戴藍翎  
先是本梧戰沒賊揭竿懸首薄城眾皆惶懼保庸以重賞購勇士  
獲歸其元續檀爲身斂之痛哭誓眾死守二十餘日卒保危城解  
圍後益籌防守練義勇設保衛局十月卸府事回本任五年八月  
粵匪由湖南竄入永新逼安福郡城戒嚴參將戰不利知府陳宗  
元請援兵玉衡至賊逸而西十月復東陷袁臨二府南逼吉安十  
一月二十日遂圍城時玉衡已升臬司督帥員弁力守待援保庸  
守永豐門調保衛局義勇入城率同幕友家丁分守睥睨城中鹽  
燭柴炭皆盡人食淡飲冰夜則黑守十二月八日地雷破西月城  
保庸與知府力戰賊退封缺口論功以同知補用時賊據臨江省  
垣隔絕求援十八次不至六年正月二十五日賊乘連日大雪暗  
穿地道毀城西南隅突入保庸巷戰被執罵賊而死幕友張滋程

虎炳家丁譚鶴齡王福王文貴皆殉焉士民竊保庸首瘞於校場之偏是役也在事文武自臬司周玉衡知府陳宗元及保庸以下各官同死者凡四十人事聞保庸以同知賜卹給雲騎尉世職附祀吉安周玉衡祠

黑珍

杜階平

王德潤

趙雲芳

郭鵬彪

路綬若

李

何瀛

潘佐廷

于燦

趙雲漢

潘俊三

黑珍字席孺宣化人累官大名鎮標遊擊咸豐二年從軍揚州戰粵賊嘗手黑旗大小數百戰當者輒披靡賊呼爲黑將軍鱗傷遍體如刻畫以勞成疾嘔血死三年賊陷金陵江南興武衛幫千總通州杜階平江懷衛千總王德潤同時死於陣四年鹽山武生趙雲芳同里武生郭鵬彪從征揚州均陣亡雲芳古北口右營千總以功升守備鵬彪歷官貴州守備署清江都司賊之攻臨清也遵



化州路綬若以太平寨千總奉檄赴山東防守城陷巷戰死五年  
 賊北竄西盛李鳳鳴從大軍轉戰畿南以功擢都司七月攻高唐  
 先登遇伏死六年大軍剿賊潁州山永協蒲河營千總盛河楊德  
 力戰死之遵化州王永攻賊瓜州之虹橋亦戰死永保定守備以  
 戰功升甘肅鎮羌營游擊同里馬翰忠以千總隸勝保軍轉戰直  
 隸湖廣江南諸省所向有功擢密雲都司七年檄赴安徽攻擒賊  
 於八里塚受創而死八年樂亭彩呈瑞以外委從軍江南戰於宿  
 州黃家水寨死焉九年賊竄六合官軍戰失利順義張振威死之  
 山永協左營把總李竹林同時殉難均予雲騎尉世職振威字虎  
 臣武生咸豐二年從古北口提督陳金綬征揚州以功拔千總賞  
 戴藍翎八月廣西富賀營都司何瀛亦剿賊陣亡予雲騎尉世職  
 瀛通州人道光二十七年武進士藍翎侍衛十年賊陷蘇州蘇州

前幫把總潘佐廷巷戰死妻子氏殉事聞以千總例議敘予雲騎尉世職佐廷號秀崖通州人其同里于燦官浙江海鹽守禦所千總杭城陷與子立全同死之閤家皆遇害十一年大軍與賊戰海口營熱河千總鹽山趙際清陣亡同里趙雲漢古北口營把總同治二年攻賊臨清戰三晝夜力竭死之七年擒匪北竄南皮武舉人潘俊三率鄉民禦賊受矛傷廢左目氣結而卒俊三由兵部差官授守備祀本邑忠義祠

王廷瑞

劉心台

袁名懿

鄭倬

王泰州

張保忠

王廷瑞字輯夫大城人署江西德安縣典史咸豐三年賊陷鄱陽官吏皆空城避賊入署見廷瑞坐堂皇問何官廷瑞厲聲曰我德安縣典史也賊縛之去廷瑞罵不絕口遂遇害

劉心台通州人附貢生官廣西修仁縣典史咸豐間從浙軍援皖

有戰功七年剿賊婺源陣亡浙撫晏端書上其事賜卹雲騎尉世職

袁名懿字抑齋順天人官湖北鄖西縣典史同治元年粵匪圍城名懿與子登陣固守十六日城陷父子同遇害事聞賜卹如例

鄭倬豐潤人安徽布政司經歷咸豐七年遇賊桐城倬及子四人同殉難給雲騎尉世職

王泰州字檝樵通州人咸豐四年署江西義寧州吏目粵匪陷城遇害

張保忠通州人浙江烏程縣縣丞以功擢知縣同治元年髮逆竄湖州率眾迎戰城陷冠服死之母殷氏弟繼綬同時殉難事聞賜卹銀三百兩建坊入祠予雲騎尉世職

任式坊 李蔚然



任式坊字亦春密雲人父元勳官直隸開州副將式坊以咸豐二  
年舉於鄉三年成進士授禮部主事四年充寶錄館校對官九年  
補儀制司主事十年遷員外郎十一年赴山東軍營攻克館陶冠  
縣以知府用是年冬授江西瑞州知府同治元年以復城功賞戴  
花翎尋丁憂歸服闋授貴州安順知府五年十一月道經玉屏二  
岔河適苗匪下竄猝相值式坊提刀率子家駿突前搏戰手刃數  
賊力竭父子竝遇害事聞贈太僕寺卿世襲雲騎尉家駿亦贈卹  
如例式坊性敦懇尙風義博極羣書負經世略官禮部時上幸  
熱河英軍航海至眾震懼式坊上書當事略言英人航海遠來深  
入重地已犯兵家大忌今更舍舟登陸兵單勢孤宜飭直隸總督  
及倉場侍郎通永道協扼前截後以收夾擊之功竝條上機宜十  
二事識者韙之其在山東歷陳營伍積弊曰操練無裨實用將士

不相維持逃兵肆無忌憚總而言之無節制而已皆切中當時之病云

李蔚然字萃拔永年人咸豐三年練鄉團禦賊有功八年舉於鄉同治二年以知縣試貴州衝賊氛行五千餘里抵省檄署定番定番新克復城垣廢圯鮮居民蔚然招流亡結鄉民七十二團畫策守禦省垣需饒急蔚然親解丁糧抵青巖聞黑苗七千餘竄州境夜返入城督居民千人分堞嚴守賊圍之數重鄉團入援者戰不勝三日城陷蔚然公服坐堂上罵賊賊脅以刃罵愈烈賊怒磔之從死者十餘人初蔚然之人黔也有友人餞之曰黔省賊充斥州縣率殘破不完子分符奚先蔚然曰先安民其要在同好惡聯紳耆築城鑿池練鄉團以衛之其濟百姓之福也不濟則以死繼之故死之日其節爲獨烈云事聞奉旨建專祠與難諸人附祀

王為霖 孫清臣等

王為霖字雨民曲周人性孝友好施與族黨困乏者求之皆立應  
 咸豐三年捻匪竄直境邑宰命辦團練十一年賊大至不可當或  
 勸之避為霖曰我輩保衛桑梓義舉也事濟幸矣不濟則以身殉  
 之三月賊逼城登陴禦之不克城遂陷為霖與邑宰范某同死於  
 南城孫清臣監生成豐十一年賊騎突至脅之從清臣躍上樓怒  
 罵賊火其樓拋瓦忿擊賊甘言引梯誘之下擁見賊首行數武投  
 井中死焦錫齡貢生死於賊子維屏以首觸賊痛罵亦被殺陳英  
 武生與東匪石天雨有舊天雨敗投其家力拒之後復熾執其母  
 復仇英脫母以身代中數百刃而死王麟書武舉人城陷與子明  
 堂被執遇害焦西林賊至鳴鼓聚眾禦賊被刺以槍身無完膚郭  
 太羹賊脅之不從攢刺而死霍銓監生督鄉團禦賊賊獲之截足



斷指罵愈力時人壯之焦錫光監生率二子維辰維邦督眾奮擊  
 並遇害吉大成諸生散家財養勇禦賊賊蜂至率弟大均大啟姪  
 愚巷戰弟姪皆陣亡大成奮擊之賊逸去獲數賊殺之復仇楊崇  
 德罵賊被縛衣以火不屈死弟崇實匿於暗室聞兒死突出殺賊  
 亦遇害秦冲霄貢生教士文昌閣賊至遇害子璫敏挺身復仇並  
 被殺郭維翰監生被執不屈遇害投尸於井王錫田誘禽首逆蘇  
 崑岡送官正法崑岡子聚鼻匪尋錫田殺之弟錫川子潤並遇害

張耀

張耀字鑾坡涿州人父汝謙嘉慶初隨其祖玉田為雲南知州生  
 耀於治所耀數歲玉田罷歸旋卒耀以內閣供事議敘未入流分  
 安徽補霍邱縣典史時父母皆年高告終養回籍數年母李氏卒  
 父汝謙得癱瘓疾動輒需人耀日侍榻前以肩承足而私焉越二

專三十一 忠義三

年汝謙卒營葬畢乃泣告戚黨將往黔迎其生母柩至是人始知其爲汝謙之庶子也先是其祖歸途耀生母卒於旅舍藁葬之耀甫數齡卽默識其處比耀如黔同官感其孝爲函致中途津要屬周恤之耀悉拜受其書比返葬凡予函者皆詣門稽首還之人以是愈高其行釋服赴皖仍補霍邱時髮逆往來長江皖上下俱糜亂移省廬州霍邱在廬西北縣令阻於賊未至任耀以前後爲尉得士民心乃羣奉之權縣事時粵捻張洛行陳玉成團逆苗沛霖擾潁鳳諸縣邑無歲不被圍耀以微官和輯鄉團激厲紳富力保危城咸豐七年卒以寡不敵眾城陷巷戰死妻妾子女均死之事聞給以雲騎尉世職其幼子三元潛伏巖谷聞得不死事定後始出霍邱人感其父之有功於邑也爲醮賞使扶柩歸咸謂耀之忠孝天不忍絕其後云

李書城

王化遠

謝振興

李書城字志道東鹿人生性勇烈多智畧咸豐九年土匪蠶起書城倡團練集鄉人議曰賊勢日甚不及時設備後將及我聚貨財以齎盜糧何如練鄉勇以衛閭里眾從之九月冀匪叟占魁率眾北犯東鹿賊雒小雲密晉賊邢根竹應聲起所至剽劫書城率鄉勇擊破之捕斬占魁根竹餘匪散走縣賴以安同治元年捻匪張錫珠糾眾萬餘犯冀逼縣境書城合冀密各鄉團進剿遇賊於淦水店衝鋒直前力竭戰死事聞賞雲騎尉世職

王化遠亦東鹿人淦水之戰賊張兩翼圍之短兵接殺傷相當旗長姜二寶麾旗厲眾賊怒斷其臂死焉勇遂潰亂練勇李彥傑被擄化遠追奪之賊怒攻化遠化遠提刀殿其軍且戰且卻身被數十創陷泥淖中不能前壯士孫殿武負之出化遠曰吾創鉅不能



生汝舍我殺賊報國吾死瞑目矣殿武大哭賊旋至割其首以去  
謝振興字旺業守禦所千總也與書城同里性開爽以任俠稱縣  
多富豪競施與能役使縣人振興家僅中產而趨赴尤眾鄉里盜  
起糾眾肆劫掠官無如何振興團壯丁直搗賊巢縛其魁以獻盜  
風頓息禾稼熟人有竊刈者振興聯里人相守望獲竊者一人詣  
縣自首狀而死者家已先至指控多人無振興名振興曰我所爲  
他人無與也縣令奇焉姑繫之獄歌呼嬉笑如常時里人餽財物  
均不受時擒匪張錫珠擾冀州縣治團練眾舉振興爲長令卽出  
而任之眾大悅其所規畫皆應聲辦請逆戰曰賊所至無禦者出  
不意擊之雖不勝賊知我有備必不來若賊眾渡滏水吾力不能  
抗縣境糜爛矣令不聽振興率敢死士渡滏與賊遇以眾寡不敵  
戰死賊亦大燔不敢北犯御史裘德俊上其事賞雲騎尉世職鄉

開立勇烈祠書城化遠振興同祀之

馬曰駮

李郁

宋遵信

魏遇仙

倪雲鶴

馬曰駮字次龍蠡縣人咸豐元年副貢生授徒養母同治六年梟  
匪作亂曰駮之子庠生鎮衡被賊脅去乘閒逃歸曰駮歎曰設我  
遇賊一日不能活矣七年春髮捻犯保定執之去賊見其衣服整  
潔索銀不應視其妻曳至賊營賊首詢知爲讀書人還其裘衣之  
呼先生勸之從曰駮口喃喃拂衣欲出賊首曰勿出吾孩兒手碎  
汝矣曰駮竟出賊黨以尖刀貫其頂而死知縣謝恕上其事賜卹  
給予雲騎尉世職

李郁字重文樂城人咸豐三年粵匪入境知縣唐盛督民勇拒之  
城陷時郁年七十矣冠服入城欲以身代令死抗之遇害附祀唐  
縣令祠

宋遵信永年監生成豐三年粵匪逼臨洛關吉林兵禦之不克遵  
信與同里魏遇仙糾眾助戰遇賊於石牌村西固斬馘無算忽悍  
賊萬餘擁至戰敗死之遇仙嫻技擊陷重圍出而復入者數次賊  
愛其勇欲生致之絆以絙仆脅降不從亦被殺林炳與賊鬪受創  
死子廷魁入賊隊復仇殺十數人力竭亦死  
倪雲鶴獻縣武生成豐四年粵匪竄入其里雲鶴鍵戶乘屋罵賊  
有笑其怯者怒而躍下與賊鬪賊誘之使人城中途曳馬上賊擲  
之地既入城遂鬪而死越日賊遁里人收其尸傷痕徧體指爪閒  
皆賊髮云

白含章

馬步衛

陳永春

白含章字可貞清苑人讀書明大義家貧廢學就行伍遷千夫長  
斷灤州誣訐謀逆獄全活者多從直隸總督琦善與洋人爭曲直



不爲威屈洋人怒幾刃之差旋賞花翎以守備用擢右營遊擊適  
髮逆倡亂赴江南以黑旗督戰屢敗賊望其幟皆靡攻維揚中礮  
卒賜卹如例

馬步衢號小雲通州人武生援例授衛千總咸豐中隨漕帥邵燦  
赴淮署濟甯衛時賊踞高唐四鄰境皆伏莽令爲謀一夜往返二  
百里調署安徽滁州衛守備地經兵燹守兵寡賊至或勸之逃弗  
從痛飲沈醉賊入署被殺事聞賜卹予雲騎尉世職

陳永春字泰和昌黎人年二十有八從貴州巡撫韓超征賊有功  
超解職薦之直隸按察使李鶴年同治三年以功授把總賞藍翎  
四年升千總六年充馬隊營官禦捻於許昌戰輒勝尾賊至山東  
屯運河東岸秋毫無犯士民獻二大旗誌其功七年以追賊功加  
都司銜擢守備四月戰賊高唐州雙廟陣亡年三十四事聞加遊

擊銜賜雲騎尉恩騎尉世職

陳成烈

于壯圖

馬奇峯

周彬

滕懋德

張秉廉

朱

陳成烈字懷芳天津人博學工文善奕以貢生任獻縣訓導同治七年二月捻匪竄縣境成烈守南門礮斃賊無算城尋陷知縣熊存瀚陣亡成烈率子康祥巷戰身受重傷同遇害長孫婦聶氏投河死次孫婦牛氏孫女五姑均投井死總督官文疏聞贈卹如例曾國藩奏建熊存瀚專祠以成烈康祥附祀同縣于壯圖亦殉捻匪難天津華長卿為于陳雙烈詩弔之

于壯圖字翼亭道光十四年舉人任祁州學正丁母憂阻於河未回里七年正月捻陷州城有勸其避者壯圖曰吾雖卸任亦官耳城亡與亡義不可去且母柩在將何往少頃賊至脅以刃不屈身受四十餘創而死妻王氏弟婦解宋子婦李姪慶光姪婦陸姪女

大姑女三姑姪孫女城姑俱投井死事聞贈卹如例入祀忠義祠  
馬奇峯字雲嵐慶雲人生有至性少孤事母以孝聞博覽羣書文  
名藉甚以諸生教授鄉里從之遊者多篤謹勵品行見者皆知爲  
馬門弟子洪楊倡亂捻匪繼起擾直東往來黃運兩河之間而慶  
雲適當其衝人民遭屠戮焚掠慘不可狀奇峯倡治團練捍鄉里  
同治七年捻首張總愚任柱竄入境奇峯率眾禦之城東眾見賊  
大至皆慄慄有懼色奇峯執戈大呼曰今日之事退必無幸毋盍  
殺賊死耳遂進搏捕斬過當賊見無援蠶擁進奇峯知事不濟揮  
眾令速去力盡被執罵賊死之子龍文同遇害事定大吏聞於朝  
以教諭殉難例賜卹蔭世襲雲騎尉以恩騎尉世襲罔替  
周彬字竹樵玉田人父若浙官閩縣丞卒於任彬奉母攜弟扶柩  
歸母病侍牀褥衣未嘗褫帶叔若洋官龍溪典史病目告歸彬事



之如父醫藥殞葬身任之以貲助弟霖補山西清水司巡檢從兄  
某貧彬爲謀養葬事寡嫂且爲立嗣贍之里饑鬻產振之活孤子  
楊全延其宗鄉人爲之勸善道光十九年舉於鄉以史館敘功授  
知縣改祁州教諭同治七年捻匪北竄彬助知州防守有姪熙績  
侍彬揮之去曰城亡與亡吾職也爾往文廟收吾骨焉竝爲永訣  
詩寄其姪賊突至城陷彬被數創詣文廟經死大吏上其事賜雲  
騎尉世職祀忠義祠著有補拙軒集藏於家

滕懋德阜城諸生官柏鄉訓導咸豐三年髮逆竄入阜城懋德率  
勇巷戰力不敵返室整衣冠賊脅之從忿罵不屈死事聞議卹如  
例同時任縣教諭張秉廉大興舉人城陷死於難

朱思榜字得標東明人嘉慶十九年舉人官威縣訓導咸豐十一  
年教匪十餘萬攻城與知縣沈容誓固守礮斃偽王奪器械無算

以功升貴州銅仁知縣同治十一年苗匪石落九倡亂思榜率丁役襲其巢巢虛無賊還遇諸途力戰受重創死邑人建祠祀之賜卹如例

劉曰萼鹽山人道光二十年舉人官武強訓導城守有功同治七年擒匪至城曰萼與知縣杜恩祿練民團登陣力禦恩祿戰死曰萼中槍而沒高鴻章與弟鴻圖率民勇戰城南禽賊魁力竭俱沒於陣

常純字葆初房山人博學能文道光十五年舉於鄉官饒陽教諭同治七年擒匪入境純毅然以守城自任相持三晝夜賊攻益急賊陷西北城蜂擁入純大呼殺賊身受數創死子諸生履剛亦遇害事聞賜卹如例

張昌茂

耿桂林  
張寶庫

薛天然

孟樹勳

王國珍

張永年

張昌茂束鹿人庠生有膽畧咸豐閒土匪四起鄉人練勇舉昌茂  
爲首戰陣皆身先之同治七年捻匪至眾潰散或勸之去昌茂堅  
不可執戈以俟賊至大呼曰我練長也手刃數賊力屈被執縛於  
樹斃割而死同時死難者又有耿桂林薛天然孟樹勳王國珍張  
永年張寶庫皆昌茂同里人也

耿桂林武庠生同治七年捻逆北犯桂林倡練勇丁保鄉里正月  
七日賊猝至力戰多殺傷賊眾麤集力不支爲所獲怒桂林首事  
繫之柱碎解之氣將盡猶罵不絕口賊愈怒以火焚之

薛天然字循理好談氣節嘗手一刀曰吾得用汝以報國足矣同  
治七年倡義築寨未成捻匪至天然力戰死事聞優卹

孟樹勳監生同治七年張總愚之亂賊攻試礮營寨樹勳守西門  
殺賊十餘人力竭戰死



王國珍監生築砦練勇爲禦賊計同治七年擒匪至遠近民爭入砦戰者多敗死國珍曰戰者由我死豈獨生耶遂赴井死

張永年監生同治七年擒至禦之殺二賊或勸之去永年曰我去寨孰與守同里張寶庫者服永年忠義誓生死共之越日賊大集眾潰永年登樓以輒擊之被執遇害寶庫亦戰死

王廷相

譚昌祺

王廷相字梅岑承德人性至孝親沒哀毀成羸疾光緒二年舉於鄉十二年成進士選翰林院庶吉士授編修充國史館協修廷相故善爲文弟子就京寓受學至室不能容居恆不妄干謁日與賢士大夫以文行相砥礪學益精進十七年簡山西學政晉當饑饉後士子多廢學廷相按部所至誘掖獎勸以敦品勵志爲立身之本以博學守約爲讀書之要竝取士之秀者課之以經義策論隨

所在評牐之時李用清主講晉陽書院屠仁守主講令德堂每逢朔望宣講廷相輒率生徒前往旁聽侍教如弟子然於是三晉人士皆知尊師重道之義一時文風蔚興樸陋之習爲之一變二十二年授江南道監察御史居諫垣二載不毛舉細故而於國家大計輒披瀝指陳不避權貴二十三年德使海靖以教士被戕要請懲治東撫李秉衡以下諸官兼索膠州海岸朝議允之廷相抗疏力爭竝劾京卿盛宣懷貪冒蠹國而歸咎李鴻章引用之非人疏皆不報時國用患不足計臣請加賦廷相力申大學士李鴻藻之議爲民請命事遂止二十四年元旦日食廷相疏請修省條時政闕失而尤以進賢退不肖爲國家治亂之源侍郎張蔭桓以貢緣獲上寵廷相劾其媚外人結近侍請明正典刑以謝天下蔭桓故大學士翁同龢所薦引疏入同龢大怒奉 上諭嚴議然鑒其無

他飭回原衙門行走廷相自去言職益專力於學主講城南龍槐書院兼易水涿鹿兩郡講席爲誨交修孳孳常若不及時與蒙古豫師山東柯劭忞徐坊直隸汪棣昌陸鍾琦以文章道德相切劘宗室盛昱時負海內盛名鮮所許可而獨雅重廷相其詩有白髮門生能抗疏歡然他日訂吾文之句二十五年東撫李秉衡入都慕其名造廬相訪遂訂交秉衡奉命查辦奉天事偕之以行至則劾其不職者數人皆廷相微服所訪知者風紀爲之一肅二十六年拳民變作朝命秉衡督率張春發陳澤霖夏辛酉萬本華東禦聯軍奏以廷相襄其軍事廷相念大局已不可救而重以君父之命友朋之義不忍辭軍次通州秉衡率師迎敵至河西務張春發陳澤霖不戰而潰夏辛酉萬本華均敗走廷相聞耗趨赴前敵尋秉衡不遇返至倉頭橋聞槍聲暴起疑通州已失守遂拔河死子



履豐救之不及亦投於水履豐尋遇拯獲蘇時七月十七日也年甫五十秉衡是日至通州亦仰藥死履豐斂其尸暫厝堡頭村北次年春歸葬於灤陽南山新坐事聞上痛悼贈五品卿銜廷相天性肫摯操行謹嚴一生篤守主敬之學以禮自持言行如一平居喜談天文地輿之學謂漢儒五行之說天人感應其理至精讀史以圖爲主考核古今形勢全國郡邑及蒙旗諸部落悉編以韻言以資強識而於北方疆域沿革諸山支幹各河源流脈絡分會洪纖畢舉四部之書尤篤嗜經學不專一家漢儒之考據通以宋儒之義理其於金壇段氏高郵王氏諸書致力尤篤晚年六經舉能默誦尤耽詩易謂通詩始能通禮詩禮通諸經咸貫澈矣嘗自謂一生學問多得力於易道其古文義法則篤守桐城姚氏詩亦莫莫獨造然不恆作亦不以之教士云廷相故廉潔非其義不苟

取爲學使時嚴禁吏胥需索供張之具皆躬自檢記絲毫不得取  
攜事竣旋都囊中祇碑版書籍無他物也官御史時命監察太平  
倉甫受命倉戶卽輦金供支用立卻之竝辭署職不就其隨秉衡  
使奉天也歲暮疆吏饋金五百嚴拒之不納至質衣以度歲晏如  
也廷相自奉儉約如寒素而濟人利世時引爲己責癸巳晉北口  
外七廳大饑地方官吏匿不以聞廷相立疏於朝陳流民飢困狀  
卒得振恤如腹地己亥冬熱河建昌諸邑饑以邊地無振例大吏  
不敢報廷相時官翰林糾同鄉京官合詞籲請御史代奏 上出  
內帑金振之民困乃蘇其周急鄉里全恤朋僚生死皆無閒沒後  
家計衰落子孫幾不能自存人尤痛之初廷相主講涿州鳴澤書  
院州之諸生有譚昌祺者字介福與廷相爲石交性直介篤學不  
倦而尤嗜宋明儒先諸書新城王振綱主講書院教士子以實踐

之學昌祺從游三年所造益精不復進取拳匪之變與州牧議城  
守製器械嚴保甲商民宴然聯軍入都聞兩宮西幸歎曰忝列  
郊庠不忍見腥羶之氣污我宗社也遂詣孔子廟北嚮仰藥以殉  
時在廷相殉節後二日也大吏上其事贈鑾輿衛經歷入祀忠義  
祠廕一子

王燮

王燮字襄臣寧河人曾祖錫朋安徽壽春鎮總兵道光二十一年  
死定海之難諡剛節卹蔭騎都尉兼一雲騎尉傳襲至燮又以難  
死燮父楫卒時年十一兩弟皆嬰穉母華勵節鞠三子督使學燮  
學古爲詩歌文辭年二十補縣學生屢以古學冠順天二十五屬  
以貧故用襲職出身而教其兩弟皆成進士以久次補京城右營  
都司管承字汎手訂捕章增防卡信之以賞罰境內肅然宛平張



曜一見奇其才及撫山東以書招之曰君善自愛天下事未可知  
儻一朝得脫兜牟則主簿參軍不猶勝以羽林期門老乎將奏之  
自助辭以母老不往光緒二十年中東戰事起燮聞而歎曰臺灣  
失矣因寓書言官力陳不可戰羣起讓之既而戰不利果割臺灣  
以和乃著論數篇都爲一卷圖表附焉二十四年積功升左營游  
擊侍郎長萃總督倉場奏派燮總管巡漕手草新章十事上之弊  
絕風清歲增漕數萬石加總兵銜長萃密疏燮有文武才引見以  
參將用二十六年畿輔拳民亂作折近畿鐵軌斷電綫以爲盡外  
國物也燮宅在東便門外通惠河南邊出立馬郊原對眾言此皇  
家物有敢截電綫一寸者死軍民圍聽悚息自是他電竿盡圯獨  
東便門一綫無恙其後亂民益橫恣紅帕首手刀連臂過市脅戕  
旗漢官所至焚殺尸橫衢巷五月二十五日燮馳馬渡河出巡漕

亂民抽刃圍擁之數而鼓噪揮刀斫而醢之已復舉其尸焚焉燹  
死後二十有四日京師陷 兩宮出狩久之大臣以其死事上聞  
照參將例賜卹家人從灰中拾餘骨歸葬其所爲古文辭皆燬於  
兵其弟焯在瓦礫中得其詩三卷曰秦園詩鈔武強賀濤序而行  
之濤言光緒二十年日本造孽於朝鮮士大夫攘臂言戰而集矢  
於李文忠公有營都司寧河王公獨能不附眾議謂左公非不知  
事變越南之役特徇時論強言戰耳故李公得謗而左公得名吳  
摯甫先生誌其墓謂公言時事多與人意合蓋指此類公詩之外  
又有撫言一卷大氏皆慨時事及自傷不遇之作其獻某公文言  
武職不得有所爲而趨奉上官有如臺隸激憤抑塞而詞旨詼詭  
殆與退之相近余愛其文而悲其意嘗諷誦之今亦不能舉其詞  
矣

忠義傳三終

大清畿輔先哲傳第三十八



卷之三

三

孝友傳一

大清畿輔先哲傳第三十九

天津徐世昌撰

管德升

王廷輔

王之楨

管德升遺其名新安人髫齡失怙恃育於庶母劉劉字撫之若己出邑令以真慈母扁其門德升事劉盡色養子孫有稍逆母顏者切責之三十餘年如一日弱冠補諸生有文名歲荒出所蓄食飢民或煮粥饋之崇禎戊寅清兵圍城人皆譁欲逸德升揮刀厲聲止之縋人城外火民居敵不能近復設奇計疑敵遁去己丑兵變敵船數百蜂擁至德升出重賞募壯士縋城下以火器遙攻之眾四潰開門追擊大勝而還晚年移家蒲城能傳容城孫奇逢之學年七十三卒同里王廷輔諸生事親盡孝養父母沒皆執喪三年不入內室事繼母如所生順治七年土寇掠州境廷輔收恤避難

傳三十一  
婦女數百人鄉里德之王之楨亦諸生也幼有孝稱人以曾子伯  
奇比之居父母喪不食葷酒三年不至私室父沒事繼母愈孝謹  
居鄉施藥煮粥善行纍纍二人者皆雍正八年旌

李顯名

李顯名字裕德新安諸生年八歲遭闖賊變父母捨之去顯名尋  
親三百里得之己丑土寇起父守墓令奉母避地外家時橫尸塞  
途顯名夜輒私往省父往返數十里無畏難色親病籲天求代既  
沒盡哀盡禮素食終其喪性慷慨尙風義濟困扶危以至產落嘗  
曰吾家素傳清白卽以清白遺子孫亦先人志也顯名幼失學年  
十七始折節讀書一時老宿皆敬服之平生以實行爲先教子孫  
有家法康熙五十八年祀鄉賢

智懷行



智懷行內邱諸生少貧傭以養親同邑王氏嘉其孝以女妻之嫂  
氏沒孤子藐焉始孩懷行令妻乳之已子以分乳致死不悔也後  
生四子皆有材器父嘗病渴思甘泉時久旱澤涸不可得懷行禱  
家之智井清泉迸溢人以爲孝感鄰人張采以貧鬻其妻母憐之  
爲典衣贖歸明末流寇圍城久相持賊虜集城下匝之數重懷行  
念母與兄在外堅請出尋之教諭某與硃書縋而下爲賊所獲令  
與一生扛釜供水生失肩破釜賊怒攢刃刺其心死之旋刺懷行  
懷行衣厚不得入呵令解衣受刺甫脫袖見腕繫一帕解視之則  
數寸白紙上朱書纍纍賊執見其酋酋熟視書謂懷行曰汝諸生  
耶欲尋母與兄耶懷行連應曰諾酋目之自齧其指旣而復問復  
應如前酋齧其指亦如前已又問城中有兵否曰有糧多否曰多  
酋嘉其志乃以帕裹其書還之且授以半矢曰持此吾軍無害汝

者既出行數里得母方驚憤仆地扶入郭復出尋兄則方縛樹受射懷行伏服請代得并釋頃之賊竟解圍去則以懷行兵多糧足之一言挫賊之氣也後父母沒懷行皆廬墓三年順治十七年學使熊伯龍奏旌於朝府尹邑令名所居爲孝子莊柏鄉某爲詩記其事曰巍巍鵲山湯湯渚水毓靈鍾秀萃於孝子孝子伊何曰維智氏家徒四壁誦讀不已傭而得食以供甘旨父思飲甘泉枯井底拜而求之舊井斯瀾分乳從子寧子受餒子亡姪存夫婦無悔是生四兒難兄難弟鄰婦見鸞代贖還爾母意如斯成之爲美有明之末流寇至止城門晝閉疇敢睨視智子縋城爰抵其壘剝衣將殺睹腕攜紙朱書成行渠見之喜尋母與兄至不畏死再訊得情爲之齧指乃加擁護授以半矢扶母負兄歸於閭里愚不可及智之謂矣比親之沒廬墓三年宗族稱孝聞於天子帝嘉乃

德命書青史

齊應選

齊應選號文登高陽人生而偉岸讀書知大體事繼母孝尤篤於族族兄介徙別鄉產饒無後身沒羣從欲瓜分之應選毅然持不可爲治喪卹瘞招致其猶子千里外俾承宗祧仿宋范仲淹法置義田一區延師儒教子弟及宗族成童者誦讀其中善治生明季歲祲畿南道殣相望應選出粟振饑凡中外親故待以舉火存活者三百餘家劉氏產絕出四十金贖之人稱盛德卒年七十三

趙明徵

趙明徵字哲公大興人束髮時出語卽驚其長者父士通精於易著易象圖說學者稱潛夫先生慕沈青霞之爲人學畫梅精絕頗秘惜一日畫一枝於縑素自題句以授明徵明徵藏之益刻勵於



畫甲申李自成犯京師明徵扶母胡抱姪篁避臺溪廠母坐淺水中曰急則就深死倏一賊馳馬過明徵以身翼母蔽姪於右腋賊射明徵中胸忍痛拔矢曰兒無恙也力持母起匿他所竟免鼎革後士通卜居濟南遣明徵曰吾東西南北人也顧西山邱墓在焉兒歸矣其代我伏臘祭祀無缺明徵遂獨歸京師奉祀事歲時集諸父昆弟祭畢而觴曰吾有親而離居爲祀先也後之子若孫曰卽於疏祀或不畢集憂喜慶弔或不相往來合族之義其謂之何嗣是修祀事唯謹族用敦睦世父士美老而貧明徵構室備衣食藥餌養之以娛其老友劉國亮貧士也病且死泣託其母於明徵明徵撫之曰子母卽吾母卽子不言吾心已許矣古人不忘夙諾况以母託予敢不養也劉死葬之卽養母於家終其身於是明徵孝義之名聞都下順治十一年與兄吉徵同舉順天鄉試十二

年省父母濟南遂遊江寧病卒年三十七

王昭

何泰昌

王昭高陽人母李被兵北去昭年幼痛母氣絕救之甦及長棄家尋母誓不見死不返逾二十年見一僧詢之族兄也亦同時被兵者述其母所居及守志堅苦狀昭得之母老且病負之行數千里乞食而歸知縣翁周鼎教諭楊燮春爲請旌於朝嘉慶時有何泰昌者文安人僑居永清父振鼎家貧授徒自給泰昌生八歲而父亡出不知所之泰昌食貧事母嘉慶六年水毀其宅避居親戚家半載聞父耗奉母走遼東乞食以尋赤足行泥雪中輾轉千餘里十指皆墮裂投宿旅舍主人憐之留母寓其家予資斧令獨往至遼陽見父相持慟哭泰昌復返迎母來遼陽家獲完聚泰昌習醫養親數年父死家厄於火乃奉母歸里門母卒負土成墳迎父柩

合葬焉年七十餘卒

高桂

孟良弼

于清元

高桂字月賓祁州人順治元年貢士賦性孝友履行端方甲申城陷卧母柩側不去弟槐幼桂盡讓其產與之後授尉氏縣知縣勸學墾荒築堤禦水政聲卓然大吏交章薦能吏第一以勞卒官孟良弼字萬選亦州人也十一歲喪母哀痛逾成人繼母氏趙性嚴厲承顏順志能得其歡心趙生子二人父長發以食指繁命生分良弼盡以田產百餘畝讓於弟後一弟早逝一弟以歲歉蕩其產良弼獨奉父母甘旨無缺供十餘年如一日父卒喪葬祭如禮年九十五卒唐縣有于清元者讀書就外傳聞弟誤傷人以弟爲父所愛也急歸自任罪被繫縲者數年流配日其妻餒之孕而生子後遇赦旋里讀書課徒終其身



張一躍蔡毓秀

張一躍樂亭人順治閒由拔貢授黃安知縣性清介嚴於御吏愛民切至如家人父子擢黃平知州以親老乞歸養嘗為父舐癰病獲安兄多子女弟幼艱於生計推產讓之康熙五十三年祀鄉賢昌黎蔡毓秀官浙江奉化知縣潔清自矢不以絲毫累民清戶口平徭役民受其惠擢山西永寧知州遭母憂歸廬墓九年雍正元年祀鄉賢

王公擢

魏繼樵

李含春

王公擢字遜哉通州人順治二年舉人考授司理恬退不仕性至孝讀書以養其親居喪哀毀逾禮撫幼弟成名終身不析產雍正二年祀鄉賢時同時圻祠者魏繼樵亦通州人順治五年舉人事繼母孝待異母弟友于尤篤官吳橋教諭擢江西永豐知縣操守

孝友一

廉潔多惠政尋遷雲南北勝知州未任卒同州李舍春字梅谷順治十五年進士事親盡孝撫諸弟友崇實學喜獎拔後進累官鴻臚寺卿祀保定名宦以上三人均祀畿輔先哲祠

田大祿

子永隆

張士堯

魏思明

劉潤

田大祿字龍泉通州人性孝友兄弟亡遺子女撫之如己出順治初年饑且疫嘗出米千石振之施棺以斂死者遠近有善人之目事聞世祖命表其閭卒年七十有一子永隆字永滋年十五補諸生考授縣丞性謹厚尚義嘗路拾遺金伺其人還之越數日其人復囊金至乃向負大祿者永隆以無券卻之其人曰公盛德若是敢爲負心人乎鄉里推爲長者同州張士堯魏思明劉潤皆以孝義著稱張士堯字伯建性至孝善事親親沒廬墓三年喪祭皆如禮嘗拾遺金還其主歲荒出粟振饑施藥以活病者邑中義舉

皆以身倡之年八十餘卒子光銓能承父志康熙七年大水沒廬  
舍光銓買舟拯溺結棚以棲居民鄉人德之魏思明字靈善少孤  
性孝友母沒廬墓三年生平好行其德嫠婦貧不能自存活者月  
給薪米俾撫孤完節成就者數十人設義學二義冢三義舟二康  
熙六十一年歲饑捐米千石振之莊親王扁其閭曰以善事親劉  
潤字膏亭靜海諸生授徒甯河一日聞母張病徒步走八十里抵  
家母見之喜汗出病愈父母沒俱廬墓三年遇忌日悽慘如初喪  
年至八旬不衰收撫姊妹子女於家婚嫁身任之設義館延名師  
助寒家子弟膏火應試者悉餽以資嘉慶六年售產捐修文廟竝  
文昌魁星三閣九年蝗災創修劉猛將軍廟禱之蝗滅大獲有秋  
十四年減河決沒四十餘村購椿木葦席築之三日決口塞民不  
知災丙寅山東荒饑民北徙者設粥廠振之三月活民無數爲邑



宰孫某汪某補官虧千餘金又捐築格淀隄除水患施義冢捨棺  
施藥無虛歲年八十五卒

邢琰 王銘 張盞

邢琰字芸圃慶雲人康熙五十九年舉人授徒奉母甘旨不缺供  
母病晝夜侍牀簞幾瀕於危及沒撫棺號泣旬餘咯血死王銘通  
州人事母孝日必備甘旨而自食粗糲不合母知侍母疾左右扶  
侍如嬰兒母沒終身不茹葷不入內室每夜匍匐泣墓前哀毀而  
死咸豐閒南皮張盞家貧幼孤事母王孝躬治稼穡延師教弟補  
諸生盞以貧故弗娶子然一身奉母必甘旨已則啖糠覈率以爲  
常母患風痺晝夜侍側衣不解帶者二十年母疾篤夜禱天願身  
代割股肉進之母沒呼天搶地越三日葬事畢徧謝族人不食而  
死時咸豐七年四月八日也年四十族黨哀其孝備棺葬之斂時

見股創儼然無不爲之淚下云

曹化洽 高國棟

曹化洽高陽武生父患疾三載化洽偕妻柴侍湯藥無倦容繼母許繼患病六載晝夜侍側未嘗入私室鄉里以孝子孝婦稱之涿州高國棟性至孝母年七十病篤醫藥罔效偕妻王禱於天各割臂肉以進母病立愈有司旌之名其居爲雙孝村

王三錫 劉甘蕙 郭雲城 陳兆亨

王三錫完縣人少孤事繼母孝妻邊能善事其姑明末兵亂三錫負母逃爲兵所獲詢知爲母子義而釋之順治初土寇起迫令人夥不從被害子學詩傭工葬父母邊病不起割股禳藥進之立愈康熙十七年父子同旌劉甘蕙家貧事母孝母病思食肉割股以進病遂痊郭雲城傭工養親乾隆七年父病篤雲城籲天誓身代

傳三十一  
不愈割股肉藥之痊知州楊永吉月給錢贍養之二子者皆祁州人也後光緒初清苑有陳兆亨者性篤孝父病累月衣不褻帶及沒哀毀骨立茹素三年母患咯血甚劇焚香告天翦股肉和藥以進母病尋瘳後數年母沒哀毀如喪父時弟病癡友愛尤至兆亨卒弟竟以痛死兆亨性喜施勇於爲義光緒三年旱出錢助振人尤稱之八年旌

### 曹廣攄

曹廣攄字蘊昔大興人博學多聞研精性命之學母病劇餌藥罔效晨夕悲號剖股烹湯以進母病頓愈而廣攄遽以創卒時人哀其孝爰爲之歌曰母若病兮兒無以爲情母或死兮兒不如無生兒病不言兮恐傷母心母生兒死兮惟念之誠生孝易知兮死孝難名嗚呼其愚不可及兮亘萬古而常存



趙植

蕭鵬起

陳心正

心正子秉信

趙植字玉田涿州人幼孤依母盧以居既長爲諸生有文名以歲貢官訓導性至孝事母先意承志母卒嘔血數升絕而復蘇者再三日勺水不入口既葬廬墓三年雍正二年旌同州蕭鵬起少孤家貧力農每出而反必面母不見則悲母沒廬墓三年始歸陳心正幼喪母每念及輒悲號不自禁後居父喪廬墓側足不入城市者三年子秉信亦敦內行年十四割股和藥愈母病人謂一門孝子云

崔士瞻

曾孫恂

崔士瞻字望寰霸州人諸生天姿明穎沈靜有至性七歲授讀目數行下弱冠文譽斐然遠近之士執經問業者踵至名宿者咸折輩行與交讀書不務綴緝章句以敦行明道爲先母疾革呼天

乞身代及沒哀毀幾傷其生其父寢疾牀第者十餘年飲食醫藥  
卧具厠湔濯之事皆身親之異母兄性剛戾虐遇士瞻怡然受  
之有過輒涕泣諫雖撻其怒不顧也生平講氣誼好施予數出錢  
貸貧人未嘗責償年三十以疾卒鄉人悼之者至哭失聲子應鳳  
亦以孝友稱另有傳應鳳孫恂字漢雍魁梧卓犖博通典籍爲文  
奧衍宏博不假繩尺頃刻數千言立就屢試屢黜後入都從長洲  
韓茨游授以讀書爲文之要康熙二十九年舉於鄉一應會試不  
售卽不再試考授中書與都下諸名流相倡和遂以詩名其詩取  
法盛唐書法鍾王爲一時所推重尋以目眚告歸讀書教子立家  
規每月朔望以兼三達尊者一人率族人入祠堂三揖行四拜禮  
序眾以齒禮畢首讀遺訓晏子所云父慈而教子孝而箴兄愛而  
友弟敬而順夫和而義妻柔而正姑慈而從婦聽而婉所以勸善

也次讀遺誠石碣所云賤妨貴少陵長遠聞親新聞舊小加大注  
破義所以懲惡也次讀遺箴卽程子所作視聽言動四箴所以修  
身也讀畢眾皆應曰諾復相揖三然後退嘗手製一杖藏祠中屬  
其家人曰吾子孫有不肖者無論老幼卽稟宗子入家祠告祖宗  
請杖重懲之三懲不改逐出之不可令污吾姓氏也因銘其上曰  
人禽之辨爭此幾希幾希旣失何異飛鴟忘本反噬祇欲自肥晝  
藏其貌夜逞其機作羹食汝不孝同之今銘此杖永遵勿違家居  
二十餘年年六十有三卒所著有薇垣吟草行於世

張璣

彭度華

張璣字照于滿城人康熙十五年進士居父喪守古禮三年不御  
酒肉服闋授陝西清澗知縣期年百廢俱舉內召民鑄石頌德誌  
不忘補刑部主事升稽勳司員外郎母憂歸年六十歆粥深墨哀



痛幾毀其生免喪授河東道不赴卒年八十七蠡縣彭度華字孟  
瞻嘉慶九年舉人會試遇凍殍於途出囊金帀棺掩之典衣而歸  
性嚴正守禮法雖盛暑必整衣冠遭父喪三年不入內室事母孝  
日坐牀側鼓琴以娛其心官曲陽訓導製籩豆簞簋俎登鉶諸祭  
器皆如古卒官曲陽人請祀名宦著有日邁堂文稿一卷古詩二  
卷惇史二卷日聞錄一卷彭氏家譜十卷

陳貺

曹永藻

溫熙之

韓泰夫

陳貺新城諸生父莘亨官江西南昌通判貺隨侍偶外出母暴卒  
貺痛哭死而復蘇一日卧柩側自刃死妻王氏痛夫亡亦絕食死  
豐潤曹永藻事父孝父沒水漿不入口竟以毀死遵化溫熙之少  
孤傭書養母母病寢食俱廢禱於神不效屬續之日一痛而絕咸  
豐四年旌之入祠高陽韓泰夫三歲父死母齊守節以紡績爲生

秦夫年十三卽日市甘旨奉母受室後嘗與妻跪受母杖母病祝天誓身代及沒晝夜號泣米汁不入口七日而卒年五十一

張孝子

韓溥

王傑

王福徵

劉潛

苑梅陶

劉連桂

張孝子永清人父沒穴土以居行乞養母每得食不敢先嘗年逾六十嘗行歌博母歡樂知縣魏繼齊廉其孝爲築室城內金花巷賜粟十石題其楔曰張孝子之門同縣韓溥武生父沒廬墓三年未嘗笑言居祖母及母喪亦如之王傑生浹月母張氏沒繼母李生子佩李卒繼母杜長傑四歲傑事之一如所生杜性嚴厲往往責撻傑順受無忤色杜感其孝卒以慈待之弟佩性剛暴往往侵傑傑不爲校不可忍則趨號於墓佩亦感悟一家稱孝友焉王福徵天性篤孝母病奉湯藥衣不解帶者累月母亡哀毀骨立繼母王性悍虐福徵夫婦譖於其父使逐之福徵攜妻子居園中廢舍

專三十九孝友一

十

每晨輒至親所代操作諍諾弗顧也戚里憐其貧恤之必力辭不獲已則持以白父母歲饑爲人傭易甘旨奉親自與妻啗糠粃久之繼母爲感動招使同居父母繼沒號咷泣血見者哀之時又有劉潛奉父母孝父信繼母言待之虐事之益恭中年喪妻不再娶人咸義之苑梅陶母病醫治無效赴城隍廟炷香默禱剖股肉然指爲鐙比歸母病遂瘥梅陶亦無恙劉連桂母病值除夕剖股肉然鐙以祝母尋愈焉

### 蔣爾恂

蔣爾恂字篤生蠡縣諸生前明戶部主事範化子也範化死崇禎戊寅之亂爾恂時方十餘歲痛哭呼天誓報父仇寫父像已帶劍立其傍朝夕哭拜必祝曰父無恂此仇兒必復也及長多膂力善騎射技勇絕人甲申闖賊陷京師謀舉義討賊未就而賊敗益散



財結死士備非常有王道士者山東人挾異術能前知爲羣盜所  
推道士曰我爲若謀之可也不可以長若顧亦未見有可者眾曰  
然則蔣公子乎道士曰然吾亦聞之第未見其人乃與其渠數人  
往謁道士見爾恂大喜徐與言眾相推戴意爾恂亦喜其眾可藉  
因相與訂盟約待期舉發會圈地事起使來蠡者卽前崇禎戊寅  
射殺爾恂之父者也知縣孔養秀欲博使者歡一日大治具徧召  
邑縉紳與其人會飲爾恂與焉酒酣其人西鄉坐自述其生平戰  
績及戊寅之事爾恂色變潛去一夜往反馳八十里率所結死士  
平明破門入捕其人懸父像磔之以祭先是戊寅高陽孫文正公  
承宗時方家居清師入關慮其復起爲後患全師趨高陽別遣人  
圍蠡縣蔣範化與城守備防禦固高陽旣下承宗徇難死蠡以  
小縣久稽師範化一日巡城指揮守備中飛彈亡眾亂城遂破徒

眾皆死當時情事無人能道其詳者其人於席閒歷歷言之甚自得也孔養秀故貪虐嘗索爾恂金不可得思有以害之及是并殺知縣遠近聞而應者二萬餘人東趨破河間將入山東勢張甚清發兵追而敗之眾潰散爾恂獨率數十騎遁至河側謂其騎曰烏合不足以有爲君等請逃死清所追者我耳我死事卽已言罷投水中眾救之不獲當事者聞爾恂已死眾散恐再變不窮其獄爾恂遂遁去易姓名久之與所親書曰同事皆非其人賊道士固不可用我亦不免書生氣宜其敗也顧父仇已報他何憾今長往矣後同治間蔣氏子會圖爲縣河南有將氏民自言其初亦蔣姓其始祖國初以事亡命來居此因去草爲將焉會圖故知之亦未語其詳也爾恂長身玉立性聰穎爲詩清麗脫灑多可傳誦事母孝有疾侍左右夜未嘗解衣卧與兄弟朋友處恭順慷慨無不得其

歡心初未報父仇時嘗道遇賊四人劫婦女衣叱而縛之已釋去其曹肅甚偵爾恂出縱五百騎伏所經村邀之村居人大恐爾恂笑曰鼠子敢爾時挾兩騎迎其兄女及女幼子歸乃分一騎護之駐村口自挾一騎彎弓注矢躍馬射其前行二人殪餘悉奔其魁呼曰蔣公子胡爲爾某欲質四人得罪狀非敢有他意也爾恂大罵數之其魁謝而去爾恂徐按轡護其女歸鄉又有大猾三人難爾恂一日赴友人飲三人皆在酒半拔刀起舞立斬三人座上眾驚慄不敢動爾恂卒飲盡歡而罷其生平豪舉從容鎮定多類此娶齊氏後娶李氏生一女適滿城趙開元

### 劉克家

劉克家字振夫保定人順治二年進士授中書舍人轉戶部山東清吏司主事兩奉欽差權北新關滸墅關剔弊惠商兩地稱爲慈



父並立碑志思遷員外郎累官廣東僉事告歸性孝友事親愛敬  
兼至喪葬盡誠兄貧爲置產贍養之弟早亡擇嗣以綿其祀友人  
程樂善死代治斂具閭國士久病供藥餌不缺王麟圖卒缺葬地  
擇己地以予之且恤其後人家僕劉安祿服毒斃迹涉李喜克家  
不之究卒獲無恙人尤服其德量云邑隄決水溢爲振其災民無  
流散者邑中有大利害皆身任之不以諉人戊戌秋有議裁併保  
定以省費者克家方在告乃以十不可裁上其議於大府畧謂東  
西兩淀保定居中彈壓所關甚鉅邑治居十五河匯流之處隄係  
三邑性命無官則築防失時必有疏虞之慮且水路之私鹽陸路  
之棍徒盜賊必至肆行無忌爲害閭閻地方從此多事矣夫立縣  
設官爲地方爲百姓非爲官也地方土瘠民貧官何得富豈可以  
官窮遂令百姓無主耶霸州道傅夢麟以所議與撫院再三爭之

卒得復疏如舊云卒祀鄉賢

耿之翰

耿之翰字爾良號戢生世籍定興誠齋先生極之子也生質奇魯艱於記誦讀書畧觀大義不工爲文辭人皆以是少之獨其父喜之曰此眞吾子也極晚年流寓蘇門之西峯樂道安貧不治家人生產薪水之蓄皆之翰身任之常治耕灌園躬自作苦以養父母父癰卧牀褥飲食便溺需人之翰日夜坐牀下三年不去左右繼而父病劇展轉爲艱且舌強不能作語之翰視無形聽無聲凡飢食渴飲疴癢爬搔皆能揣知其意不先不後如所欲言如是者三年父喪未除而母氏又病病則不能卧之翰保抱攜持無閒晝夜寒暑已則櫛沐俱廢飲食不時如是者又三年母卒哀毀骨立居喪未嘗泥禮文而悉合於古不飲酒茹葷不御內則自侍疾以至

終喪十數年如一日也終以勞瘁病五日不汗而死學使湯右曾  
陳至言皆旌其門查嗣栗上聞建坊旌之朝野鄉黨無間言先是  
人問其父孰可與傳先生者極沈吟久之曰畢竟屬之翰之翰口  
無僞言身無僞行不知世閒有機械變詐人或以機械變詐投之  
輒信不疑雖數以此受欺於人終不悔之翰友有毛某者貧甚之  
翰之翰時分所有周之既數年之翰偶食不給其母讓曰未聞立  
眎母飢而飽他人者若再以毛爲言必批其面之翰唯唯一日長  
跪請先受扑責而後敢言母問所以則曰毛不舉火吾家尙有米  
數升曷分半活之母轉瞋爲喜曰有子若此吾復何慮之翰始以  
父母多病頗留心經方因精其術後求醫者踵門無虛日有求輒  
應而不受謝嘗凌晨出門及燭乃返或終日不得食問所醫誰氏  
則茫然無以應也年五十有七卒二子希涑希泗以詩禮世其家



路開泰

謝開先  
劉漢儒

王調元  
段思齊

耿元文

王金坡

蘇奇英

路開泰東鹿人順治閒父天運遠出不歸開泰鬻產裹糧出尋足跡遍天下歷十餘年贖父於滿洲以歸父母卒領家殯葬衣食或不給晏如也謝開先字玉子康熙五十六年舉人襁褓時父痛明亡棄家遠遁稍長母道其故涕泣不食尋之十載始相遇父年已八十矣知府舉開先廉潔孝友流涕辭之歷官至山西平順知縣王調元字燮亭蠡縣人幼時父外出十七年無音耗長而歎曰天下豈有無父之人哉乃習醫術爲尋父計有自關東回者告其父在瀋陽東六七百里許聞之卽啟行負尋父報帖抵通州足重爾遇有鄉人出關者埒其車以行至遼河得資益東行過瀋陽會天雨陷泥淖中失履赤足跋踞凡七閱月忽見其父迎之歸而醫學益由此大進活人無算云耿元文定興人父愉舉人順治八年攜

妻張流寓河南生子允文而張卒葬夏峯愉旋里繼娶魏生子五人元文其季也弱冠念母張骸骨未歸而允文病廢乃自請於父往夏峯不許遂潛行負骸骨以歸王金坡清苑人家貧業農父某赴甘肅鎮番歲久未歸金坡既葬母乃往尋父時花門亂作陷賊中三四日不獲食咬草根咽之年餘抵鎮番詢其父已病沒矣金坡痛而絕者再知縣給路票負骸乞食而歸蘇奇英廣宗人明崇禎十三年大飢人相食父客死山東鉅野時奇英幼常痛哭康熙二十五年往尋不得號泣三晝夜聲徹原野有一老人指示其處齧指瀝血驗之果然遂負骨歸葬同縣劉漢儒甫周歲父遊於外流離至遼海再娶梁氏生子不通音問者二十年漢儒後訪至父母已俱沒弟爲豪家奴袁主人贖其弟徒步千里負骸骨歸與己母合葬段思齊唐山人一歲父出遊無蹤稍長詢知輒思慕泣下

久之補諸生遂子身出尋父歷古北口宣化熱河諸處憂勞致疾旋里嘔血而沒知縣旌其門並勒其行於石

王又曾

劉公舉

王又曾安州人以太學生考授同知七八歲時值歲歉家食糠粃父憐其幼煮粥食之又曾不敢獨食母喪哀毀骨立淚盡繼以血三年不見笑容奉父愈謹父患便澁手探取親嘗之鄉黨稱爲純孝雍正八年旌其同時旌者劉公舉亦安州人諸生四歲而孤母病九年卧牀不起朝夕侍奉無倦容母沒擗踊號痛絕而復蘇者再負土築墳路人哀感

陳倬

父聖俞

陳倬字卓人磁州人父聖俞字起菴順治十五年進士知永嘉縣申免逋賦數千辯復諸生之牽誤者民負營兵債代償之並贖其



留質妻女政聲卓然母憂歸卒永嘉人肖像以祀著有寓甌雜詠  
歸田詩草倬拔貢生父沒廬墓側繼母張性嚴厲倬偕妻王事之  
謹能得母歡弟佶張所出也弱而多病倬與同榻者六載終身無  
閒言人謂倬行如其父世以孝友顯云

### 郭化遠

郭化遠獻縣人六歲父愼以童試遭辱恚憤棄家去不反化遠稍  
長問母知其故卽欲往尋母氏戈泣曰吾剗下惟汝耳汝出吾復  
何依化遠旣念母言而日夜思父至切每鄰里戚黨有他適者必  
跪拜乞爲偵訪村居當南北孔道每日夕必徧詣旅舍殷勤款客  
道其意冀萬一得父所在或有以疑似告者化遠泣丐母往尋往  
來徒走千數百里前後幾三十年不能得然自是遠近喧傳無不  
知化遠者乾隆元年縣役某至河南登封少林寺見一火工老矣

聽其言鄉音也叩之郭姓問胡不歸蹙然曰吾久與鄉絕亦老死於此耳問有子乎曰吾出時子卯哥數歲矣役歸告化遠化遠且悲且喜併日夜南行抵少林求得老火工與之語審是化遠抱足大慟曰兒不孝子卯哥也父亦泣下然意不欲歸寺僧勸之遂偕化遠旋里戚黨空室聚觀慎鬚眉皤然化遠左右扶掖亦班白矣咸嘖嘖感歎不衰云

### 劉廷訓

劉廷訓字聞斯其先世爲小興州人明初遷涑水歷世業農廷訓生而聰慧讀詩至哀哀父母生我劬勞輒唏噓流涕年二十補諸生母病醫藥罔效廷訓割股肉入藥詭言醫所劑和與他藥不同服之可立愈母食之逾日果痊縣令給牌扁旌其門順治三年丙戌成進士授山東臨淄知縣甫下車高遠賊聚眾數千破淄川肆

行屠戮淄川與臨淄接壤廷訓親與士民禦城固守會援兵至擊破之而廷訓亦以憂勞致病值大雨壞城扶疾督民修作工竣而卒

柳枝楊 溫得之 王之翰 張琪裴

柳枝楊字近川靈壽人幼孤其母撫之成立母沒枝楊哀毀骨立廬墓三年炊汲皆自給不通家人往來妻氏往饋怒而出之終身不復娶順治二年巡按旌其門溫得之字子一交河貢生少孤貧祖母王母周早寡事之維謹母患癰卧牀不能起得之與妻穆晝夜侍湯藥數十年如一日母沒廬柩側三年疏食水飲冬不鑪夏不扇知縣旌其閭王之翰字鄰甫藥城人天性篤孝因侍親病久知醫方嘗其糞然後酌用藥餌焚香祝禱誓以身代親病竟愈人以爲誠孝所感生平好善樂施戚友中有貧無依或喪不能葬若



無力婚嫁者皆周恤之道光三十年邑教諭匾其門曰孝子良醫  
咸豐元年元氏令又以孝德善行榜之同治十年旌強珉裴東鹿  
人五歲喪父母趙氏撫之成立妻李以織紡供養之趙病痿卧牀  
蓐夫婦口啖母手自除穢污二年不倦母卒有田六畝悉質之營  
葬

趙燧

王懋桂

王慎德

孫文安

趙燧字子靜唐山人副貢生明文字公問源之長子也生而孝友  
仁慈工詩書酒丁母張憂廬墓側朝夕哭奠上食三年未嘗櫛沐  
髮與泥垢黏結厚寸許及服闋薙下置案上牢不可破見者皆爲  
流涕燧初於廬次築室教諸弟讀書講說諄切每至嘔血或不率  
教隨以涕泣諸弟皆束行爲良士順治初有司旌其問以父蔭推  
授山東商河知縣有惠政愛民若子苦大吏需索不能應竟解綬

孝友一

歸自號懺潛處士年五十八卒士人情之爲立孝子碑同時武強  
王懋桂大城王慎德鹽山孫文安皆以廬墓聞懋桂順治六年任  
萬全衛訓導慎德字惺樞明崇祀孝子祠夢麟之子也世以孝行  
著稱父母沒慎德廬墓三年名其堂曰永思供主其中四時致祭  
如生時手製家訓鐫碑陰以教後嗣順治丁亥吳治匯爲縣宰榜  
其門初革代之際盜賊蠭起所至塗炭獨至慎德所居鄉賊轉相  
告曰此王氏世孝子家也戒勿犯鄉里皆賴以安全至今人猶  
嘖嘖稱之孫文安鹽山人事母姜孝母沒廬墓三年妻病沒惟葬  
日柩前一哭而已盜嘗竊其衣物後知之潛送還沒後知縣黃貞  
麟立石表其墓劉恪侯任天相沈修敬傅光美劉修典母卒俱廬  
墓側三年

劉德廣 徐兆極

劉德濟涿州人國學生父源汴明季官鴻臚寺鳴贊流賊破京師  
按京朝官及選人籍名索諸薦紳榜掠之號曰追賊或立斃或賂  
免或受其賂復殺之源汴名在索中德濟匿其父他所而身自詣  
賊曰劉鳴贊卽我是也賊拷責數百默無言度其父去已遠德濟  
奮起叱咤罵賊賊怒杖殺之而源汴竟獲免時大興有徐兆極者  
其父若兄亦在索中兆極哀泣請代賊爲感動釋之兆極字子京  
順治五年舉人官涑水縣教諭終山西岳陽知縣

### 袁砥

袁砥深澤人順治九年武進士幼失怙事母至孝兄亡母念婦孀  
居孫在襁褓中憂形於色砥曰兄弟之子猶子也况嫂氏早寡能  
以節光吾門乎延族人爲立券擇田產佳者悉予之砥父昆弟二  
人其叔父亡後一子又亡孫及孫婦又相繼皆死遺孤曾孫二孫



女二砮又曰叔母猶母從兄弟之子亦猶子其孫猶孫也迎叔母  
與母同居撫其孤成立嫁其孫女咸如禮康熙七年漳滋并溢毀  
沒廬舍無算砮駕舟拯溺全活者多縣城南街地窪下雨後行人  
多苦之砮捐資作石路十餘丈學宮及他神祠有傾圮者率倡先  
完葺縣人爲泐石記其功雍正十三年入祀忠義孝悌祠

李浚

子恆光

浚弟濬

李浚字宣明西寧人明東川通判齊松子好學篤行侍父疾累月  
不解衣帶父沒廬於墓側生嘉禾人以爲孝徵時詔舉賢良有  
司高其行將薦之力辭不就生平勇於赴義拯困濟危不遺餘力  
順治十年大雪踰月人困樵採浚率眾贏糧入山開徑三十里煤  
運始通由是得寒疾卒遠近慟之子恆光字正陽少負異才以童  
子受知於學使梁眉居時文士皆兼騎射恆光每發輒中學使大

奇之嘗侍父遇盜於途躍馬直撲之盜駭走父沒廬墓哀毀幾滅性著書凡數種嘗秉母訓作閨中儀範一編尤有裨名教工擘窠書大字有徑丈者浚弟濬字文明諸生僮有氣概從弟源客大同姜瓖之變與其母俱陷城中初英王西征嘗助饟二千金至是濬復奉牛酒犒王師且告之故王鑒其誠許賊平全源母子卽賜之裘馬命署大同路通判明年城破卒脫源於難濬在官掩骼修隍招集流散踰二載告歸康熙中卒與兄浚並祀鄉賢

張可久

魏三元

張可久字乾德大名人幼時鬪賊破太名置僞官士民攻殺之賊黨後至糾士民詢首謀者有雷某舉可久父宿名遂遇害可久亡去得免年十九日挾利刃伏道左伺雷出入一日遇諸通衢狙擊之雷馳走從後斷其首尸行數步始仆持以詣縣途中且行且齧

至公庭首無完膚知縣義其孝烈釋之順治十二年申武進士授  
二等待衛出授廣東水師鎮右營遊擊鎮江門叛賊李榮犯境率  
所部兵迎戰入重圍後軍不繼躍馬大呼殺數十人戰死 上聞  
遣官諭祭廕一子後二百餘載至同治七年縣有魏三元者父卓  
雲爲東匪所傷三元持槍入賊隊復仇力竭亦死

吳仲廣

弟仲大

祥瑞

吳仲廣仲大祥瑞棗強之三孝子也族兄弟有仲表仲登者素無  
行三子之父廷博遇之輒面斥其過仲表仲登銜之其兄弟行又  
有仲節者諸生也仲表仲登謀挾其勢難廷博會俱飲鄰莊晚歸  
中途仲節嗾仲表仲登毆廷博斃之時順治五年也仲廣年方十  
八仲大祥瑞俱幼仲表仲登旣斃廷博皆逸去而仲節以金二百  
五十兩通廷博兄廷賓求息訟三子之母泣誓廷賓曰汝不念手



足誼欺諸孤幼余嫠婦何能爲余夫血衣尙在余唯祝諸孤速長  
成耳廷賓竟主葬廷博八年仲廣訴之御史臺檄眞定司理鞠仲  
節與廷賓薄得罪而仲廣以獄事久不得歸失業仲節反以繫獄  
中爲愚戾居閒言官事富倍於前三子旣無力不敢復言上理每  
子母兄弟篝鐙夜績時時環血衣泣廷博死十餘年家益窶無所  
資爲生仲節數數使人通意給之錢康熙元年元旦仲節來賀歲  
往歲仲節每偕衆來今歲獨與一從弟先至三子各持梃伺其伏  
服梃交下仲節倉卒竄至中門外季氏婦疾前扼之遂死於是三  
子各持梃自首至縣曰猶未旰也或教仲廣一人當之仲季可生  
無俱斃狂狴中仲廣然之獨首縣堂仲季曰同報父仇奈何令兒  
獨陷獄各持梃爭首縣縣宰愕然異之時大吏以廷博死仲表仲  
登手仲節罪不至死律三子一死二戍冀州知州許某力爭之發

仲節與廷賓通賄狀坐仲節元凶如律予三子杖當三子入獄時  
家窘甚無以供食飲又苦蠹役需索三子婦晝夜紡績各竭十指  
力供給數年不怨悔論者謂非獨三子孝也乃其婦亦皆賢女子  
也季者尤俠義有丈夫氣廷賓初無子受財娶妾已生子矣身死  
子亡妾改適一妻老無依三子出獄後爲耕田以養之及卒爲鬻  
所遺田產器物以治其喪縣人劉元燿爲作三孝子傳

### 司世教

司世教字覺斯號沙南居士靈晉人生而端凝自兒時循循雅飭  
王父奇愛之曰此子非凡將大吾宗九歲能文匡坐讀書未嘗傾  
欵與同邑張公儀立存社文益進順治十六年成進士康熙五年  
選授湖廣巴東知縣巴東山邑也初置縣百姓僅六七百戶田數  
十頃世教莅治政尙寬簡民有訟者立於庭曉之大義不苟細小

惟專以墾田勸耕爲務嘗單騎至鄉與諸父老絮語告以種植蠶織之法暨孝友睦婣諸事二載民數增至千戶田數千頃尋卒於任所年五十九士民醵資爲建祠祀之且挂紙錢於竹效宋寇萊公準故事更謠曰小小巴東枯竹兩叢前生寇老後生司公世教初丁王母艱哀毀踰禮人或慰之泣曰吾七歲而孤兄弟姊妹累累惟依王母以生非王母無以有今日聞者皆感泣友於諸弟一姊早寡無子迎歸率妻事之終身竝爲置後教子以嚴跬步造次必於禮康熙十二年長子鼎臣又登進士父子竝躋清列惟孝錫類王父之言於是驗矣

### 劉澤厚

劉澤厚字救菴吳橋人明諸生年十五隨母省王外父於河南值闖寇陷城負母逃走刃下創徧體卒脫母於難父大晟死難柩寄



晉中冒兵燹返樞葬之士大夫咸嘖嘖稱其孝順治十六年成進士任四川江安知縣多善政土寇白應龍等焚劫城郭率友人周天球家丁息自階等八人鳩民兵出城禦敵戰一晝夜眾寡不敵死之事聞贈按察司僉事祀鄉賢雍正二年祀忠義孝弟祠

趙萬麟

賈錫穎

李遇奇

趙萬麟冀州人幼沈毅有膽畧父俊與同里李光不相能明季盜起光執俊并其長子萬象殺之萬麟時年尙少光易之得免後漸壯謀復仇乃故暱光與飲博盡歡光以是益狎之不復爲意會光淫其族弟某妻礙其叔翁拔貴將殺之拔貴覺而謀諸萬麟萬麟喜與相結又私念拔貴爲人懦不可專恃且光之族大慮後變里中有張可介者義俠士也嘗爲人出死力告之故乞與偕行可介諾之及期萬麟可介併擊之光視萬麟曰若宜殺我可介何爲者

已而光垂斃，扳貴果求止。萬麟厲聲叱之，遂碎其首詣州。自首曰：是殺吾父兄者，吾殺以報之矣。州守金成良嘉其孝而難於律，乃薄懲之。與可介竝繫獄，後遇赦俱出，得不死。同時賈錫穎，景州人，其父光彝及世父光顯，光祖爲同里大盜王。小廷所殺母周亦遇害。錫穎時年十四，匿他處得免。小廷後受撫歸里，易錫穎而侮之，曰：若當德我，非我安有若錫穎？陽謝之。順治八年，錫穎年十六，值四月八日，里中爲社賽神。小廷飲酒肆，錫穎潛攜利刃入，自後刺之，洞其胸，斷首抉心，持奔父墓，哭祭畢，自鳴於官。當事廉其實，壯而釋之。景州後又有李遇奇者，亦以復父仇聞於時。李遇奇父孔昌，罹巨盜齊七之禍，遇奇走數千里，偕捕者入其巢，禽之，置諸法。歷官刑部江南司員外郎，罷歸卒。

陳廉 高文友

陳廉字純白冀州人母病革數日水漿不入口俄而目瞬口開闔  
有聲廉倉皇出戶有頃捧一杯羹進母母言適欲食此何辨之速  
也廉以乞諸鄰媪對後每進食母輒不樂曰不如向羹美廉復詭  
爲肉以授其妻曰試作不托奉母越數日家人見廉形甚悴衫有  
血痕疑而不敢問俟熟寢解衣視之左臂刲肉三四寸血淋漓驚  
泣廉寤急止之曰毋然恐傷母心母尋愈廉亦無恙同里高文友  
字魁儒南宮人七齡喪父哀毀骨立如成人與母氏鄭兄仁友相  
倚爲命性慤謹未嘗讀書言動皆合禮學士家莫之逮也母嘗遭  
危疾醫禱罔效夜夢神告之割臂肉作粥疾頓起居常婉容愉色  
進止眎母意爲向背一日遇鬻女者於市買歸侍母母見之戚跪  
請得其故立還其父母不責償遇里社祭神報賽輒虔祝母壽勤  
施與矜鰥寡恤窮乏凡利於人者罔弗爲母祈永命保康強也母



卒悲戚哀感惘惘然至不辨朝暮躬自負土成墳結廬守墓時子然獨處里中無賴往往伺閒欺侮之或掠取衣食文友弗爲動已皆感格戒不復犯天寒風雪中有人來餉以漿挾一簋甚重既去滿室暖氣翕然始覺其異跡之已杳人其詫爲神貺云督學使者先後以孝旌其門舉鄉飲大賓卒

張咸

趙秉謙

劉叔茂

張咸景州人父克纘孝友好義國初承明末之弊又經兵燹邑所屬土曠賦繁民相率賣妻鬻子償租稅克纘盡廢其產佐輸得保聚者數十家貧日甚不顧咸幼喪母日伏冢側哀號失聲家貧體無完衣而奉父必甘旨父病瀕危與妻買侍湯藥月餘不怠性澹泊有遺千金產者謝不受雍正元年祀鄉賢咸子淑迪康熙五十五年舉鄉飲賓總督蔡某旌其門淑迪子壽亦有孝行自克纘至

壽四世篤行爲一州所宗時仍世以篤行著聞者深州有侯守基  
趙秉謙皆五世同居有司表其閭秉謙家素封男女內外百口準  
人賦食嫁娶喪葬用有常度童僕婢妾皆循循規矩論者以比李  
自倫秉謙子其躋其鼎與其躋子克毅孫廷蘭並康熙間同榜舉  
人州又有貢生劉叔茂者幼失父母事叔父母敬慎有禮子岡鳴  
舉人有司以七世同居旌其門

王之俊

崔生

荀殿臣

劉印永

王之俊字越凡深州人六歲時守喪歸輒懷其佳者進母康熙十  
四年丁父艱旣葬俊盡以產分給其族將廬於墓族人難之不顧  
或曰餓之自返也俊露坐數日風雨饑窘不以挫族人憐之者  
漸往饋食鄰人林悅晉荷席杆爲架窩鋪居之久而食或不給經  
二旬有八日悅晉往視猶生也乃自任饋事且從林青市柏百餘

株植其坐旁曰饋儻缺食柏子年餘林青病謂其子曰吾饋王孝  
子不終死有遺憾其葬我王坐左右爲鬼猶得伴孝子也之俊跬  
步不他出惟送林葬行三里許旣三載邑貢生高近明糾衆謀薦  
之俊歎曰端木廬孔子且六載況吾父復廬三載又補廬母氏喪  
六載已而曰終身可也野棲旣久靜觀天時默識物化頗能言雨  
暘休咎問者接踵歲旱州守問之應來謝曰偶中耳之俊何知鄉  
鄰又有尙少菴者與其子國來募諸邑米數十石給之俊食秋水  
大至汪洋浩淼田無人跡者旬餘近明歎曰嘻孝子死矣棹舟往  
見之俊方踞樹阬坡上氣息才屬近明強昇之舟歸養家塾中水  
落還墓山東趙某過其墓見席窩曰是何可居歸語其弟晉不遠  
數百里爲墓瓢起廬初之俊苦無水有荷鋤於田者過之之俊借  
鋤三斲地水突出曰可瓢許足炊用名之曰三鋤井暑月農人濬



而深之之俊卒水旋涸州布衣國之桓舉之州州正置不理已而督糧廳胡燿署州事之桓復言之燿進之桓問狀對曰嘗讀春秋傳云子既生不免水火母之罪羈貫成童不就外傳父之罪就師學問無方心志不通身之罪心志既通名譽不聞友之罪燿起拱曰名譽既聞有司不舉有司之罪矣遂詳府道之桓又走薦京師涂遇田逢年行傭得直佐之桓資斧之桓卻不受逢年恚曰善許私爲耶不以分人田逢年又展轉不避鞭笞卒助之桓以之俊事上聞之桓家有小犬每聞之桓爲孝子事出輒從凡五載止旅舍護眎其驢日暮則前後奔馳掉尾曳塵暴客望之疑騎從多疑畏不敢犯過陟陽之桓再出閉舍門犬抓闕豪躁移時不得出憤投雪中死二十二年夏之俊在墓十八年矣廬災之俊病族人舁之歸舍遂卒督學使者奏其事奉旨錫三十金建坊於墓博野顏元

聞之爲作九異傳顏元嘗記安平崔生廬墓事事在王之俊前十年崔生逸其名弱冠丁父艱廬墓或請顏元爲文贈之旣崔廬墓九閱月元乃爲之序曰廬墓非古也古人之居喪也奉其親主於殯宮倚廬中門外粥食不食菜果不酒肉不入內不偶坐不侶行朝夕哭朔望奠哀至則哭三月不怠期悲哀三年憂禮後擇吉內新主於廟祠行祭禮故喪中奉主於殯宮喪畢奉主於祠廟而墓不與蓋人之死形歸幽窀神返堂室孝子尙神不尙魄也故曰廬墓非古也廬墓者近世孝子之不得已也自禮俗崩壞家無禮法人無禮度中門不窺內外界嚴孝子能自信之也未必能兼爲人而信之言而不語問而不对孝子能自守之也未必保人皆守之則患有奪喪之人而其爲喪也不終大喪廢業非杖不起孝子能自遂之也未必家政可使之遂其家有喪君命三年不過其門孝

子欲自安之也未必吏治能使之安則患有奪喪之事而其爲喪也又不終所讀惟喪禮祭儀所思惟父母罔極孝子志自一之也而聲入於耳形入於目鄰情眷誼旁人歌笑皆足以雜孝思則患有奪喪之情而其爲孝也卒不終是以決志於塋原之畔搆環堵以自蔽庶幾其信吾哀而可守也遂吾哀而可安也而孝志一矣蓋亦由家不設殯宮奠不重神主故得爲是也云爾然非三患迫之則殯宮之制神主之禮孝子必能慮及而考究之何必戀戀無知之魄從諸荒野以蹈之死致生之不智也故曰廬墓者孝子之不得已也我上谷孝子最多以廬墓聞者更多以吾耳目所及則若蠡吾王孝子一龍渥水仇孝子雲慶金容孫徵君鍾元尤表著者王孝子家無餘丁惟妻杜氏每餉去墓百武懸一樹輒避孝子取食仍懸器於樹還廬杜乃取之去蔣戶曹有傳誌之仇孝子六



十無子畜一妾親知力阻以無後非孝而不顧大雪冱寒鬼燐頻繞而不悔孫徵君有傳誌之至若徵君又充廬墓之孝而爲今世名儒節操學品卓異一時幾與古人頡頏所謂立身揚名終孝事者矣要皆行孝子不得已之事而不失古人居喪之實故可傳也僕見今所稱孝子者始也不飲酒矣不食肉矣不入內矣久之而旋渝焉今之所稱廬墓者以孝聞於外矣而信邪說犯名教于先王之法以爲父母戮此豈孝子而有此乎抑其孝有不真云爾故子脊之非敢爲孝子疑也恐子言不信也昔仇孝子之在雪廬也題詠獎贊郵致者累牘皆聚而焚之非惟遠名也孝子痛楚惻怛肝腸若裂方自以爲罪戾聞人譽諾反傷其心故子不敢作過情之言吾友以此上其廬當不爲崔孝子所燼矣時安平又有荀殿臣而深州有劉印永皆以廬墓著稱

高裔

傳三十九

三

高裔字素侯宛平人少有至性年十二父鵬飛以吏事被誣謫戍  
潘陽裔涕泣號呼欲上書請身代眾駭遽譁笑易孺子言莫與承  
聽久之行訣泣曰兒不能發憤致身使父生還十年後當獨身依  
戍所不復言歸矣自是日夜刻苦問學成康熙十五年進士入翰  
林會以地震推恩開贖罪例裔請於朝告貸鄉人之官京師者卒  
贖父以歸方是時裔仁孝之聲震天下而終身或有以此相譽者  
輒忸怩蹙然若無以容少善草書詩詞雅健得風人之意後皆不  
復置力日侍門內閒爲其母披覽雜記陳說其義用博歡樂父出  
寒時貧無以生晝從諸昆弟坐列販鬻夜且泣且誦每達旦不寐  
嚴冬服布單衣寢食靡節氣滯腰脊閒遇勞苦憂煩輒作凡二十  
餘年及父沒裔方卧疾母命哭踊勿備禮裔強承命內痛積心數

曰氣滯處毒發如大孟醫視出曰不可治也疾既篤一門人入視把其手歔歔曰子無憂某雖無祿亦當終事吾母踰旬竟卒時康熙三十九年二月十三日也年五十四裔嘗分校禮闈典試秦中視學大江之南號爲廉直不枉所得皆名士桐城方苞其尤也歷官由通政司左參議五轉至大理卿所司纖細皆得其理娶田氏事舅姑一如其所以事父母始歸時舅尙羈塞外數年中與裔相對輒哽咽未嘗笑語有寬容先兩月卒

### 趙巡

趙巡鹽山人父邦智享年百十有二生平儉樸兢兢有守嘗以事至鞏華飲酒肆坐有遺金久稽不去俟其人至還之里有李進孝者遺金邦智榻間翼日持還其家後被里書報大戶與同里張松共收里稅以貧不能應攜家避往樂亭松故狡獪以負逮邦智繫



獄賄屬獄卒置之死巡時年十四痛哭告語其兄父有子四人而  
獄死曷賴有子也兄皆逡循不知所爲計巡毅然曰我代父死有  
三兄父不爲無子不爾我四人無父矣言已泣下諸兄計與偕往  
給獄食抵家欲爲一炊乏米貸鄰糲屑煮之熟讓諸兄食諸兄曰  
汝食代父死我食何爲於是食畢赴縣至劉公渠適母氏霍自邑  
來卒見之驚曰汝胡來巡曰兒計來代父霍曰汝父比急瀕死矣  
傳語汝等皆遠避日暮吏來遍捕汝等不得脫卽長汝者無能爲  
汝幼徒投死耳汝胡來語畢挽之南行巡曰兒誓不同矣強之不  
可至縣白邑宰曰趙巡邦智子也家雖貧猶有田宅父在獄其誰  
與售願身代父出辦財償負邑宰許之釋邦智初巡至縣先省邦  
智獄中邦智咎其不宜來已又誡曰汝勿言恐人知爲吾子也巡  
卽大言於眾曰此吾父也今來相代眾皆異之及見邑宰釋邦智

巡貫三木與松同攀時當嚴冬寒風淒冽松固躄者心輕巡少故以所扶杖擊其桡巡佯與好言因攀至近一扼仆地痛擊之呼聲驚邑宰巡泣訴松惡狀因言巡父以貧故徂亡於外會計惟松乾沒亦惟松於父何與邑宰怒易巡桡松然猶未遽釋之也巡至獄益憤不與松俱生直松食輒奪而急啖之使不得食至夜豫以一瓢作枕強引松被自覆松叱之巡怒曰我與若畢命於此若欲安眠耶因抽瓢擊其頸眾驚起大異之曰此子非常年雖幼不可輕也繫十餘日遇赦出後生三子長光耀亦有孝行既出就外傳懼父年高不及見其成每挑燈夜讀輒書借壽十年四字禱於神及補諸生邦智猶坐肩輿觀其墓祭禮云

李桐 呂燦 吳緒祚

李桐饒陽人父以貧遺客凡二十八年不歸桐幼卽請於母願出

尋父母曰吾志也但汝孩提從何處覓邪因母子相抱持悲泣後  
桐長遂與母訣徧蹤跡父不獲久之聞父在關東鐵嶺往果得父  
父老疾不能遠行桐則傭鐵嶺歲餘以傭值市蹇驢扶父歸父母  
至是復聚里人感泣公題其門曰真孝呂燦字闇公深州諸生節  
士叔成子也崇禎十一年年十三母賈氏沒號泣不食至耳目閉  
塞無聞見未幾父叔成殉節哀毀如喪母期年祖母滿氏又沒燦  
獨辦喪具至傾產不以累諸父其幼孝者呂燦後又有諸生吳緒  
祚年十二喪父勺漿不入口者數日後遇忌日輒涕泣凡五十年

劉復作

劉復作邯鄲諸生年十歲父沒以貧廢讀書操井臼習紡績供浣  
濯糞除之役母病割股齶天願身代既沒則大痛曰吾母豈可須  
臾離耶夜縊母柩之側年二十餘自書遺屬閱者爲之垂涕



賈廷輔

趙越

賈其仁

康收

梁夢熊

賈廷輔雞澤諸生七歲喪母奉繼母孝事兄謹父遺產聽兄擇取母病侍湯藥滌除溺器嫻族不能婚葬者竭力助之永年馬某死都中廷輔醵金殯斂邯鄲裴某困保陽不能歸適廷輔同寓濟之得還有司上其事奉旨旌表入忠義祠同縣趙越字踰生貢生幼喪父哀慟幾絕居喪三年不茹葷每食必薦母張知文教越早歲補縣學生越資脩脯供甘旨能得母歡年八十一卒賈其仁性至孝母沒父不再娶其仁晨夕侍父側寢則依牀下二十年如一日父好交游其仁每伺意邀所與具酒肉以從雖典質弗計也縣有以忤父母聞者縣令其仁責之觀者如堵咸咨嗟勸勉而去康收諸生事母孝母病侍湯藥嘗糞卜吉凶知縣管繼武旌其閭梁夢熊諸生母卒居喪三年不食葷酒寢與父俱二十年無倦乾隆十

二年旌表建孝子坊

宋時化 宋時正

宋時化深澤諸生幼事父母早以孝聞年逾六旬慮父母見其衰  
老時作嬰兒舞蹈以慰親心父病篤禱天願身代病立愈父年至  
九十二乃終時化鬚髮皓然悲哀號泣若孩提初免懷抱者見者  
稱之平居每與子孫言人之事親須先立品品不立雖甘旨定省  
非全歸義也因作詩箴族黨人皆化之壽至一百歲而卒將死子  
孫問家事無所言惟言人皆可以爲聖賢而已子孫皆有聲庠序  
至曾孫鋒銜聯科舉進士以爲孝友之報云雍正十年入祀忠義  
孝悌祠縣又有宋時正字貞侯不知於時化何兄弟也性敏嗜學  
順治十七年舉人幼時出嗣叔父事叔父母本生父母皆以孝稱  
飲食必親嘗每夕親滌溺器撫孀姊之孤如子孤亡又爲立後經

紀其家事初任吳橋教諭嚴條約立社會諸生經造就者多成名補景州學正如在吳橋時及親喪歸葬兩學諸生不遠數百里來執紼至數十人其得士心如此雍正八年縣人公舉入孝悌祠

### 趙方頤

趙方頤字養公武清人河南學使珣之子也七歲喪母事繼母徐如所生閒從至外家外祖篤愛之過於諸孫方頤姿格穎秀眉目如畫事徐十有餘年能得母歡既冠就婚江甯未彌月聞徐病卽日攜其妻兼程歸而徐已沒居喪哀毀骨立每與人道及輒哽咽不自已事祖母張尤久珣旣沒張尙康強方頤兄弟左右侍養惟謹珣在河南方頤綜覈署事內外肅然父病以元日焚香籲天請減己年延父壽喪葬一遵朱子家禮事其兄方觀友愛白首無閒言鞠幼弟教諸子恂恂愉愉遠近稱其家法雍正十三年五月卒



年五十九

王潔

王潔字汲公別字洵盤大興諸生父世德初娶徐生潔而卒繼娶魏徇甲申之難又繼娶蕭生源國變後世德數欲死不得久之弃家去南游潔時方九歲蕭日課之讀書教幼儀弗少懈戚姆或讒之于食拊曰兒母非母後母也弗兒恤喚兒何辜爲泣下潔艱然投箸起趣歸入門奔母前抱之大慟母驚問故語咽不能出哭且訴曰某姆不仁謂母非兒母後母傷兒心母潛然相持愕不止戚姆聞之大慚自是中外無閒言世德南游數年不歸蕭攜潔兄弟南下與世德會渡江偕隱一年卒於高郵潔哀號水漿不入口累日夜擗踊無節幾滅性支離苦塊年餘每夜半撫棺嗚咽或夢中號哭而起聞者哀之潔自孩提未嘗與羣兒嬉初入塾師授之

讀輒能成誦請益者三師曰足矣俟明日曰明日自明日今日將  
何爲師大奇之旬餘大學中庸卒業一日宴客演劇潔苦囂喧自  
覓靜至後園坐大甕中讀書十二歲補弟子員有聲試輒高等及  
南游遂棄去不復試偕源從清苑梁以樟講學潛心理窟以樟深  
器重之源自四五歲潔奉母命授句讀至是教益嚴時予杖曰我  
敢忘我母臨終語而背之耶則擲杖泣故源事潔爲嚴師潔護弟  
如保母人兩賢之潔事其父能先意承志嘗客山陽其父將遠行  
患腹疾潔夢中泣禱於關壯繆侯祠既返見父坐水閣飯壯繆從  
後殊書一好字於背寤而父正坐水閣食未畢自此霍然中州巨  
室孟氏有女能詩善鼓琴慎擇配聞潔父子名遣媒妁來締姻許  
假田宅世德語潔悽然曰母藁葬他鄉不能返兒寢不安席忍議  
婚耶因泣下辭去後丐寧都魏禧爲其三母立傳曰潔聞人言後

母字若刀刺吾心梁以樟亦嘗語人曰王生真古孝子吾不忍譽其孝恐傷孝子心也年幾四十不娶父強之授室潔念親老無以爲養時時出游嘗艱險卒無所遇鬱鬱成疾會妻楊氏又卒病曰劇時源館京師付書慰藉之潔答書云弟書字字血淚讀未竟失聲哭哭已又讀不意筆墨能感人千里外如此此道今人固絕響未知古有是否則恨不令祥覽見也吾疾從此瘳矣越數日竟卒時康熙三十年六月十九日也年五十有五無子以源子兆符爲之子其將卒也遺書與源曰潔生平無大過今不幸遭此變命也積志未酬時也不能終養不孝爲大然老親自荷享祐吾弟賢聖發遇在卽我亦可瞑目地下但苦吾弟耳源爲著行實有云兄九歲得源母後母也久而忘焉性至孝愛母服母訓母不知子前子也

張義

郝元功

曹允正

李良輔

劉復燦



張義字宜五獻縣人少喪母繼母章氏私其子禮智每虐使義毒  
之不死縊之不死義事母益謹加敬禮喉母斧斫其臂創深垂絕  
復蘇族眾忿欲鳴之官義跪而涕泣謝眾曰是益重不肖子罪不  
肖死無恨章遂出義與其婦戒村人不得留義與其妻賃春高陽  
三數日輒攜甘旨歸省母數年禮智蕩其產義輒爲出值代贖之  
章意少解乃率妻子歸置田宅禮智死爲厚葬之章感悟乃與同  
居年八十餘卒知縣宰侃旌其閭同時事繼母以孝聞者祁州則  
郝元功獲鹿曹允正冀州李良輔唐縣劉復燦郝元功字巨勳八  
歲失恃事繼母馬氏色養四十餘年氏性嚴厲稍失意輒怒詈元  
功長跪請罪務得其歡後已父旣卒母待之尤酷一日家人承母  
命偶失意母大怒元功惶恐失措無所容戚里憐之代爲跽懇始  
已元功蓋水漿不入口者數日矣後母感其孝時爲霽顏州守吳

寶芝旌曰祁陽懿德營田觀察使黃世發監察御史戴永椿並表其門曹允正字素修幼穎悟其父鍾愛之七歲失恃繼母遇之虐年十六補博士弟子賀客咸在母摘小過鞭笞之客驚救得免母時欲逐之出允正日夜飲泣窮無所歸或爲之謀曰君試廢學觀母志若何允正從之母怒立解允正問故其人曰此無他但忌君有名耳允正曰但得親歡功名皆身外物也自是絕意進取與傭工同操作性耽吟悲歌抑塞讀者皆哀其志異母弟宦江南母隨之任允正時往省視加孝謹焉李良輔字夢賚十歲喪母哀泣踰成人繼母孫性嚴酷良輔奉事之謹父病良輔獨侍湯藥數十晝夜幾廢寢餐及沒繼母欲薄葬良輔哀辭懇切卒得如禮後繼母卒日夜號泣聞者哀之後舉康熙三十八年鄉試終新城教諭劉復燦年十四歲喪母事繼母周氏竭力奉養周屢鬻田產以濟其

家復燦無怨言嘗怒責復燦跪門外時雪深尺餘不命之起不敢起再事繼母楊孝養與周同楊沒時復燦年已七十矣盡哀盡禮聞者歎服先是復燦五旬父病焚香祝天求身代既卒絕粒數日幾死父生時所嗜食終其身不忍嘗乾隆五年旌

### 任培元

任培元邯鄲人性至孝父病晝夜侍側未嘗解衣卧及沒擗踊幾絕廬於墓三年家貧母老人有貸之貲者力辭弗受與弟躬耕養母甘旨不缺供母沒廬如故雍正四年旌

### 路允升

路允升字廷彥曲周人明巡撫振飛之孫也少有神童之目年十四補諸生康熙二十一年成進士改庶吉士閱一年授檢討爲人和易有容而性耿介不爲貴勢屈好讀書喜爲詩在翰林三年一



羸馬蹙蹙自館中歸閉戶哦詠聲達戶外然雅不欲以文章自見  
居嘗私言得爲御史快言天下事於意良足至性過人以官繫京  
邸不克時侍父母左右皇皇如有所失欲乞假省覲父止之不許  
居無何父以痰發竟卒訃聞一慟仆地久之始甦擗踊痛哭寢食  
俱廢奔喪抵舍淚竭目腫百日後肌肉盡消每慟輒嘔血母至強  
作溫語去輒復慟或勸以滅生不孝復慟曰非不知此奈情至無  
如何耳浸至病不能起顧猶強爲朝暮奠母氏察其動止有異以  
手摩其面泣曰爾以過毀致死何以處未亡人允升故爲強步大  
聲咳嗽明已不病一夕嘔血不止握其弟手曰吾已矣爾必求名  
師益友續吾家聲不願以富貴相期也言終而逝目猶眇母氏至  
撫之乃瞑時年僅二十八耳先是允升妻氏彭姪過大期允升病  
急乃舉一子允升猶及見之論者謂天之所以慰其孝也

# 趙昇

趙昇字虛齋大城人曾祖臺光順治中恩貢授河南歸德衛經歷署靈陵父萬肇母駱氏隨任所生昇甫八日母亡寓養於同寅高氏家年餘臺光亦卒萬肇念兩柩力不能竝舉葬其妻靈陵南門外刻石爲誌曰大城駱氏之墓並納壙中猶奉祖柩偕昇歸家昇稍長問知母氏羈葬遠方念之輒流涕欲往取柩父以年稚不許康熙二十六年昇年二十三矣假資戚友尋母柩南行至靈陵資已罄求母墓不可得昇呼天號泣乞食露宿數月徧訪土人無識者昇痛憤誓曰吾生於斯亦宜死於斯不得母柩吾不歸矣秋八月遇人於途問之告以故其人曰爾三陽乎三陽者昇小字也昇愕然曰然其人曰吾榆林高某也昔吾祖與爾祖同官汝失恃乳食我家爾顧未之聞之延至其家呼妻出曰此爾昔所乳之三陽

也曷涕泣稽顙再拜高夫婦亦爲墮淚代訪久之得臺光舊僕迹  
墓所在至南門外宿麥彌望邱隴皆平僕相眎其地形縱橫步之  
度樹木遠近良久指之曰在此掘少許見所誌石猶存曷曰此真  
吾母也已又念路遠乏資喜繼以泣乃沐手拾骨高資以二金負  
之北行及河水漲不能渡旁有一人裝似驛吏問故曷具以告其  
人曰爾苦孝人也來從我因買舟徑渡既抵岸其人已不見矣既  
抵家治棺成禮葬之先塋由是孝子之名達遠近焉雍正九年卒  
年七十七

司鴻銓

司鴻銓字傑士曲周人祖某字松軒邑名諸生耄而勤學一日藏  
書庭生草葉如薤長尺餘祖曰書帶也吾子孫當有以文學顯者  
鴻銓生而岐嶷四齡受書聰穎逾恆目下數行覆誦無一字遺年



十八補諸生食餼尋登拔萃領鄉薦益發憤下帷足未嘗出書齋  
一步嘗謂殖學如樹木於六經固其根於百史扶其幹於諸子百  
家擷其實而揚其華家貧藉課徒養親父春秋高出入扶持怡然  
如嬰子弟妹有目疾醫之不效鴻銓百計以娛其心嘗戒其子曰  
爾事叔父若姑母當如事我渠疾於目我疾於心也一日讀庭堅  
傳反復吟誦香國中來香國中去二語焚香默坐若有所思鑪灰  
未溫無疾而逝鴻銓性嚴毅少合惟喜獎藉後進士無遠近多歸  
之里中一無賴子眾縛而懲之踣而請曰背可鞭面可唾但無使  
司孝廉知謂我不才至此也其居鄉化俗論者比之王彥方云

### 崔渭源

崔渭源號清夫長垣人侍講學士崔蔚林之子也生而穎異神清  
質粹祖九圍奇愛之字曰肖玉蓋深喜渭源之克肖其父也爲制

舉業精潔淵微登康熙四十四年副榜人咸惜之渭源少卽致力  
聖賢之學不以科名得喪介懷嘗語所親爲學須向日用倫常中  
著力庸言庸行其味無窮彼不務實而馳騫於聲聞之末者固不  
知此中真味也六歲母梁卒哀毀盡禮一如成人繼母張遇之虐  
父子告歸林下養疴蘇門渭源請從每食畢肩輿出遊渭源挾書  
一卷茶一鎚隨其後天暮乃歸就寢日以爲常及父疾篤左右侍  
醫藥七晝夜寢食幾廢父沒渭源年始十四執喪三年寢處土室  
中不鑪不扇每至父遺疾日輒潛然淚下越旬餘容色猶慘戚若  
初喪時祖父尙在渭源以孫代子職十餘年如一日祖父性嚴見  
人小有過失輒呵責加之渭源委曲承順能得其歡心繼母善病  
奉養無方終其身無一事一言拂其意侍疾常至夜分數命之退  
乃退一日母盛怒自晡至夜闌渭源怡色順受侍立門外俟其母

履熟乃退至私室無幾微怨怒意見於辭色外家張氏貧涓源解囊周給未嘗使其母知或待母言也事兄若事父四十餘年無閒言母命涓源與兄析居自留四百畝又以三女在各爲留田百畝備遣嫁費及母卒涓源悉歸之兄又益以己田三百畝宅三區兄辭焉涓源著歸正說以堅其受曰此非讓產也乃兄所應有而弟歸之耳涓源好義樂施嘗做宋范仲淹置義田給族黨有從兄以田求售價百金如價買之復歸其田曰我非買也相助耳嘗買一女奴已逾年矣知己許人召其父母還不問值有盜賣其田者置不問曰此迫於饑餓耳其厚德及人類如此涓源幼清癯多病晚年連遭繼母兄喪哭泣增劇而神志湛然疾革取巾櫛沐浴語不及私惟命于鑰纂述其父遺事續之家譜言畢正容而逝時雍正八年六月二十一日年五十七



李成龍

李成龍字興澤冀州人年十五與仲弟化龍同被兵虜泣告主者曰親老且病身願執鞭乞還弟侍養許之行至深州主者遣所虜丁壯運束芻秣馬成龍後至主者曰吾以汝爲逃矣成龍曰負多力不勝故後蒙大恩還弟成龍碎身粉骨不足爲報安忍再逃主者義而釋之父沒事母以孝聞後與兩弟析居田地廬舍取其饒者陋者康熙四十四年卒

李長白

李長白字素心大興人父澍官山西大同知府長白留侍其祖於家澍官山右有循聲膏發常平倉濟民而性強梗爲巡撫噶禮所嫉掎摭無所得則以擅發常平爲罪獄甚急長白聞之以倉卒營祖喪不得行出奇計藉知交爲轉圜事少緩乃盡斥其產償官逋

不足又貸得三千金輸官卒脫父於難奉之歸里乃爲治具召賓  
客宴樂以娛父志父宦久亦忘其家故貧也時人爲之語曰廉吏  
不可爲而可爲不見李太守之有良子乎長白頌豐美髭髯善議  
論見者皆以遠大期之而不意其終身於憂患也卒年六十有一

### 李琬

李琬清豐貢生善事父母嬉笑剝下如嬰兒父母病躬奉湯藥六  
七年不以勞其兄兄病亦晝夜謹事之不以譏其子姪康熙癸未  
戊子民饑計口貸糧以饑鄉里壬寅饑亦如之其豐年有乏者亦  
貸之不取息不責償糧貴卽出倉粟以均市直里之人貧不能娶  
妻及病沒而無棺以葬者皆給之金不待乞假嘗出巨資修學宮  
及關帝廟宇里西豬龍河支流值秋雨輒病涉爲施柴席便行人  
往來居恆與子言孝與弟言恭謂詩書皆教孝之書學人孝而偽

何如眾人孝而愚然肌投崖非謂虧體為孝也發之皆實心盡之  
皆實力守之皆本分揆之皆常經抱愛敬以養生送死如此則雖  
耕樵婦豎無非聖賢所許矣乾隆八年大府舉琬善人建坊旌之

孝友傳一終

大清畿輔先哲傳第三十九



孝友傳二

大清畿輔先哲傳第四十

天津徐世昌撰

邵泰

邵泰字峙東號北崖大興人少孤體羸專靜好學康熙五十年舉於鄉六十年成進士改翰林院庶吉士散館授編修雍正四年典試四川號得人明年請疾歸乾隆二十三年卒於家年六十九泰自成進士立朝僅六載以母陸在南迎養不至遂決志歸時母年逾七十善色養一味之甘必愉色手奉以進母遭危疾曉夜叩天乞身代卒得無恙母後患風痺五載扶侍未嘗頃刻離母喪後遂不復出泰口不談理學而檢身甚嚴精研經傳易詩皆有纂說諸子百家擇其精者手錄之謂其得道之一偏而修身治人皆有助於聖人之教兩江總督尹繼善延纂江南省志陳宏謀尤欽其學

撫陝時聘之主講書院不赴及來撫吳朝夕過從詳詢民生休戚利弊當世之務多見諸施行所為古文詩歌甚夥能作擘窠大字吳中碑碣多出其手伯兄仲兄季弟皆先卒惟三兄與之同白首友愛若童卯自築書圃以居以舊宅讓其兄平居自奉節嗇而族嫻之貧乏者輒傾囊助之不惜也卒後陳宏謀為銘其墓

趙允澍 弟允涵

趙允澍字雨蒼易州人康熙五十三年舉人隱居事母築蘇園於城南每自與其母周行林墅用為歡樂著有潛谷日錄十二卷易經酌四卷允澍弟允涵乾隆元年進士官檢討以母老告終養歸

王偉

王偉字輔君大城人父士晉邑諸生生六子偉與仲兄儀孳生天性孝友父以其讀書不慧使學賈然偉心實好書每見先正格言

輒釋其義身體力行之嘗讀論語至孝哉閔子騫喟然歎曰爲人子不當如是耶其父在時已令其兄弟生分及父沒偉質京師數以所獲金分給諸兄弟既又念諸兄弟多廢學乃相與約復合爨以家計爲己任以仲兒儀魁梧有勇力勸令肄武儀每習騎射偉小心隨侍勤逾僕隸如是者四年儀遂於康熙四十八年成武進士少弟仟亦補武生偉欣然曰吾庶有以見先人於地下矣其爲賈公平直正一毫不妄取邑進士劉標爲縣令聘使理倉糧革陋規殆盡及歸里年已七十矣居常三復不矜細行終累大德二語遇事輒持之以慎每與人言余一生造次不敢有放心處小事如臨大敵心慕宋韓琦之爲人曰使魏公在余必師事之嘗取孝弟忠信勤慎和緩親賢取友十事立爲規條以自省察又自輯問心書一卷深有味於天心仁愛逆境成人之語一篇之中三致意焉



蓋其生平所得力也人無賢愚皆接以和大城訓導李豐在嘗曰  
王君篤好前言往訓誠當代之典型不徒爲一鄉一國之善士也  
無棣齊公家曰王君容貌辭氣藹然有儒者風家徒四壁立而夫  
婦泊然自守樂而忘飢非有得於道能如是乎年八十六卒

戴珩子三聘

戴珩字崑生祁州人有至性善事繼母讀書攻苦與弟同補諸生  
某甲生一女而其母死謀棄之珩爲撫之得生有宋姓鬻于瘞其  
妻惻然資其葬收子養之爲娶妻生子使歸奉祀其他善行多類  
此卒後門人私謚景惠先生子三聘字莘野舉人嗜學篤行父子  
兄弟自爲師友士多歸之性孝侍父病不解衣帶者七閱月母馬  
素患痰疾侍宿榻旁十餘年中夜聞聲輒起十數次無倦嘗冬月  
偶出值大風雪天苦寒念母馳歸侍左右終母之身未嘗外宿也

事叔父如父撫猶子如子其爲南宮教諭時有諸生爲白氏螟蛉子以從父暴卒誣陷獄中三聘理申之事竟得白人至今稱之

李崑來

弟欽來

李崑來字問河深澤人弟欽來字敬哉同爲縣庠生事其父及大父皆能盡色養大父晚病目痛得人臂枕之乃安寢崑來與欽來每夜更次侍牀下以臂受大父首歷數年以爲常父性豪宕好客兄弟竭力供所需父沒事繼母如所生未嘗缺甘旨兄弟尤相友愛終身不析居分任內外事子姓妻孥下至臧獲食指近百人皆奉命唯謹家素封好禮守法度門內肅然客至諸子侍立不命之坐不敢坐不命之退不敢退也欽來病革時崑來適病風不能出戶欽來夢中輒呼兄與語喃喃不絕聲先是崑來嘗小有病欽來徬徨憂泣終日侍側不忍去病已而後安時兄弟年皆七十餘矣

故邑人言孝友者必曰李氏生平樂施尙義修石橋建義學捐重  
貲若弃敝屣尤篤於友誼邑有趙生名存仁者將應試而妻病崑  
來曰第去勿憂有某兄弟在未幾妻果死兄弟爲計身後事皆周  
備無憾趙自爲謀不啻也初李氏之先有秋實者明萬歷間充良  
鄉石戶石戶率多破家且爲子孫累秋實度亦不免乃痛陳其弊  
爲訟牒置懷中自縊其妻生子纔期月卽襁負持所書牒訴當事  
眾役自是皆得免于旣長名果碩仕爲石渠倉大使卽崑來欽來  
大父也其後子姓駸駸遂爲邑望族云

王孫錫

子作肅

王孫錫字申之吳橋貢生母范卒外家宦邸徒跣扶柩數千里歸  
廬居三載未嘗露齒子作肅字敬一康熙十四年舉人官滑縣教  
諭以性命倫常經濟文章四者訓士復聖廟樂舞諸器凡有關學



校者力爲持之性孝友事繼母鄭如所生母有不悅輒跪自引咎請受責解顏乃已家居潛心理學顏其齋曰復初著有復初齋詩文集濮陽司鐸錄聖廟樂舞紀略天雄語略卒年七十六孫履吉康熙五十年舉人官內閣中書曾孫實堅好古砥行乾隆丙辰與千叟宴玄孫問葵歷官淮揚道以循良著稱累代清德或曰孝行之報云

### 李雋望

李雋望字時可蔚州人康熙五十九年舉人童時初就塾讀一日聞鄰有以官逋繫其妻者急白母資令完繫父疾籲天祈代復到股以進母馬病痿痺卧牀十年借婦侍寢疾旦夕不少離弟厚望官高密爲攝事者所誤責償虧傾貲產助之無難色嘗遭家禍獨以身當流離痛毒幾死一不以累羣李難解獨任家事督課子弟

益勤一時之言孝義歸之

李雍熙

李雍熙號淦秋先世本棗強人後徙長山少義俠致客數千里鋤強抹貧難立削牘經紀出千百金不吝後執母氏喪比葬寇大至明器悉焚毀雍熙大慟踴身壙中親友挽之得不隨迺易囊行茹長齋懸於胸鐫母訓其上鏤爲善望惡字長白山故有其外舅史氏別業因結茅著方外服讀丹經其上而好義急難如故悉推其田宅與弟姪族戚之貧不能自存者養於家成立者數十人里人以窘乏來鬻物與直而還之一舅弟爭廬給以田勸之息乙指甲攘其貲曰無是也爲代償邑有巨鎮曰周村牙僧握權度爲民累雍熙僱人充之稅出已囊不索商一錢貨湧競至居民大饒又爲立義倉義學義冢凡諸善舉皆躬先之一日偶疾鄉人走望禱者踵

相接初明季盜起雍熙部伍壯丁置練長教以營陳周鄉樹望樓外聯木寨身執銳指揮盜不敢犯暮年一日同從兒化熙有所之化熙故與踶馬甫上馬怒而躍雍熙提鞭後馬懼伏循循走化熙捧腹笑曰何許道叟而若是所著有孝行庸言翠岩詩集雜著藏於家塾子孫繩繩皆貴顯仲孫斯義以進士仕至大理寺卿

### 王榮紳

王榮紳正定人幼孤性純孝中年不娶有勸之者曰養母不暇遑恤其他有張姓慕其孝謹欲妻以女辭之曰吾兩弟皆有子不慮無嗣矣况女之賢否未可知脫有不慎不重爲老母累乎朝夕侍母側母性所嗜必設法購之嚴冬以已身溫母手足煖而後休母卒哀毀骨立弔者累千人

### 馮中存



馮中存字性菴南樂人雍正四年進士授四川溫江知縣莅任八年政尚寬和以繼母年高乞養歸時繼母年九旬中存亦且七十餘矣晨夕定省婉愉如孺子遭喪哀戚盡禮其在溫江能聲不著於上官而民受其福溫人爲之語曰馮爺在不留獄手握三文理可直年八十七卒

### 王景功

王景功獻縣里民也家赤貧無半椽之庇有田半畝治爲圃躬耕以養常得父母歡妻不得於其母終身不與妻言母有養女已適人常體母意縮己食周之一日飢困往鋤田念父母尚未朝食且鋤且泣有物觸鋤錚然拾之銀也易錢六千爲父母市甘旨母病劇無買棺資乃鬻其田又拾銀可五兩許舉以買棺盡用之或曰何不少留曰吾方以田易棺可侵牟天與耶數日母愈而父死遂

以葬其父雍正三年大饑仰振以活四年春振止而圃韭早熟刈  
入城市易米還時其家絕食三日矣慮米至家需炊熟母不能待  
乃市餅趨歸仆於路不能起卧而號村人呂徒往舁之則已飢而  
死矣探其懷得餅數枚論者謂景功知母未食市餅而歸爲其便  
於卽食也便於母且更便於己景功乃至飢餓且死竟不食若景  
功者其可謂愚孝也後其母得老婦銀自贖五年死無棺眾哀之  
曰詎可使景功之母無棺耶共輸錢買棺葬之

張菴  
弟菴

張菴字夢叶南皮人父份生子六人菴居長菴其季也菴諸生性  
至孝年七十猶嬰兒慕父病肺羸甚卧必枕菴肱始寐左右更遞  
凡三月血痕班駁衣袖閒皆滿執父喪葬祭皆如禮少子受長以  
雍正五年進士累官至河北河務兵備道築養堂迎菴菴先迎其

母至一堂之內愉色婉容其教諸子以忠孝宅心以清慎勤奉職以庶富教治民隨受長令林邑商邱祥符三縣守開封監河北官愈貴責之愈嚴長子卿子官浙江鹽場月必手書昧以治鹺察姦之義故兄弟居官皆有聲平生好義喜施嘗以歲禮焚貧戶租契質劑更出米粟周之孫字季婉生性純孝父晚年多怒孫下氣怡色尤能得其歡心受長迎養其祖母於河北道署孫千里隨之未嘗一刻離膝下次子惟寅官吏部孫來都視之甫二十日忽心動急歸其母果卧病母泣孫哀泣時時夢母來孫喜曰吾將見吾母於地下矣遂不服藥而卒惟寅乾隆元年進士貴州道監察御史初孫文正公嘉淦督學直隸時頗雅重孫嘗以不獲舉其孝行於朝爲恨及其卒爲之銘曰行無加於孝德莫貴於誠有所爲而爲雖割股廬墓而不足稱惟其結於中而發於外雖未有過於古之



中制而足以動人之感興嗚呼張君閱世其如生

### 商克勤

商克勤字敏公安肅諸生少失母祖母氏李撫之成立克勤性篤孝祖母年至七十餘朝夕奉養未嘗去左右偶出中途心悸輒馳歸祖母卒晝日痛哭以頭搶地水漿不入口者三日初祖母生時一飲一食克勤必手自烹飪滌廁不假他人祖母臨終謂克勤曰我孫孝後當顯情乎我不之見也及入邑庠戚郇來賀克勤泣然止之曰吾祖母所望於孫者至大不才旣不能副所望今幸博一衿而祖母又不及見痛何極耶克勤與異母弟三人友愛特至爲延名師教之皆成名克勤曰恨不令吾祖母見之也克勤有叔祖母鄉居家甚貧克勤迎入城養之終身曰吾祖母姊姒今唯叔祖母在孝事叔祖母卽所以孝事祖母也其推仁錫類如此邑人

爲作孝孫傳至今傳之

韓仁 趙瓚

董景龍

趙乙

陳琪

韓仁阜平人事母孝一日虎銜其母仁聞妻曰號泣聲急奔至持  
梃擊虎斃之母無恙時雍正七年也邑令爲立坊名所居村曰雙  
孝時柏鄉有趙瓚者農家子巡撫于成龍嘗給匾旌之曰殺虎救  
母而獲鹿又有董景龍者侍母出舂米虎突至銜其母肩景龍抱  
虎項奮拳擊之虎捨母爪景龍仆道士里人往救得脫承德趙乙  
與兄芳山行遇虎噬芳乙從虎口奪之出張空拳擊虎虎斃而兄  
生時人呼爲虎鬪子嘉慶時阜平陳琪字美東生性至孝童時喜  
誦孝經母病聞恆嶽下神祠著靈異徒步往禱入山迷路陡聞風  
聲氣腥甚方驚疑間虎突出叢薄相距不數武琪挺立不卻仰祝  
曰如吾母當痊吾必不死於虎母不救吾死何恨祝已虎逡巡去

口涎絡繹道上不絕琪迹之行里許竟至神祠禱歸母病尋愈琪年始十三耳父老咸歎異之稱爲孝童琪敏慧勤學博覽嘗謂人子不可不知醫遂通經方父病日夜侍湯藥衣不解帶父慰之曰兒甚孝且勞然因我病廢學非計也自是學益勤年二十補博士弟子員以異等食廩餼家居教授常數十人會學使召諸生說書明倫堂次及琪衣冠就列抗聲論析聲動左右學使歎曰此經筵講官也厚獎之居父喪葬祭遵古禮不用浮屠鄉里皆化之母劉有外孫三皆早失父母貧無依琪迎而撫育之女長皆爲擇配資遣如所生少受學於舅氏王庭擇庭擇故名宿喜宋儒之學及沒子已前死琪撫其孫槐三爲娶妻生子旣成立乃資而歸之居嘗謂教養二事隨地皆可自盡不必爲官也生平和族黨振貧乏勸厲後進終身爲之無倦容道光三年子鳳圖由進士授河南內黃



知縣迎養署中其布衣蔬食不改儒素作訓子詩三十首凡勤政愛民謹身節用之道皆條舉之鳳圖卒以循吏著稱年七十九卒於署邑民發健足百人舁挹至行唐皆不取傭而去

賈鎡子澎

賈鎡字惠生永清人幼篤孝母氏王惡聞雷聲鎡六七歲聞雷聲卽趨就母左右不去九歲時見天未升雲立起出取敝席蔽牖戶父埭怪而問之鎡曰天生雲則雷將發兒爲此恐驚吾母也又數年母疾篤鎡始十二日偕五歲幼妹夜出父令家人蹤蹟之不可得黎明城隍廟道士送至家先是道士早起見鎡與妹匍匐神前道士驚問其故鎡曰吾母疾垂危願減吾二人算益母壽是日母疾果差踰三日而愈邑人以大孝稱之鎡穎敏好讀書年二十三爲縣學生學使安溪李光地見其文詞意懇摯有至性不類文

士所爲拔置前列特賞之永定河決壞室田貧無以自存乃租旗地躬自耕耨給父母甘旨遂廢學不復規進取父年躋百歲鉉年至七十餘孫曾繞膝侍父母起居飲食一不假手他人居父母喪哀毀逾禮幾至毀生初父旣卒鉉典質莊田營治棺槨夜突有羣盜持刀奪門入索金甚急一盜熟視驚曰此永清賈孝子也揮眾悉去遠近聞之傳爲異談乾隆十一年卒年七十二子四人澎最知名澎字東瀾少敏慧授經書二年卽通天義年十五業制舉業卓然有志於古不屑爲俗文補弟子員累應鄉試不售會諸舉孝廉方正知縣丁穰以澎應以親老不出課耕著書餘三十年嘗撰餓鄉記以貧自勵學者稱之澎天性友愛於諸兄弟子教誨甚至賈氏有業園爲莊田別給靜海荒田百二十頃名撥補地地濱海潮汐不可種而官租輸納歲以爲常澎獨任之不以累諸兄弟子

久之以負租重累出四百餘金始除名伯仲子孫由是始免追呼之累乾隆四十三年卒年七十七著有耕餘集

### 張浩

張浩清苑人乾隆中任長沙協守備駐湘潭縣多盜浩獲其渠賜以酒食詳問賊巢穴及黨與姓名籍記之事發披籍按名往捕無得脫者歲歉捐米千石煮粥食饑民以擢任去軍民遮道攀留多泣下者浩事母孝母性嚴偶不憚浩即長跪自搗叩頭血出母色霽命之起乃起後母北歸里浩請終養格於例不得晨夕北向跪問母安否聲淚俱下十年如一日云

### 艾子誠

任足兒

閩斌

李濟泰

艾子誠靈河人父文仲木工也與人鬪擊之踏地誤以爲死懼而逃時其妻方娠越兩月生子誠稍長問父所在母語之故自是惘



惘如有失居常詳問其父年貌及三代名字姻婭姓氏里居曾有  
議婚者子誠辭曰烏有其父流離於外其子安有室家者越二十  
年母卒營葬畢卽治裝赴遼東或以存亡不可知阻之子誠泣曰  
幸相遇生與俱還沒則負骨歸不遇老死道路不復還矣眾揮涕  
送之旣出關念其父懼罪亡命必潛蹤僻地深山窮谷蹤跡殆徧  
不能得久之資斧絕乏食二十年志不懈益堅一日至馬家城遇  
一老父憐其窮呼與語得其故爲之感泣邀至家以酒食款之俄  
有木工攜斧鑿入子誠見之審其年貌與父相若心動因牽裾泣  
述其父出亡年月且屢述家世戚黨其人且駭且悲然頗自疑出  
門時未有子也子誠復具陳始末乃噉然相持而哭蓋文仲出亡  
變姓名已四十年故無人知之者老父感其孝爲謀歸計其父以  
流落久負債不能行子誠復趨歸家質田宅貸親黨得百金再往

竟奉之歸歸七年其父始没子誠於是娶妻生子四人皆勤儉能治其家

任足兒灤州人襁褓中父某謀食出關久之無耗足兒隨母傭於邑諸生朱垣家足兒數從其母問父所在將尋之母答不知且禁之往其父年貌亦靳不以告也一日不辭而去出關資罄行乞至黑林鎮會大雨趨破窰窰中六七八人先在憐其饑與以食且詢之故足兒自道其籍貫姓名及尋父狀眾詫曰汝父吾儕也少待且歸雨止某果來眾迎告之某愕然足兒膝行而前哽咽不能成語某備詢父祖名字戚黨姓氏及已生年月日足兒不能悉某怒謂眾爲戲已揮足兒去曰速他往覓爾父足兒曰兒覓父旣得父矣復何覓兒幼不能周知家事母又諱言之且兒不告母歷千辛萬厄始至此天下豈有偽認父者眾皆責某強之歸某心猶豫又自

念貧困恥返里眾謂足兒曰汝父疑汝歸與母來釋然矣足兒然之歸述年貌於母果父主人畀數金資其行既至夫妻父子相持大哭同人贖之乃得歸時足兒年甫十四也

閻斌南宮武生天性至孝弱冠遭兵燹母子相失日夜泣禱於神足跡半天下後入都門得其母於八旗某抱頭痛哭歸質婦衣釧贖母歸

李清泰高陽人父鏞增生客遊京東北諸邑猝病顛出走不知所之清泰時年十二兩弟幼家貧傭以養母十二年兩弟長教之研麥粉爲生常至夜分不寐家稍裕計留兩弟侍母已出尋父母聞之驚惶謂清泰曰汝父非貴顯誰知名者且狂走不知存亡吾老矣不欲汝遠出更增一懸望也清泰泣曰父在兒從之歸儻有不諱而令棄骨遠方烏用子矣言已因伏不起母乃許之身負榜文



四出蹤跡不可得東出山海關已又欲繞道畿南越大河南下時  
清泰孝子名聞燕趙閒肅寧城南三十里有某寺老僧寄書言往  
年一客死形狀類是清泰往僧言不獨貌似客所書格言數十事  
故在寺壁也清泰幼失學不知書歸家取父書并偕族父鈞往出  
門母呼止與言汝父腦後骨大驗之良是清泰痛哭爲易棺斂歸  
葬時乾隆四十年也邑縣人欲舉孝行清泰力辭人益重之奉母  
數十年未嘗拂其意母患痰喘爲按摩膺背晨夕無倦母老侍病  
衣不解帶者三年嘉慶十年無疾卒

### 呂元龍

呂元龍字鱗州一字慕堂大興人其先世自河南遷山東明末始  
來京師崇禎甲申之亂有名相者官千戶守永定城門城破爲賊  
死旁有一卒義之持一骨出城歸其家人埋室中其後亂平以術

者言因墳焉遂不改葬元龍之七世祖也元龍生而秀偉不能彊  
記而穎悟絕人四歲通千支方名六歲卽辨八卦先天後天圖次  
七歲丁祖父憂擗踊就哭位若成人甲者莫不奇之及長力學工  
文而天性純摯出就外傳慕父母日三四歸家省視居頃讀小戴  
記至顯揚先祖所以崇孝擲卷嘆曰人子不當如是耶自是搆室  
如棘闌狀每屬文則坐其中乾隆十五年以第八人舉鄉試越日  
與宴順天府署攝所宴物歸祭先廟旣薦大慟曰吾祖不及食此  
耶伏不能起明年試禮部不第益發憤攻苦元龍有所善韓生者  
與鄰比其妻氏賢而善品漢人聞元龍書聲謂其夫曰此子聲宏  
而中淒其有不自得者乎旣再試禮部爲文至嘔血仍報罷自是  
遂得疾而卒年三十一卒之前自序生平遺其子麟凡二千餘言  
皆孝弟植身之事少時偶遇美婦人幾不自持後卒止乎禮義尤

人情所難者顧生平未嘗以告人可謂能自樹立有守之君子矣

王書吉 鄭聚江

王書吉沙河人拔貢王昌義之仲子也乾隆中昌義以事戍伊犁死配所長子元往迎至華陰畏難而歸書吉裹糧往糧盡丐食而行往返四載行二萬餘里卒返其父骸葬祖塋同縣鄭聚江父全以罪戍黑龍江父死乞食尋父尸逾年攜骨歸途中遇大風雨奔至古廟殭死適有人至救之復蘇夜夢其父告之曰前途無恙矣乃負骨歸里葬之

繆文璧 韓大佩 李永凝 孫廷欽 齊錦 劉之權

繆文璧字煥庭天津諸生幼孤事母以孝聞母卒日夜號泣幾喪明家貧不能營葬停柩室中偶不戒於火薪然將及柩相顧號叫文璧大呼奮身入火抱熾薪出毛髮俱焦柩得無恙文璧暈於地



將絕矣夜半昏迷中覺胸膈間若有人摩之者味爽頓蘇時乾隆二十四年四月六日也創腐五十餘日始愈痂鬚眉復生卒後旌於朝入孝子祠文壁生時嘗製巨冊爲其母徵詩一時賢士大夫多題詠之者後乾隆甲午亦四月六日縣人韓大佩以孝死於火韓大佩初遭生母常之喪哀毀骨立年十七一日夜半火作大佩夢覺呼家人起自鳴鑼走衢巷呼救復至城外告變於其嫡母王比返火延家祠闔巷喧雜中獨不見大佩及火息命人掘灰燼得諸敗檻下周身衣俱焦尸黝如鐵蒲伏螻屈若有所護持者方施尸見先人影像與木主俱在懷抱中見者皆慘痛揮涕至嘉慶十八年四月縣人又有以死火著孝者李永凝永凝字長清年四十餘妻張氏生子三日作湯餅會慮室不能容爲綿蕞於庭夜半火自突出延燒及屋宇永凝驚起呼救比鄰比至聞母叫於室挺身

人救一鄰人曳之曰人俱焦矣永凝躍地呼曰天乎人安有立視母死不救者絕裾人負母直出至庭棚覆火火四散作慘碧色旣撲滅見永凝尸焦黑伏地尙負母不釋觀者皆泣下方火熾時門閉不可入有人破其室後壁聞有呻吟聲掖出乃其妻張氏也煙塞嚥垂絕子在懷中哺乳無恙前嘉慶十四年三月十六日阜平孫廷欽亦負母焚死孫廷欽昆弟三人俱孝謹廷欽尤純篤一日父攜兄弟出廷欽獨與母居至夜火發母室廷欽倉卒負母突出門閉俱焚死後道光丙申定興人齊錦遇火抱母痛哭風止火息而通州人劉之權居母喪鄰火延其居之權抱柩欲殉家人挽之不去火亦尋滅齊錦貢生自幼始學卽勤定省出入必告設教於外歸先省親次省墓後人私室有戚友無子欲分居錦謂之曰萬物莫不有本父母本也兄同本者也父母沒能敬兄卽有子矣生

徒有與父別居者錦曰孟子言不顧父母之養謂之不孝夫下豈有無父之人哉其人皆悔悟後得疾曰死非吾恨恨事父未終耳劉之權字致中生有至性母病籲天祈代母沒終身茹素年逾九十卒

### 張創基

張創基大城人。生而孝友，性誠篤，慷慨好施。兄弟四人，家貧共田數畝，屋數椽。乾隆中，父沒，諸兄以食指繁，議析居。逾十餘年，創基獨置田千畝，頃而諸兄窮乏，猶如昔。創基曰：「兄皆不給，余何忍獨溫飽耶？」乃復與合居，尋取所置良田均分之。鄉鄰義其行，有爭訟事，就質之，立解無賴。子見者皆歛迹屏息，如嚴師論者比之許武。

### 谷凌岱

谷凌岱字瞻岳，號壽園，蠡縣人。少雋異，讀書多妙悟，願數奇。年逾



三十始補博士弟子員嘗應秋試遂絕進取專意養親父患脾泄親攷校方書治藥餌因之知醫父母沒哀毀骨立杖乃能起自斂及殯皆依馮辰所訂士喪禮行之有弟一嘗中寒疾凌岱適他出未知也心忽怦怦動買舟亟歸弟病卧榻上躬親調治之愈而後已時有兄弟相訟者飲以酒從容與言古今孝友軼事娓娓數千言其人感泣去改行

于忠賢

宋立邦

于忠賢武強人少孤貧以傭養母每日負母於力作所暑置蔭地寒則就陽工作畢復負之歸所得值易米奉母而自食其糠粃有餘資則早置綿衣以備禦寒母年至九十餘食輒吐忠賢時取嘗之以驗寒熱有饔餅者過其門不取值曰此窮孝子也邑又有宋立邦者亦農家子事母孝每出傭必備一日餐而後去得值足一

日食卽一日不去母左右母病痿嘗負之出遊衣服不見垢污四旬不娶或勸之則曰吾力僅足養吾母子二人不能兼顧也聞者賢之

趙嘉言

尙欽周

趙嘉言東鹿人四世同居每會食五十餘人子孫侍祖食婦女侍祖姑食一人不至不舉筋家規肅然爲一時冠嘗手錄經方施藥醫貧民居恆語子孫曰人苟心存愛物於人必有濟勿以善小不爲也識者以爲名言其邑以五世同居稱者又有周煜郭維寧李思慎曹謬乾隆五十七年旌尙欽周貢生亦同縣人教家有法度男女一百二十餘人僕婢五十餘人七世同居爨近二百年曾祖朝椿設義學籌經費教子弟各有執業衣服器用有定數婚嫁喪葬取諸公分等差無敢爭者光緒初旌

朱光觀

王澤溥

傳四十一

朱光觀字仰文天津人乾隆四十五年舉人幼孤有至性父岷曾  
贅山東德州張氏張卒遂葬於德一日光觀設祭對木主歎曰生  
母嫡母同一母也豈有母骨拋置異鄉可以爲人子者乎時嚴冬  
大風雪光觀徒步赴德訪舅氏族人已無存者詢母葬愈不知葬  
處光觀晝行於野夜宿破廟中逢人咨訪久之至德州北之景州  
棗林村遇一老人叱曰汝張姑子耶何由至此僕年近九十天豈  
留以待君耶僕張氏佃葬時曾目覩猶髮鬚識其處引至數里外  
寒煙枯草馬鬣杳然光觀仰天號泣老人曰速焚紙錢視風所旋  
灰落處當必有兆如其言掘焉未及三尺有朱棺見木雖朽粉書  
猶可辨光觀踴而哭行路皆感泣乃謝老人扶柩歸里合窆焉鹽  
山王澤溥生甫週歲父遠出十餘歲泣請於母乞食尋父跋涉瀆



陽諸郡歲餘卒尋父歸里孝養之終其身

齊如奎

王書其云

齊如奎蠡縣人國學生性端謹尤孝友乾隆五十八年秋嫡母兄桂林以虧國課千餘金繫獄時如奎已析居矣爲質賣田產措銀五百餘兩偕同母弟焜耀代之完納知縣汪大枚曰有弟如此世閒豈易得哉其不足者予代納之及縣試特拔焜耀冠童子軍同縣王書其字林閣號蘭圃天性孝友喜讀書幼時仲兄主分爨弗能止乃獨不受田產嘗冬夜讀書無膏火然香代燭欬唾成冰誦不輟舉嘉慶五年鄉試課徒自給一日館歸見其母色若不豫詢知爲仲兄子姓多懼無以養也泣然曰兒不貧則舉家不貧矣分爨猶共爨也母顏霽爲一加餐父母卒喪葬如禮服闋選授遷安教諭伯兄無子迎養兄嫂人醫怡怡十餘年如一日自奉儉約居

恆布衣麤食一飯一蔬積俸錢爲仲兒治產買田百餘畝築屋十數間爲學從子女營嫁娶贍宗族鄉黨咸無聞言生平邃於經學手批四書會要錄二十卷五經俱有註解藏於家

### 魏交通

魏交通字畏齋其先甘肅靖遠人父官山永協把總生三月而父卒母改適李姓李肅州人官古北口千總交通育於其叔叔官大毛山把總因入臨榆籍補博士弟子員食廩餼而時時以不得見母爲恨又聞父沒其母藏有父像因徒步赴古北口求之且冀得一見母比至母已隨李歸肅州聞父像在其姨京都劉氏家蓋母歸時留以付交通者也入都奉像歸然以終未得見母戚戚不自釋又念邱墓隔數千里思一省視迺西行三月抵肅州而母已前卒年餘矣趨拜母墓哭失聲去之靖遠遷其祖父母暨父與叔母

之樞以歸葬之城北母出既與廟絕乃設主別室歲時祭祀輒憂  
戚慕思終身如一日遇己誕辰不受賀曰生我劬勞而不獲一見  
我天地之罪人也何祝焉有司舉孝廉方正固辭不受生平好讀  
書雖病不釋卷尤邃於易兼通堪輿醫術嘗訓其子弟曰士子砥  
行勵名居家無愧於鄉居官無愧於國足矣病篤自綜其一生艱  
苦作孤孽餘生紀略以示子孫道光二十八年旌從祀鄉賢祠

### 孫履隨

孫履隨字遇安鹽山諸生幼出繼其叔父未弱冠叔父母皆亡本  
生父旋亦棄世履隨孑然孤立依本生母氏陳以居先意承顏悞  
若成德少嗜書爲文驚其老宿以事親不赴試而戚儷中子弟有  
雋才者輒多方扶助之歲飢有鬻子女者爲捐貲贖之歸諸昆弟  
析居失業始終護持視如已事人有譽之者曰此分內事吾豈欲



骨肉見德耶後諸昆弟子姓多以進士起家內官部郎外仕守令子葆元亦以道光九年成進士官翰林檢討履隨年六十四卒

宋大成 曾好明

宋大成天津人父沒遺子女三人貧無以生大成奴於人以養其母每夜深始歸歸必市果餌羞脯奉母察母顏色憂喜話日閒瑣事博母歡母寢乃退母或不豫必徧詰家人嘗扑責其妻令長跪謝罪母命之起始敢起其弟若弟婦或逆母意則痛哭教誡之時自批其頰或以額擊地求死其弟夫婦感泣謝罪後已其姊已嫁多子女困乏不能自贍大成迎之歸爲起屋居之衣履食飲皆與已同撫其子女若已出人弗知爲異姓也兄弟妯娌甥舅終歲怡怡無閒言二十餘年如一日焉樂亭曾好明字麗天生有至性少時見里有婦不順其舅姑者誓不娶時已議婚趙氏女將行聘

矣請於其父母辭之不許則長跪而泣曰吾兄弟六人一人不娶  
不至絕祀也父母同室侍牀側每夜焚香祝天求益母壽調飲食  
體寒暖械窳滌濯必躬必親嘗以勞致疾精神迷罔穉弟執其手  
泣明開曰大呼曰母在我必不死已而果愈後其母年至九十六  
卒好明已七十二矣踰年亦卒好明生平厚自刻厲終身茹素幼  
守瓜田一少婦奔之卒以禮自持不苟又嘗之田遇竊禾者背趨  
而呼之使逸嘗爲人償負其家後擁厚貲或請索之婉謝之而終  
不往問里中有貧無葬地者指已地與之一日鋤田其旁有蕪田  
不治者問之知其夫外出妻弱不任力作卽爲雇人治之其好行  
善事多類此

段金墀

段金墀字對軒蠡縣人道光十九年舉人兄金甌字鞏若道光二

十年進士授山西山陰知縣在官多善政以清廉稱咸豐閒以事  
謫戍烏魯木齊金墀時以大挑二等辭不赴選從兄西行金甌賦  
詩云念汝有官當北上憐予失職伴西征一時士大夫繪爲聯吟  
出塞圖題詠甚多從戍三年經行萬里人莫不矜式之後署懷來  
縣教諭著有拾餘錄鹿莊詩草西征詩草

徐樂兒

洪世祿

徐樂兒蠡縣人家貧居室外無他產嘗爲人傭取值或採樵自給  
不給則乞食鄉里閒人多以爲愚少時喪父其事母也寒爲之衣  
飢爲之食便溺皆親侍恆無失時母病痿負之出入冬則向暖夏  
則就涼一妹已嫁母愛憐之常負如其家有故他往則先食其母  
而後行鶉衣百結僅足蔽體所居室鄰人有欲以重價購者執不  
售及母沒悉售以市棺衾營葬事語人曰向之所以不售爲今日



也吾事畢矣識者於是始知其固不愚也蠡人又有洪世祿者字  
邁種農家子也幼失怙貧不能娶事母至孝母病癱瘓出則負以  
行入則扶之坐每食問母所欲竭力奉之而自食糠粃時不給衾  
褥胸衿有穢污親爲滌浣滌面櫛髮諸弟或代之不願也夏日種  
瓜卧母團焦中母飢卽摘瓜以獻冬織布母室中然枯柴取煖或  
以已絮覆母身自著單衣軋軋之聲終夜不輟母沒哀毀骨立抔  
土成墳歲時墓祭淚常泫泫見者至不忍視同治九年卒年七十  
鄉里共稱洪孝子云

### 俞奎垣

俞奎垣字蓮芸大興人父進麟官甘肅涇州知州奎垣讀書喜談  
忠孝事及長務爲博通有用之學旁通金石醫卜星相家言道光  
二十九年舉於鄉咸豐二年成進士改翰林院庶吉士授編修六

年充會試同考官擢御史八年主試湖北留充學政湖北屢遭粵  
匪變士氣大衰奎垣崇尙經術加意培植之應試者倍於曩昔十  
一年春賊酋陳玉成破黃州奎垣方按臨漢陽賊警至郡城爲空  
或勸之回省艱然曰吾無守土責然斷無他去理當與守令共存  
亡耳後賊竄棗隨始得無恙總督官文約襄守省城以功賞戴花  
翎事竣受代書篋外無一長物將之甘肅省其父而貲斧無所措  
同官致贖二千金乃以千金畀鄂城書院餘攜以行至甘肅悉呈  
其父彌官虧未嘗有私蓄也京都太常寺有仙蜚者常隨奎垣不  
去其初來也色甚黃時或變他色大小無定形凡所遇吉凶嘗藉  
仙蜚驗之由鄂之隴過險灘船觸石幾穿奎垣談笑自若僕人起  
視之有蜚護其身兩翅俱溼形大如斗其在鄂時蜚忽粉白色而  
文宗哀詔適至在甘肅蜚又粉白色奎垣知有變勸其父辭官

甫戒行而平涼諸處皆失守行至涿州以母病親汲水和藥失足墮井卒年三十有八葬於廣渠門外楊家莊畦盤旋於墓數日乃去

### 崔增福

崔孔穎諸生小名增福獲鹿人生有至性方七歲母梁氏病痼日侍牀第奉湯藥久而不懈後病劇禱於神不應日夜飲泣寢食俱廢久之聞人言某病瀕死其子割肱肉療之立瘳增福卽潛以刀割肱肉初不覺苦束之以帛血亦不注煎而進之母問之詭詞以對母食旣病竟不起增福一慟仆地家人奔救引其腕見複裏重重血肉墳起再三詰之始以實告鄉人共白邑宰旌其門曰孝童後應童試名補邑庠生有述其事輒流涕曰童年無知毀傷肢體罪莫大焉敢爲名耶終其身不使人見之道光二十三年卒年八



十

侯念祖 張升堂

侯念祖正定人太學生性高曠不羈嘗讓產於弟弟以浮蕩盡鬻之念祖召弟同居復割地爲之償債族人有鳴謙者邑諸生親老子幼沒時託以身後事鳴謙故寒士死後親爲殯斂代養其親教其成立養葬婚娶皆身任之平生周急恤困老而不倦鄉里至今稱之同縣張升堂太學生性倜儻胸無宿物善事父母父病日酷暑走京師延醫購藥父生時喜其兄恂謹常以讓教升堂及父沒盡以腴田美宅與兄已受其薄者兄不受卽泣不食必許之後已其撫幼弟尤篤擊族人有孤貧失業不能婚娶喪葬者恤之至數十家子福駿有父風

劉如式

劉如式大城人父保禮好參鳥不治家人生產如式生有至性幼  
不嬉戲不妄言笑爲人傭養親舅氏林某嘉其孝與之房一區復  
假資命作生計如式設肆鬻湯餅其父日持布囊容千錢每市所  
得必俟囊錢滿方敢收貯一日餅甫入釜父呼其鳥逸如式急出  
尋歷數時始獲而釜中餅已粥矣又一日操塲鳥逸如式蹤跡至  
晚方歸其鄰曰子何汲汲如此誤正業非計也曰吾父非此食不  
飽寢不安吾敢以此傷親心乎年逾三十未娶妻或勸之曰吾家  
赤貧竭力以事二人尙虞不繼何堪復有室家之累也或曰子不  
聞無後爲不孝耶曰吾族中子姪眾矣求一人嗣我可也自是遂  
終身不娶侍父病衣不解帶者三月及沒毀幾滅性喪葬悉如禮  
事母尤能養志歲且盡如式請於母與鄰人李夫林負販外出往  
返期三日母許之行七十里宿於旅舍夜半東北風大作如式徬

傳四十一  
三  
惶歎息不能寐天林問之故則曰吾母居西室今東北風作吾恐  
吾母無人侍必畏寒不能眠也方寸亂矣惟有歸耳乃以金與天  
林急返家見母安眠如故心始安里人有不孝於母者聞之多愧  
怍改行後撫從兄之子慶蟠爲嗣爲之授室夫婦雙拜堂下母益  
歡樂過於平時母病如式貨錢備後事舅氏子某念其窮飲之錢  
數十千至如式留而不用或問之曰吾父母生前皆仰外家若身  
後再取之舅氏心滋愧矣道光中母卒如式日夜悲啼勺水不入  
口者八日旣葬遂病噎隔年餘卒

潘祖望

潘祖望字子久安州人篤志好學工詩古文以道光十七年拔貢  
選授衡水教諭歷保知縣辭弗就在學官三十餘年以實學課士  
諸生皆彬彬守禮法士習爲之一變性尤好善喜施與地方有善



舉輒倡先爲之唯恐後光緒三年歲大飢邑宰請上官協辦振事  
每下鄉必囊私錢以行擇極貧者周卹之或詰之則曰官振需時  
日此輩朝不保夕若待振至填溝壑矣今區區爲是者所以延其  
生也一日見路旁有棄女年三四齡氣息僅屬抱之歸命子婦善  
視之卒撫之成人邑有富人子爲賊誣者祖望言於邑宰包增樹  
雪其冤某奉五百金爲壽正色拒之因口占一詩有欲種福田須  
積德清風兩袖勝遺金之句其清介類此祖望性孝友論交取友  
以倫常爲重喪強有憾孝子者細人也每至署必延之上座人咸  
異之祖望曰士夫讀書萬卷而倫理二字往往不能無所憾是子  
能孝其親里黨無閒言吾對之有愧色矣雖不識字何害聞者歎  
服光緒六年乞老歸里書籍外無長物家人以祖望徒手歸食指  
繁重謀析居祖望瞿然曰吾家同居七世一旦分析則骨肉如路

人家庭如秦越矣堅持不可其同祖弟祖承力請之不得已始議分祖望一人居長房祖承兄弟五人則次出也其家共田三百畝皆祖望手置議者請析而二之祖望曰長人少次人多平分之則此有餘彼必不足請以六均之祖承執不可讓之至再始三分其田長受其一次得其二鄉之人至今稱之以爲法焉年八十三無疾而逝著有滇行吟草一卷桃城課士錄兩卷孫銘皋齡皋齡皋光緒二十一年進士翰林院庶吉士累官甘肅巡警道提學使署布政使人咸以爲積善之報云

張承緒

張承緒字維業冀州諸生所居里曰西野莊頭東南瀕滏水其高祖際隆曾祖存義先後捐田三十餘畝建滏陽書院教族人子姓多成名至承緒已五世矣乾隆三十年知州吳克明旌其門曰孝

友雙輝嘉慶十一年族有無賴子張明遠謀奪書院田租與存義子錫齡訟知州孔傳金判錫齡一支經理復益田十餘畝學益盛從游者漸多外姓子聲譽斐然名一州錫齡武生生子鳳翥諸生卽承緒之父也鳳翥家故饒以殖學延師嘗鬻其所有田產遂落承緒課徒四方藉脩脯養親甘旨未嘗少缺每遇鮮食雖遠必購之懷歸以獻其父妻魏亦賢順姑早卒日侍舅食能得其歡鳳翥至老不知其貧乏也承緒教書院數十年鄉人大率皆其弟子素工書畫能文章精音律然性方鯁鄉里皆嚴憚之子弟之不肖者恆曲道以避其面學使龐鍾璐案試至州試日值天大寒承緒呵凍而書學使就閱其卷問寓何許翊日使人持一扇求書竝以學官言兼求其畫遂列高等於是承緒名播遠近無不知者然終其身教授里門未嘗一就試京兆書畫皆冥心自造無師承嘗曰吾



傳四十一  
以適吾意耳其所譜詞曲與畫皆寫有藁本藏於家光緒十一年  
卒年六十一子英椿以其兄娶妻與母生分自矢終身不娶以子  
兼婦職事母母卒年八十餘英椿亦且五十矣

### 雷林

雷林承德人道光十八年負父猶龍避教匪之亂途遇賊賊脅其  
從猶龍厲聲罵之賊以刃刺其口林抱父痛哭同遇害

### 劉瑛

劉瑛承德人甫四歲父宗哲沒母孀居不能任家事季父宗善代  
主之先是宗哲前妻吉氏客死厝於外瑛年十五以吉櫬未歸爲  
請於叔匍匐數百里昇骨合葬宗善無子垂沒呼瑛而泣命之曰  
家所有皆爾父之遺我死無立嗣叔母老爾善視之言訖而逝瑛  
大慟卒謀於族以堂兄珣嗣伯父宗賢早故子瓊瑛之兄也無立

錐地瑛割宅一區腴田八十畝授之餘產悉付珣自率其妻子奉母依祖墓築室以居諸兄力挽之瑛謝曰吾年方壯無凍餒虞願各努力毋以弟爲念也遂不復返

### 康華國

康華國字偉英蔚州人道光二十五年舉人事母至孝母喬故士家女通書史教華國力學爲名諸生會考拔貢學使心器之已擬選矣試之前夕卧客舍適有鄉人至以其母疾私語同舍生華國聞之星馳而歸抵家則母昏卧踰日矣聞華國聲頓甦疾竟愈以其不與試心嘗悒悒乃益發憤攻苦是科遂舉於鄉奉母絕意仕進母卒鄉居教授數十年未嘗履城市云

### 曹紹遠

譚玉潔

李文玉

薛有信

曹紹遠昌黎人父商山海關外久無耗紹遠獨身事祖父母及母

稍長問其父輒涕泣廢寢食時時欲往尋祖父母以其幼也阻之  
道光二十七年紹遠年三十五矣乃決志行歷遼東西聞父在赫  
津魚衣國僑居紹遠走八千餘里出入逾年始見其父痛哭失聲  
卒奉之以歸光緒五年旌譚玉潔字映冰臨榆人父聖培貿易奉  
天後不知所之玉潔行乞於途至伯都訥得見父遂奉以歸同縣  
李文玉字殿璽父客奉天久絕音問文玉覓之年餘遇之吉林玉  
石牛壘堡父不欲返踰年病沒文玉負骨歸葬竭力事母母年至  
九十餘卒薛有信遷安人道光二十五年父純行賈於外數年無  
耗有信年十四號泣請於母尋父出關東四年始與純遇時純已  
喪明行乞於路有信見之大慟亟解衣衣父勸之歸返至塗路有  
與純舊識者感有信孝皆出資助之次大孤山遇盜劫純病不支  
有信負以行日十餘里比至家年已十九矣既而母病盛哀思冰



有信徒跣二百里至都山陰果得冰歸以奉母母飲疾頓愈事聞旌其閭

任騎馬

馬傑

任騎馬字伯超新城人其在襁褓時父爲里人馬奇人所殺至年七歲與鄰兒戲父老竊語其父慘死狀騎馬聞之歸以詢母母告之故痛而絕者再隱抱復讐志自名曰騎馬每夜分以手搥胸前肉自呼曰任騎馬汝忘父讐邪積久色青紫若癩結然故盛暑未嘗袒年十三傭於鄰歲得值易薪米奉母母爲議婚輒婉謝時以飲食結馬馬以其馴謹且少而懦益狎好不疑年十九母卒喪葬畢急市利刀二埋暗室時時淬礪之鄉俗終歲傭者名曰長工歲前卽取值騎馬以明年謀復讐託言家無內顧不受值四月八日里中演劇賽神騎馬藏刀衣底往迹馬弗得奔至馬家叩其門反

局復往劇場覓之適見馬來人道旁厠騎馬伺其出舉所新市笠  
謂曰估值幾何卽以笠蔽其面右手抽刀刺之馬雄於力格刀刃  
墮地左手復抽刀洞其胸血自背出連刺二十八刀時觀者塞路  
咸涕泣歎曰孝子孝子馬妻至怖不能移履騎馬謂曰昔吾父  
於是時是地死汝夫二十八刃我之殺彼數亦如之今大讐已復  
吾事畢矣汝母子奚懼爲急投里長詣縣自鳴縣宰欲生之目示  
意使供鬪殺騎馬曰某七歲蓄復讐志徒以母在故忍恥偷存今  
十二載矣幸父讐已報使世人知任氏有子足矣不敢逃死以亂  
法也縣宰益壯之堅不使醫騎馬乃解衣示之胸曰鬪殺固如此  
耶卒供謀殺歷府司院無異詞總督那彥成親詢騎馬復讐狀命  
二子側聽歎曰此田家子不讀書者士大夫愧此多矣爲建坊立  
石據實奏上得 旨免抵改永遠監禁又以孝子不可無後爲築

室獄中旁舍令娶妻騎馬每飲食必北向稽首誓報國日夜習武  
事久之手能碎石以指穿木立洞寢則舉足置頸上左儻易以右  
右儻易以左如是者三十年咸豐初赦歸里投忠親王僧格林沁  
軍思殺賊自効未至足折歸家貧力食學形家言曰苟盡吾術爲  
國家生一二人亦圖報之一端也方在獄時縣宰以其孝子命  
爲囚長乃市酒脯食諸囚申明約束之法處分男女尤井井新繫  
獄者必引以歡笑事恐憂鬱傷其生也有餽以錢帛者嚴拒不受  
節所授米糧以濟遞解囚徒之不能自給者眾囚感服奉法無鬪  
爭脫獄諸事一日獄圯他囚繫鄰縣獄獨留騎馬公堂旁室騎馬  
飲食溲遺不出戶役詬之曰官繫吾此此卽獄也敢踰尺寸以蹈  
非法哉縣宰嘗畀之錢令祭父母墓騎馬不可曰禁地安可私出  
入且馬奇人亦有子若閒以殺囚囚一身安足惜復以獄訟累賢



令尹囚罪深矣縣宰歎賞者久之騎馬沈毅方正生平無大言遽色終日危坐未嘗跛跨車中不左右顧口未嘗唾剃髮以囊貯之曰此吾父母之遺也性尤慈厚不踐生草不殺生蟲一言一動皆似於禮新城進士王振綱尤推重之曰此夫子所謂善人不踐迹亦不入於室者也某令聞其名欲覓之輒引避曰吾刑徒耳可與官府往來耶又有某令延騎馬相宅不可曰官宅與民異設言不利必興役改作是以吾一言擾民也同治初卒年六十八卒後邑人士泐石紀之曰孝子伯超之墓湘鄉曾國藩總督直隸以孝義剛烈旌其閭云同邑馬傑幼讀書穎異兼數童子課貧不能給去爲傭世父其良無子以傑後之咸豐七年世父爲讐所殺傑年十五謀復讐負利刀枕而寢議婚已定託貧故絕之時大母暨生母依傑爲生忍而待越八年大母暨生母相繼沒躍然曰可以行矣

時世父柩浮厝於庭傑置刀柩前酌酒焚香哭而祭曰傑軀弱力不敵讐願世父助我出門去迹讐所在時天大風雨夜黑不見掌讐入某家博狎不顧背而刺之斷其首持以祭世父詣縣自首繫獄年餘卒

### 王定枚

王定枚字卜臣正定人生而豐秀體狀巍然六歲授書穎慧異常兒十二歲徧通四子六經時抗論古今書傳得失驚其座人年十三連遭祖父喪執禮毀瘠如成人隨母兄居別業日帶星走田間汲井溉田歸則侍其母嬉游舞蹈或雜說里謠以博母歡丁母憂號搶羸頓痛不欲生自是神罔罔如有所失別業在下鄉距滹沱十里時代兄視稼部署井井皆有條摘發佃人姦欺動中情款佃人皆畏服兄以制舉文三百首授之甫五日背誦均上口又嘗以

傳四  
意評校得失悉中銖兩以內艱不及試而卒年十九生平喜爲詩  
既疾猶語兄曰吾他無所思但思爲父耳兄名定柱痛其早亡爲  
作孝友儒童傳

### 劉世芳

劉世芳字美之永年人幼孤貧事孀母朝夕奉養惟謹母得奇疾  
醫藥禱卜皆罔效輾轉牀褥百有五旬世芳日夜悲啼籲天祈身  
代夜夢神牽其臂慰之曰得女貞實卽瘥世芳醒而異之顧不知  
女貞實果何物也姑以名旁求果得之和以進母疾竟霍然世芳  
知醫慮母春秋高時時和藥餌調護之母年至八十八始沒世芳  
躄踊號哭哀感行路寢苦茹粗三年不履臥室聞以其術醫人不  
責償推產讓兄叔母寡奉之如母其他善行多類此

### 王策



王策字竹林元氏人七歲失恃繼母性烈嚴冬嘗爲母以身温被  
母虐之使露地操作更深扃其門策脫去衣服從門闖下入室和  
氣婉容和色以博親歡既長父沒待異母弟尤友愛母感其孝爲  
之齋顏

### 傅傳習

傅傳習灤州人性謹飭耆宋儒之學同縣王士琛亦老宿砥行礪  
名互爲師友咸豐元年正月朔日食傳習與士琛偕哭於廟年逾  
四十所造益深家徒四壁泊如也母喪一依朱子家禮除酒肉斥  
浮屠不用音樂有來弔者以蔬食菜羹飯之鄉人皆不悅喪未畢  
灤河溢水大至壞垣破壁汨汨自竈下出傳習卧苫次驚起大號  
呼救水且及腹踔躑泥水中顆粒不入口自暮達旦水漸退家人  
救至氣息才續不能言眾欲扶去之傳習搖首示不可強之則坐

泥淖中進以湯粥咽數匙輒已時村中水尙盛求草蓐不可得藉以門扉傳習坐卧其上數日竟卒

鄧人玉

鄧人玉字照吾大城諸生父秉文亦諸生母劉氏卒人玉方七歲哀毀如成人事繼母王以孝聞家貧館他鄉遇珍味必徒步攜歸遺父母妻劉亦善事舅姑生二子而卒人玉義不再娶繼母病革祈天乞身代不效而没比至小祥泣然曰父耆而鰥古禮謂七十非人不煖熒熒獨處何以堪也於是爲父繼娶而已鰥居如故養親之暇立簿日記功過俾族人創家祠置祭田敦孝明倫以啟後人咸豐四年正月粵逆李開芳北竄掠之去人玉時時流涕念其父耆耄無人奉養恐凍餒死賊相顧歎息曰孝子也釋之同治二年父年八十三卒人玉年亦六十餘矣寢苫枕函泣血三年如一

日服闋繼母又卒家徒四壁喪不舉日夜悲戚族黨勸之草葬喪事稱家有無耳人玉泣曰爲人子者親生則養死則葬凡以報罔極之恩求子心之所安而已非爲名也卒以憂勞致疾卒年七十四

### 徐嘉賢

徐嘉賢字少珊天津人生而英擊動止端重不苟言笑大父廉鏞奇愛之雖甚憂怒見之輒釋易簪時屬家人善撫之而嘉賢則號踊如成人時年甫七齡耳其事父母也無幾微不適親意者遇事關白而後行一無所私於己性開敏劬於學禮敬其師偶一言及輒變色易容必莊必肅年稍長就學於外歸課諸弟以嚴見憚循循侍立無跬步片言踰尺寸而愛撫之甚於保姆教其子世昌世光一不稍假藉後皆成名仕至貴顯而謹守家法至今猶不易其



素云咸豐三年粵匪林鳳祥李開芳竄河北擾懷慶父思穆奉督師訥爾經額檄治懷慶糧臺嘉賢以兵事艱險請隨行挈持煩難攀畫周至官軍結筏渡河賊對岸施槍礮眾怯欲退嘉賢時年十七獨奮然率之以進既渡賊掘棺伐樹結柵抗官軍久之無聲嘉賢單騎偵之賊已遁矣拔難女數百人以歸訥爾經額壯其膽略特疏薦於朝疏爲賊劫不得達及訥去事遂寢而嘉賢絕口不言其功益肆力於學閒以琴詩書畫自娛嘗佐其父理官書究治河之法建策抒議悉中窾要論者謂其父治河有聲晨昏之間所助爲多嘉賢治家有法內外無疾言遽語親故相依委曲盡意時以空乏自窘不悔也母病嘗藥侍食無晷刻離疾篤刲臂以進及沒哀瘠骨立又痛弟妹熒熒無所依親與撫眎憂勞致疾遽以毀卒年二十五著有治齋書屋詩草藏於家

趙基復

趙基復字子原新城人咸豐五年舉人官順天府東安教諭意度  
夷曠不治生產性至孝母病割臂肉療之喜為詩直據胸臆駁逸  
奔放無刻鏤餽飮之態人謂青蓮後身書法重神骨得晉人筆法  
小篆尤精何紹基書名震一世見之自歎為弗及與縣進士王振  
綱舉人李文鼎友善時人有新城三傑之目咸豐中卒

孟昭祿

劉世洪

孟昭祿雄縣人少孤事母以孝聞母病卧牀葺晝夜無違左右飲  
食起卧皆躬自扶持母卒疏食飲水雖鹽菹不御不入內寢冬不  
衣絮喪葬一秉古禮服闋如初喪如是者又九年母所遺物皆謹  
藏之母所畜雞犬飼之至死埋之不忍食也先人遺業盡與兄昭  
珍纖毫無所取昭珍不事生產會咸豐中大水產盡落昭祿悉為

復之已則與妻居貧食力自給有餘輒以給姪竝以周親黨之困者年七十三卒同里劉世洪字篤敬純謹守桀矧弱不勝衣一夜賊入宅執其父昌胤世洪驚起赤身持刃斫賊中其背父得脫賊反刺世洪左膀流血淋漓力鬪賊不能當咸駭走父沒撫兩弟篤愛悉推其產予之叔父亡奉叔母如事所生二十年如一日

王貴保 李重林

王貴保鉅鹿人咸豐十一年教匪之亂曲周知縣余承思招集義勇貴保與父永祥往應募戰河東七义路眾潰貴保奮力突重圍出聞父陷復衝圍入救之力竭父子俱沒於陣同時死者二百餘人知縣立祠祀之同縣李重林監生同治元年冬賊入境執其父索銀與馬重林奔至賊所曰若釋乃翁如願以償賊縱之去問重林不應賊怒以刀斫之至死罵不絕口



劉華祝

晁萬嶺

郭永

劉華祝清豐諸生成豐十一年東匪至父命同避祖塋側曰我死以對先人華祝負父往遇賊以身蔽父被數槍哀乞賊曰殺吾母殺吾父賊提髮撲塋外暈絕父遂遇害及蘇賊已去弟至議斂賊復來請暫避華祝曰父已死吾不獨生遂偃卧尸側賊謂其死不顧而去葬後念父死非命絕粒死同里晁萬嶺監生東匪之亂衣冠祖塋子景泰勸之逃不聽賊至脅之降父子俱罵賊死郭永性至孝親卒結廬墓側寇至被創不忍去知縣崔維樂旌其門

劉永生

劉永生字子直柏鄉諸生父三謨以事詣貴州貧不能歸時遭吳三桂變緝北人三謨刈髮隱浮屠中永生辭母跋涉萬里極南詔邊境迎父歸里迨卒廬墓三年永生艱得子初買妾臨城母女相

抱痛不忍離舍之不責償子甲雍正元年武進士任山海屯田守備勤慎有聲

趙魁升

趙魁升字超人冀州人少孤有至性髫齡從從兄調年讀一年通四子書毛詩及朱子小學以家貧廢學胼胝田畝閒而終歲所獲不足供給菽水則又牽車牛服買藉以養親每日朝起趨市必詣母牀前或立寢門外告以所市何方何時當歸率啟行時早歸時必遲啟行時遲歸時必早刻時往返雖風雨寒暑未嘗一爽期懸母望也村農所食惟菽粟而市肆則百物時至魁升既逐什一尤以時得甘鮮佐菽水爲快有弟魁俊早失學魁升強之讀書而性鈍不克如志自請於兄願力田佐兄奉母既娶而卒魁升終身痛之如失左右手一妹適鄰鄉李氏不得於其姑久之亦不爲夫所

喜魁升每至其家輒婉言愉色萬一冀博其歡歷數十載至其姑  
沒每往來迎送心輒惴惴妹生二子皆育於已教之成立世父悉  
聞性豪宕有氣不肯低首於人嘗貨錢買一船責者至蕩其產償  
之不足魁升則盡取已地十三畝售之以代其償後世父家稍豐  
未嘗一言及前事曰朋友尚通有無況骨肉乎魁升初讀書明敏  
強記後嘗以早廢讀爲恨暇輒自手一編或伏几學作書每往田  
若趨市過塾門聽鄉先生誦讀旁皇至不能去或坐學者於旁令  
說古今書史聽之終夕無倦後其孫衡卒以博學善文章斐聲大  
河南北或曰天之所以報其志也魁升誠篤公直族黨敬畏甚於  
官長向者里社有公儲歲終則籍其出入榜之於眾獨魁升所掌  
眾皆不聽榜曰吾輩任心不任目若君者吾信之於平日久矣鄉  
人有事往往就質居閒排解一言而釋族中有強暴子多力善御



馬馬見之皆戰慄家人無敢撻其怒者惟魁升責之俯首而笑族子全祿喜游博召而戒之卒盡復其產某氏婦以不遂於姑出之數年矣魁升以理喻之爲反其婦姑亦悔悟子孫至今繁衍稱大族焉其盛德感人類如此魁升旣以農賈起其家偶美食必泣曰昔與吾母蔬食嘗不飽今何下咽也偶易衣必愀然曰昔與吾母所服者大布今錦吾衣心何安也後家人相戒日用皆依舊不改其素云同治七年卒年七十一

韓燿

韓燿永清人父文楚故武生以事爭爲里人楊國順所殺吏索賄文楚家不遂以誤殺論國順得減死出獄行益肆燿年九歲謀復讐購利刃藏之篋中伯兄然出嗣世父家故裕燿陰與謀屬兄養母而已復讐母微聞之潛搜其刃藏之他所咸豐九年九月燿與

仲兄燧季弟煊收禾田中猝遇國順欲擊之恐兄弟株連而止偵國順所之投樹下卧急歸家索利刃不得見斧斧節國順往殺父時所遺也持去奔國順所力斫之死文楚死已十年燿適以父死之日復讐且均死一斧因自首之官邑令憫其孝屬獄卒善遇之解省見者皆嘖嘖共釀金爲助同治元年遇赦得出事母益謹遠近稱爲韓孝子

陳金燕

呂登魁

鄭金鐘

陳金燕字振南清苑人武生性篤孝祖德麟病禱天誓身代日夜侍湯藥衣不褻帶者年餘同治七年擒匪竄清苑境金燕率里人禦賊殺六百餘賊虜至里人懼爭散去賊執德麟德麟忿罵之賊割其耳金燕弟其翰其珍其漣俱罵賊死賊去金燕背負祖逃路雪沒脛宛轉數十里耳血泔泔自肩至股皆赤德麟命金燕走姻

家假車馬既至又遇賊賊縛於柱而去里人遣車迎德麟歸祖孫相持泣見者皆歎曰孝子孝子十一年德麟卒金燕寢食柩側每飯必手獻如生時年餘毀卒年三十九東鹿呂登魁強健有力同治七年正月賊入境負母逃行五六里賊追至登魁以善言哀之賊已釋矣猝一賊至以槍刺其首誤中其母登魁置母於地奪其槍奮殺數人賊懼力不敵母子皆死鄭金鐘事父孝賊至持槍負父以行賊至刺之墮馬行三里餘槍折力窮與父俱死

### 胡柄泰

胡柄泰字小帆天津人少孤事母以孝聞凡起居飲食疾病疴癢維持調護必慎必周母或不怡多方將順必得歡心而後已母年逾八旬構疾大漸柄泰延醫禱神力盡無效及卒柄泰竭蹶營斂畢仰藥以殉距母死方五日妻孥無知之者時同治十二年三



月晦日也年四十五

王紹義

王紹義大城人道光三年邑大水歲飢日不舉火祖東侯語其子全忠曰吾家五口相守同餓死不如外出謀食或有生者全忠遂攜妻東子紹義乞食至關外新民屯妻東病死以蘆薦藁葬義冢叢薄中紹義一痛而絕久之始甦覓父已不知所在紹義日行乞夜歸宿母墓傍拾瓦礫置其上旬日閒纍纍成大邱壠有關內人售酒屯市愛其誠篤招使監銷數年積錢十數緡哀請主人謀歸家省其祖曰主人厚恩異日當圖所以報也淚隨聲下主人慨助數千遺之抵家祖幸無恙相抱持痛哭自是紹義在家奉祖然時時念母骨未歸又不得父耗為恨紹義年已二十有一矣有鄰翁嘉其孝欲妻以女東侯曰許之矣紹義泣曰兒母野葬他鄉兒

父存亡不可知敢圖室家之樂乎兒行兒行當出關尋父母誓不  
得不歸也紹義乃再出關遇寺廟輒禱祝至新民屯尋母墓已爲  
水所齧蕩平無跡矣於是往尋父數月資竭行之至天築台渴而  
思飲遙見有灌園者趨就之則其父也驚喜痛哭失聲時父爲園  
傭積數金遂相攜至新民屯覓母墓不得紹義跪哭於野晝夜不  
絕聲不飲不食眉髮皆皓白旁一老翁告曰以馬鞍繫長繩使紹  
義口銜勒跪曳之鞍至何處止不動啟之當有驗如言行之夜深  
鞍止不動隨掘尺餘見瓦礫堆如故瓦盡骨見紹義齧指出血隨  
滴隨沁於是編蒲束負之旋里未至家前一日東侯夢全忠夫婦  
攜紹義歸惟東氏蹶左股不良於行醒而異之至晚全忠父子攜  
骨歸明日買棺拾骨葬之則左脛骨缺一節人驚爲神光緒間李  
繼昌宰大城奉大吏命修堤督之遷葬紹義立其側鬚髮皓然羣

呼爲白眉孝子異而問之備述其事乃爲封其墓而繞道堤焉

席黑子

席黑子年十一父母以貧亡於外黑子依舅氏至年十七乞食尋親達京都走塞外一日禱於廟有老人問里居姓氏告曰某村有一婦廣平人也往尋之果其母背負行之而歸再入京尋父已見之矣父堅不回黑子歸里告其母越數月再至京以疾卒

臧廷魁

臧廷魁字占菴棗強人世以耕讀爲業父早亡母喜讀書聲每日坐母側誦經書數頁母病糜粥湯液躬自調劑百五十日病既革顙天祈身代母沒擗踊殞絕復蘇勺漿不入口者數日比葬大慟曰吾生五十年未嘗一日離吾母今委之曠野無人地心何忍也乃留墓側不反時隆冬雨雪深三尺廷魁坐卧其中面黧黑手足

孝友二

三五



瘴瘕村人閔之共爲築室居焉每食必獻且悲母之死於渴也日  
三獻茶誦孝經一卷如母在時居數年或勸之歸不應責以教子  
廷魁乃招妻子同居墓廬曰使吾母與子婦諸孫終日相對聞讀  
書聲吾母之喜可知也母好施藥藥廷魁卽墓側踵行之終其身  
歲旱蝗廷魁率眾禱雨立應蝗皆死同治十一年縣令方宗誠爲  
請於朝旌其廬

曹壽升

曹壽升字星階天津諸生生有至性而體弱有腹疾光緒元年春  
父病篤舉室無所措一日病忽愈人皆驚喜壽升則手足皆拘攣  
不能誦伸詢之託言顛踣致傷久而察知其刲股及臂凡七處和  
藥煎之以進也創亦旋愈既一月父病復發卒不起壽升盡哀盡  
禮苦塊中腹疾作遂卒年二十八縣人舉其孝行旌焉

楊慎初

弟愈初

李成慶

李國柱

楊慎初行唐人性樸拙業農與弟諸生愈初友愛俱以孝稱同治初父病不起愈初一痛而絕慎初痛弟殉父亦病狂死同縣李成慶諸生母王善病輾轉牀第聞晝夜調護往往達旦不寐執母喪哀毀幾滅性弟疾繼作奔走醫藥竟以勞致疾死元氏又有李國柱者字石臣貢生父沒痛死者數數月祖母又沒哭輒嘔血屢瀕於危戚友皆以母在勸解之年餘始就痊朝夕奉母同寢處者十四年及沒哀毀如癡年餘卒

郭允中

郭允中字厚田先世居武清家京師久遂爲宛平人父銓喜施與鄉黨族戚婚姻喪葬諸事皆取辦於一身若營已私久且困宿產皆墮落及沒負債累累允中繼之一體親志無所更如是者三十

餘年而責望者益奢且眾偶有弗給往往出怨言至不能堪允中竭力摒擋其妻王亦有賢德通書明大義時典嫁時衣飾助之以成夫志或勸之稍自顧則曰此吾先人志事他非所計也少以國學生納貲爲通判監修定陵有勞賜戴花翎晉同知分發東河以貧不能赴官家居讀書教子手錄論孟至數十過其子家聲卒以進士成名官農工商部主事文聲斐然或曰天之所以報孝子也光緒三十一年卒年六十有二

孝友傳二終

大清畿輔先哲傳第四十



敘錄

畿輔跨有幽冀并三州之地太行崛起西南連蜺透蛇以趨碣石  
常山之鎮昭餘祈之澤滹沱洩易桑乾巨馬滏漳之水巨瀆洪川  
左包右絡匯於大海其地勢雄偉博厚數千百年扶輿旁魄鬱盤  
之氣收奇攬勝代生偉人其上者爲將相爲師儒下焉者亦講孝  
弟尙節義廉恥不失爲鄉黨自好之士三代以前若伯夷叔齊尙  
矣自孔子以布衣教授從游之士燕趙爲多淫衍至於戰國其支  
流餘裔家傳師說而虞卿荀子尤著漢興表章六經人文燦起孟  
但京房言易韓嬰毛萇貫公言詩胡常索盧放秦恭言書董仲舒  
毋邱壽王雋不疑言春秋盧植言禮王禹言樂崔駰崔瑗父子通  
五經尤善爲文章故兩漢政治導源經術彬彬乎三代之遺焉逮  
於蜀魏迄有明之季賢哲代興更僕不可終數舉其卓者顯者則

范陽之盧渤海之高鉅鹿之魏趙郡之李廣平之宋博陵之崔皆  
累世賢達載在史冊吾嘗竊觀人才之盛學術之隆治化之美兩  
漢而後莫過於唐宋語云士不通經不能致用故荀子推大儒之  
效而極於詩書禮樂之歸唐時孔穎達賈公彥等撰羣經正義李  
元植馬嘉運啖助蓋文達諸儒繼之北學益昌有宋大儒周程張  
邵倡明義理之說一一返之於五經四子於是孔孟之道煥然大  
明二程世居中山後徙河南邵子亦范陽人後徙共城蓋皆北產  
也遼金之際畫疆立國人才多出北方降至於元儒風稍稍替矣  
而姚樞劉因竇默獨堅守宋儒之學姚燧蘇天爵安熙安煦元明  
善王恂王結諸人互傳師說文章政事蔚然可觀不第通州諸史  
定興諸張之武功卓絕也明興畿輔理學實祖劉因容城孫徵君  
奇逢撰明畿輔人物考列科爲七先哲大畧備於此矣而文學一

科闕焉弗錄豈其人不盡足傳與然稽諸史志保定武彀南皮李騰鵬宛平于奕正大興李季鼎密晉蔡駿皆淹通高雅士也夫文者實之華所以彰微闡幽載道以馳世者也孔子曰言之無文行之不遠故四教首重文世之豐功碩德介節高行其人姓氏湮滅不得其文以傳者所在皆是詎不悲哉清主中國二百六十餘年人文之懿踔越前古順治三年丙戌開科之始畿輔進士凡得一百餘人而高陽李文勤公霽尤爲政事文章之冠當時魏貞菴裔介魏環極象樞諸公倡學於上孫刁顏李諸先生講學於下理學之傳衍爲宗派自河閒紀氏大興朱氏接踵而起博綜漢宋諸儒學術暨古今詩文源流派別之所在導倡來備兼羅竝包而皇畿績學之士習於見聞時時角立傑出並興於世獨怪崑山顧炎武氏嘗以北人拙於文辭聲律金元而後且有人荒之譏此拘方之



論也善哉萬斯同之言曰吳會之人貴文藻重聲氣士大夫之終  
鮮不具誌狀家傳自明史館開率率引傳致重人多爲言之北省  
遠方百不一二致惟見列朝實錄人不過一二事事不過一二語  
其載於郡州縣志者略舉大凡首尾不具其名雖甚赫著而行誼  
事蹟不可鑿空而構欲特立一傳無由摭拾以成其章由斯以談  
北人之貴仕於朝者猶復若此況乎閭修之士終其身足不出里  
閭名不達公卿竝世無稱又奚足怪吾爲此懼焉然徵文考獻去  
古未遠輦轂之下方聞博碩之士鱗萃羽集其遺文軼行時有能  
言之者而縉紳世族楹書家乘亦往往而在余不自揣輒網集舊  
聞昭發潛隱竊仿夏峯孫氏之作推而廣之門分類別悉列諸篇  
其所不知則俟後之君子

清有天下實生賢輔創迹開統魏王李杜大興朱氏乾嘉之良逮

於末造維李與張撰名臣傳第一

有清武功超軼千古南戡西撻桓桓貔虎馬箠四指掃土開疆

天子褒嗟圖形紫光撰名將傳第二

孫師陸王刁祖程朱顏李後起手闢馘塗著書滿家爲世大儒撰

師儒傳第三

聖門游夏文學之科六藝鐸世訓故紛羅河閒崛興追踪漢獻淹

通四部大文豹變辭章之彥考據之儒士不一流前駕後趨代有

作者竝爲國華撰文學傳第四

士有不幸生當國變志不辱身甘貧與賤巨蛇大鱗戰於邦郊危

亂不居去國而逃維其不緇是以不羈不爲其雄而爲其雌不飛

不鳴維道之尸景彼高躅山砧水麋撰高士傳第五

古傳循良廬書外吏入治出長皆天子使展采錯事內外貫行官

靡逋政萬口流聲無大無小有善則錄臚其往蹟以箴素穀撰賢能傳弟六

燕趙慷慨好俠喜功橫刀奔命萬夫之雄強寇大敵狎若嬰子衽金蹈刃報國以死褒忠之典職龔祠祀千載而下懍懍生氣撰忠義傳弟七

名教喪亡政俗不綱禽犢無恥骨肉閔傷庠序之教自孝弟始本亂末治南轅北軌吾觀王道莫易於鄉親親長長變不易常由家而國庶幾其昌撰孝友傳弟八

徐世昌曰余少奔走燕趙之郊車跡殆徧每過先賢故里輒拜瞻其祠墓感慨思慕恨不并世警欬其側而親炙之然其流風餘韻至於今時後生志士聞而興起者踵相接也孔子曰魯無君子者斯焉取斯荀子曰學莫便乎近其人蓋其見聞之習又得師承之



傳故收效如此孔子之告子貢也以事賢友仁爲居是邦之道孟子亦言友天下之善士不足則尙論古之人余志此久矣故取邦之賢者仁者表而出之以爲尙論之資維桑與梓永作世法凡得一千八百六十六人列爲八篇析爲四十卷因論列所纂目次撰大清畿輔先哲傳敘錄第九

叙錄終

分金

201-440

清代傳記叢刊·綜錄類①附  
周駿富輯

# 附：大清畿輔列女傳

六卷

徐世昌撰

明文書局印行





傳

輔

人

卵


影

清

養

女

翠



20 1-444



序

余爲大清畿輔先哲傳旣成書又仿漢劉子政撰列女傳五篇附之書後子政當漢成帝時宮闈縱恣無所統紀乃傳述古列女貞淫善惡之迹奏之天子以爲勸戒范史而下踵而爲之遂增婦女於列傳之中子思子曰君子之道造端乎夫婦及其至也察乎天地天地之事近之在於夫婦居室之間推而極之至於聖人之所不知所不能而天地亦時有所憾焉而莫能盡故曰生民之始萬化之原皆推本於此吾觀大小戴禮昏義內則昭教諸篇其言夫婦之道甚備而虞夏商周之所以興盛則原始於二女塗山有娥姜嫄仲任太姒之賢及其衰也康王寘朝夫人作鬪雝之詩以相諷諫我孔子以詩教詔天下後世凡周南召南及諸國風所歌詠大抵皆男女寘私之事而家國之興亡治亂卽於是乎貞之若鑑

照而數計也中華開國四千餘年文明之化光輝日新綱常名教  
之大防孝弟忠信禮義廉恥之教耳濡目染洽於心机上至學士  
大夫下至愚夫愚婦習慣之性幾成於自然而不可移易逮於有  
清益以聖教範圍天下而畿輔首善之地漸化尤深當日孫包顏  
李諸大儒先生復爲之昌明禮教以扶翼斯世一時聞其風者雖  
委巷繩樞之子窮殘弱女目不覩詩書身不親保姆而貞孝節烈  
之行往往而是吾嘗謂文王后妃之化下逮於行露之人江漢之  
女子皆守身執義有士君子之風焉直哉言乎古之人不余欺也  
爰取中壘之意甄錄懿行以類相從各爲之傳用詔來者易曰家  
人有嚴君焉父母之謂也故嚴家無悍虜而慈母有敗子魯之交  
伯鄒之孟軻齊之田稷魏之慈母莫不導之以道範之以禮反金  
斷織稱爲母師若博野之尹氏河間之左氏其殆庶幾乎撰母儀

傳第一管子曰孝者子婦之高行也孝而不解則美名附故子婦之賢以孝爲主以天性言之孝父母易孝翁姑難以人道言之吾既親吾之夫矣則親夫之親其於父母又何閒焉世俗之傲愛敬不知甚至抱哺其子與公並倨婦姑不相悅則反脣而相稽賈生所爲太息而流涕也吾爲此懼焉撰賢孝傳第二婦人之吉從一爲貞故夫有再娶之義婦無二適之文此柏舟之詩所由襲錄於聖人也梁寡婦有言曰不慕貴而羞賤不棄義而從利不忘死而趨生懿哉此其所以爲貞乎撰節義傳第三孟曰取義孔曰成仁丈夫猶或難之而況於婦人世固有死重於泰岳而命輕於微塵者蓋人雖死而有不死者存焉乾坤之所以不息綱紀之所以不渝其在斯人乎其在斯人乎撰貞烈傳第四有才而無德非婦女之所宜也故范氏之傳文姬君子譏焉然禮有姆教之法婦學之



師若韋逞之母陳邈之妻有才如此夫復奚疵善乎班氏之言曰  
教男而不教女蔽於彼此之數者也八歲教之書十五志於學獨  
不可依此以爲則哉通女訓奠坤維內助之賢於是乎賴之撰才  
藝傳弟五烏虜風教之隆污由縉紳始自西學漸入中土內外之  
閑始稍稍弛矣而窮鄉鄙屋之閒獨以此爲大辱無恥至傳相告  
語懸爲厲誠君子以是歎古先聖王禮教入人之深且久也世昌  
兄弟不幸幼失怙受先太夫人教養以有今日先姊殉姑早亡世  
昌何天之寵謹守慈訓兢兢至今不敢稍隕越皆太夫人之澤也  
同年王君晉卿謂太夫人之賢先姊之孝不可以無聞且爲掇錄  
事實請載之傳中以昭來許余心怦然不敢復避體例之嫌或亦  
當世仁人孝子所矜而許之者也天津徐世昌

大清畿輔列女傳目錄

卷第一

母儀

肅寧朱潤母鄭氏

定興杜越母宋氏

任邱劉鏢母白氏

宛平高裔祖母段氏

河間左方煥母王氏

玉田申贊皇母顧氏

磁州張丙厚母成氏

永年趙振宗母張氏

博野尹會一母李氏

永年申夢麟母劉氏

同縣曹士俊母賈氏

遵化董世明母王氏

吳茂春妻張氏

鹽山劉曾璇妻吳氏

南宮王堯恒母李氏

大城楊蔚林祖母馬氏

子圭書妻李繡英

滄州葉伯儉妻全淡真

永年武澄清母趙氏

新城王振綱母杜氏

永年翟觀承母連氏

王樹枏補傳

天津徐世昌母劉氏

同里霍綽母李氏

灤州李茂春母陳氏

望都楊升恒母何氏



望都張鴻翔母甯氏

卷第二

賢孝

清苑張羅彥妻趙氏

清苑王延褒妻張氏

豐潤唐之演妻姚氏

文安邢惟式妻萬氏

通州耿宗湯妻王氏

交河馮瑤林妻張氏

鹽山劉執中妾吳氏

同縣邵潔妻陳氏 韓芸書妻邵氏

大興厲淑明

滿城黃來聘妻魏氏

子鏡妻朱氏 鏡子傳綸妻馬氏

永清賈涑妻劉氏

姑張氏

灤州王曰錡妻魏氏

故城張仲瑜妻王氏

獻縣張守仁妻梁氏

永清陳應新妻高氏

霸州吳繼科妻郭氏

永清石瑾妻吳氏

大興袁宗菴妻邵氏

永清温得珠妻李氏

永清蔡浩妻鄔氏

同縣張富妻蔣氏

永清蘇廷燧妻西氏

容城陰賢妻杜氏 陰常太妻李氏

廣昌何某妻魏氏

深州李壽山妻魏氏

永清葉可興妻燕氏

同縣燕宗灝妻邢氏

永清孫興禹妻張氏 子鳳瑞妻楊氏

霸州馮顯宗妻李氏

同縣楊彬妻初氏

永清李文燦妻郭氏

子永齡妻燕氏

永清仇致廣妻任氏

曲周王懃妻岳氏

趙州閻貞女

東光王而陶妻張氏

天津吳某妻韓氏

通州白鎔妻劉氏

宛平韓孝梅 永清朱棫女

棗強王孝女

故城盧著



元氏王炳如妻郭氏

滄州楊天德妻王氏

大城李壽山妻孟氏

同縣李長壽妻王氏  
李璠妻鄭氏

龐氏妻高氏

天津王瀛妻湯嘉名

大城王巨庭妻張氏

同縣劉懋源妻元氏

安州梁某妻張氏

武清高貞女

獻縣韓守立妻俞氏

故城張某妻李氏

任邱白俊德繼妻劉氏

孫蔭欄妻周氏

涑水章貞女

深州嚴烈女

獻縣吳孝女

赤峯范豈二節婦

天津金佑妻王氏

天津徐氏 王樹柎補傳

灤州郭東陽妻劉氏

樂亭董孝女

望都耿一圭

大城韓天印妻楊氏

天津張玉貞 妹淑貞

大城葛廷魁妻梁氏

臨榆趙貞女

天津鄭凌仙 王姐姐

任邱李樹畹

卷第三

節義

蠡縣蔣爾恂妻李氏

廣昌徐喆妻李氏

姪圖遠妻趙氏

容城孫立德妻張氏

同縣宋諒妻孫氏

南宮邢鑣妻李氏

柏鄉耿復昭妾趙氏

永清張科妻劉氏

通州張維垣妻姚氏

平谷關某妻王氏

同縣馬馭雯妻顧氏  
李某妻韓氏

王李妻倪氏

東明房莖妻甄氏

同縣戴曾隆妻張氏

永年杜斯美妻盧氏



蠡縣龐國棟妻魏氏

懷安朱琇妻秦氏

清苑何溶妾張氏

永清張其蘊妻曹氏

易州田氏雙節婦

霸州王經妻何氏

寧河岳景純妾張氏

子屹然妻朱氏

臨榆錢朝樾妻張氏

撫寧魯樊二女

安肅田廣宗妻張氏

饒陽李氏楊氏兩賢婦

平谷劉秀姑

獻縣紀汝備妻張氏

灤州賈克明妻孫氏

灤州李氏兩節婦

涿州王萬齡妻張氏

遵化何門兩節婦

大城李柏齡妻陳氏

大城王國風妻張氏

### 卷第四

#### 貞烈上

高陽王鈺妻張氏

同縣劉百順妻王氏 張志和妻邊氏  
女經姐 東鹿穆烈女 同縣石如玉

妻彭氏

新安梁大用妻孫氏

蠡縣徐洑妻王氏 同縣李壤妻辛  
容城李煥元妻孫氏 新安張

攀鱗妻荆氏 高陽張毓椿妻白氏 同縣劉廣福妻  
龐氏 韓蕙光妾譚氏 安肅張永錫妻王氏

寧晉馮學曾妻王氏

易州范烈女

豐潤殷壯猷妻李氏

深澤袁邦璽妻楊氏

同縣李金錫妻賈氏

蔚州宋典姐

永年楊之孚妻馬氏

武邑井第大妻滕氏

西寧侯烈婦

玉田桑琰妻曹氏

通州康流著

新安魏克儉妻王氏

易州田誠甫妻王氏

涞水蘭應祿

高陽孫之敬妻張氏

祈州戴五姐

同州甯超宇妻焦氏

目承

六



理姐

目錄

肅寧宋氏五烈女

同縣苗烈女

交河董才姐

豐潤金烈女

香河朱某妻芮秉貞

天津邢文貴妻殷鳳娘 寧河樂某妻左氏 天津徐某妻張氏

宛平高章侯女

安州張貞女

雄縣孫貞女

天津高爾信妻魏氏

天津金振妻丁氏

同縣王廷錡妻劉氏

南皮張裕慧妻王氏

任邱邊蘭珠

獻縣戈鎮妻劉氏

大城孟黑子妻苑氏

任邱舒貞女 阜城寇貞女 寧津王貞女

獻縣黃貞女

天津張懷清

臨榆郭烈女

棗強屈瑜妻劉氏

固安高萬基妻呂氏 寧河王寅清繼妻吳氏

東明曹三姐 同縣張黑妻童氏

廣昌沈貞女

通州趙傑女 寶坻王澤世女 密雲楊文瑛

天津周鼎妻龍氏 同縣葉烈婦王氏 志廬妻邵氏

天津孟氏吳氏兩姊妹 同縣關維印妻劉氏

元氏耿志明妻董氏

目錄

七

大興沈毓鳳妻史氏

天津金讓妻章氏

獻縣張天錫妻孟氏

天津梁貞女

遵化王立妻孟氏

滄州某甲妻張氏

故城張伉妻馬氏

天津王貞女

天津張起妻趙氏

長垣李烈婦

曲陽崔貞女

東明邱貞女

正定蘇貞女

靈壽蘭貞女

武強張貞女

深州周成姐

同州王二姐

卷第五



貞烈下

豐寧謝紹鳳妻徐氏

平泉州王興妻朱氏

天津毛凌阜妻朱氏

同縣孫泓妻程氏

新城孔貞女

同縣劉貞女

文安李榮姑

婢陳春華

樂亭陰鳴岐妻李氏

遵化洪士俊妻王氏

天津于維琛妻劉氏

同縣孫佑妻唐氏

朱元善妻陳氏

天津李黑姑

天津劉鐘妻王氏

元氏王訓之妻劉氏

東明霍松坪妻李氏

武清田大成女

貞女

蕪州王天元女

固安馮綸女

文安陳

天津樊景恆妻王氏

清苑姚景崇妾任氏

青縣周某妻謝氏 安肅蘇民生妻劉氏

大城韓遇雲妻賈氏 同里崔玉堂妻張氏

望都任氏婢祥姑娘

獻縣劉肇竣妻唐孟端

天津婁舉正妻王氏 笠山杜光泰妻周氏

天津王兆霖妻金氏 同縣王恩徽妻金氏

棗強盧貞女

肅寧苗烈女

南樂藍姑 同縣張姑

天津金慶蘭妻周氏 同縣楊葆廉妻張氏 門世祺妻張氏

天津李夢齡妻梅氏

滄州蘭貞女

天津孟傳謀妻龐氏

同縣張文靜妻梅氏 平遠楊國昌妻陳氏 天津郭鴻儀妻張氏

武邑魏某妻常氏

大城蕭林妻馬氏

同縣沈廣維妻張氏 葉宜春妻邢氏

大城馬廷梅妻駱氏

大城劉任二貞女

南皮慕貞女

灤州苗翠

天津三王氏

同縣李運昌妾徐氏

天津鄭廣義妻劉氏

河間裴璋妻宗氏

目錄



南皮張氏兩烈女

任邱王蒲

卷第六

才藝

盧龍蔡琬

天津樂樟妻王氏

故城祕王伊繼妻何氏

滄州左方燾妻張貞範

元城陳朝蔭妻寶氏

天津查為仁妻金氏

女調鳳 容端 綺文 嚴月瑤  
侍女宋貞娘 許雪棠

天津梅成棟妻金氏

同縣趙西姑 張筠

天津佛女

灤州王廷勳妻寶蘭軒貞  
同州李希彬妻鄭淑  
同縣李綸妻李氏  
遷安高順  
樂亭張

山妻宋氏

大興方履鏡繼妻呂氏

正定何鴻受妻于氏

大興劉尹玉  
子婦劉己未

文安張嵩山妻葛氏

任邱李灑煥

天津陸文輔





母儀傳一

大清畿輔列女傳第一

天津徐世昌撰

肅寧朱閻母鄭氏

鄭氏者肅寧諸生鄭獻颺之女同邑朱有容之妻而閻之母也氏生五歲而孤母史撫幼子閉門課讀氏學幼儀內則諸書嫻禮法尤精女工年十七歸有容時姑張患病不起數年矣氏侍牀褥間溽暑涸寒遺之不去及沒遺幼叔氏撫之飲食寢興不假他人手舅嘉其賢割腴田數十畝給之辭弗受舅性豪邁好客家且中落氏以紡績佐舅所需子就外傳時解佩脫簪爲束脩費初伯妣病革託之弱女氏恩勤無異所生族有貧且寡者餽薪米無虛日死則爲市棺葬之性不信佛而仁愛若天性未嘗踐生草傷生蟲子閻成進士宰夏縣迎之官廨朝夕以清白慈仁勸之有犯法受杖

而斃者氏聞之怒不食闔泣跪請罪乃已民有掘硫鑛事獲重罪  
氏命闊寬之曰百姓皆汝兒女汝愛百姓當如吾愛汝輩也生平  
冬不爐夏不扇處富貴若寒素然嘗指諸孫戒其子云做官當爲  
子孫地一日命家人備後事眾訝其無病尋呼茗一啜端坐而逝  
年七十有九詩曰終温且惠淑慎其身氏有之焉

### 定興杜越母宋氏

宋氏者明壽州州判宋鳴陽之女定興明武舉杜鑿之妻而越之  
母也幼失恃父鍾愛之授以女誡諸書年十八歸鑿舅御子婦嚴  
氏嫻婉如禮獨得堂上歡與娣姒遊處下逮臧獲若不知家世貴  
盛者鑿豪而好客朋友羹醴之設常丙夜解佩佐所需鑿没氏痛  
不欲生病卧三年舅姑強之服藥餌稍蘇一意奉親教子饋食堂  
上非手滌羹釜不敢進味必特設餘則間粗糲食之示不鈞禮也

鑿有孀妹歲時供饋之舅姑或微恙湯藥必嘗而後進手滌衾禡  
淚輒隨孟水下教四子皆成名而越爲大儒與定興鹿善繼以文  
行相勵氏性介越食貧授徒門下士有託一紉爲母壽者必力卻  
之有代爲請者越辭曰先外王父宦歸啟囊中裝余母獨不視強  
之僅受做衣一襲偶語及之淚尙漣然非越之介實出母意也越  
尋以歲貢薦於廷邑使者促之不赴氏曰吾辨香禱神久矣母子  
窮廬相依爲命有至樂存焉不敢念祿養也順治七年卒年八十  
有二君子曰有子養志如彥明氏之賢過尹母矣詩曰母也聖善  
此之謂也

### 任邱劉鏞母白氏

白氏者商州知州河間劉正之妻而鏞之母也生而貞靜婉嫕方  
脫祿授之閨誠能卽誦曉大義組織繪繡之事尤精妙年十七歸



正事公姑盥漱起居如古禮有所欲輒先意承之正有三兄兩妹氏推甘任勞娣姒藹然相接一門之內皆稱其賢姑益愛之私出黃金一筋予之正好讀書適有鬻二十一史者價百金氏卽出金予正曰爲君藏之久矣公姑相繼逝含殮殯葬氏左右之無毫髮遺憾明未遭兵燹家業凋落正讀書清源廣川間氏攜兩子鏹鏞依外家以居辛巳大饑人相食氏勤十指供餽粥正以是不廢讀卒成通儒以五經首選出爲代州知州旣徙商氏時時以廉相勸曰世人以官爲富貴地往往多財供不肖子逋蕩爲鄉里笑吾與君莫得好兒孫足矣故正謝政歸囊無一錢寓居蘇門與孫奇逢以道學相切劘性好賓客過者必治具氏時折簪珥以佐其乏賓客皆爲延譽梁宋間兒童走卒無不知有劉使君者別室有子二氏愛猶己出鏹鏞旣娶婦而嚴於課誦無故不輕令入內鏹學成

爲名諸生嘗令鹽亭解組歸裝貨無蜀物氏曰爾清白無忝爾父  
矣一日病作鏞素精岐黃術請診候進藥氏卻之曰夫榮子貴身  
受國恩順受其正可也吾復何求含笑而逝年七十有五任邱龐  
塏銘其墓曰貴而能貧順所受閨門之行丈夫守載勒金石傳不  
朽良牧之妻廉令母君子謂氏可爲相夫教子法矣詩曰令妻壽  
母此之謂也

### 宛平高裔祖母段氏

段氏者宛平民高位妻也北俗早嫁娶位之死氏年甫十七有二  
子矣高氏無宗親依兄以居喪畢兄勸之嫁氏曰吾不識兄意吾  
非難死也無如二子何兄曰我正無如二子何也我力食能長爲  
妹贍二甥乎氏曰易耳自今日無累兄但望勿羞我貧暇則頻過  
我使人知我尙有兄足矣是時氏嫁時物僅一箱直二緡索半直

而售卽日移居小市板屋中以縫紉給衣食如是者二十年長子  
早沒次爲小吏以罪謫遼左氏撫諸孫又十餘年孫裔發憤成進  
士贖其父以歸而氏年九十矣氏性嚴毅子婦雖老終日侍立不  
命不敢坐裔之母谷性篤孝雞初鳴起灑掃奉匱侍盥就竈下作  
羹食親上之食畢然後退率以爲常及貴盛媼黨皆曰世有太夫  
人年七十而執僕婢之役者乎將公爲爾姑言之谷曰吾與姑故  
寒姑習我非我供事姑終不適吾皤然白髮而身無疾痛灑掃盥  
饋以事吾姑此日可多得耶氏以康熙二十七年卒年九十六距  
位之死七十有九年矣始所僦板屋在珠市西及孫貴卜居適當  
其地家僮數十出入呼擁氏時指示子孫以無忘其素云詩曰  
我心匪鑿不可以茹亦有兄弟不可以據若氏者可謂獨立而無  
所懼者矣



河間左方煥母王氏

王氏者雄縣王所之女河間左印奇之繼妻而方煥之母也字淑昭家爲雄望族明末流寇起所偕其妻孫避亂江左順治九年生氏於六合黃岔河有夙慧穎異絕倫三歲偶檢案頭書輒色喜母口授數帙瀏然成誦嘗從諸兄問字終日默誦漸以已意測句讀不數年遂通經史會境多盜所攜眷徙山中假宿李氏家氏問曰李與吾親乎友乎所曰否難中倉卒相就耳氏曰處亂世雖倉卒當裁以義兒死不敢出也卒徙之廢廟託處焉年十三母卒晝夜哀泣不欲生時仲兄旋里三兄哭母死兩弟一妹皆幼穉氏節哀治家政內外肅然一日鄰舍火延及寓廬氏度不免率弟妹伏柩前哭待死俄返風火滅人咸異之氏旣勞於家事而誦讀益勤所取數卷試之皆朗誦無訛而性理諸家言尤疏解明達有特識所

驚喜曰吾家楹書付汝矣使兩弟一妹從受學後四弟殤五弟企  
靖康熙二十四年成進士歷顯秩妹適李某博學能文同受知  
聖祖皆氏教學之功也初氏從忻北歸印奇聞其賢聘爲繼室既  
歸夫妻間互爲師友詩文唱和無虛日康熙十九年印奇授廣東  
恩平知縣氏偕往抵梅嶺夢父來別泣告曰父將棄予逝矣已而  
果然旣抵任值兵燹後萑苻多未靖氏謂印奇曰髓髓非斧斤不  
解是未可以芒刃試也於是嚴捕盜之令鉏強植弱數月民俗一  
變乃建書院培士風教化大行氏內助之力居多二十二年解組  
歸逾九年再補河南涉縣氏佐理一如在恩平時蒞任十三年世  
稱循良第一尋卒官氏扶柩歸卧轍哭送者數千人五十一年企  
靖登顯秩擢刑部右侍郎迎氏至京輒以疑難相質時有大獄上  
命九卿會訊企靖請於氏氏曰吾籌之熟矣依吾言當立決及訊

果服 上大書正靖伏奏此臣姊淑昭所教也 上曰婦人有此卓  
識耶時有外域遣使賦詩上頌者 上命羣臣屬和氏代企靖賦  
二律以獻 上嘉贊者再企靖復以寶奏 上遣官寶金帛聘爲六宮  
女師氏以老能辭撰陳情表上之 上歎息久之允其請六十年企  
靖巡撫江西丐氏同往事必咨而後行或稍不合必退述父命呵  
戒之雍正二年北旋時氏已年逾七旬矣氏以一婦人足不出閨  
闈而手所摩畫皆國家大政隨方指授多協機宜氏於書無所不  
讀尤究心二十一史逐卷能默誦嘗曰吾一生學識悉出於此六  
年七月子方煥授河南確山知縣請以安輿奉母往氏諭之曰吾  
曩隨汝父及舅氏宦游四方今老矣不任其勞非能忘汝也但視  
國如家愛民如子逾祿養多矣方煥拜泣受教而別及蒞任一遵  
母命以不善事上官而罷比歸氏不以升沉介意惟含飴課諸孫



而已氏性仁恕篤友愛酷嗜書終其身未嘗一日釋卷年方十齡下筆千言立就博奧宏深不能窺其所際素惡佛老言以義理養心爲本七旬後齒重生耳目聰明髮無白者無疾端坐而逝君子曰立言立德立功古所謂三不朽也氏能兼之詩曰在彼無惡在此無斃庶幾夙夜以永終譽此之謂也

### 玉田申贊皇母顧氏

顧氏者玉田申壙之妻贊皇之母也壙爲吳門明順天巡撫用懋之裔孫流寓玉田遂家焉氏字壙未婚而壙以疾卒訃至女慟哭誓爲申氏婦卽日奔喪視殮畢屏櫛沐願終身守乃以贊皇嗣贊皇甫四齡氏親課之讀書嘗曰窮達命也但俾吾嗣得爲正人足矣贊皇遵母訓刻自勵端方有儀邑有張應秋者重其人延致於家爲築館舍迎母以居負笈從游之士常百數十人康熙二十九年

年贊皇舉於鄉僉曰氏之教不愧孟母云君子曰世以女未廟見  
不祔於姑歸葬女氏之黨取女有吉日而壻死女斬衰以弔既喪  
而除之未婚守節非禮也不知聖人制禮不責人以所難耳若貞  
女之堅貞媵壹自任而不恤其難若此要亦聖賢之所予也不然  
柏舟之詩何以存也

磁州張丙厚母成氏

成氏者大名相國成克鞏之女磁州內閣學士張榕端之妻而刑  
部郎中丙厚之母也少事父母以孝聞既嫁舅姑以爲賢養生侍  
疾送死一蹈禮經其舅潛與大儒孫奇逢講學河漳士大夫遊中  
州者皆歸張氏氏自姑卒以冢婦理家政凡饋獻賓客以及僕御  
芻秣毫髮以上皆能當親意後榕端官翰林爲國子監祭酒視學  
江南生徒朋游日進丙厚成進士官刑部所交多一時名雋凡服

用所宜賓祭之式雖千里外氏常爲之節制而內自宗族姻黨以  
及厮輿婢妾無不得其歡心康熙癸未榕端予告歸子丙厚自交  
城內召需次於家日與兒丙謙捧觴爲樂時氏夫妻年俱七十諸  
孫繞膝五世一堂氏忽悄然不怡丙厚問故氏曰吾何所不足者  
但物盛而衰吾祖宗之積雖厚而受報亦過豐矣無墮先德以長  
吾憂在若輩耳氏性惠和好施與聞二子能緩急人或濟人於難  
則邴然而喜病革猶趣丙厚置義田千畝以周宗族之無依者康  
熙五十五年卒年七十有九君子謂氏貴而不溢樂而不淫詩曰  
溫溫恭人維德之基此之謂也

永年趙振宗母張氏

張氏者永年張裴之女同邑趙一鸞之妻而振宗之母也年十五  
適一鸞食貧力作越三歲一鸞死生振宗方二齡氏誓死姑大慟



曰遂爾之義此呱呱者將安屬吾血食其斬諸氏乃起奉姑撫于  
歲荒日刺繡易米將姑已則食木皮草子僅不死而已姑病籲天  
祈身代姑死哀慟踰常葬如禮日督振宗學過於嚴師或以其貧  
勸易業氏愀然曰甯士貧無賈富也振宗弱冠補博士弟子文名  
藉藉庠序間僉曰非母之教不至此直督以其事上聞建坊旌之  
年六十五卒君子謂姑以養終子以教立氏之恩勤可謂至矣詩  
曰予羽譙譙予尾脩脩予室翹翹風雨所漂搖予維音嘒嘒此之  
謂也

博野尹會一母李氏

李氏者博野李宗白之女同邑尹公弼之妻而會一之母也少時  
聞父讀書卽能暗誦論事識大體通時務年十九歸公弼越七年  
而寡子會一甫三歲辛勤拊育口授經書稍長使就外傳每夕歸

善燈紡績必親課之於傍以長以教會一安詳恭慎少卽負大志  
論者謂其胚胎於母教者始此氏家窶艱舅姑老父母衰病無子  
養生送死半手所措据惟日夕教子冀其成逮會一補諸生食廩  
餼家始稍裕康熙五十九年臺省以節孝上聞旌之如例是歲會  
一舉於鄉越三年成進士授吏部主事又三年出爲襄陽知府屢  
攝荆鄂間皆就養官舍氏塵心民瘼每遇雨暘不時輒長跪默禱  
有祈輒應禳疫驅蝗亦如之雍正八年冬沍寒稽襄民六十以上  
者量給布帛有差民德之爲建賢母堂氏以詩辭終不能止會一  
移守揚州揚俗怙侈鮒魚初出豪貴家爭購之價至數十金時有  
年家子以是爲壽氏命卻之躬行節儉以爲表率會一遷都轉擢  
鹽政開府中州所至節俸銀賜高年布帛卹窮民濟兵餉皆承母  
命爲之民感其德爲建賢母祠如襄之民初開歸大水會一疏請

流民所至命有司隨在廩給而籍之踰歲資遣還鄉無一流亡者  
民皆曰豈惟大府之明太夫人爲吾民廢寢與餐實利賴之安得  
不竭心與力乎其爲民心愛戴如是乾隆四年會一內擢副憲氏  
以疾不能入京師會一陳情得予告越三載上錫以詩并額其  
所居之堂曰荻訓松齡所賜雲紵貂衣克什尙方諸珍物不可算  
人皆嘖嘖稱羨謂熙朝盛事云會一蒞官內外凡所設施每夕必  
以告得則喜偶不合輒對案較食比歸里設義倉購義田興義學  
由近及遠會一輒先意承志謂老人非此不歡也氏通文史在廣  
陵憫民俗之奢閨閣尤甚嘗自作女訓十二章以勸懲之每閱邸  
鈔至聖謨及羣下讜論皆拜而稽首以慶卒年七十有八封太夫  
人桐城方苞銘其墓曰古之貞婦守節閨房夫人義事實播家邦  
古之賢母義方是帥夫人德心曲成民物克已裕人恩周六親讓



災弭患誠動鬼神九重褒嘉萬眾稱美福德之全在古無比天寶  
光啟以昭女儀豈惟女儀志士之師君子曰尹會一之賢皆母教  
也既成以德致其功業氏無愧焉詩曰教誨爾子式穀似之此之  
謂也

永年申夢麟母劉氏

同邑曹士俊母賈氏

劉氏者永年劉敬乾之女同邑諸生申覲宸之妻而夢麟之母也  
氏善奉舅姑事覲宸伉儷尤篤覲宸病廢食寢者數月病革屬無  
死以老親幼子託之及卒氏遽引刀自裁舅姑撫孤兒夢麟以覲  
宸遺言勸之氏截髮自責立起治喪事初哭泣無數既恐傷親心  
強爲笑語家貧紡績易食豐以食舅姑而自取粗糲與兒共啖之  
舅姑卒葬如禮夜篝一燈伴子讀往往達旦夢麟有小過輒涕泣  
不食長跪請杖乃已夢麟補博士弟子食廩餼氏督之不爲少寬

每戒曰吾家世忠孝豈一青衿自限哉夢麟業益勤卒爲知名士  
夢麟年四十五病卒氏益教其孫成章嚴於教子乾隆十八年舉  
於鄉時氏年八十六守志六十五年矣詩曰貽厥孫謀以燕翼子  
此之謂也同縣諸生曹士俊母賈氏年十六于歸半載夫亡誓殉  
死時祖翁祖姑及孀姑俱在堂慰之曰汝已有身矣遺腹男也吾  
老人有所依汝夫爲不餒矣越兩月生子士俊及長教之讀書卒  
成名當時與申母並稱云

遵化董世明母王氏

王氏者豐潤王某之女遵化董纘之側室而世明之母也生而婉  
孀明淑年及笄侍纘爲側室奉尊嫜以孝事嫡以禮生二子世明  
世華而纘卒時氏年甫三十世明才八歲儻然攜孤子內陵外侮  
輒以一身當之日日檢校父書延名師教其子尋次子世華殤氏

進世明而教之曰汝弟亡則吾與汝益孤吾家楹書全付汝矣督  
之乃益嚴世明長納資以同知發安徽六權州縣補安慶同知其  
在繁昌六安時有水旱災氏施棉衣爲士商倡獄囚之飢寒者贍  
以錢米貴池有大盜不刑而服叩頭曰盜雖不良然荷太夫人恩  
不敢狡詞以煩公心者所以報太夫人也其盛德感人如此世明  
旋擢廣西思恩知府思恩患瘴癘世明以迎養爲憂氏曰從子禮  
也生死命也兒何所依違耶遂同往乾隆三十七年沒於官署年  
五十九氏天性仁慈待奴婢如子女聞罪人呼聲常廢寢食問決  
獄有所平反則喜溢於顏色之閒後世明歷江安糧道三署布政使  
皆謹守母教終其身君子謂慈母有孝子詩曰旣受帝祉施於孫  
子此之謂也

鹽山劉曾璇妻吳氏

吳茂春妻張氏



吳氏者甘肅按察使滄州吳沂之女知縣鹽山劉曾璇之妻也嫻詩書識大體少隨父任內室火母適病卧牀氏年未及笄獨搶負自火中竝攜幼弟以出人皆驚異于歸後減簪珥勤紡紝渾厚仁讓宗族里黨無閒言嘗訓子慶元慶凱曰古人言嚴家無悍虜慈母有敗子人家子女失教多由慈母害之吾不忍爲也氏教二子俱成名官山東有聲尤工吟詠然不輕示人著有雙榕樓詩稿年七十九卒氏弟諸生吳茂春妻張氏南皮進士吏部員外郎張慶長之女也性端淑亦工吟詠顏其居曰繡桐齋手訂詩集二卷乾隆四十七年隨侍其翁沂東莞署中燬於火今所傳者僅數章而已君子謂吳氏愛而能勞詩曰維其有章矣是以有慶矣此之謂也

南宮玉堯恒母李氏

李氏者南宮王歲業之妻堯恆之母也歲業好讀書櫻瘵疾而沒氏年二十五生三子矣家貧無以養日躬率家人拮据操作養親課子衣食仍不足則散遣婢媪以一身肩之課田租察姦佃人不能欺家始粗自給氏篤於骨肉歲業有姊貧而早寡迎與姑同居服食皆與姑等有妹早沒遺一女氏撫之如已出長爲擇壻厚其奩具而嫁之論者以爲人情所難信哉其難也氏幼卽知書經史皆能通大義痛其夫績學不遇嚴督諸子以成其志童稚時卽口授句讀不假外傳遇故實可資勸懲者必反覆言之俾知法戒或不率教卽涕泣道之所業有進則啖之果餌以爲勸諸子皆循循遵母教刻苦自立能有成長子堯晉三子堯典爲邑名諸生仲子堯恆以舉人累官至監察御史初堯恆官刑部氏以姑老侍養於家及姑沒堯恆復迎氏氏以書責之曰豈有姑服未除遽離喪次

就子之養者乾隆五十七年畿南四郡饑詔五城設粥廠十城外  
五以飼流民而以御史董其事堯恆分司廣甯門外數日輒一歸  
省母奉甘旨氏怒呵之曰饑民轉徙待命朝夕天子憂勞宵旰以  
民命生死責之汝汝苟多活一人受實惠余雖日不再食亦甘心  
焉斯夕奉公之不暇忍僕僕往來耶堯恆自是不敢返左都御史  
紀昀聞之歎曰賢母也五十九年卒年七十三君子謂氏能教孝  
以教忠詩曰威儀孔時君子有孝子此之謂也

### 大城楊蔚林祖母馬氏

馬氏者大城馬天福之女同邑楊綱之妻而蔚林之祖母也嘉慶  
十年于歸逾九年生二子夫卒明年姑又沒夫兄以其孤寡累人  
與析居家無夙儲晝夜織席易升斗粟飼二子己則自食糠粃十  
餘年肥甘未嘗入口積腴田三十畝教二子且耕且讀有過責之



如嚴師咸豐九年長子連珠死妻馬氏欲以身殉氏諭之曰兒幸  
有娠脫男也汝夫瞑目矣死胡爲者婦泣諾旣生子蔚林甫彌月  
而婦死氏撫幼孫教養尤至卒成立入邑庠光緒四年縣宰命舉  
其節孝請旌氏泣曰夫死守志人生之大不幸也以傷心之事而  
籍爲身榮吾實恥之且守志吾之分也教子孫立家業吾之職也  
循分盡職非人生奇異之行旌何爲哉十七年五月朔晨起取湯  
自浴浴罷集家人屬後事至夕端坐而逝年八十七明年刑部主  
事王樹玉以事聞卒旌於朝氏性烈有膽略咸豐四年正月髮賊  
南竄氏鍵門升屋持刀自衛賊入里氏踰牆下跨驢而馳一賊尾  
之氏擲刀擊之傷遂得脫賊去返家亂民入室將掠奪見氏皆驚  
愕而去性喜濟人之難自奉儉約而戚族有困乏者周之惟恐後  
夫兄析產後敗喪幾盡遺一孫氏收而養之君子謂氏不好名不

宿惡詩曰孝孫有慶報以介福此之謂也

滄州葉伯儉妻全淡真

子圭書妻李繡英

全淡真者字菊如福建布政司庫大使涿州全材之女滄州貢生葉伯儉之妻也氏早寡教諸子嚴明有法其子圭書以祖廕爲縣令氏不令謁選勛之曰縣令不易爲以漆雕開之賢尙不能自信汝宜嘗念此讀書積學以求自信勿躁進也後圭書與弟圭綬同登賢書子孫皆成立乃以家政付子婦日手一編吟詩自娛著有晚香閣詩稿一卷圭書妻李繡英字繡談鹽運判臨川李宗湖之女也道光八年圭書就婚於粵越二年返棹至杭而氏卒氏工書字體清瘦亦能爲詩文人皆惜其有才無命云君子謂全氏善教子詩曰飲之食之教之誨之若氏者可以法矣

永年武澄清母趙氏

趙氏者宣化趙某之女永年庠生武烈之妻而澄清汝清河清之母也通經史知大義年十九于歸事舅姑以孝聞姑疾奉湯藥中夜露禱於庭得寒嗽疾親課諸子授以六經四子書如是者六七年夫病瘟醫言口吮其胸則汗出病愈但病者愈吮者病矣氏曰死不恤病奚辭遂吮之終不起而氏病幾危時年二十九矣翁沒家益貧晝操作夜紡績嘗自製冬衣綴以敝葛教子澄清汝清成進士河清食餼貢成均門閥鼎盛氏荆布如故親族有以緩急告者則分資應之並創建義塾置田百畝以教養鄉閭子弟年九十五卒道光二十二年旌君子謂氏富而好禮詩曰豈弟君子遐不作人氏之壽考宜哉

新城王振綱母杜氏

杜氏者新城王懋之妻振綱之母也于歸後家甚貧薄田數畝井



曰縫紉炊爨之事以身肩之上事兩世翁姑皆能博其歡生子振綱督之就學貧不能具膏火日減食之半供之夜則命然香照讀道光十八年振綱以第一人成進士出大學士穆彰阿之門道德文章名噪天下時穆彰阿專朝政內外官吏率仰其鼻息然喜獎拔門下士振綱既告養歸里貽書招之任以親老辭命改京職便迎養仍力辭不就氏喜曰吾兒抱道自重可謂能潔其身矣遂偕隱不出閉門講學遠近執贄者常千餘人家以此少豐氏日夜紡織不稍輟孫曾繞膝男女同居七十餘人皆各執其業不侵不怠終歲無嘻嗃聲世之稱家法者必推新城王氏年九十五卒同治間以五世同堂旌詩曰俾爾熾而昌俾爾壽而臧此之謂也

永年翟觀承母連氏

連氏者永年連姓之女同邑國學生翟家全之繼妻山東候補知

縣觀承之母也年十八嬪於翟越九年生觀承三歲而孤翟故臨汾人家全始遷永年無期功之親又家貧無立錫地或勸之嫁母指懷抱子自誓曰子存與存子亡與亡勿多言也觀承七歲使就傅或勸改業謀生計氏課之讀益勤縫紉紡績以佐之觀承旋以選拔生貢太學同治元年舉於鄉充八旗官學教習授山東知縣十三年攝東平州迎養至治所勸之曰吾撫汝四十年恩勤至矣汝能移吾撫子之心以撫斯民孝莫有大於是者觀承善承母志事事皆奉命以行明年氏舊疾作時大吏塞荷澤決河檄觀承峙芻蕘築隄埧觀承以母病躬侍湯藥出入蹀躞無暇晷母謂曰古人云國而忘家以吾故分汝志吾之過也其送我歸疾其庶有瘳乎觀承念母留終不適乃以終養請大府鑒其誠許之既歸四閱月母卒年七十九咸豐元年旌於朝君子曰王稚川調官京師母

老留鼎川久不歸侍黃山谷作詩諷之若觀承之決然舍去揆諸古人不以三公易養之義殆無愧與詩曰靡依非母此之謂也

### 天津徐世昌母劉氏

徐母者桐城劉敦元之女天津徐嘉賢之妻今相國徐世昌之母也咸豐三年年二十一歸嘉賢時曾祖姑尙在堂一家累重百餘口事畜皆氏身任之姑愛之如所生一日姑病劇割臂和藥禱於神嘉賢及仲妹各割股相繼進疾果瘳後姑沒哀泣失明嘉賢亦以毀致疾臥蓐二年餘左右扶掖刺指血藥中卒不起時子世昌年方七齡世光五齡舅慮其以身殉也責以養親教子大義始強起治家政婚嫁喪葬之事躬親拮据不以言勞舅性輕財急義喜交遊媼戚賓從往來雜遝無虛日有無龜勉尤能得親歡及舅沒囊空如洒至不能具器食嘗隆冬大雪苦寒室無火母女守菹芥



一孟曰待世昌傭書得值市米始作食未嘗飽也氏乃處之晏然  
惟日詔其子以先世造家之不易及累葉枯苑興衰之故且曰汝  
父高才不祿資恨以終汝能繼其志而益光大之則汝父不死而  
徐氏爲有後矣聘名師嚴教敕晝出就傅夜歸侍母側機聲書聲  
嘗徹旦不絕光緒八年世昌世光同舉於鄉督責之一如孩穉世  
昌卒成進士入翰林累官至大學士內參樞密外管封疆皆兢兢  
奉母教以行每述及之未嘗不流涕也先是嘉賢初聘黎氏未娶  
而卒氏爲設黎氏主祭之且令子以時拜其墓人尤以此賢之氏  
以光緒二十二年年六十四卒以其節旌於朝建坊入祠如例初  
世昌有叔曾祖令鄢陵者憐氏之貧也命攜家往依之氏不可曰  
君子能勞後世有繼公父文伯之母言之矣寄人之蔭而墮其志  
非吾子之福也鄢陵君聞之歎曰女中丈夫也熾吾家者其在斯

人乎君子曰徐氏累代皆以牧令起家至世昌始大以是知母之賢而能教也詩曰其肩維何天被爾祿言生賢子孫爲天所錫也然則天之所以錫氏者亦厚矣哉

灤州李茂春母陳氏

同里霍維母李氏

陳氏者布政司理問灤州李遇亨之妻而茂春之母也年十八于歸八年而夫故氏哀痛絕而復蘇自是不復食其戚黨勸之曰李氏四傳皆一子汝子茂春尙在抱獨不爲李氏血食計乎且有二老在事畜之責非異人任也氏瞿然悟起營喪葬事李故爲邑豪昕夕操作雖貧家婦有不能堪者及課子讀書則豐以俱其師曰師所以成吾子也氏性喜急人之難茂春能守母訓錢米醫藥之施歲費數千緡歲歉則收族人而養之費且鉅萬居恆誠子以謙和養德以施濟養富以節欲養年海陽敬勝兩書院助銀千兩復

出五百兩倡修郡城未幾茂春亡復撫其孫夢松成立光緒二年  
歲大旱氏適病屬其孫曰吾鄉之民待振久矣汝能成吾志吾目  
瞑矣言訖而逝年六十七逾月州設粥廠夢松捐米二百石並助  
山西振銀千金皆母之遺教也同里有霍綽母李氏者豐潤諸生  
李廷槐之女也適霍鳳岐爲繼室鳳岐任安平縣訓導憂歸不復  
出以內政悉委之氏霍故雄於財僮僕數十人多游手不任事氏  
嚴督而恩馭之信賞罰剔浮費鄉里推爲能其撫前室子量其性  
質之所近而督課之雖嚴而不苛人益賢之年二十九鳳岐沒哀  
慟誓殉死家人環泣以託孤遺屬爲請氏強起治喪豐殺皆中禮  
子綽孝事之如所親凡事稟而後行未幾綽亦亡遺子二曰鴻達  
鴻藻氏兩世撫遺孤心力交瘁長孫成立又以病死君子謂氏可  
謂盤根錯節者矣其視陳氏所遭若一轍焉詩曰嗇矣富人哀此



惇獨陳氏之謂也

望都楊升恆母何氏

何氏者望都何青雲之女同邑舉人楊士魁之妻而升恆晉恆之母也生有至性喜讀書時與戚黨婦女談儒先性理其無知者則以釋氏因果說警之無不敬而愛之者母病七載蹠踐執役無少倦夜半焚香告天乞身代積雪沒脛不顧事兩繼姑孝如母咸豐中粵匪北犯氏出紡績資爲夫團練費同治七年捻髮諸賊竄畿南子以避亂請氏責之曰汝所學何事汝父義男子必死守勿去也汝其助之生平持躬教子以寡過爲主嘗謂尼山無大過顏子不貳過仲子喜聞過聖賢猶如此况吾輩乎自立功過格日記以自勵歷四十載如一日析居讓產取其薄者園蔬柴粟任人取攜弗與校每歲正講聖諭廣訓及文帝勸孝錄曹大家女誡推闡大

見悍隸追呼急氏歎曰閭莊界望完兩邑屬望民多貧屬完民多  
富望民苦徭役將盡入於完矣氏乃以女紅所積京蚨五十緡屬  
諸子溥權子母俟有成數代村人納差年七十三卒子鴻翔息集  
一百緡卒成母志自是閭莊屬望者無差累焉君子曰氏可謂好  
行其德者矣詩曰何有何無甞勉求之凡民有喪匍匐救之此之  
謂也

母儀傳終

大清畿輔列女傳第一

夕子集

201-502



賢孝傳

大清畿輔列女傳第二

天津徐世昌撰

清苑張羅彥妻趙氏

趙氏者光祿寺少卿清苑張羅彥之妻也端莊慈敏不輕笑言孝舅姑和妯娌教子慈不廢勞御媵妾嚴不廢情門以內分職授事雍雍如也羅彥罷官歸氏謂曰直道不容今如此猶幸矣甲申李自成北犯羅彥倡義守城氏出冠帔簪珥犒士曰此朝廷所賜當爲朝廷用之城未下氏率諸婦匿後園井亭誓死以待子秉曜尙幼屬老嫗攜匿之城陷羅彥就縊氏命結雙環於梁請先引環明志環絕傷股墮二齒不死羅彥氣已絕矣匍匐至井見兩妾子婦皆投井死乃躍入逾一晝夜不沈詰旦家人聞井中有聲救出之欲自剄索刀不得復倒擲井中仍浮水上兩手持磚強以水呷滿

口又不死如是者更兩晝夜有安定宇者至井亭見之泣下曰光祿公闔門俱死宜人環不能死而又井不能死天欲以孤付宜人也儻必死五歲孤焉託乎氏乃挽索出井匿草屋中賊黨大索張氏子敢匿者論死其僕人導氏出城探乘曜存亡數日尋至山中賊遁復故居啟諸屍棺斂之撫乘曜至成立卒年六十有八君子曰臣死忠子死孝婦死節張氏一門可謂大義昭天壤矣氏求死不得天之不忍墮其宗也詩曰保佑命之自天申之其斯之謂乎

清苑王延襄妻張氏

張氏者清苑諸生王延襄之妻也幼喪父母養於舅氏明祭酒孫從度家及笄適延襄延襄自皇族遭甲申之變產中落氏省衣縮食禮以奉舅姑每食必手自烹飪三十年如一日姑染疫病幾殆家人皆避去或謂之氏曰病不病命也人其如命何親奉

湯藥七十日巾裾廁踰皆躬自澣滌不假手他人姑愈而氏亦無恙翁病篤事之一如其姑翁將沒顧謂人曰天下第一孝婦也時延喪遠出未歸殯葬皆身任之不以累昆弟其家益困至不能具再食氏與姑同寢處者十四年姑畏冷氏手製火鑪三姑但索湯粥應聲進扶掖抑搔能察於無形一日疾革謂氏曰吾年八十有七恃吾婦以至今日死無恨矣氏侍姑疾四年積勞成痿痺輾轉牀褥者又四年乃卒君子謂氏純孝也終身慕之詩曰思媚周姜京室之婦氏又何多讓焉

### 豐潤唐之演妻姚氏

姚氏者豐潤唐之演之妻也明崇禎間偕妻適遼左阻於兵不得歸甲申從大軍入關抵故里則廬舍已墟父故母他徙之演出尋母歲餘求得之迎歸夫妻朝夕奉母甚勤越十年母患瘧疾且不



起氏禱於神夢有告者曰姑必羹而肉始得愈氏覺欲割以進家人環視弗得間既病且革氏屏左右潛至厨下嚙左股割肉六寸許爲羹以進姑咽之甘汗津津下病霍然之演自外歸見母愈而婦暈於地幾絕氏戒勿言其婢潛洩之於眾云詩曰帝謂文王君子謂氏之孝通帝謂矣

### 文安邢惟式妻萬氏

萬氏者文安進士萬方慶之女同邑明經邢惟式之妻也幼嫻姆訓深諳內則諸經方慶司理甯國解組居江甯母劉染沈疾醫之無效氏驚泣欲絕時家有佛龕供觀音大士像一夕屏侍婢焚香拜祝請身代隨咬腕下肉自煎入藥人無知者母飲之病果愈時年甫十一耳是夕也龕中見尺餘青衣人十數往來上下氏見之無怖心咬腕時亦不知其痛也人咸謂至誠所感云後北歸適邢執

婦道謹事姑嫜視形聽聲先意承志姑非氏侍左右輒不安生二子偉俊相繼舉於鄉僉曰天之所以報氏也君子曰邢氏素以忠孝顯氏可謂無忝所生矣詩曰豈弟君子神所勞矣此之謂也

### 通州耿宗湯妻王氏

王氏者通州諸生耿宗湯之妻也氏素有才智宗湯故氏年三十矢志守節治家肅然氏之夫族有婿曰呂哲素無賴煽賊黨入耿家縛其夫弟宗孔及諸姪將加刃舉家驚匿氏坦然不避告賊以故賊知墮哲計釋縛而散哲叔茂奇與哲相狼狽嘗屬盜誣宗孔下獄詎氏曰付我五百金可脫汝叔氏佯應曰善須書所需乃可與姪商耳遂獲茂奇字券命姪如標赴巡按所白冤獄始雪盜伏法茂奇亦獲罪詩曰變彼諸姬聊與之謀智哉氏之善爲謀也

### 交河馮瑤林妻張氏

張氏者交河諸生馮瑤林之妻也幼讀書知女誡母病衣不解帶者數月饌必親藥必嘗沒而哀毀幾不起事翁姑甘旨必手調不假僕婢翁老得心疾氏能順事之病危禱天乞身代病輒愈姑疾卧牀不能起晝夜跪扶飲食藥餌躬進之不以爲勞瑤林嗜書氏質簪珥衣飾爲購之無少吝及夫病沒刺指血作誓書焚之以告天族人高其節以從弟德林子瀆吉嗣之氏撫子婦如已出就其生母同居二十餘年年八十餘終縣宰扁旌其門詩曰無非無儀唯酒食是議無父母貽羅氏之謂也

鹽山劉執中妾吳氏

同縣邵潔妻陳氏

韓芸書妻邵氏

吳氏者鹽山庠生劉執中之妾也執中四十喪妻無子因納之時氏年十有七越七年執中卒其父南庭年七十有七矣泣諭氏曰吾子死矣汝年穉上無姑下無子中無兄弟妯娌吾須與不死願



親視汝改適也氏泣曰吾家貧不能蓄僕婢翁年高多病妾安忍去翁強之氏詭應曰翁百年後妾去未晚也翁博學能文家徒壁立氏晝夜紡績爲奉養資翁齒缺咬而食之越十二年翁卒無以爲斂撫簣號泣翁族姪有諸生爲砥感其孝醵費助之引氏前言勸之嫁氏曰妾復何事哉妾幼不耐艱苦常惕惕然恐事翁無狀無以暝吾夫之目今幸矣養生送死自揣無大憾吾事已畢待死而已爲砥嘉之爲割附郭田十餘畝更建室中門外奉事之三十年狀聞於大吏扁其門曰苦節年六十四卒爲砥爲附葬於執中之墓其後同邑邵潔妻陳氏韓芸書妻邵氏同以節稱邵潔妻陳氏者諸生陳心虞之女也年十八歸邵六年而潔沒氏痛念孀姑老而無子不忍死乃代夫事親姑病危禱於天病頓起卒享大年而沒姑既沒復迎姑之妹養之曰是卽姑也氏始生一女天夫兄

列女傳二 四  
冲繼之二子亦天再繼之名曰黃氏夜績而教之讀既冠醇謹能  
文章國人皆稱願曰有是母宜有是子也康熙三十二年卒年五  
十九韓芸書妻邵氏者庠生邵執毓之女也年十九于歸三年芸  
書卒氏絕飲食誓殉夫其姑泣曰吾子雖死有媳在如子在也汝  
若死是真死吾子矣氏泣而受命於是爲立曉巒爲嗣仰事俯育  
以身任之凡舅姑所欲必求得之舅姑所忌必曲避之姑患驚悸  
氏躡足以行屏息而語姑有所苦必呼氏左右之如是者七年姑  
沒慟幾絕旁觀者咸垂泣教子自爲師保不少姑息後曉巒以能  
文入邑庠恂恂守母教號稱謹厚能世其家云君子曰三氏者可  
謂慈孝兼之矣詩曰佛時仔肩此之謂也

### 大興厲淑明

厲淑明者大興厲日升之女咸寧劉璜之妻也明慧端靜博學能

詩父疾到股和藥飲之數暈絕幾死而父病果瘳年十九于歸璜嘗隨其父兄任所氏子身鄉居支拄門戶生子元龍自督課之嘗致璜書曰昔曾教子爲劉氏得賢嗣卽新婦所以報君也元龍卒受母教成進士初璜本生父起禧令海鹽報罷公道錢累千氏悉出嫁時衣飾付質庫以償起禧始得歸里氏治家政以勞致疾而股創又時時發病革詔其子曰吾少喜爲詩此婦人餘事向者聊自遣耳悉取其集焚之元龍救不得遂卒君子曰才名累也拙諸閨閣重累也且才名與孝行孰重不得已而無可傳或有時託乎此耳桓少君屏其嫁時資送而挽鹿車曹大家賦藻絕麗而垂女誠彼皆無與於孝而人之稱道之者至今弗衰況其兼此之美而所難又遠過乎此者耶詩曰釐爾女士從以孫子氏之謂也

滿城黃來聘妻魏氏

子鏡妻朱氏

鏡子傳綸妻馬氏



魏氏者滿城黃來聘之妻也年二十八寡性至孝鄰舍火氏守病姑不去天為反風火立熄其子鏡早故子婦朱氏年二十五亦以孝稱姑患瘡氏吮之愈子傳綸既授室而天婦馬氏年十九依朱守志適飛蝗入境姑媳籲天呼號蝗不食而去眾皆異之康熙五  
 十三年旌君子曰三氏者可謂能競爽矣詩曰世德作求此之謂也

永清賈涑妻劉氏

劉氏者永清劉楠之女賈涑之妻也父早卒母胡寡居有兄遠適蜀一日母患危疾醫者皆束手有江南談生者以善醫名氏長請一診談視疾有難色勉為一方氏持藥徬徨割股肉和之以進母服之汗浸浸出黎明疾遽瘳時氏年方十四耳康熙五十七年賈涑將議親迎氏以母老兄又遠出私命老僕乞哀於舅姑曰女

子許人惟夫氏所命禮也雖然吾母所依者只一女耳請須我三年俟兒歸俾母有所養乃請爲婦事母之日短事舅姑之日長也舅姑相與感歎且憐其意許之比嫁孝事舅姑上及夫之祖父一以事其母者事之後兒嫂俱天亡母老無依舅姑俾氏迎養於其家及沒又厚葬之曰吾以成其孝也氏生子三人慶棣慶霖武學生慶植庠生君子曰劉氏純孝也內訓有言曰孝莫大於寧親推事父母之道於舅姑無以復加損矣詩曰在彼無惡在此無射此之謂也

灤州王曰錡妻魏氏

姑張氏

魏氏者灤州諸生王曰錡之繼室也其姑張氏名家女年十八歸諸生王心一之長子某僅育一女而寡以夫從子曰錡爲嗣曰錡少多病連喪婦繼聘氏年二十三來歸生子未週夫沒時氏家徒

四壁缶無粒米竈無束薪家居柳河柳河者水鄉也下隰多潦潦則掇草根木葉或撈取水藻雜枕中糠粃咽之或勸其改適厲色拒之逾年子又殤兩世孤嫠僅守一坏土鄉鄰見者皆感泣是時氏年未三十其姑數勸之嫁堅不去又三年撫族婦吳氏子未彌歲姑媳相對紡織餬口達旦不然火日不得兼食偶遇佳節親族有以甘脆分饋者虔藏之以供其姑不入口也氏歸寧時饜以嘉穀則涕泗曰吾姑數十年未嘗此味矣卒不忍食而返康熙五十九年姑病劇曰吾必不起念無以報汝但願娶孫媳如汝者吾目瞑矣卒之日香閨一室典賣衣衾拮据葬之姑沒家益困其族中長老從容諭之曰汝所不去者以姑在也今姑沒事已畢田無寸土子又非已出復何戀乎氏漠然不應又十餘年子成立爲娶婦氏年五十髮頽白乃謂所親曰而今而後吾志遂矣設當日苟且



爲溫飽計何以見吾夫於地下耶人言貧苦吾一生不知有樂事  
又焉知有苦境也君子曰節操者士大夫之所難況婦人女子而  
出於艱難困頓者耶若氏者可謂動心忍性者矣詩曰出其東門  
有女如雲雖則如雲匪我思存縞衣綦巾聊樂我員此之謂也

獻縣張守仁妻梁氏

故城張仲瑜妻王氏

梁氏者獻縣張守仁之妻也幼孤育於姨母年十七歸守仁而舅  
姑相繼沒又十五年而守仁沒氏年三十二無子遺二女其長又  
死門內蕭寂惟守仁大母穆氏年六十餘矣雙瞽痿足日輾轉牀  
蓐間氏晝夜扶將大母耄而好怒小失意輒嗔詈或以爪攫氏面  
至血出氏事之自若也里中婦諷氏他適氏曰余朝出門老姑夕  
餓死矣其所佃主母嫠婦也數遺之食氏不忍徒食更爲之傭紡  
織得值錢奉大母氏不苟言笑平居未嘗過鄰舍事大母三十年

比卒而氏已皤然老嫗矣既葬大母依其女以居康熙末年終焉  
張穎曰氏不忍夫家垂死一媪依依不去其非有所利而爲之也  
而卒成其志以死雖古義士何多讓焉同時故城有張仲瑜妻王  
氏者諸生王岫之女也幼讀書明大義年十六歸仲瑜甫二載仲  
瑜遠遊不返氏以婦代子職翁姑飲食無缺供姑年七十三患瘡  
穢褥漬膿血殆徧氏更易浣濯伺起卧不解衣履者七十餘日翁  
庸五病痿痺藥必嘗以進歷四年未倦翁有素行負人望嘗垂涕  
數數與人稱婦孝焉及卒喪葬皆如禮夫兄有孫女幼孤氏撫而  
嫁之嘉慶五年卒年六十三將卒告嗣子際泰曰吾家貧事舅姑  
無狀無厚葬我道光元年縣宰旌其門曰貞心化石詩曰其類維  
何室家之壺君子謂二氏者可以爲壺範矣

永清陳應新妻高氏

高氏者永清高守業之女同里諸生陳應新之妻也年十七歸應新越十二年應新卒遺子秀芝財七歲時姑已沒有夫弟三人長日新次又新次代新齒與秀芝相若也氏恩勤撫鸞若一母然陳故有薄產舅治外事門以內皆民主之挈持綱維宏瑣畢舉舅死氏治喪葬皆盡禮爲諸叔次第授室析爨以居其叔皆曰生我者父母長而成我者嫂氏也自今以往兄弟有私貨財取以自利溺厥妻與子不以嫂之心爲心者天必誅之由是事無巨細皆稟命於氏雖一祭之温一味之甘非先氏不敢自薦也諸叔俱壯盛有子女氏撫視之如孩提時氏故善理家政命日新又新率子秀芝力田代新讀書謀進取又時其逸勞相其盈縮而調劑之族戚鄉黨見者皆肅然起敬推爲女宗氏曰是諸叔與弟孝友能克家老婦何德之有憶夫病且死者婦當時實不欲生嘗剖股然脂禱神



請身代非第夫婦之情也亦以舅老諸叔幼可無嫂不可無長兄然竟不獲請命也夫今諸叔幸有成又皆善良老婦坐享愧矣何德之與有君子曰氏之節可及也氏之行不可及也內訓曰婦有令譽行之純也行純在乎自力氏之自力可謂至矣詩曰其儀不忒正是四國況兄弟乎

永清石瑾妻吳氏

霸州吳繼科妻郭氏

吳氏者永清石瑾之妻也年十八歸瑾踰年生子有聲又三年而瑾死氏守志不嫁瑾有祖父母年八十餘祖父病風痺起居出入非氏扶持之不樂也其狂疾作則令氏襁負庭院中不當意輒批頰辱詈氏曲意承順之疾稍愈則又慰藉之曰向得毋非禮苦汝耶氏曰無之已疾復發則又狂如故矣瑾祖父母既沒舅姑虐遇氏姑劉繼室也生子招少有聲一歲劉愛之奴使有聲不得與招

其衣食旁觀爲之流涕氏自若也比有聲娶婦劉又虐遇之氏率其婦愈恭婉無忤劉有母貧常寓食于石見氏所爲劇愛憐之曰有婦如此不知惜而虐之我女其鐵石人耶劉之女亦時時諷諭劉曰嫂純孝稱鄉里今我母待之威人且謂女實無良而陷之使至此也劉由是稍稍寬假之家庭稱雍穆焉後劉沒翁年七十餘娶繼室李齒與氏相若氏尊禮之與劉無異視晚年有聲夫婦相繼沒氏老無依宗黨憐而敬之爲有聲立後焉永清又有郭氏者郭樹芝之女也年十九適霸州吳繼科其翁石潭有弟名藻生二女無子石潭以長子嗣之長子殤又以繼科嗣石潭卒繼科隨母王以田產歸藻與同居氏事兩姑奉之惟謹藻妻張性嚴而戾時怒其嫂氏曲調之張弗善也曰新婦我所娶而向他人兩妹復時時媒孽之張虐之愈甚王氏姑私憐之不敢言輒執其手泣而慰

之氏佯曰詈他人誤聽耳生子未周歲繼科沒臨沒前屬曰汝善視吾親善成吾子九泉下感汝德矣時節婦年二十一痛絕者數翁姑不知恤益日夜詬詈之氏心愈慎氣愈和抱哺其子笑語如常時恐傷王氏姑心也氏每歸寧翁不使攜其子曰兒許大無母可活也父母憐之曰汝其審所處矣氏泣然曰翁姑老子幼一旦舍之去何以見死者地下乎父大痛曰眞吾女也未幾王氏姑卒翁姑愈嫉之促令歸母家既歸日夜思兒不置一日心動兒忽來告曰翁病痰旬餘矣氏聞之徒步偕兒反至則翁卧牀上哭問之翁遽感悟拍牀泣曰負吾賢婦負吾賢婦於是翁哭姑亦哭氏侍湯藥衣不解帶者年餘翁稍瘥而姑得暴疾死翁相繼亦死族人覲其產謀魚肉之氏悉貨田宅爲殯葬資羣謀乃息及兒長娶婦生子女乃泣告子慎儀曰吾所以不死者受汝父託也然非耐困



辱而折田產詎能全吾節以保汝身耶子慎儀讀書善醫提學使旌其門君子曰婦女之忍慘於小人夔栗之難勞於君子二氏者眞可傷也已詩曰旣生旣育比予於毒彼翁姑者獨何心哉

### 大興袁宗菴妻邵氏

邵氏者大興邵璞之女袁宗菴之妻也璞以諸生官廣東崖州巡檢與妻妾偕妾宣氏生三子二女而亡妻章氏及長子幼子又相繼死璞憂鬱搆疾勢且革謂氏曰京師吾丘首也必以返葬累爾及沒囊無一錢姊弟三人煢煢相對泣氏傾所儲爲仲弟辦裝北歸將伯戚黨閒無所得一年返粵而卒氏痛絕死而復生者再竊念父柩未歸勉延喘息攜弱妹僦居草屋間以十指易衣食崖州牧江都趙某聞而歎曰此吾故人女也爲媒於崖州巡檢袁宗菴氏乃以仲妹歸之逾年妹死趙曰袁賢者必能成氏志者也復媒

之而歸於袁未幾袁投効浙東氏哀之北遂奉父母三喪歸京師  
葬焉詩曰無父何怙無母何恃出則銜恤入則靡至氏之所遭殆  
又甚焉而困心衡慮卒成其志君子是以知氏之能報德也

永清温得珠妻李氏

李氏者李俊彩之女永清温得珠之妻也年二十歸得珠得珠早  
喪母父錫娶後妻生二子得珠因失愛叔父鏡又助之暴得珠鬱  
鬱得顛疾舅姑并惡氏而虐之氏婉順以受時時慰得珠後得珠  
顛益甚一日晝卧叔父呼之不應怒將笞之遁去投女弟家其姑  
流涕曰癡兒何至是耶將擊之歸得珠遽投井死氏泣請其舅姑  
治斂僅乃許之時雍正十二年也氏年二十有二遺腹生子經元  
撫之以守舅溺後妻子將析產强氏改醮氏不可則與後妻以非  
禮凌之至不能堪氏度終不容乃抱經元泣曰婦人無事二夫禮

今婦不肖爲舅姑憂願還母家幸貌孤長歲時能以杯酒奠夫墓足矣家產粒米寸絲無分受義願舅姑勉自愛諸叔善事高年勿復以婦爲念再拜出門慟哭而去道旁觀者皆掩泣氏歸謂其父兄曰女子適人無返食兄弟義今不幸處此願自食力假一椽庇風雨而已俊彩爲賃地數畝氏躬自耕種晝勤樹藝夜治鍼紉經元旣長就外氏娶婦母子攻苦三十餘年家少豐後錫死繼姑子俱無賴鬻田產盡而死姑衰老無依氏聞之挈子婦諸孫歸侍起居牀下姑執手涕泣曰吾甚慚吾婦也相愛異平時鏡死無子其妻與娣之嫠者皆仰食於經元經元有四子俱能力田稱小康云君子曰孟子謂不順於父母如窮人無所歸人生之慘蓋未有劇於此者史之贊舜也曰父頑母嚚象傲克諧以孝烝烝乂不格姦舜大聖也而天下後世之稱之者罔不以此李氏不過一窮婦人



耳其所遭之境與所執之義以視舜之大孝又何閒焉詩曰孝思維則若李氏者可以則矣

永清蔡浩妻鄔氏

鄔氏者永清蔡浩之妻也幼時貢生張某抱爲己女年十五張爲許嫁於浩浩父早沒奉姑依叔父景維以居年十九浩卒遺子才數月王姑尙在堂姑得顛疾時時撻詈氏氏順受之奉事益謹王姑晚病風痺氏侍左右飲食皆手進王姑卒喪葬舉無愆於禮未幾姑病劇氏衣不解帶者凡數閱月及卒氏哀毀異常人景維無子氏固請置側室又無出乃撫他姓子爲嗣氏教其子以叔父事之景維卒族黨利其貲斥異姓子鬪於庭氏婉謂之曰此子吾叔舅所愛者如以他姓不可瀆宗則親莫如我我乃有二孫獨不可承叔舅重乎市道論財吾不忍爲耳於是眾默然而散詩曰式相

好矣無相尤矣君子以是知氏之善爲說辭也

永清蘇廷燧妻西氏

同縣張富妻蔣氏

西氏者西國梁之女永清諸生蘇廷燧之妻也年十九歸廷燧廷燧兄弟三人皆業農廷燧獨讀書未冠入邑庠益攻苦而體羸不任勞病劇親迎具禮而已氏始入門解妝侍疾不數月廷燧卒氏飲泣無聲家人咎其無生意而廷燧三兄婦方有身指其腹語氏曰若男爲汝後逾月生名曰廣命氏子之成其志也氏撫子事姑平居不作悲傷語恐傷姑心姑嘗病瘡卧牀蓐數閱月不解帶捧持抑搔無不出當親志者伯氏仲氏感其孝曰服勞可能也達於無形無聲是其難能者矣皆善視之同居終其身嗣子廣讀書爲諸生同縣蔣氏者張富之妻也乾隆七年歸於富年十有六矣甫五年而富卒氏生遺腹子維淵撫孤守志時王姑年老且病墮

皆傷其足輾轉牀第間寢興動止非氏不適也氏家故貧舅永泰  
豪於酒好賓客不問生計親故至必命具饌氏勤女工易酒脯或  
質衣飾供非時之需必得翁歡而後已永泰卒家益凋落子維泗  
守母訓治田粗得不饑姑老喪其明氏已娶婦抱孫矣朝夕扶掖  
必躬親之弗以委子若婦姑每謂人曰昔先姑傷足非新婦不爲  
杖今老婦喪明非新婦不爲燭也君子曰范蔚宗之傳列女也庸  
行多不章閨門之中其地至隱其事至微家人骨肉之間無所謂  
畸行偉節可以聳人聽聞也然其所至難者固在此不在彼以是  
知氏之孝爲不可及也詩曰永言孝思此之謂也

廣昌何某妻魏氏

容城陰賢妻杜氏陰常太妻李氏

魏氏者廣昌何某之妻也姑疾篤醫藥弗痊氏割肱肉以進人稱  
其孝爲徵詩以紀其事桐城方苞曰古者婦於舅姑服期先王稱



情以立文所以貴其實也婦之愛舅姑不若子之愛其父母天也  
苟致愛之實婦常得子之半不失爲孝婦古之時女教修明婦之  
事舅姑內誠則存乎其人而無敢顯爲悖者蓋入室而盥饋以明  
婦順三月而後返焉示不當於舅姑而遂逐也終其身榮辱去留  
皆視其事舅姑之善否而夫之宜不宜不與焉惟大爲之坊此其  
所以犯者少也近世士大夫百行不忤而獨以出妻爲醜閭閻化  
之由是婦行放佚而無所忌其於舅姑以貌相承而無勃谿之聲  
者十室無二三焉況責以誠孝與百行之衰人道之所以不立皆  
由於此廣昌何某妻魏氏割肱求療其姑幾死其事雖人子爲之  
亦爲過禮而非篤於愛者不能以天下婦順之不修非絕特之行  
不足以振之則魏氏之事豈可使無傳與抑吾觀節孝之過中者  
自漢以降始有之三代之盛未之前聞也豈至性反不若後人之

篤與蓋道教明而人皆知夫義之所止也後世人道衰薄天地之性有所壅遏不流其鬱而鍾於一二人者往往發爲絕特之行而不必軌於中道然用以矯枉扶衰則固不可得而議也其後乾隆時容城有杜氏者陰賢之妻也與陰常太妻李氏皆善視親親病割股醫之愈杜以嘉慶七年旌獻縣紀昀詠李氏詩曰容城城似斗有廟祀椒山不謂英靈氣還鍾閨閣間天憐貞孝志人轉死生間見說衣千結今猶沁血斑莫以殘遺體翻嫌孝太愚再三原自審萬一冀重蘇白髮終娛舅黃泉可對夫此身都不惜盜問得旌無蓋歎李氏之孝未獲旌於朝也君子曰割股事親聖人所不忍言也然孝子之心所以致其親者無所不至他何恤焉詩曰以祈黃耇氏之祈可謂至矣

深州李壽山妻魏氏

魏氏者蠡縣魏炳之女深州李壽山之妻也幼失恃事繼母謹順寡言笑精女紅戚黨藉藉稱其賢長適壽山祖姑傅長家政性苛虐異常人初傅孀居撫孤子既抱孫乃大忿不怡禁子與婦同室數年子抑鬱死目將瞑不使婦一見婦飲泣亦死至是氏于歸傅待之如子婦亟亟爲壽山謀置造室李故雄於資家尙豪侈而酒漿縫紉之事使氏皆躬爲之婢媪旁觀無敢代者衣食常不得飽煖甚於窶人嫁時妝資祖姑悉篋藏之未幾壽山死無子傅取族人子爲孫又恐其孫之孝於氏也故驕佚之使無人子禮曰此他人家掌珠也何多責焉子長成益肆而無忌漸蕩其產於是傅年九十病且死唯氏晝夜侍左右一日忽大悔曰孝哉孫婦吾前苦汝矣吾過矣笥中有吾嫁時衣汝自取之及氏啟笥則已罄矣傅死子益無賴氏自置棺待盡以苦節終君子曰傅氏既虐其子婦



復寔志於氏乃至絕嗣破家而不顧其乖毒伎佞無人理極矣氏始終夔慄卒使臨死悔悟伏枕哀鳴豈非所謂至誠動物者哉然若氏者亦可悲矣詩曰有洸有潰旣詒我肄氏之謂也

永清葉可興妻燕氏

同縣燕宗灝妻邢氏

燕氏者永清葉可興之妻也年十九于歸越六年可興卒遺子有聲才三歲氏泣不慘聲悲不形色夫弟可儒年僅十四察氏意似不欲生者每見之輒流涕氏喻其意曰若欲我不死耶若宜自愛毋辱先人我爲若勉留此身終事老姑撫穉子矣可儒少狂蕩不謹自是泣諾率氏教過於嚴母氏家苦貧必以甘旨奉姑姑食輒偕子若孫氏潛出所餐惡食示叔及其子自是每侍食輒陽飽出而食其惡者姑病目失明氏每夜齋戒禱神年餘目復明聞者傳爲異事氏遂終其身夜夜祈姑壽至七十七始卒可儒能力田有

聲讀書能文章爲縣諸生一門雍睦稱孝友焉同邑有邢氏者邢  
有起之女燕宗灝之妻也年十六嫁宗灝彌歲而宗灝卒彌留之  
際宗灝以氏少艾欲其守志不忍強目視良久而瞑氏撫尸泣曰  
我許君不嫁矣假事有變當以一死謝君既葬燕氏宗族以宗灝  
年止中殤無可爲後者氏齒穉例於古未得笄也議遣嫁之氏泣  
誓曰男子有室於禮爲成人女子已爲人婦無幼長也且我固誓  
夫以死殉矣於是議者乃不能奪氏事舅姑孝勛夫弟宗瀛以學  
曰此家聲所繫且未亡人終身之託也宗瀛益感憤力學爲諸生  
有名後生子以嗣氏焉君子曰二氏之節酷矣其尤難者教叔成  
名上延宗祀非甚盛德其孰能感之者此詩曰孝子不匱永錫爾  
類氏可謂善錫類矣

永清孫興禹妻張氏

子鳳瑞妻楊氏

張氏者永清張志金之女孫興禹之妻也年十五于歸乾隆二十一年興禹沒氏年二十八氏撫穉子事孀姑飲食起居能察及微漠姑性嚴厲氏能以婉順得其歡興禹疾且卒屬氏善爲計氏指天相誓時子鳳瑞生未彌歲旣就外傅教以義方不爲姑息孫故豐於財二世嫠婦熒熒撫數歲孤親黨過從見鳳瑞輒如抱玉以趨若惟恐蹶者氏至笞責之無少顧惜或竟日不餐鳳瑞跪牀下泣請悔過始已嘗曰有兒不孝不如無也鳳瑞感憤力學能文章乾隆三十七年試有司猝遇疾沒鳳瑞婦楊氏年始十八無子守節事姑有治家才處內外事井然有章氏母家貧其羣從有私乞貸者氏婉謝曰姑假我事權寸絲粒米非爲人婦者所敢自擅且我無子保此欲誰屬惟女子事人於法不得顧私黨爾其夫族有請急者輒稱姑命濟之曰敦宗睦族大義當如是且與我無親嫌



亦所以廣姑惠也御僕婢恩而有法有被責者輒自愧不可見少  
主居恆容儀端整見之者謂若老師宿儒凜凜有不可犯之色詩  
曰威儀棣棣不可選也氏有之焉

霸州馮顯宗妻李氏

李氏者霸州李方儒之女馮顯宗之妻也于歸三載顯宗病沒無  
子女有勸之改適者以舅姑在辭之舅姑相繼沒家有薄田二畝  
盡鬻之爲葬貲餘一陋室居之日或不得一食而處之泰然惟言  
及翁姑則輒涕泣晝夜紡績自給逮年老不克自供閉戶忍饑未  
嘗乞假於人人有予以米者不受雜以糠粃則受之鄰里窺其乏  
食予以米必先以糠和之蓋恐其不受也君子曰氏一農家婦耳  
而安貧執義老死而不悔古之高士何以加茲詩曰獨寐寤言永  
矢弗諼氏有之焉

永清李文燦妻郭氏

同縣楊彬妻初氏

郭氏者永清李文燦之妻也年十七歸文燦文燦夙業油歲稷失資父母衰老子女俱幼穉私計鬻婦可支半歲需且不勞日日事傭作也氏知之泣謂文燦曰歲稷可復熱身失不可復全也且君鬻婦得食食盡婦不可還君庸免傭作耶我義不事二夫獨有死耳君得值我死是爲負人君不得值我死是兩失也文燦不聽其族人有士魁者給錢十千粟四斗事遂已氏以粟之精者食舅姑次則食文燦與二子自拾糠粃和水咽之初姑得異疾自腰膂達於左股堅腫如石僵卧牀第不能少屈伸晝夜呻呼垂絕氏旁皇無計默禱於天曰姑疾如可瘳雖毀體膚不敢愛也越日拊所患堅者漸釋如凍解氏夜半爇香中庭掀左袂齒噉肉起礪刀割之肉脫而創無血痕且不痛苦投肉於火火盡煙結蟠鬱如雲良久

乃散氏匍匐下拜裂繻裹其創是日姑夢有神翼之疾竟瘞家人  
皆相慶以謂天所佑也時方盛夏氏偶炊爨火氣逼創傷作痛正  
啟視間爲夫妹所窺固詰之得其情詫相告語姑感歎爲泣下氏  
自姑疾愈四月不茹葷不食鹽蓋割肉時所自誓也氏始嫁時父  
母家甚貧有弟一人傭力外出父母前後得疾不起氏歸甯侍湯  
藥扶掖溲便衣不解帶者數旬其至性如此同里有楊彬妻初氏  
者東安旗莊民之女也年十八歸彬彬世業農有確田五十畝彬  
讀書能文章應童子試頻得矣以卷污被斥悒惋而卒時氏年二  
十二遺孤銳亮甫周歲耳翁得眷痛子不欲生氏泣跪請曰翁奈  
何若是誠不忍爾子之死忍令爾婦從爾子之死耶且婦所以不  
死者亦以親老孫幼不得不留婦以支持耳翁奈何若是得眷始  
收以家政畀氏一人當是時田已盡舅姑皆高年有妹在室未



字人氏擘搗匱具市薪米日取柳枝編箕結筐易百數十錢給衣食未嘗仰資於人姑劉得春繼室也性嚴毅氏怡聲柔色僅免呵責而已嘗嚴冬汲井水水凍手指著缶凝爲一置缶膚脫血出而姑方呼與語氏忍痛強歡笑姑見之詰得其情執手歔歔撫之曰兒何至此由是遇之和於初劉嘗病頭風晝夜號呼氏旁皇無計密取刀啟左臂割肉置几上蒸火燒之肉忽躍起隨火旋繞久之火盡乃止子婦及夫妹驚起詢視臂創無血漬相與錯愕及歸寢見暗室中有光爛然良久始滅明日姑疾竟起人謂誠孝所感云君子曰以郭之賢孝而遇人不淑乃若此割肉奉姑初與郭若合符然古所謂格金石泣鬼神者其無愧也哉詩曰夫也不良國人知之天之玉郭於成者可謂尤酷者矣

永清仇致廣妻任氏

子永齡妻燕氏

任氏者永清任恩之女同縣仇致廣之妻也生五年失父母與兄姊依伯氏居伯氏婦李繼室也氏病不相顧及李病氏奉事湯藥唯謹李卒哭之哀人以是異之年十六歸致廣家故饒氏豐事孀姑而儉於自奉夫妻尤相敬愛無違言乾隆六年致廣病得惡夢持甌欲自殺氏奪棄之爇香禱天請身代竟不起氏時年二十四遺子永齡永祥女二人永祥生七歲而殤永齡娶婦燕亦死初致廣昆弟三人伯曰致方仲曰致遠致廣其季也氏以兄致方孫雲龍爲永齡後俾燕撫之成其志也致遠始與致廣不相能及致遠官河工縣丞虧帑金事發將抵死氏爲鬻田償所負始獲歸里困乏不能自支氏貲給之既死又助之喪雲龍生父不勳亦苦貧氏周之終其身乾隆三十一年永定河水溢民居多漂蕩男婦爭避水其家氏盡撤廳廡堂除居難民出薪粟計口多寡授之食烽竈

益益部署秩然全活者無算氏年老猶持家政婦燕惟朝夕侍起居而已燕同里萬箱女也年十七歸永齡二年而寡或勸之醮則涕泣曰吾姑與王姑累世以節稱我忍墜其家聲哉姑之二女既適人有家貧者燕時周之或鬻匱資佐姑所不繼並上其姑節行聞於朝旌焉君子曰氏可謂不念舊惡者矣以兄之宿怨而氏報之如此詩曰死喪之威兄弟孔懷原隰哀矣兄弟求矣氏無愧焉

### 曲周王勲妻岳氏

岳氏者曲周王勲之妻也王故邑甲族氏于歸家尙鼎盛氏奉舅姑事夫子無攸遂無違言粥粥若無能者未幾家中落徙臨清勲出賈津門家事悉委氏乾隆中王倫變作聚黨數萬人將據臨清居民爭逃避鄰人招之出舅姑將從之氏止之曰賊將以臨清爲巢穴必不戕民以自弱若偕眾而竄倉猝相擁擠不崩散則踐踏



死矣既而奔者他藉死於途或擠之河水爲之塞而氏一家獨無恙後大兵南下氏急趣之曰走走勿緩也否則幸免於賊難免於兵矣及出城限於河流氏出貲厚付舟人既達西岸喜告舅姑曰今得生矣舅姑問故氏曰此易明耳官軍方壯賊不敢追戮奔者賊未大創官亦不遑搜捕賊黨也且老穉踽踽數人敝衣蹇步無重貨厚藏人亦無可覬覦者可安行以達曲周矣既而皆如氏言自是復家曲周氏仰事俯畜且十餘年奉舅姑事夫子其粥粥一如新婦時人或稱之輒曰此天幸也婦人何知乎年四十七卒郡守旌其門曰節著安危君子謂氏訥而有智詩曰百爾所思不如我所之此之謂也

### 趙州閻貞女

閻貞女者趙州閻士禮之女也幼失恃繼母趙撫之如所親許字

同里高近知未婚而卒訃至女大慟請奔喪禁之不可士禮訊夫  
家迎女舅姑聞之悲且喜辭而後許之時近知已葬矣女命人掃  
除墓地設夫主位然後登車戚黨輿馬送之者數十輛抵高門女  
不下車馳詣墓下而哭拜訖昇主前行女隨其後既至門抱主人  
素服行禮畢乃拜舅姑易斬衰時送者迎者及來觀禮者駢肩累  
足皆歎息泣下近知寡兄弟其父母失子得婦愛如已女舅疾女  
齋戒祈命誓茹素終身舅疾爲愈姑病熱渴思飲冰時方盛夏女  
禱於神是夜甕水爲凝士禮無子家赤貧女每歸甕爲籌井曰足  
五日供然後歸未幾姑卒舅以家貧不復娶女曰祖嗣不可缺也  
屬媒求得甕津樊氏女爲舅納聘焉樊既至女事之一如前姑凡  
家政必告而後行姑媳深相愛也樊後生二子其長子名琛者旣  
而生子用女撫以爲近知嗣女事親前後喪葬皆盡禮生平無疾



言怨色待家人諱如也嘉慶元年卒年七十餘君子謂女其知道乎詩曰敬爾威儀無不柔嘉此之謂也

### 東光王而陶妻張氏

張氏者景州庠生張奕烈之女東光庠生王而陶之妻也奕烈故望族氏幼嫻姆教識大義年二十七適而陶而陶家貧而好學有文爲邑名士夫婦雞鳴戒旦以進取相敦勉越五年而陶病卒無子是時翁年高夫一妹尙未字氏茹痛強自支以事翁撫妹爲志妹素嬌惰氏愛護之謹其眠時至不敢使聞剪刀聲翁性乖異凡飲食起居語言好尙多戾於俗氏小心奉事務求得其歡其艱難困苦有不可以言狀者又數年妹適人翁外出不時返氏熒熒無所依乃歸居母家未幾而父母又並故氏益無可恃日夜紡績營升斗或代富家以針黹攻苦兩目遂失明嘉慶十四年夫弟毓和



有子方周歲繼以爲而陶子迎氏歸至是而陶卒二十七年矣妹家中落歸母家而其夫與子又相繼沒於是氏返故廬抱其妹大哭曰當日吾之不卽死者爲翁與妹耳今妹又如此吾與妹始終之矣又四年氏卒年六十三君子謂氏安貧而知命詩曰三歲爲婦靡室勞矣夙興夜寐靡有朝矣此之謂也

### 天津吳某妻韓氏

韓氏者天津吳某之妻也父文義官蒲河營千總効力清江浦以疾卒閱七年氏始知痛父亡旅邸無伯叔兄弟日夜哀號謀歸櫬其夫阻之氏曰人孰無父而忍使其不正巨首乎盡鬻奩具攜一媪一僕買舟南下抵清江徧訪無知者具情訴有司始知父沒海州海州距清江七百餘里徑途險絕氏卽日起行至海州經一村舍乘驢忽自止策之繞舍門不去氏心動入詢之卽其父舊所主

家爲言父客死狀且指藁葬處示氏氏悲摧欲絕隨往啟棺拾骨  
裹以重金背負之骨輕如葉人咸謂精誠所致云或有告氏者曰  
汝父常寄金某某訟之金可得也氏曰吾豈爲金來哉不聽囊骨  
徑歸歸逾年而卒詩曰道之云遠何云能來人特患其無志耳志  
之誠者可以格天地泣鬼神幽明且不能間之况道路耶聞氏之  
風者可以興矣

### 通州白鎔妻劉氏

劉氏者延慶州拔貢生劉文京之女通州尙書白鎔之妻也于歸  
時鎔方補諸生家赤貧歲謀館穀於外氏事舅姑以孝聞姑鄧多  
病晨夜侍牀褥憊則束髮使卷植而懸釘諸壁頭少垂髮絲絲下  
墜痛輒徹心旣以藥不治病潛割左臂肉和之而進祕不告人姑  
飲之竟愈氏食粗糲數十年教子女嚴而有法視庶出子及猶子

輩如已出嘉慶二十一年鎔督學安徽氏卒於使署沒前一夕臂創大裂初姑疾食藥覺有異嚴詰家人不得狀至是遂著云君子曰劉文京孝子也若氏者可謂無忝所生者矣詩曰思媚周姜京室之婦氏無媿焉

宛平韓孝梅

永清朱棧女

韓孝梅者宛平人也父藻官江南東流知縣女有夙慧年十餘讀詩至女子有行遠兄弟父母即掩卷涕泣終日嘿嘿有所思既長有請婚者女輒白母願終養父不許伏地慟哭不得請不起父泣然曰吾窺汝久矣今從汝志會藻去官貧不能歸諸子皆遠出女代母執家政暇則侍父讀書賦詩爲樂久之父病篤女自爲膏詞刺臂血書之請減已算益親焚於神祠守祠者至不忍聞掩涕引去而父卒不起女每長號左右婢妾皆與弔者汎瀾沾襟臆女毀



憊垂斃氣不絕如縷母撫之泣曰吾老矣兒盍不少待耶女張目  
應曰不敢稍稍輟哭強起進餽粥易衰麻治家政如故女好讀書  
每食竟則請父畫像前日讀三帙以爲常父沒之八年母病篤女  
於是日絕粒食作書報父謂兒力竭矣母疾終不可爲行奉母見  
吾父地下矣遂死年四十有二永清又有朱孝女者父朱棫早卒  
女方在襁褓母王守志撫女女有至性讀書聰穎過人侍母病善  
爲調護相依爲命者十餘年其幼時母嘗許字武清諸生曹文甲  
至是婚有日矣女泣曰哀哀父母生我劬勞男子女子皆子也罔  
極之恩無或稍異母老且病忍遽離乎聞者悲之母病劇目不交  
睫者數旬及卒女送祀節孝祠歸卽吞金以殉遺手書二十與其  
夫云君家孝娥以身殉父兒不自知有母而已深負舅姑慈愛之  
恩伏願更得賢婦以奉盤匱一與叔祖汝楫云兒終鮮兄弟母氏

劬勞人鮮知者每一念及五內如焚生不能孝願長侍地下以伸  
孺慕文甲重其孝以其喪歸焉同治十年旌於朝君子曰二女皆  
嫺書有至性事親不嫁終以死殉以聖人中行律之過矣無已其  
狷者乎詩曰尚慎旃哉猶來無死此父母愛子之心也知此可與  
言中道矣

### 東強王孝女

王孝女者東強國學生王濟源之女也少賦性毅烈七歲讀書尤  
喜誦孝經常自恨不爲男兒不得終身事父母女寡兄弟媒妁至  
輒涕泣揮之去父母衰老遂矢志守貞侍養終其身父母卒盡禮  
營葬樹碑建祠擇族孫承其祀同治元年賊竄東強女倉皇必負  
木主行年逾六十遇父母忌辰輒號泣哽咽不能下食先是道光  
四年女年十七有巨盜攻門女持鎗立暗室中斃一賊賊退而家

無恙咸豐四年賊踞連鎮忠親王僧格林沁兵至境女捐金餉兵  
王詢知女高行書孝烈可風以表其門縣宰方宗誠以事聞得旌  
於朝君子曰男女居室人倫之正也至以父母無子老死不嫁以  
養其親則又正中之變焉然固非奇女子不能也詩曰匪棘其欲  
適追來孝此之謂也

故城盧著

盧著者字碧筠德州盧陰溥之長女也幼許字故城賈汝愈未婚  
而殤女甫十二聞之潛屏容飾父母問其志則曰兒知不貳字而  
已願長事吾親陰溥戚然許之女竭力事父母數十年母袁卒陰  
溥悉以家事委女內外秩然陰溥老而致政病痿痺晝夜侍湯藥  
至病革未嘗言勞初汝愈兄子臻登進士入翰林以女守貞二十  
九年年已五十矣列狀上禮部復請於陰溥將奉叔母歸陰溥顧



女歆歔曰汝之志行成矣旣以不貳爲賈氏守禮宜終歸賈氏乃將父命謁賈氏之廟執婦禮先是臻祖鏊有遺命爲汝愈立後臻有兄當立而天至是宗老議立臻子敦恮爲嗣孫而撫之道光十四年禮臣以貞孝聞于旌建坊題名如例蔭溥旣沒始常居其家與臻母相依如手足誨臻以安義命時與從子婦講說古賢孝事浣衣練裳望之如見古女師焉有僕婦黎氏者早寡貧不能守聞女之教感而矢志執役依女終其身其爲人心服如此晉江陳慶鏞讚曰盧氏貞女也在盧稱貞女在賈稱貞婦何言爾盧母家也賈夫家也貞女從母辭也貞婦從夫辭也然則成婚已乎曰未成婚也未成婚則曷爲謂之貞婦也歸謁賈氏之廟矣其歸謁賈氏之廟奈何德州故相國盧文肅有舊於故城內閣舍人賈鏊以女字鏊之子曰汝愈汝愈沒盧氏年十二聞之呼天矢靡他則維曰

我儀焉爾矣矢靡慙則維曰我特焉爾矣既長問其志曰願長事  
吾親也父母知不可奪憐而許之佐理母家政勤而有禮事母終  
喪如一文肅之晚而退也患痿痺侍湯藥色憂亦憂色喜亦喜於  
是年五十矣汝愈之兄子臻通籍翰林請於文肅迎氏歸乃執豆  
籩歸謁賈氏廟既迎歸則爲賈氏婦矣壻沒而婦迎歸於禮有乎  
曰廟見如壻存用吉禮畢返喪服擗成踊用奔喪禮禮之未有者  
可以義起也其年以臻官貶贈汝愈爲文林郎氏爲孺人從賈請  
也先是臻有兄曰柎其父汝愚奉舍人命爲汝愈後五歲而殤至  
是臻復以次子敦性立爲嗣於柎子行也於汝愈孫行也爲汝愈  
也孫者則爲柎也子凡殤不立後柎五歲爲無服之殤何以得立  
後爲盧氏立也曷爲爲盧氏立汝愈卒十四歲亦中殤不得立後  
有盧氏則當立無盧氏則不當立何言乎有盧氏則當立盧氏歸

成婦禮則汝愈亦責成人禮矣責成人禮有人父之道故得立也  
汝愈得爲孫則祔得爲子宗法上治祖禰下治子孫無無子而有  
孫亦無無禰而有祖祔旣立爲後矣是已承之也今來爲後者亦  
當爲其後禮之未有者可以義起也是祔亦有父道乎曰爲殤後  
者以其服服之言殤無爲人父之道不以殤者之爲父而但依本  
服服此殤則是實與而文不與也曷爲實與而文不與實者宗法  
之大者也文者禮法之隆者也與其爲殤者子恩掩義也不與殤  
者之爲父義斷恩也然則有嗣孫無嗣子無乃不可乎曰小宗無  
子則絕大宗無子則不絕凡成人而死得立子孫爲後不得立兄  
弟爲後無子立孫仍當懸其位而旁敘以己所自出所謂與其廢  
而絕之毋若繼而存之爲夫猶愈於己也公羊子曰爲人後者爲  
之子仲嬰齊爲兄後孫以王父字爲氏譏其昭穆也然則無子立



孫猶可立兄弟則不可也盧氏歸使賈氏二殤得以復存君子於是焉嘉矣道光十四年冬以貞孝狀上得旨予旌建坊揚盛典也讚曰柏舟序詩其伯蚤死其姜守義此貞婦之權輿與夫子列諸鄘風之首而繼之以牆有茨然則敦勵人倫維持風化端賴此貞節之操與南史紀衛敬瑜妻年十六而敬瑜亡父母欲嫁之誓而不許題曰衛婦貞義之門魏書紀盧元禮妻李氏至孝聞乎州里標李盧二門號曰貞孝女宗盧氏知禮守義一醮不移於母家爲孝女於夫家爲貞婦宜標賈盧二門以爲風俗勸焉君子謂陳氏之讚無媿辭詩曰有孝有德女之謂也

元氏王炳如妻郭氏

郭氏者元氏王炳如之妻也氏年十八歸炳如期年翁卒又期年夫哀毀致疾亦卒時道光十七年也氏痛而投繯家人急救之甦

其叔翁以事孀姑繼亡者祀喻之婦感泣乃繼從伯兄子廷楷承夫祀未幾姑又病叔妹幼弱繼子甫生齒氏一身侍湯藥飲食兼撫諸孤每夜深泣禱中庭乞身代姑死姑尋愈逾九年叔授室生二子甫襁褓而其妻李氏又卒氏抱之於姑室養之親如已出子成立次第外徙婦與姑同室終焉氏事姑二十八年及廷楷娶婦而姑食必親嘗衣必手製不以子媳代之姑沒未葬有傳賊至者鄉人皆逃氏獨守柩不去廷楷入邑庠與從弟廷英廷望同居其爨皆事氏如所生一堂雍穆鄉里式之年五十卒君子謂氏孝而兼慈詩曰保其家室此之謂也

### 滄州楊天德妻王氏

王氏者滄州楊天德之妻也伯翁遊塞外不返舅長齡思之命天德往尋氏暗繡八字於夫之襟曰夫行如蓬妾心如鐵是夜夢亡

母呼小字語之曰孝貞孝貞汝全汝貞豐亨三歲貞乃明醒而不盡解姑識之時年甫二十也天德去二年無耗氏浼戚某往探之始知夫及伯翁所在又五年不歸舅沒既葬又浼其兄王某往迹之攜繡字衣襟歸蓋天德死已葬矣氏奉姑龐率二女編草笠自給以甘脆奉姑而自咽糠粃姑嘗冬月病思魚不得氏晨汲輒密禱冰碎其瓶忽一婦來與之一盜愕問之婦曰回詢爾姑自知之返而述其狀姑恍然曰得毋汝夫乳母余媪耶取視盜潑刺有聲鮮鯉躍焉烹以奉姑病良已未幾姑又病脾洩氏嘗之苦泣曰姑其危乎比沒質宅營殮勺飲不入口晝夜哭積淚成血葬之積雪中手掬土遂成墳焉初氏寡兄憫其苦微諷之氏怒欲自剄乃已守節六十七年咸豐元年州人龐鼎來爲立傳彰之先是天德至塞外有武郎漢吉爾們氏內蒙古科爾沁部人未嫁時隨母歸寧



道遇寇殺其母天德適至奮力擊賊逸去親送女至其家女父感天德恩以女歸之辭不獲已納焉甫半載天德復出尋伯父染疫死適天德妻兄王某至見氏於烏拉鎮雪嶺下爲述其事卽以馬革裹尸葬之因向王某叩首曰吾不能隨阿姊共事婆婆矣是日自經於墓王某視其合葬而還君子謂王氏生以報其夫吉爾們氏死以殉其夫可謂分敬無妬者矣詩曰綏予孝子若王氏者尤天之所綏者與

大城李壽山妻孟氏

同縣李長霖妻王氏  
李璠妻鄧氏

龐謨妻高氏

孟氏者大城李壽山之妻也咸豐三年于歸年二十一夫亡遺孤甫匝月祖姑年七十餘風痺卧牀褥氏哺而食之兩股復生瘡膿穢淋漓氏親浣衾裯除穢惡衣不解帶者七年如一日同治初祖姑祖翁相繼沒氏哀毀柴立喪葬費皆出之紡績所餘光緒元年

翁患背疽氏哭禱於神日夜調藥餌滌廁踰八閱月而翁病愈其翁嘗曰吾可以無子不可以無婦婦在勝於子在也氏年逾五十依依愛慕如嬰兒族黨化之有不孝者咸曰不可使氏見也十五年旌同邑李長霖繼妻王氏善事繼姑咸豐初姑染疫氏侍湯藥輾轉扶持幾廢眠食姑亡四日夫長霖痛母亡又毀卒氏痛絕復甦者再喪事畢氏以翁年高左右不可無人勸翁續娶繼姑至事之愈謹姑亦愛之如己女焉翁哭子喪明每飯氏必手調以進翁食畢乃退與姑同食其姑嘗曰吾雖無子得此婦勝於百男也氏守節二十三年光緒十四年旌同時大城龐謨李璠之妻皆善事親龐謨妻高氏霸州高振德之女也三歲失母育於姑母李氏家姑母少居孀愛氏如所生嘗教以女訓女誠諸篇持躬端重不愆於儀年十七歸謨家赤貧謨覓食四方久不歸氏子身事翁姑十

指所供甘旨無缺有勸其改適者氏曰舅姑老矣夫子存亡未卜  
養親之事責實在余余朝出門老親夕死矣余何人斯而忍出此  
耶由是日日爲人縫紉易薪米以其腴者奉親而惡者取以自食  
舅姑溫飽終其身不知其子之亡也舅如沒竭力營葬歲時祭奠  
久而不衰戚黨復有憐其孤苦勸之嫁者氏曰人生不過爲衣食  
計耳有二老在吾力尙能給之今營營一身餬口更易自食其力  
不勝於仰人朵頤耶聞者愧服光緒閒寄居李氏宅閩範肅然鄉  
人咸敬式之李璠妻鄧氏幼貞慧十九歲歸璠璠病嘔血數斗醫  
束手曰若得生人血雜藥煎之可治也氏刺股取血和藥以進疾  
果痊未幾病復作而死氏哀慟氣僅屬姑曰吾老且孀遭家不造  
吾之命其視汝爲存亡也因相持而泣氏自念吾死姑亦死是我  
迫姑死也乃忍死奉姑時時強笑語姑安之以天年終氏擇族中



子嗣其夫子善治家家頓起僉曰天之所以報節婦也同治年旌君子曰四氏之節可能也其孝不可能也詩曰夙興夜寐無忝爾所生此之謂也

### 天津王瀛妻湯嘉名

湯嘉名者字碧春浙江樂清協副將武進湯貽汾之女雷州知府天津王鶴舟子瀛之妻也咸豐三年二月十日貽汾守金陵城破時氏歸甯於家父促家人走氏獨不忍去父投塘死氏藁葬之亦赴水死氏工詩善畫白描人物銀鈎鐵畫近李龍眠君子謂氏才而有德詩曰寧丁我躬氏可謂臨難毋苟免者矣

### 大城王巨庭妻張氏

同縣劉懋源妻元氏

張氏者大城庠生王巨庭之妻也氏爲文安望族巨庭父嶸慕其家風爲二子婚焉長曰陟庭次曰巨庭陟庭妻爲氏從姊早卒巨

庭善圭峯楷法知名於時一日病將死呼氏誦列女傳而卒方其病時嘗一夜數食氏秉燭以待不解衣寢者累月生二男一女其三皆早夭至是少女又病氏恐其啼也置諸懷以帶束之既死氏不哭且戒家人勿哭家人疑之謂其有異志也及巨庭死則一痛幾絕陟庭生二子三女繼妻王氏之所出也氏請其子爲巨庭後嫂氏不與氏泣請乃許之其女姪曰伊女死不哭焉能撫吾弟或謂之曰當嗣不嗣是疑汝恐他適也氏驚曰是謂我非人也吾祖吾父何如人吾夫又何如人臨終之夕言猶在耳而頓忘之豈復人類耶言畢一痛復絕自是毀妝去飾代家人操作習勤苦飲食同於奴婢翁姑憫其寡而無子而勤苦若是往往爲之垂涕氏既得嗣子撫之如已出少長延師課讀每爲先生饌必沐手更衣入廚治酒食曰幸此子成立死有以見亡人於地下矣嗣子名鉞以

第一人補博士弟子後家漸貧乏氏勤苦倍於前操作之餘紡織無虛夕一家服食未嘗取諸市也咸豐四年朔忽患疾噤不能言而卒年五十一一夕子婦劉氏夢氏語之曰某物在某許某物在某許吾卒時未之告也劉驚寤檢之果如所言大城又有劉懋源之妻元氏者靜海元某之女也年十九歸懋源周歲生子紫垣而夫沒上有老姑年六十餘矣家無寸土氏以鍼紵紡績供母子衣食嘉慶初大水浮饑姑老且病不能食粗糲氏竭力營甘旨嘗思魚肉截髮典衣市之又取門楣案足鬻之以易稻麥室中僅餘草席半片自咽糠覈雜草子充饑而老親之供未嘗乏也咸某媪憐其貧苦潛與媒約將強醮之藏車里外徐徐入見氏道其意氏驚泣曰熒熒之母呱呱之兒生死責在余且劉氏婦不能他人從若言是速我死也遂持剪自刺血淋淋股衣袖急救之得不死媪大



驚倉皇遁去自是人無敢以言餽者奉姑撫子三十年而紫垣生子五人皆志學成名有聲鬻序聞君子曰天之挫阨夫氏者可謂酷矣而困心衡慮天亦有無如氏何者詩曰命之不易無遏爾躬觀於氏可以知所自立矣

安州梁某妻張氏

張氏者高陽張澧之女安州梁某之妻也性賢孝喜讀書尤精女紅嘗以父無子誓不嫁然幼已許梁無如何于歸後善事舅姑接娣姒以禮既生子夫沒子亦殤舅姑相繼皆棄世喪葬畢產落遂歸母家以十指養親能備甘旨未幾父卒奉母垂十年又卒皆葬之盡禮先是女晝夜勤女功以所得資半供菽水半私蓄之備襄大事故生死養葬皆無缺焉邑人慕其孝巨家婦女爭延之爲師以嫌不就復歸夫家立猶子爲嗣紡績佐讀書膏火頻年值荒歉

質衣飾殆盡終以勞卒鄉人哀之爲賦薄命詞詩曰實命不猶其氏之謂乎

### 武清高貞女

高貞女者武清高希端之女也幼字同縣趙玉琴高故巨族女早失母希端將遠出謀食乃送女於趙爲養媳年甫十二婉事舅姑以孝聞未幾玉琴外出不歸翁尋之數年亦未返姑謂女曰我死無所憾汝固未成婦如吾女耳別爲生計奚必同餓死乎女泣曰兒受父命爲趙家婦今若此養姑吾所願也姑泣而頷之而家計益艱日夜勤紡績奉姑自採野蔬啖之姑欲分所食女曰野蔬兒能咽姑病且老不能也久之其父告女曰汝翁汝壻死矣汝將如之何女泣曰命也但求勿令吾姑知耳戚黨勸其改適女不答而事姑益謹時女年二十有六矣又十年歲大饑糧屢絕有諸葛子

者好義而俠慨然曰貞女孝婦且遇慈姑而聽其窮困以死非吾輩之恥乎遂與其弟古香倡捐資得數百緡代權子母每月以息錢造門置闔內不與女相見也又五年女年四十一居室傾於雨依敗壁爲巢諸葛子爲築草屋三間居之姑尋卧病女嘗藥調羹祈天借壽須臾不離左右者三年餘姑握女手以終古香曰此後不可造貞女之門矣以錢倩戚媪付女而女盡以營殮葬焉君子曰女之孝若天性然其貞不可及也詩曰豈弟君子莫不令德此之謂也

獻縣韓守立妻俞氏

故城張某妻李氏

俞氏者獻縣韓守立之妻也夫妻皆至孝鄉里無閒言守立痛母喪明百治不能愈大母復喪明聞人言割肉然燈有效欲試之以力作養親未果氏請以代晨起叩天默禱割右股肉寘諸盂爇以



火炊爨如平時伯姑見之亟滅火視創處無血痕氏曰兒肉已割矣幸爲然之冀有效不然兒徒苦也伯姑火之不能然氏自然肉乃燼大母兩目果霍然復明里人驚爲神書其狀告於邑令萬廷蘭往驗之信喟然歎曰若氏者可謂至誠能動矣故城有張某妻李氏者宜興湯先甲之婢也年二十餘適張姑老而貧命其夫外出謀生計張念已出母無以養氏察其意謂之曰姑老不能奉甘滑君之罪也旣命君出矣胡不善自謀以重親憂乎妾在姑側猶君在母側也夫泣而別十年滯遠方不得歸音亦絕氏以十指養姑念及子則謾爲傳語慰解之一日姑病氏焚香跪禱不效又乏醫藥資幾不起氏仰天呼曰吾夫之出也姑命之吾實強之夫以有言在無內顧憂也今姑病儻不幸子不得視含斂吾之過也吾卽身殉何惜焉吾聞有割股療疾者吾其試之不效而從死未晚

也急取利刃復度曰股下體不潔不如肱乃割左肱一瓣長三寸  
餘見骨血不止以敝繒縛之自切爲膾烹而進時姑已食不能咽  
爲置湯口中作咯咯聲又久之甫能食食及半開目而視且能言  
氏大喜曰語不吾欺也食畢病頓瘥問所食者何僞曰脂也里人  
咸曰脂之克起沈疴也如是耶越二年夫歸袒臂示之相持痛哭  
明年姑無疾而終君子曰脂與肉一也脂不能愈病肉固能愈乎  
二氏者可謂至誠感神矣詩曰神之格思不可度思此之謂也

任邱白俊德繼妻劉氏

孫蔭欄妻周氏

劉氏者新安劉馨之女任邱太學生白俊德之繼妻也初俊德妻  
生女五人而亡氏年二十二歲歸俊德逾二年生子濟川甫三歲  
俊德沒氏撫幼女孤子皆成立年逾六十猶躬與僕婢同操作家  
亦漸饒濟川娶婦高陽姚氏事姑孝生子男五女三皆氏爲之婚

嫁鄉里皆取以爲法年七十三卒光緒三十年大吏奏旌其門濟川之五子蔭欄娶高陽周子儀女年二十于歸歸兩月而蔭欄沒其父母欲奪其志堅不從朝夕侍姑側諸先後皆愛憐之癸丑姑病革禱於天不效及沒乃引刃截其左腕家人急救之腕已斷矣逾月遂卒年二十四君子謂周氏孝以成其節詩曰永言孝思昭哉嗣服若周氏者可謂能嗣其祖姑者矣

### 涑水章貞女

章貞女者涑水章銓之女也幼字同里張榮年十四榮病沒女聞訃請奔喪父母禁不許屢議改聘輒死誓有倩其舅氏問名者已成議矣女微聞遽取出判書毀之父母知其志不可奪乃止越八年榮祖母沒女乘閒取纓絰往哭焉遂拜孀姑矢終身供婦職姑強之返不可暫以別室居之里人以狀聞於縣邑宰魯傑率同官



以鼓樂肩輿導之夫家成其志姑家故貧以女紅佐甘旨先意承志得堂上歡姑沒哀毀骨立喪葬皆盡禮尤善處娣姒娣婦橫逆弗與較立猶子祀其夫後家益貧恆斷炊訓導張萬青率諸生醵金爲置田廬周卹之同治五年旌詩曰無怨無惡率由羣匹女之謂也

深州嚴烈女

嚴烈女者深州諸生嚴啟鵬之女也同治七年捻匪犯州境家人奔辟止女外祖家其所居阻水賊至登舟辟之旣免而王父懋功以墮水病甚命家人曰賊且復來吾憊不能行當獨留家人且他適聚死無爲也女不可王父趣之不聽遂俱留越二日賊果復至女罵賊死年十六女初受同郡李氏子某聘女死踰年李氏子亦死越二十年李氏葬其子請以女附且爲置後焉君子曰遷葬嫁

殤禮之所禁後世且沿以爲俗其迫於情事士大夫家有爲之者矣君子莫之譏也女於李氏子固生前所媒定者也其死也旣與禮之所禁有別而仁孝之行家人尤不忍殤之孔子不殤汪錡重其死也於烈女之耐葬又何閒焉詩曰不僭不賊鮮不爲則此之謂也

### 獻縣吳孝女

吳孝女者獻縣吳士仁之女也幼失怙鮮兄弟佐母紡織誓終養不嫁同治七年捻賊北竄鄰婦勸之行女曰有命在不懼也及賊至覓利刃置袖中扶母出走遇二賊於途叱女返擠其母於地將殺之女急呼曰不殺吾母當從汝返否則有死而已賊曰諾女扶母歸置密室中出謂賊曰餓否吾爲若炊炊訖使食時二賊各據一室一賊據牀卧一賊出懷中酒飲之女乘隙繞至賊後刺其頸

貫喉嘎而仆女佯作笑聲拔賊所佩刀直趨彼賊室賊方起立而  
刃已洞其胸矣須臾賊俱死急出負母逃數日母愈君子曰女可  
謂智勇兼備矣詩曰終踰絕險曾是不意此之謂也

赤峯范豈二節婦

范氏者赤峯韓義之妻也土匪之亂夫倡義捍賊被戕死氏走山  
谷中哭之四山皆響應哭已歸而澗中忽生蒲草編扇售之以養  
姑姑沒廬墓三年壽八十餘卒而蒲亦死同縣郭自立童養妻豈  
氏年甫十一夫遠出不返孀姑王氏憫其幼勸改適泣曰身許郭  
氏去將焉之願以十指養姑及姑沒氏年三十六鍵戶紡織足不  
踰外戶遷安女史高順貞輓之以詩曰塞山峨峨河水瀰瀰人傑  
地靈清聖所止南有喬木在山之阿惟援惟繫施彼女蘿義爲郭  
妻情猶豈女盻則未合名則已許北堂有護西山有蕨浮雲有根



井水不竭既奉盤匱既潔滄澗以養以葬殫茲十指揆厥畸行赴  
義歸仁不屬毛裏摯哉天真貞女事夫忠臣委質爲忠爲孝天無  
二日君子謂有婦如此可以不憾於無子矣詩曰有母之尸饗若  
二氏者其庶幾無譏矣乎

### 天津金佑妻王氏

王氏者天津王魯翁之女同縣金佑之妻也家豪於貲勤慎守閨  
訓不驕不佚嗜文翰能爲詩然不輕示人年二十三歸佑六年而  
孀遺一女姑失明氏忍死撫女事親飲食起居姑依之爲命氏持  
躬樸素足不出寢門閒歸寧半日輒返以姑不能頃刻離也未幾  
姑沒女殤氏哀毀成疾卒年五十三君子謂氏純孝也詩曰父母  
何食又曰父母何嘗微氏姑其殆矣

### 天津徐氏

王樹枏補傳

徐氏者天津徐嘉賢之女蘇州顏士棟之妻也幼淑慎婉靜不輕發一言八歲喪父哀痛如成人事母至孝友于尤篤撫兩弟世昌世光能佐母教之義方徐氏故世宦至是中落氏食貧習鍼術通詩書大義年二十一歸士棟翁忠愍公懷忠戰沒亳州士棟發憤承父志讀書有聲庠序間氏雞鳴戒旦以遠大相規勉會姑病夫婦同割股和藥進姑沒乃同殉焉河南巡撫請於朝旌表如例詩曰瓶之罄矣維罍之恥君子以是知氏之以死報德也

灤州郭東陽妻劉氏

劉氏者灤州庠生劉祺年之女同里庠生郭東陽之妻也端慧有識年十九歸東陽東陽故聰敏氏以鄉曲無師恐輟學請於舅姑令之四方就外傅舅廷恕喜而許之東陽遂入城讀書學大進既入泮蜚聲庠序間力學益勤卒以積勞致疾而沒氏生子一女二

皆在抱力以事親撫孤自任未幾舅沒一子二女相繼殤氏泣曰  
已矣誓以死仰藥投繯皆以救得生姑婉諭之曰汝獨不爲吾老  
人計乎氏乃忍痛侍姑姑老而多疾飲食藥餌氏親調之不以勞  
娣姒姑所求輒預儲已則粗衣糲食數十年如一日東陽兄弟三  
人而伯東曜僅一子遇明娣姒又久不育氏慮繼子之難也請於  
伯爲遇明再娶吳氏女連舉三孫氏親撫育之已雁行入塾矣氏  
居恆時時以郭氏宗緒爲念曰吾生平無奢望惟望昆季三人均  
有後吾死可見舅姑地下矣年六十七無疾而卒詩曰克昌厥後  
氏之謂也

### 樂亭董孝女

董孝女者樂亭人也年十一父桂林卒女哀毀過人父葬後焚  
依寡母矢志不嫁有求婚者輒向母泣曰母無子族中又無可繼



者女適人誰奉母耶誓終養以報母矣如是者十餘年母知其志堅不忍強之家故赤貧女自甘凍餒而奉母必甘旨女性剛烈好靜獨居躬執炊汲日夜紡織無一時稍閒舍北有沙田數畝亦手自耕穫不假手於人恐男子入其室也婦女有游蕩者讎視之與接年五十一其母亡罄所蓄以殮所存只破屋數椽瘠田一畝杏五株而已以無力庀葬具殯之室旁手捧泥而封之平居恆以刀自衛淫雨敗其屋無所容未嘗離母隣婦偶至其室見女流涕問其故則曰亡人以入土爲安吾悲無力葬親耳因諷以求助女愀然曰婦女不可輕受惠於人況送死兒女事豈宜于人耶同治十一年女年六十八矣鄉之好義者屬鄰叟曉以里黨相周之義女乃受所贖而葬焉初女當母在時昌黎富室某喪妻聞女賢欲聘爲繼室並許代養其母屬其戚道意焉女聞之掩耳而走自

是終身不與見君子曰子輿氏有言丈夫生而願爲之有室女子生而願爲之有家恆情也女獨斷斷若是其與唐之陽城兄弟終身不娶者何異哉詩曰父兮生我母兮鞠我拊我畜我長我育我顧我復我出入腹我欲報之德昊天罔極此之謂也

望都耿一圭

耿孝女者字一圭望都舉人耿恂之女也耿恂妻劉無子僅生女一人劉患哽噎痿痺不能行女按摩抑搔手調飲食六七日嘗不眠病稍減女始卧牀下一夕恂自外至悞踐其指甲脫落血流及肘而女不知時年僅十一歲也幼許字容城某甲子女有憂色及某甲子夭女泣曰吾得終事父母矣遂矢不嫁劉病胃久女嚼而反哺之恂設教保定同治元年病沒家貧無一錢及門弟子賻之資女隻身扶病母返父喪鄉里來弔者嘉其孝爲表其門踰二年

劉亦故合葬於父皆如禮自製文樹之碑讀者爲流涕方其父母存時有饋遺者辭受悉稟之父父不在室則悉卻之其處事精審類此光緒四年三月二十九日以己生日拜父母墓久未歸女叔耿怡趨視之女卧地氣息僅屬十指皆血出詢之女曰人生有不才子不過十年墓就泯矣我父母無子我卽子也貧不能役人培冢土身執其勞而無力若此可恨也因涕泣不止掖之歸逾十日卒是年十月旌於朝建坊入祠君子謂耿恂無子而有女死無憾矣詩曰誰其尸之有齊季女此之謂也

大城韓天印妻楊氏

楊氏者大城韓天印之繼室也年十九適韓母家富夫家貧氏安之無怨色事姑如母敬夫如賓撫前室一子一女愛逾所生光緒八年天印卒氏一慟幾絕誓身殉姑泣曰吾老矣視是呱呱者將



誰依耶氏忍死養姑撫子女而其殉夫之志未嘗一日忘也氏集  
蓼茹荼田園稼穡皆躬服其勞家由此起光緒二十二年姑沒氏  
盡哀盡禮喪葬皆從厚繼爲子女完婚嫁事畢曰吾可以死矣鄰  
里以爲戲言獨其子深知之與其婦晝夜迭守氏不得閒乃更操  
作不少休丁酉五月天酷熱負簣自田間晚歸其子曰盍少憩無  
太自苦氏喟然歎曰吾豈不知自逸者欲汝知稼穡之艱難也自  
汝父沒後家中嘗斷炊今獲小康皆勤儉所致也夜分危坐歷言  
持身涉世居家之道且告以吾鄉中某也可爲法某也可爲誠語  
至夜深曰汝夫婦可歸寢矣明日宜早起入市糶米勿誤也俟家  
人睡熟卽以米袋繩坐地自經死年四十一聞氏畢命時繩離項  
四寸餘不知其何以死也豈天鑒其誠與君子謂氏孝慈兼盡視  
死如歸詩曰無已大康職思其居氏之教子可爲法矣

天津張玉貞

妹淑貞

張玉貞者字蘊仙江西縣丞張棠之女也女生之夕其父母同夢  
鐙花大如輪髻嫩聰穎異恆人博通經史琴棋書畫皆能悟其微  
尤工爲詩長篇短什見者皆驚絕性幽靜足未嘗踰戶朝夕事父  
母矢志不字人常曰罔極之恩長報親之日短不忍離也有議婚  
者父母以大義導之不能強族戚婉勸之女怫然曰是迫我於死  
也乃絕粒數日幾殆父母憐其志許之咸豐初粵匪竄江西侍父  
母避鄉里常以刀自隨三年母沈卧病女晝夜侍湯藥焚香告天  
割左臂肉和藥以進母卒不起誓以身殉自縊者再皆遇救乘間  
吞金環醫以藥出之竟不死光緒七年父沒女哀毀骨立刺血寫  
金剛經爲父母祈冥福終身持誦之著有蘊仙詩草芬芳悱惻其  
泣血詞尤不忍卒讀焉梅州吳秉慈序之行世九年卒年五十江

西巡撫潘霽奏旌其孝於朝妹淑貞亦工詩君子謂玉貞純孝也大孝終身慕父母女殆庶幾焉詩曰明發不寐有懷一人此之謂也

### 大城葛廷魁妻梁氏

梁氏者大城葛廷魁之妻也幼端重明敏精女紅勤操作及笄適廷魁生子雲程甫周歲而夫沒氏年二十一以親老諸叔幼而孤子又乳食無所依仰事俯畜以一身肩之後諸叔授室乃與氏生分薄田僅數畝氏慨然曰貧窮有命但求終吾志艱苦非所計也雲程自是不得卒學棄而爲賈家業隆隆起乃奉舅姑獨養之並分其所積以贍族黨之貧者翁沒傾貲以葬而自甘菲薄無異貧時茹苦四十年人未嘗見其一淚或問之氏曰人之立志貴堅持而力赴之一經挫抑輒歔歔喪悔不勝其悲者皆其立志未堅而



中無所主也吾視百年如旦暮困阨已自安之矣何泣爲氏年逾六十朝夕侍其姑如嬰兒之於慈母焉光緒十三年旌君子謂氏貧而有立志詩曰無思百憂祇自疾兮言憂之無益也

### 臨榆趙貞女

趙貞女者臨榆諸生趙文淦之女也許字王福升未嫁而卒女甫十六歲請於父母欲衰絰往執婦道父母堅不遣自是誓不改聘性至孝父病焚香籲天以祈病愈稽首觸地者兩月餘母病躬侍湯藥不假手他人祖父耄而多疾女夜夜守視年餘無懈志父教諸弟書女側聽善記不忘與諸弟言必援古忠孝節義事以爲式妹四人母沒教之女紅授女訓諸妹奉之如師焉同治十一年旌詩曰維此良人作爲式穀女之謂也

天津鄭凌仙

王姐姐

鄭濂仙者天津守備鄭起龍之女也生有至性習詩書知禮義幼許字同里趙嗣元母袁舉子女五人女念母氏劬勞髻齡卽代理家政提攜弟妹一如成人光緒二十二年母病劇女焚香禱天誓身代割股和藥以進水漿不入於口者五晝夜母卒不起親族環而哭女涕泣哀號持刃自刎頸血噴薄殷襟袖眾驚救諦視頸上凡四創皆深入須臾死矣年甫十六時起龍官粵東粵之官吏上其事於朝並徵詩文以記其事道光時有王姐姐者蘭山知縣王枚之女也十一年枚卒女捐軀以殉君子謂女重孝義輕死生行之高者也詩曰不屬於毛不離於裏天之生我我辰安在此之謂也

任邱李樹畹

李樹畹者任邱李沐仁之女也女生而聰穎婉順精女紅嫻禮法

善事親能體於無形終父母之身未嘗幾微失意指兄弟友愛尤  
過絕恆情母嘗病女才十齡竊跪拜禱於神後母病疫瀕危女剖  
左臂肉肉不斷則以齒齧臂而剪斷之爲湯進母汗出溼枕衾病  
霍然愈愈後十年母復病且革復剖臂療之初女剖臂無血此則  
血湧出俗謂有血者病不治果不起後父病其姊樹棊抽刀斷指  
以代藥血出不止命幾殆亦無效女自父母沒終日號泣淚盡繼  
之以血卧病三年旣除喪日夕侍父母像旁誓終身不嫁先是父  
母爲議婚有成說矣女聞之病大作乃止不復議及母病且死告  
其兄弟速爲女議婚女泣謂母曰母善自養勿顧念女母察其意  
之將以身殉也呵斥之且諭以男女大義母旣沒仍自誓曰父母  
存事父母父母亡守父母主終不去左右也逾十年其兄弟強字  
同縣宗氏女聞邑遽變廢寢食疾復大作已謂其姊曰姊殺我矣



然終恐傷兄弟情遂歸宗慶溥而病且曰劇凡九月而卒既卒不  
瞑其弟樹穀祝之曰姊亡必書姊位置父母旁乃瞑年三十九時  
丁巳正月九日也詩曰愔我不卒女之志亦可傷矣

賢孝傳終

大清畿輔列女傳卷二



節義傳三

大清畿輔列女傳第三

天津徐世昌撰

蠡縣蔣爾恂妻李氏

李氏者高陽李某之女蠡縣諸生蔣爾恂之妻也明崇禎十一年爾恂父範化以戶部郎中家居守城死於兵爾恂抱父屍大慟已晝父像朝夕哭拜必祝曰父無恂兒必復讎順治四年偵知殺父爲某汎卒糾衆入城磔而祭其父東走河間衆潰遁去時爾恂年方二十三娶氏未一載也氏累代顯宦而性婉嫻執巾櫛唯謹爾恂抱大志學技擊意氣慷慨未嘗一狎視氏至是遂走天涯不復知生死踰月產一女氏嘗撫其女泣曰汝父丈夫也吾今追憶汝父面目皆恍惚不可省識爾父執大義吾當執節報爾父閉戶紡績以給餽粥年踰八十始卒君子曰男義女貞皆所謂求仁得仁



者也詩曰于嗟闊兮不我活兮于嗟洵兮不我信兮其氏夫婦之謂乎

廣昌徐喆妻李氏

姪圖遠妻趙氏

李氏者廣昌徐喆之妻也喆官浙江蘭溪縣丞署武義知縣耿精忠亂作武義當其衝喆登陴拒守爲叛弁所執逼之降不屈自縊死氏倉皇奉姑梁挈子恭負亡骨以歸旣而恭復殤遺三女亦相繼死氏卒守志以終姪圖遠隨之蘭溪死於任所妻趙氏亦守志終其身君子曰耿逆之叛唯制府范公與二三君子抗節以死餘無聞焉喆以一丞乃能持大義不顧死生如此而天之報施其妻子者又或舛焉詩曰悠悠蒼天曷其有常此之謂也

容城孫立德妻張氏

同縣宋諒妻孫氏

張氏者山東招遠知縣容城張嘉遇之女同縣諸生孫立德之妻

也順治六年土寇變立德遇害氏號泣護以身引頸受刃賊義之  
不忍殺氏復投井水淺不能死不粒食者三日既又縊於窗眾奔  
救得甦遂忍死奉親撫孤孫故貧氏承以勤儉躬自織紉督子士  
瑾甚嚴一日以課業違祖訓氏泣子請受杖眾兩賢之姑多病晝  
夜侍榻側順治十七年姑患痢氏時抱恙猶侍左右不懈一夜嘗  
數起執燈滌牀褥姑一飲一食離婦輒不歡明年姑愈而氏以積  
勞卒士瑾弱冠入邑庠走千里乞大儒孫奇逢爲之傳奇逢歎曰  
賢哉有是母宜有是子也立德有妹適同邑諸生宋諒年十九諒  
死誓身殉家人強慰之撫子鎰成立初寇起氏投井賊退挽之出  
卒年八十一康熙二十九年旌君子曰容城俗尙節義多儒士張  
孫二氏一婦人耳而當仁乃不讓焉詩曰爾之教矣民胥倣矣此  
之謂也

南宮邢鏹妻李氏

李氏者南宮邢鏹之妻也年十二歸鏹鏹幼穎慧善屬文順治十六年以暴疾亡氏適甯於家聞變遽奔赴及門一痛而絕左右救之踰夜始甦誓以死從姑魏解之曰吾夫婦老業失子詎堪更失婦或亡者意不以父母屬汝耶氏遂稍進食然形已骨立矣葬事畢氏歸甯有諷以他辭者輒痛哭詔之憤而成疾母進藥卻之曰吾求死不得也疾篤請還母持之泣氏亦泣徐歎曰母勿復念也既抵舍而卒年十八後鏹沒三載康熙元年三月二十五日也詩曰願言思伯甘心首疾此之謂也

柏鄉耿復昭妻趙氏

趙氏者柏鄉明舉人耿復昭之側室也復昭妻楊無子卒遂納氏未幾復昭沒易簣時以氏少女且無子命嫁之氏泣然泣曰幸得



托身君子雖弗遂白首願敢移所天以爲泉下羞哉夫子其待我於他日也復昭領之而瞑氏年甫十九止一女在襁褓家奇窘崇禎戊寅辛巳之間歲大饑人相食柏鄉尤爲兵衝薪爨幾不給氏勤紡績撫弱女及嫡子七人恆忍饑餉之里黨嘖嘖稱賢母焉其律身尤端嚴長齋繡佛足不踰閭者六十八年康熙九年無疾而終年八十有七大學士魏裔介文其碑曰行潔志芳皜然不滓因過廬而式焉詩曰柔嘉維則若氏者可則也已

### 永清張科妻劉氏

劉氏者永清張科之妻也年十六歸張未三載而科沒沒時氏已有娠矣張故豐於財科有二兄卒後氏之父母舅姑俱促氏更適人勒折百端氏不爲少動已而舉子雲惠乃請見父母舅姑泣且誓曰向所不卽死者徒以是耳今幸生男天不絕吾夫之嗣願以

死守不知有他父母舅姑皆不悅而罷自是詬虐之無虛日會天  
大寒氏夜裸孤兒操紡績姑哭入其室辱罵之命婢汲水注其牀  
息燈火且曰吾以觀爾冰操也敗室烈風牀上下冰凍寸許夫有  
女弟聞哭聲踉蹌至氏衣冰結錚鏦如被甲兒噤不能啼小姑急  
納懷中溫之乃少蘇黎明姑排闥入見其女與氏足陷冰中堅不  
得拔且怒且憐之攜其女去其後姑將毒氏小姑輒身先之夜必  
持被就氏宿姑無如之何兩伯兄謀強納里中無賴少年小姑聞  
以告氏氏挾刃自防曰倉卒有變終以是爲歸爾小姑因語氏曰  
父母所以逼嫂爲二兄也二兄計出於此爲家貴也盍推以讓二  
兄自全性命與其殺身禍嬰兒也氏深然之於是乞一陋室操作  
其中會永定河決伯仲廬舍俱漂沒不數年相繼卒又皆無子於  
是水退田淤悉爲膏腴地氏乃盡有其業卓然稱富家雲惠長而

生子鑄讀書爲縣諸生氏年七十八無疾而終君子曰孤臣孽子  
酷矣氏之所遭其操心慮患殆又甚焉詩曰其虛其邪既亟且  
氏之愚不可及也氏之智尤不可及也

### 通州張維垣妻姚氏

姚氏者通州張維垣之妻也維垣初與氏定婚卽隨從父炳宦楚  
中炳卒於官維垣寄居湖廣家焉後以事北來始成婚甫三月卽  
還楚氏居母家閱歲維垣遺書絕婚令改適姚泣告戚黨曰吾無  
故絕於夫命不辰也願終身爲張氏嫠婦時年僅二十三耳氏事  
父母孝每歲時伏臘輒往祀張氏之先及父母沒始歸依夫族叔  
家年踰五十循循執婦道張氏義之爲嗣一子已娶而天氏守貞  
五十一年年七十三卒張氏族人高其節葬於張氏之壙從其志  
也詩曰女也不爽士貳其行若姚氏者可謂遇人不淑者矣



平谷關某妻王氏

同縣馬馭妻顧氏

王李妻倪氏

李

王氏者平谷貢生王漁璜之女也性貞淑解詩書年十九適關某事姑相夫皆以禮甫三載夫疾衣不解帶者五閱月疾力矢從死歸與父母決越數日夫卒父往慰之氏曰父忘繞膝時授兒書耶天地人謂之三才兒雖女子亦人耳幸勿以兒為念父方外出乘閒投環死顧氏者防禦守平谷顧天寵之女也幽閒端慧幼失恃事繼母王以孝聞年十六歸馬馭妻為室三載馭妻卒氏生子一驥方在抱哭而絕者屢矣姑察其意恐其以身殉也謂所親曰吾一兒一婦一孫兒死賴有婦婦孝不啻兒婦存謂即吾兒存可也今兒死婦痛又將死婦死吾孫其胡賴以生耶不如吾先死吾不能坐視此也婦聞之強起營喪葬咸如禮日事孀姑曲承色笑姑若忘其為無子也者康熙十八年地大震民無完室多流離失所

者婦侍姑衣食益豐於前期年姑沒婦哀悼幾殞命後一驥入縣  
學尋舉於鄉氏不樂而哭一驥長跪請命氏曰始吾哭汝父汝祖  
母恐吾哭且死今汝祖母先吾而亡不獲見汝之成是以悲耳氏  
守志至六十四歲康熙四十四年旌倪氏者平谷貢生爾訓之女  
也年十五適同里王李甫三載而李病沒閉戶自經者三均以救  
免戚族以氏弱諷之改操氏曰靡不有初鮮克有終乃引刀自刺  
以明已志自是垢衣糲食足不越戶閩朝夕奉繼姑恩勤無異所  
生年六十三卒康熙四十四年旌韓氏者平谷李某之妻也年十  
九夫故子方在抱舅姑利其嫁屢逼之氏堅拒不從舅姑怒逐之  
其兄招之歸氏不可爲賃室以居有饋遺者皆不受紡績自給拾  
薪撥蔬并日而食時時往省舅姑無異平時比舅姑沒夫弟析產  
得故宅撫子顯華成立以勤儉起家乾隆三十年六月有二羊鬪

於山占者曰大水至矣闕日山水暴溢有夜聞空中語者曰此節婦里也不可不護翌日水退而莊結石灘民皆無恙云氏年八十四無疾終君子曰可以死可以不死死傷義然亦各行其志耳古之稱程嬰杵臼者曰死易生難今觀四氏無生死一也詩曰百歲之後歸於其居氏之志如斯而已

東明房莖妻甄氏

同縣戴曾隆妻張氏

甄氏者東明房莖之妻也年十八于歸莖質弱善病結褵五月而病沒沒時語氏曰我不能生汝不可死雙親弱弟惟汝焉賴之異日報命重泉也氏哀痛幾絕水漿不入口者四日翁姑諭以撫孤大義氏泣受命董喪事無巨細皆備不以毫髮累親時氏年十九勉爲婉容侍左右又五六年翁姑繼逝痛絕一日始甦營葬悉如禮康熙六十年黃河決邑當其衝居民率結筏逃氏曰狐死正首



邱未亡人將焉往耶虔禱神須臾水退丈餘村廬皆淹沒惟氏室無恙人咸異之氏撫夫穉弟篝燈紡織卒爲之成室及生子卽以後焚翼之者已出僉曰夫死無異生婦生無異死乾隆十三年旌之如例同縣戴曾隆妻張氏年十七于歸生二子夫亡痛毀不欲生其祖翁以詩解之曰傷哉已死鬼痛此未亡人好撫兩孤子蒼天看得眞張乃撫子事親姑患痼疾日夜撫摩手爲之孿子建高入庠食餼建坊旌之詩曰予手拮据予所將茶予所蓄租予口卒瘖曰予未有室家君子謂氏之不死所以成其家室也

永年杜斯美妻盧氏

盧氏者永年盧睿之女同邑諸生杜斯美之妻也雍正三年斯美卒氏年二十五絕粒數日念孀姑老子衛龍甫週歲斷一指自誓以守家貧時乏食氏勤紡績養姑無缺供明年姑病氏籲天乞身

代及卒竭力營葬家益困八月值斯美忌辰而衛龍適患病垂絕氏引刀自裁鄰婦救之復投於井又救出而衛龍適愈氏歷六時許亦獲甦里人呼所投井曰思井衛龍受母教補博士弟子知名於時氏終以驚憂多病年四十七卒廣棟爲作思井行君子曰氏之死不死若有天然詩曰視天夢夢夫又烏知天之所以禍福人者非人之所能測也

### 蠡縣龐國棟妻魏氏

魏氏者蠡縣龐國棟之妻也夫早卒矢志不嫁祖姑徐姑董皆守節者魏氏竭力養之衣食無一缺日織綿布一端或給之綫爲織每端必長一二兩然不多取一錢農時躬自耨不與男子語不與比鄰往來祖姑八十餘躬負之出入姑老亦如之終則葬以禮族人或賻以資曰吾貧暫貸用必償如不責償是以非人視我也日

夜織不期月輒完所負樞發披緘負引或請代氏曰吾一姑無子孫吾在卽其子孫也可代乎雍正三年邑大饑邑令喬某振饑民過其門曰此貧家也盍告振里役曰寡婦曰寡婦亦吾民也若饑則與之里役呼之告以故氏曰吾固乏食然食朝廷米責償不役以自喬喬曰振也何償爲役復之氏曰償則食儻不償吾孱婦耳何功以報朝廷乎鍵其戶再呼之不應喬歎息而去後喬歸之米一石又辭不受役力請曰邑父母養汝節可拒乎氏不得已置米於案拜而受大吏聞而賢之旌其閭並爲擇族之賢者嗣其家君子曰氏一農家婦耳然安貧守節知大義跡其言何諤諤也蠶多獨行君子聞顏元李塉之風者多興起有立志氏或漸其化者與詩曰刑於寡妻此之謂也

懷安朱琇妻秦氏



秦氏者懷安秦國賓之女同里朱琇之妻也年十六歸朱朱窶人子氏食貧善事舅姑越五年琇亡氏年纔二十一遺子依中方在抱氏茹荼育子及依中長以窮不能養覓食他鄉死於外氏無替功總麻之親自操爰紅自食其力雍正九年縣宰某高其節時以米遺之十年卒年七十二爲請於朝建坊旌之君子曰氏安貧守志歷五十六載如一日焉可謂難矣詩曰有美一人傷如之何此之謂也

清苑何溶妾張氏

張氏者清苑州同何溶之側室也年十七歸溶溶故素封家政無鉅細皆倚氏以辦時嫡子三人孫曾皆成列氏循分無愆禮乾隆三年溶沒氏年二十四遺命盡室資遣之旣葬氏泣謂家人曰吾家豈乏饘粥使妾了殘年耶身已委人矣誓無貳志守節七十五

年親見六葉人僉以太夫人尊之不受幼穉拜者皆答之曰主僕分也卒年九十有九君子謂氏於是乎知禮詩曰實命不同此之謂也

### 永清張其蘊妻曹氏

曹氏者永清諸生曹之瑚之女同縣張其蘊之妻也年二十一歸其蘊其蘊家故饒於貲至父學詩始中墮乾隆七年其蘊卒氏年二十七長子和甫五歲次子穆尙襁褓姑張年老善病其蘊兄弟五人皆遠出惟仲家居惑婦言不顧母姑就養於氏僦居一室中棟宇破敗不能蔽風雨氏則牽蘿索茅晨夕視餐寢能得姑歡氏故端飭有姿色東安巨族郭某慕之謀聘爲繼室重賂其父之瑚且邀飲其家酒酣出一匣皆金珠重貨也且曰以是爲若女聘翁無憂窮乏也之瑚爲所動持匣詣氏不敢言逡巡啟匣置几上目

視氏氏知其意立起碎之泣謂父曰知兒者莫若父兒生且三十年奈何不諒若此耶之瑚慚退反告郭郭愈重之復啖其弟詭稱母疾氏歸其母與家人晝夜聒說之氏大憤不俟駕馳歸自是足跡不踰閭閻寄語謝父母曰兒不肖不能事父母繼自今當如兒死無復存問爲也方郭謀聘氏仲氏亦預其議至是爲戚泣與之確田五畝鄉鄰亦高其節謀周卹之氏拒不受則屬以刀尺縫紉事故厚其工貲與之由是日給得無匱養姑撫子終其身君子曰富貴不能淫貧賤不能移威武不能屈氏誠不愧大丈夫哉詩曰彼其之子舍命不渝此之謂也

易州田氏雙節婦

崔氏者易州田之棟之妻也之棟家赤貧傭工度日氏以針指佐之年二十九之棟死撫子虎成立爲娶妻王氏亦同里農家女也



未幾虎又卒王年僅十九遺孤數月多勸之改醮者王以死自誓時家益困僅租地數畝耕耘灌溉姑偕婦力作炎風暑日不聞怨悔聲夜則姑婦相對織胡風峭寒十指皆凍裂率以爲常秋穫輒先納賦饗殮不繼弗顧也氏積勞十八年喪其明王日夜扶持調護之奉養無一時缺姑婦皆享大年子亦謹慈稱孝子焉詩曰未堪家多難予又集於蓼若王氏者尤可風已

霸州王經妻何氏

寧河岳景純妾張氏子屹然妻朱氏

何氏者霸州吏員王經之妻也經年二十四病卒氏絕食數日家人以撫孤勸始進食踰年歲稔人相食氏攜三歲孤兒居破屋食草蒂草蒂盡繼以榆皮榆皮盡啖葛藟輒棘喉日號泣聲徹比鄰鄰媪勸之改適曰以汝才貌何自苦乃爾氏曰婦人從一者也予非惜一死正以王氏祚衰不忍死棄去況生去耶後以織紝自給

撫子承芳成立年八十七卒靈河晉景純妻張氏者年二十四生女而寡撫嫡子屹然峻然守節五十四年乾隆九年旌先是景純病革問其志氏入室自經家人救之甦乃取磁鋒刺面塗以墨景純領之卒氏攜子女廬墓以居逾歲始歸面墨不復脫人稱爲鐵節婦云屹然爲邑諸生屹然貢成均嘗有聲孫曾元三世入庠者十有四人屹然妻朱氏亦早寡撫子事姑歷五十九年年八十四卒乾隆十九年旌詩曰謂子不信有如暎日張氏之謂也

臨榆錢朝樾妻張氏

張氏者臨榆張汝賢之女錢朝樾之妻也早歲失恃怙叔父張漢三育之乾隆十年適錢子丹之子朝樾子丹故山陰人流寓臨榆遂家焉朝樾貧無立錫地氏慈順執婦道事翁姑惟謹于歸甫兩月朝樾外出死於錦州氏年十八無子哀痛誓不貳集蓼茹荼以

婦代子時時忍饑以養其親如是者三十餘年翁姑沒哀毀盡禮年五十有三矣無可依寄居王氏家鶉衣藿食以終君子謂氏志窮而益堅詩曰終窶且貧莫知我艱此之謂也

### 撫寧魯樊二女

魯春姐者撫寧人也幼許字同縣劉柱兒柱兒養於李氏李氏父母亡柱兒歸宗李族之黠者與魯謀曰李魯匹也魯未與劉婚彼劉矣彼復妻李妻不可也於是魯還柱兒聘而以春姐別字焉劉以貧故罔敢問春姐聞之曰易李而劉仍吾夫也女更二夫爲不義吾恥之亡之劉告以故劉愕眙間魯家偵知之遽劫春姐以歸與劉鬪而訟縣宰曰春姐可敬也判之歸柱兒爲之合登公堂以鼓樂送之夫家觀者如堵越歲而縣又有樊正姐之事正姐幼字楊氏子子年十歲而病廢楊之父母不欲以己子累人女也使辭



樊婚強而後可遂更字正姐於王正姐聞之悲不自勝凡王之聘物未嘗御也嫁有日矣正姐問其母曰兒將安嫁母曰嫁王正姐曰見幼非受楊氏聘乎母曰然有之顧楊病且廢吾憐兒爲兒擇壻也正姐默然比夜潛出踰深山密林數十里豈農達楊所其翁與夫不識也其姑素識之問何爲曰求爲婦也翁姑痛曰正姐高誼古名媛不之過惟恨吾子病吾兩姓合議而離婚也今日奈何未幾其父母偕族黨集楊室勸之歸正姐慨然曰夫病天也吾爲病夫婦亦天也違天不祥必使舍吾夫而別求之請以死誓詞情慷慨勸者皆感泣楊樊知女志不可回而慮無以謝王也鳴諸官使告絕於王而正姐卒爲楊氏病子婦其歸之前一日夫病頓瘥可強起焉時乾隆十九年甲戌之冬正姐年十八春姐事則乾隆十八年癸酉之秋年十七云縣境之台頭營有黃孫氏者素忤其

姑聞春姐事改供婦職其姑病危刲股爲羹進而姑病瘳君子曰匹夫匹婦一念之誠感天地格鬼神而聞者且爲之興起焉教化之不可以已也如此夫詩曰豈無他人微子之故二女之謂也

### 安肅田廣宗妻張氏

張氏者安肅張聰之女同縣田廣宗之妻也性端莊嫻大義事舅姑以孝聞年十八于歸逾三年舉家患時疫氏綢繆調護廢寢食者百餘日日祝天以頭觸地至血流已而舅姑亡夫病又劇氏親嘗其糞驗吉凶而氣已絕矣時田氏僅有叔一人年十齡氏哭之絕粒五日鄰里勸之曰若死叔將焉依田氏之嗣絕矣氏不獲已起營喪葬而家貧無儋石儲惟以紡績易衣食每食必俟叔飽乃食否則忍饑終日不使叔知也叔長爲娶妻韓氏年逾四十無子氏復出紡績資爲買妾而妾又病無子氏日夜焚香籲天以祈後

韓氏逾五旬始生子人咸謂氏積誠所感也既而叔亡氏又撫其姪延師課讀卒翼之成人時氏守志四十七年矣乾隆三十二年旌君子謂田氏之不絕其嗣氏之功也詩曰不康禋祀居然生子此之謂也

饒陽李氏楊氏兩賢婦

李氏者饒陽老農女也年十五歸趙姓繼子良璠時良璠年甫十三耳氏以弱穉笑舅姑歡半載遂歸母家良璠執手私屬曰勿改適久之當復聚也氏亦矢以死守明年良璠迫於父母命復娶楊氏女氏未之知也其父母匿不以告後探知其夫已再娶雖志而守志益堅道翁卒爲持服欲奔喪父母阻之不果乃以死自誓告其父曰我死必昇歸趙氏三尺土乃安宅也其父不得已鳴於官時良璠娶楊氏已六年矣縣宰兩難之而楊氏固賢淑憐氏高



義欲歸之跪請於姑姑爲感動有悔心縣宰遂判之歸以成其志  
楊氏大喜請於姑親迓之氏感其賢相得無間也君子曰楊氏李  
氏可謂兩美必合矣詩曰其新孔嘉其舊如之何此之謂也

### 平谷劉秀姑

劉秀姑者蒲州知府平谷劉登庸之女也端慧絕倫幼許字淮南  
舉人程光奎子允元允元隨父南旋音書永絕登庸罷官居天津  
之北倉而沒家貧質其屋女與庶母姊妹嫂姪八口僦居李姓破  
屋中隆冬無衣姊妹相依以背常二三日不舉火逮夏淫雨壞其  
屋移居屋旁草棚內上下胥沾溼鄰人好義者謀救之商諸準提  
菴尼照震尼慨然潔一室以居鄰人復醵錢數千付之日糴倉米  
二升供一餐不能飽也未幾姊妹嫂姪相繼死庶母病疫又死女  
孑然一身矣藉鍼黹餬口居準提菴者十六年後復移居接引菴

十四年人無見其面者菴中有醮事婦女紛來求一識不可得初女之弟宗善者贅武清李氏生子永安八月宗善之楚遊不返永安既長歲一輦其母來省視欲攜之歸氏堅不可曰容徐議之而允元南歸後其父死家亦墮謀北上就婚不果時有傳女已故者從與允元別娶允元義不負女曰卽死必耐其墓然後議遷延者凡三十年乾隆四十二年始附漕艘至北倉訪女墓無知者過楊村遇操撥船王福功者北倉人也詢之曰嗟此女苦矣其父沒後一家相繼亡惟此女尙存其所許字淮上程某聞已物故而女誓不嫁寓吾北倉準提菴後遷津城菴中不知何名矣程躍然曰子卽程某也竊謂女已死此行特欲以杯酒澆孤墳耳今尙在乎顧訪之當何從曰有啞僕者義人也女在城時節必往候之前聞菴有嫁女者憤極以拳毆尼幾殆既知嫁者爲尼姪乃已若得若人

導之宜可達允元急返津訪啞僕得之欣然挈允元至接引菴叩  
門告尼以故尼曰子之來無憑驗真耶僞耶曩有新選大尹少年  
喪耦託尼道意女愠不食者二日我叩頭謝罪誓不復言乃已不  
可以重污我貞女也閉門而入允元惆悵久之回至船語其表姪  
楊吳增楊約眾以男義女貞公呈天津知縣金之忠金訪之確遣  
巡司喻尼勸嫁女以無父母主婚辭巡司曰縣父母真父母也且  
女之所以守者爲程也程已至而猶不嫁將何謂乎宗善妻弟諸  
生李文燦聞之亦力勸之金爲卜吉出數十金備婚嫁資又出十  
金曰妝奩細碎吾輩有必不能詳者持此補不足可也李退語其  
姊及尼照震女聞泣然久乃許時六月八日也金潔館備彩輿大  
書義男貞女金字牌執役數百人親迎於接引菴送之船行合盃  
禮時夫婦年垂六十矣是日觀者塞途皆咨嗟歎息至有泣下者



居數日金爲辦裝送之南旋淮陽吳恆宣作義貞記傳奇以演其事天津知府荆如棠亦爲賦義貞行曰猗嗟夫婦人倫首男義女貞古無有彼蒼作合終有時白首依然成匹偶岑川程氏家山陽好客人呼小孟嘗需次京華名藉甚殷勤爲子擇齊姜蒲州太守衣冠族有女深閨掌中玉一見傾心縞紵投百年願把絲羅續佳兒嬌女甫髫齡一語纔通締好盟銀河有待雙星渡未屈魚軒百輛迎從來世事有消歇富貴榮華如轉睫雁羽終成南北阻燕飛竟作東西別弱冠乘龍願未諧相思何處問鸞釵堂前空有宜男祝牖下曾無季女齋矯首浮雲暗於邑迢遙京洛無消息夜夜思縈寡鵠愁年年只抱鰥魚泣之子零丁立路隅蒲東歸櫬返鄉閭家園蕩盡淒涼甚一僕扶攜致直沽腸斷同懷諸姊妹空門寄跡甘憔悴隻影煒煒繡佛幢臨妝賸有烏雲在妾意君心各自留斷

蓬飛絮兩悠悠任他鄰女誇紅袖望我良人矢白頭苦志貞操神  
所佑分明暗室朝曦透偶逐蒲帆直北行其中自有機緣湊繫纜  
延迴一水濱征車僕僕擁飛塵路旁爭說劉貞女觸撥羈人記憶  
眞叩門尋訪深深語罷織停鍼聽觀縷莫認浮游蜂蝶蹤須知本  
是鸞凰侶風流令尹畫堂開五色花封手自栽豆蔻梢頭春已去  
合歡枝上月方來同心結縮無差異上如青天下列地蘋藻思將  
婦職修結褵不負先人意裙布相莊食案邊一經追憶轉淒然赤  
繩繫足三千里曠日盟心五十年輕裝結束回南鷺魚水新歡豔  
行路卜築枚皋舊宅邊親操井臼相依住唱隨琴瑟有利聲一日  
賢名徧楚城好共青燈酬絡繹羨伊黃髮戒雞鳴肩輿迎到黃堂  
側舉止幽閒大家則貞義長昭彤管輝作歌示我邦人式是年兩  
江總督高晉聞於朝詔並旌之賜坊額曰義貞之門君子曰劉之

節程之義金之賢詎非天作之合哉詩曰今夕何夕見此邂逅子  
兮子兮如此邂逅何謂喜之甚而相慶之辭也

獻縣紀汝備妻張氏

張氏者獻縣紀汝備之妻也氏爲武強舊族年十九而寡持服三  
載不去衰麻孀居三十七年雖酷暑未嘗解衣卧侍舅姑婉容屏  
氣退卽端坐如枯木數十年未有見其喜笑者汝備兄弟六人別  
院而居氏獨與舅姑同院姑患病瀕危夜焚香泣涕禱天終身不  
食葷酒汝備沒時無子氏視含殮畢卽泣拜舅姑及諸叔求立後  
必得請後起故仲弟生子樹發就襁褓中指與之氏愛逾所生而  
教育義方督學不少假卒入庠爲名諸生乾隆四十七年建坊旌  
之越四年乃卒彌留時屬樹發曰必與汝父合葬姑舅旁如生時  
定省也其叔翁紀昫誌其墓曰世以守節爲婦人分內事是誠然



矣然茹苦含貞閱數十年如一日則千百人中不能得一人也人顧可以庸行易之耶論者謂貧賤之家節孝難富貴之家節孝易然以境遇論貧賤者身無所倚仰事俯蓄無所資其難誠爲極矣以人情論則艱苦者無逸志而富貴者席豐履厚以孤寂之身處華靡之地姑姊娣姒寒暖殊則炫而易搖僕隸婢媪炎涼異則激而生悔且奢佚之身不能耐勤苦則奉養難無父之孤坐擁舊業不惰則驕則教子尤難今氏以媳代子以母代父所爲不加入數等乎詩曰恩斯勤斯鬻子之閔斯此之謂也

灤州賈克明妻孫氏

孫氏者灤州賈克明之妻也年二十九生女而夫亡翁娶再醮婦攜其前夫女翁愛女與氏讎日凌虐之使改嫁不從則設法強賣之初賣於馮乘夜率眾毀門入強持之納車中急馳去氏呼號以

頭撞車血汨汨出族人驚起追至馮家挾氏而還繼賣於豐潤方甲氏懲前事常以刃自衛時臘盡甲覷村人赴市突入其室挽之登車車中伏健婦二左右抱持之氏刃傷數人族人聞之大怒紛紛持械往復奪之歸氏乃避居女家翁又欲鬻其居室逼之出族人不允爭之始獲留數椽適豐潤鄭某喪婦翁又使人媒合之時氏在女家翁給之曰翁病且殆矣氏驚痛登車夜發及入門則鄭氏家也氏暝目謂之曰汝無婦而欲婦吾吾賈家婦也誓死不再爲人婦乃從衣底出短刃指之曰儻相逼以此先之鄭懼婉言以謝送之歸蓋氏自夫亡後至六十歲凡三遍嫁矣君子謂氏遇艱而志卓詩曰不我能愾反以我爲讎此之謂也

灤州李氏兩節婦

趙氏者灤州諸生李學詩之妻高氏者李學書之妻也學詩學書

爲同母兄弟友于敦篤娣姒亦相親愛如姊妹一門之內雍雍如也一日弟涉河而溺兄躍身救之相抱死時趙年二十五生二女高無出年僅二十耳旣失所天而家苦貧無以爲生娣姒矢志不貳啜蔬水咽秕糠而歲時必潔酒饌祀其夫久之饑凍益甚度勢不可同居高就食母家趙往依夏氏女語其壻與女曰未亡人止借一席地不以衣食相累也紡績自勤壻偶有所遺卻而不御歲除前必營數日糧呼高返舊廬同營祭享有高其節相慰勞者則謝曰此吾分內事也卒之時趙年八十六高年八十君子曰孔子之賢顏淵也曰簞瓢陋巷人不堪其憂回也不改其樂此聖賢之所難而二氏所遭之遇所處之境其不堪殆尤甚焉在易之節曰苦節又曰甘節若氏之守節無子無產一無所爲而爲之而處之泰然歷數十年如一日苦耶甘耶蓋均非氏之所計也詩曰樂子



之無家二氏可謂能自樂其樂者矣

涿州王萬齡妻張氏

張氏者河南張書銘之女涿州進士王萬齡之妻也咸豐七年萬齡宰高縣禦賊死氏聞耗痛絕者三嫡妻曹氏憐其少欲嫁之氏以死誓守志曹病氏禱天乞代十一年扶柩旋里貧無以自存氏布衣椎髻以紡織易衣食足不踰梱者二十餘年同治六年亂賊起氏杜門死守不懼州牧憐其節月以錢米資之詩曰誰謂荼苦其甘如薺可謂能甘之者矣

遵化何門兩節婦

王氏者遵化何國正之繼妻也年十九于歸三載而國正亡無子以夫姪振廷嗣生三子義川士英士魁皆爲諸生而振廷及三子復相繼沒先是義川聘閻氏女婚有期矣而義川病議改期女聞

之謂其母曰期改而病痊可也設不測何以爲女地以吉歸不愈於以喪往乎父母哀其志如期嫁之入門成禮卽脫簪珥侍湯藥如是月餘義川卒氏年甫十九依祖姑以守先意承志能博堂上歡涕姊尤雍睦壬年八十有一卒閭孀居二十四年以同治六年卒嗣子耿光士魁子也君子謂閭氏爲知禮詩曰旣見君子我心則休此之謂也

### 大城李柏齡妻陳氏

陳氏者大城李柏齡之妻也光緒初年饑餓孳相望柏齡攜全家赴汴尋年柏齡死僑葬於汴城西南隅氏父母遣人勸氏歸欲改醮之氏請備於人稍得貲扶柩歸使人固促之氏不得已買輒砌其墓託其夫友魏姓護視之遂辭其姑與兄嫂而歸氏至家誓不再適時時飲泣以夫柩未歸爲念後聞其姑已改嫁兄嫂皆赴湖

北首問杳然氏大哭欲鬻產隻身赴汴適江蘇善士張少連施振至大城聞而義之與十金氏遂往尋夫墓至則積水汪洋問魏姓無知者氏大哭曰妾跋涉千餘里今不得夫骨死不歸矣忽有一叟至曰若尋汝夫墓耶因指之曰柩在此淺水中誌石尙在也氏叩首謝之叟忽不見氏如其言堰水而涸之果見誌石得一髑髏不敢信因祝曰夫如有靈請示我俄於泥中得白絹一片蓋其夫生時所衣也婦大喜負骨歸有商人助之十金其姪名長官者奴於汴氏並贖之以歸葬其翁與夫於祖塋之兆觀者皆歎息泣下光緒七年直隸總督李鴻章奏旌於朝君子謂氏不以死易心不以遠喪志詩曰道之云遠何云能來觀於氏可以風矣

大城王國風妻張氏

張氏者大城王國風之妻也氏爲農家女知大義年二十六國風



死遺一子龍里族來弔慰氏泣曰死者已矣一孤之託其將誰屬  
吾非貪生而畏死者也聞者皆泣下氏晝採薪夜織布爲母子生  
計子旣冠庸頑不能稱母志氏乃傭於其邑劉氏同治七年馬賊  
起舉室惶恐無所措氏獨懷其主田券而遁事定主厚酬之不受  
後傭於獻縣裘訓臣家隨其眷出守滇南道津門遇一女迷路啼  
市中無賴少年將脅之去氏呵止之詳詢里居親送之歸其父母  
謝以金力卻之不受及至滇太守以嚴刑治苗民擄掠往往見筋  
骨氏憐之適令製藉刑裊氏爲之加厚太守責之曰裊貴薄不貴  
厚何其拙也氏對曰恐服刑者痛耳太守不悅旣而歎曰古之格  
苗者以德今之制苗者以刑效酷吏之行昧先王之訓吾直老媪  
之不若矣自是不輕用刑專以德化之苗民大悅僉曰氏一言之  
力也太守致仕氏亦隨之歸里以性不好利貧如故也初氏遇一

卜者云汝之壽不能過五十至光緒二十四年氏年六十四矣適市復遇前卜者駭然曰汝積何陰隲百齡可期也因詰其平生終不言而退君子曰有善不伐其德隱矣晏平仲陳踊貴履賤之說而景公爲省刑氏以一女僕而一言寤主非陰隲而何詩曰無言不讎無德不報此之謂也

節義傳終

大清畿輔列女傳第三

貞烈傳上

大清畿輔列女傳第四

天津徐世昌撰

高陽王鈺妾張氏

同縣劉百順妻王氏  
束鹿穆烈女

張志和妻邊氏女  
石如玉妻彭氏

張氏者不知何許人高陽太學生王鈺之妾也年十五侍鈺鈺病卒氏偕嫡阮矢志誓苦守順治元年土寇張鳳臺聞其美強委禽氏引刀斃面賊驚歎而去守節五十餘年郡守旌之邑人劉柟為立碑紀其事同縣劉百順妻王氏順治六年河間鎮守卒劫而欲污之氏不從斷十指罵愈厲被殺鄉人憐而葬之越二百餘年高陽有張志和妻邊氏者同治七年擒匪張總愚竄畿南志和女經姐避亂遇賊於途強劫之大罵不屈賊連刃之仆於地叔父允升至奪賊刀殺二賊賊擁至允升戰死母邊繼至以身覆女女呼母速去曰兒必死必不污賊手也賊益怒殺其母女罵益厲割舌焚



之尸焦立如植賊大驚始舍去賊平以貞烈上聞九年旌其母與  
叔皆入祠其同時死難者東鹿則有穆烈女石如玉妻彭氏女字  
芝姐父舉人穆某爲邑名族教家有法則女生而聰慧性端重不  
苟笑言同治七年捻賊至境劫之去女哀之不聽大呼父曰速去  
勿顧兒伺父行稍遠乃厲聲罵賊賊怒鞭之仆曰汝佯死耶復牽  
之女忿起踢賊中其目賊連刃刺之死時年十八石如玉舉人妻  
彭氏不知何許人也同治七年張總愚北竄如玉命于兆奎以牛  
車奉母避寇猝遇賊如玉以身蔽母賊斫之死兆奎被刺傷其妻  
呂亦受創彭抱如玉尸命兆奎速去叱之乃行行里許亦遇害彭  
謂姑曰賊已西速還里乃以夫帶繫車轅自經死呂昇至家旋獲  
甦君子曰匹夫不可奪志亶哉使三軍之帥皆有匹夫之志安在  
其可奪也詩曰誰爲此禍有三軍之責者能毋怍乎

新安梁大用妻孫氏

蠡縣徐沟妻王氏

李壤妻辛氏

容

氏 高陽張毓椿妻白氏

譚氏 安肅張永錫妻王氏

劉賡福妻龐氏 韓蓋光妾

孫氏者容城孫丕基之女新安諸生梁大用之妻也順治四年大用誣死西市氏慟欲自裁兄弟阻之不得乘閒經死容城孫奇逢讚之曰嗚呼沙城雁觸斷碑煢煢一羽不忍獨飛嗟哉烈婦夫羅網羅六月寒永宛如之何矢身一死血濺青莎嗚呼抱子之甄影不可磨蠡縣徐沟妻王氏不知何許人也康熙十八年沟卒欲身殉舅姑責以撫孤大義越五月孤殤自經死釋纒屍不仆有異香邑人爲徵詩名烈香集同縣辛氏進士辛禹奕之女也適諸生李壤壤才高善病病三月且殆氏禱天乞身代及死氏繫囊夫背殮之一慟而絕救之始甦家人晝夜防之嚴乘閒卒自經死年二十二距夫死僅一日也先是氏姨母孫氏適容城諸生李煥元煥元

侍父之皖同知任病咯血氏于歸甫兩月見病劇許以死殉及煥元死吞蓮珠數十粒不絕歛續後漸息悲開笥檢衣裳記之簿呈於舅姑家人皆有遺贈歸室登牀取帕自經死面如生時康熙三十一年也皖之人臨而哭之又相與歌詠之桐城張廷玉新城王士禎雲間王鴻緒皆有詩其翁彙爲貞烈集京江張玉書序而傳之是年辛氏始生迨康熙六十年卒復殉節明年學使陳世倌以貞媛並列上其事於朝旌焉新安又有張攀鱗妻荆氏者年二十于歸佐其夫養母凡八年夫病侍湯藥三載無間夫沒自縊以殉雍正七年旌桐城方苞書其事謂聖人繫易以陽剛爲女德之賢剛者天德也天德之氣藹然而溫利者爲陽慘然而凜栗者爲陰凡婦人之順於舅姑宜於家人慈於子姪者皆陽明之發也故其變也激而爲義烈得天法之正焉吾於荆氏之死悟易道矣乾隆



時高陽有張毓椿妻白氏者于歸後侍夫疾經年及沒哀毀不欲  
生家人勸止之爲嗣其夫姪教養周至時毓椿大父官天津學博  
方告歸家貧甚齋鹽并刀尺組紉之事氏皆身任之病則躬調  
飲食侍湯藥朝夕扶掖累月不交睫大父旣沒則進家人告之曰  
吾所以不死者以犬父老且病嗣子未成立耳今吾事已畢將從  
吾夫於地下矣遂飲藥卒時乾隆五十九年四月也同縣劉賡福  
妻龐氏任邱舉人龐慧珠之女也性慧通經史賡福官廣東病沒  
氏年二十九聞訃作絕命詩誓身殉夫兄劉步駟以同知仕湖北  
偕之任所氏辨裝赴粵迎夫柩歸至湖北乏資隻身歸姑沒營葬  
畢曰予可死矣歸窆別母整衣拜祖祠夜自縊時光緒元年十一  
月八日正其夫故時也檢篋得遺書皆慰其母者讀者爲之流涕  
其姊劉賡雲妻張氏賡泰妻楊氏皆夫故守節教子終其身光緒

八年旌焉進士韓蓋光妾譚氏亦高陽人蓋光官部曹沒於京氏  
家居聞訃投繯以殉同時旌者有安肅張永錫妻王氏者安州貢  
生王豈之女也性孝通經史年二十一于歸翁官陝西鳳翔知縣  
氏偕夫侍任所善事庶姑御下尤仁厚數年翁沒氏典釵釧助夫  
扶柩歸夫服闋需次陝西署江口村巡檢未履任而沒氏典衣殮  
之越三日自縊柩前時年三十有九太史張大楠助資以殮並送  
之歸里族人以夫姪鴻文爲之嗣君子曰若氏者皆孟子所謂舍  
生取義者也死固難而處死尤難王有撫孤之責孤殤而後死白  
以舅父在舅父沒而後死龐以夫柩未歸姑尙在姑沒而後死死  
之久暫不同而死夫之心則同所謂其揆一也詩曰靡不有初鮮  
克有終氏能終之難矣哉

寧晉馮學曾妻王氏

王氏者明巡撫湖廣都察院右僉都御史寧晉王夢尹之女同縣諸生馮學會之妻也學會病沒氏二十三生遺腹子晉祺一女甫四歲氏矢志守貞撫子女值夫弟夫婦相繼亡遺姪盛祺方三歲氏爲撫育之逾已出焉土寇亂起攜家入城依母氏汪以居順治五年五月三日寇破城入夢尹宅其母端坐罵之賊執刀擣火相迫母持挺奮擊中一賊仆地頭破血溢賊呼其黨環而戕之擁氏投火中氏從火中躍出大罵不絕口賊反刃中氏額而死詩曰具禍以燼若氏者可謂無忝所生矣

### 易州范烈女

范氏者滿城范良弼之女字於易州田乃倉年十九未及婚而沒女欲往弔母弗許遂潛服毒曰生爲田氏人矣死爲鬼當入田氏墓嘔血二日母掖之過田氏拜姑訖乞留夫棺同葬言已而絕是



夕庭前海棠冒開忽變爲白定興杜越祁州刁包容城孫奇逢安  
州魏一鰲永年申涵光北方大儒也皆爲詩文紀其事保定知府  
胡延年因彙其集曰雪棠紀初女母劉早亡有姑適安肅郝氏孀  
居撫之爲己女卽女之今母也女卒之歲爲順治九年年十七時  
夫兄乃疆生子濟方四齡立爲嗣翁時雨命分田五十畝給之新  
城王餘佑高其義以女許其嗣子孫奇逢曰人之貴貴其節也婦  
死夫與子死孝臣死忠君死社稷豈分輕重哉然婦之節死節較  
守節爲烈而女子死節較婦人死節爲尤烈君於社稷臣於君子  
於父妻於夫分定於天情根於性其死之所不容己義之所不容  
逃者也然世猶難之若未覩夫面而爲夫死與未委質爲臣而爲  
君死者同科則尤烈之烈矣更可異者冀北春寒海棠忽發人耶  
天耶至誠動物鬼神效靈此又古今所未及聞見者刁包曰在易

之坤以臣道妻道與地道並言則知忠臣事君烈女事夫其義一也雖然士爲知己者死委贄策名而死於君者蓋不乏人若夫未任一命之寵而必殺身以報之吾得兩人焉曰王蠋曰徐應鑣女爲悅己者容同牢合卺而死於夫者蓋不乏人若夫未成二姓之歡而必捐軀以報之吾得兩人焉曰祥符陳氏曰嘉興項氏蠋以布衣死齊應鑣以太學生死宋是男中之陳項也陳未成婚而死楊子項未成婚而死周郎是女中之王徐也若滿城范烈女之以死殉夫於陳項又何多讓焉今讀其絕命辭幾於文山衣帶之贊矣易曰地道有終烈女其知之哉君子曰女其不朽矣乎詩曰豈弟君子來游來歌以矢其音氏得諸君子傳之名益彰矣

豐潤殷壯猷妻李氏

李氏者臨藍參將豐潤殷壯猷之妻也順治十一年孫可望寇臨

藍壯猷繕甲兵爲守禦計氏出簪飾佐之軍士皆感泣願效死可望屢敗衄怒甚萃衆攻之圍久不解而援者又不至壯猷念久困非計欲開關出戰長子文請俟援不聽乃突圍出力戰沒於陣氏聞變急拔劍揮二子出二子俯泣不知所爲氏厲聲曰癡兒不速行殷氏不血食矣以印授次子質令疾趨去寇衆已擁門不可出復回舍母與兄皆伏劍死矣乳媪指之曰後園可匿也遂倉皇奔深草中伏三日得免闔門殉難者四十八人賊平世祖嘉壯猷忠賜勅書晉秩廕拖沙喇哈番二世乾隆十年採遺事乃旌氏節入祠祀之君子曰壯猷忠矣李氏從容就義而教子數言卒延殷氏則烈而智也詩曰宗子維城無俾城壞此之謂也

深澤袁邦璽妻楊氏

同縣李金錫妻賈氏

楊氏者名賜娘深澤昭武將軍化儒之女同邑袁邦璽之妻也邦



璽工書能文氏年十六于歸倚窗鍼紡佐夫讀如對益友翁繼禎  
有六子氏爲第四婦同居一堂不以少婦自諉敬潔慎威儀每昧  
爽熒粧整服出謁翁姑供巾櫛肅齋膳惟飭焉康熙元年邦璽應  
試不得志怏怏卒氏痛哭投井家人救之甦邦璽葬五日氏水漿  
絕口哭失聲家人日夜防守之越六日衰絰詣夫冢歸與諸姑語  
顏稍展家人議速立嗣安其志氏給之如廁乃持白練逕詣書齋  
懸梁而絕年二十五夫妻先後死距五日家人爲合葬焉同縣賈  
氏者名全姐賈錫之女李金錫之妻也年十七歸李越八載夫病  
年餘事之無少懈時翁服未闋見夫疾篤乃假歸窻取嫁時衣履  
以歸金錫臨終謂氏曰孀母在堂無子代養汝成吾志可也氏揮  
淚曰姑有伯兄在不待妾也夫唱婦隨何生死間乎夫卒視含殮  
哭盡哀已而輟哭曰夫去猶未遠也趨所居小樓鍵戶自縊乾隆

十年旌焉初金錫沒父來唁將別委曲開諭之返未及家而氏訃至君子謂氏以閨門弱質而慷慨赴義無少瞻徇可謂烈矣詩曰民之秉彝好是懿德此之謂也

蔚州宋典姐

宋典姐者蔚州衛西厓頭宋有懷之女也年十六許字州民蘭尙安子州廝兩姓皆業農以羅帕約爲婚未及娶州廝暴亡訃至女方代母舂穀遽輟舂慟哭絕粒數日父母百計慰之意若少解者已而乘母出裂原聘羅帕自縊死康熙四年正月二十三日也衛有司具事請旌暫厝之淺土五年學使蕭惟豫聞於上越歲蔚之士民議遷典姐柩合葬於州廝之冢義士李雲華龔石誌墓而魏象樞爲之銘曰其心如結其血爲碧不爲劍合蜜爲玉折生則異室死則同穴天子聞之書曰貞烈象樞又告法若真朱彝尊汪琬

各爲詩文以彰之宋彝尊爲賦宋烈女行其辭曰紅羅持作帕素  
練持作巾何必合衾裯始爲同心人宋氏有女典生長蔚州之野  
西崖之山年紀十五餘許配千字村村民蘭州斯大義結夫婦忽  
登泰山籙人壽不得久女方曬穀聞之心悲哀長跪告父母兒當  
赴泉臺信誓旦旦不可乖父母聞女言尊嫜爾未事慎勿捐形軀  
相保親父子各各遺室中涕淚終不止月正三十日其日二十三  
白日從東來奄忽墮西南闔門夜無人女向空夜坐攬我素練巾  
接彼紅羅帕徘徊寢室旁自掛中門下父母啟視哽咽不得言觀  
者四方至歎息日暮還童童喑嘯側乃有松柏林誰言寸草荻乃  
有松柏心汪琬曰禮云女子幼從父兄嫁從夫顧有未嫁而殉其  
夫者或疑之以爲過竊嘗以謂君臣夫婦一也士庶之未委質者  
猶女子之旣字而未嫁者也謀人之軍師敗則死之謀人之邦邑



危則亡之然則不居其位不食其祿與居其位食其祿而非有軍師邦邑之責者先王固不輕責之以死也然而夷齊餓死首陽之下則孔子稱之童汪錡死於郎之戰則許其勿殤夫夷齊未嘗事紂也汪錡不在成人之列又非有祿位於魯者也由是言之是皆可以無死及其既死而孔子曾不以爲過得非世教旣衰人倫道息凡忠孝義烈之行聖人急欲借之以砥礪末俗而不嫌其矯激者與其又何疑乎女子之殉夫也禮曰男女非有行媒不相知名非受幣不交不親然則媒氏行而可以知名矣聘幣具而交親之分可以定矣曾子問曰取女有吉日而女死如之何孔子曰婿齊衰而弔旣葬而除之夫死亦如之此言女子於其夫之死必服斬衰以弔也夫生則有交親之分死則服斬衰之服如是而遂以身殉之其何過之有烈女生長農家非素聞姆氏之誠者也又非嫻

於詩書之文而習知禮義者也顧一旦慷慨殺身雖名家士族亦有所不逮此其義烈出於天性夫豈得以矯激少之哉君子曰魏象樞可謂善勵俗矣詩曰四方爲則又曰四方爲綱其諸君子表彰之心與

### 永年楊之孚妻馬氏

馬氏者永年馬安之女同里楊之孚之妻也年十七歸之孚越五載之孚死氏哭之幾絕者再矢死不更適服除翁與父謀氏年少無所出會當嫁之氏聞之跪請於姑曰曩不卽死正以代夫事翁姑耳而忍棄之耶姑曰語不云乎無兒不使婦氏曰語謂婦不願者難以強也若矢以終身事視兒在有加焉何不可者翁意終不同一日父有使至翁所切切耳語氏泣然曰是必爲我死期迫矣康熙十三年元日謁拜伯翁翁以婦寡可勿謁氏曰拜止此矣忍

不一受耶聞者意謂氏將嫁故別耳亦不疑也逾日謂姑曰新歲  
欲以杯酒澆死者墓姑許之因詣墓慟哭久乃回潛服毒毒發給  
家人曰病耳家人見鼻口迸血知爲毒相與強藥之稍甦曰我以  
毒一人喉當卽死今宛轉苟活將何爲家人守之不得死至人日  
防稍疎夜再服毒屆晨遂死年二十五氏容止端麗言笑不苟多  
賢行瀕死無異常時申涵光曰馬氏一農家婦非有詩書保姆之  
訓亦非習見節義有所觀感也彼鄉之人嫠而再適以爲當然故  
其翁若父謂少年宜嫁無子女宜嫁閭巷細民之情固無責焉而  
烈婦不動聲色視死如歸一毒再毒氣乃加厲孱然一女子勇過  
賁育豈獨弁流愧之哉涵光旣爲之傳而申涵盼復爲作烈婦吟  
以彰之其辭曰紫聰山鬱蒼洛淦水清瀏山水積靈奇沙磧產瓊  
玖扶風有靜姝嫁作宏農婦夫家儒者流賁產良貴富婦家本寒



微祖上起畎畝女蘿附修柯自顧慙非偶欲爲門楣光結禱奉箕  
帚賦性比松筠居家能孝友憶昔方兒時自負原不苟阿父運并  
刀阿女持熨斗誤剪雙鴛鴦歎惋不離口如何比翼禽一旦不相  
守詎知成讖言身乃遭陽九良人冰玉姿魚水期白首于歸五載  
餘所天慘不壽赤虬下庭除魂魄歸培塿痛哭摧心肝願從地下  
走家人苦相留一言敬爲剖堂上有翁姑家中有父母忍死承歡  
顏大義掣其肘無何媒妁來甘言巧煽誘青春過隙駒不如早歸  
某婦笑而不言言者爲忸怩旋當歲履端登堂謁從舅舅曰婦休  
矣婦言侍不久再拜退逡巡廚中儲酌酒縞素上邱原血淚灑林  
藪賤妾有素心冥冥君知否一叫一斷腸日月爲慘黝翁姑利奇  
貨貪歸過矇眵畏婦矢靡他避人常喁喁婦聞心已知無復能忍  
垢薄暮閉閣眠詭言痛欲嘔妯娌驚扶持藥餌拒不受夜半歸黃

泉鳩霜猶在缶田家耕耨時蓄毒賊稂莠詎意有心人乃爲節義  
取正氣薄雲霄聲稱溢鄰右有司爲式閭親奠酒一卣彤管流輝  
光貞珉重不朽君子謂氏死不從亂命詩曰母也天只不諒人只  
此之謂也

武邑井第大妻滕氏

滕氏者武邑井第大之妻也年十九姑偕氏夫婦同傭於景州諸  
生張企齡家康熙二十七年六月七日第大赴市阻雨未歸傭人  
鄭復量李是磔覷氏獨宿夜半抉戶入氏驚呼復量扼其吭欲強  
污之而衣結甚固乃以帶勒而斃之第大母晨起見之驚告企齡  
企齡嚴詰諸傭鄭李懼欲逃械之州一訊得實府檄員會讞反誣  
企齡獄久不決鄭李忽發狂大號曰氏來索命矣口鼻流血同時  
死乃改檄故城知縣黃亮復讞得其情案始定詩曰誰謂雀無角

何以穿我屋此之謂也

西寧侯烈婦

侯氏者西寧歲貢侯鎮之女也幼端凝明禮教父母鍾愛之年十七于歸某氏子明之明之父夢庚生二女長適人次者年笄矣與舅氏子趙存仁通氏知之以語夫夫童騃慢弗應氏大戚未幾而難作先是夢庚以妻病痺恆外宿前室遺子四皆娶婦妻不能容命析居家事一聽於女存仁時出入姊妹相朋比礙氏不得肆欲並污之以氏嚴謹日夜構諸姑姑素悍益虐遇之日僅與一餐躬操作指骨皆見而氏安之如故也女私竊其履遺存仁乘閒反詰之氏怒歷數其所爲以死自誓且曰行歸偕吾父來與若質舅姑矣女大窘是夕誘明之他出夜半女攜存仁入氏室強刼之氏呼聲達姑寢所女懼且忿乃與存仁急以繩勒氏頸並以灼油灌其



口油猝沸濺及胸皆糜爛而詭以自縊聞事發官捕存仁及女論抵存仁屬其家脅夢庚走訴京師事下山西巡撫嚴鞫盡得其實氏例得旌夢庚本諸生以女故敗其家慙恨死其妻先一年死長女得免議卒爲夫所棄云當氏死時村俗謂弗祥演放爆竹花火以祓之名曰祓社至期觀者累千人忽陰風起沙礫飛擊衆駭散及門歛有物外過若壁立人相踐踏多傷死無得出者康熙二十七年戊辰正月十九日也君子曰處人骨肉而揭其私禍有來矣氏以新婦日陵逼於羣汙衆穢之間非性定志堅其不爲所易者鮮矣氏于歸八閱月卒慘毒以死詩曰肆不殄厥愠亦不隕厥問氏之謂也

玉田桑琰妻曹氏

曹氏者豐潤曹首望之女玉田桑琰之妻也幼嫻閨訓年及笄適

琤事上接下循禮法內外賢之康熙三十年琤隨父開運之學使任得暴疾病且革氏念不起閉戶自經其妣覺而急救之得不死琤卒防益謹出入必偕氏乃請於舅姑曰媳所爲以無子故若爲夫立嗣得歸葬死何爲者舅姑從之以伯氏子文廣爲之嗣氏攜子扶柩歸里葬旣畢督家課子處之坦然家人不復防氏給其子往奠墓卒自縊死于歸僅一載耳年二十四君子謂氏必死以成其志詩曰我心匪石不可轉也此之謂也

通州康流著

康流著者通州康武寧之女也幼許嫁鄰人張京京父饒於財後遷京師家始墮損又素叟詬無節貧不能自存康氏戚黨聞於女女坦然無怨疵其父兄私謀奪女不與京女正色持大義責之乃止一夕女夢張氏使來致命不知何祥私以告其母而京父忽至

通言京已死矣叩之卽女感夢夕也女悲哀素服號泣請於母送之夫家執喪其父兄大駭斥之曰女乃狂邪日夜環向女女收涕弛素服更容貌言動如平時家人稍稍皆散去夜半閉戶悉取所製巾帶綦履焚之衣素服以練自結而死女有妹與同卧起及死妹寐未覺也其父母乃持女喪如京師歸張氏與京合葬郭西白石橋時康熙三十一年也君子曰未嫁死夫非禮也迫於父兄之命而執義不顧卒以身殉所謂求仁得仁者也詩曰我心匪席不可卷也其斯之謂與

新安魏克儉妻王氏

易州田誠甫妻王氏

涑水蘭應祿妻

王氏者新城王餘佑之孫女忻州知州新安魏一鰲之長孫婦也餘佑一鰲皆孫奇逢弟子以文章道德名一時餘佑子曙光一鰲子韞石世相好也氏年十六曙光許歸韞石子克儉于歸後事舅



姑盡婦道克儉善病相之敬而有儀康熙三十二年克儉補易州諸生讀書保定城中疾作氏聞之自易州趨入侍左右卒不起氏擗踊長號曰吾無天矣生奚爲耶吞毒半下咽姑見以指出之大哭呼曰吾與汝舅俱有年汝夫之二弟稚汝夫死汝又死是死吾夫婦也灌以藥日夜令人防之且曰若叔異日產子首與汝氏時年十九矣乃強起治家事數年叔克肅生子繼先遂以嗣之氏撫育之勤髻鬢卽督就外傳夜歸必自課之初克儉藁葬坎下村四十八年韞石立新阡營葬氏見之淚集裳不可拭後佯爲歡笑若無事者夜視兒寢熟乃醜漱齒髮以手畫壁曰吾事畢矣志遂矣端坐几上雉經而卒安肅知縣薛祖順旌其閭爲文刻石樹之墓蠡縣李琰復作傳彰之且曰婦之家祖姑字易州田治埏之子誠甫事夫如大賓誠甫夜出至漏二三下必秉燭莊坐待之無惰容

誠甫早逝撫一啞子育孫成家室今蕭蕭白髮七十餘矣其視烈婦生死皆無負云易州屬涑水有蘭應祿妻孫氏者不知何許人也應祿家貧無立錐地負薪自給氏執炊爨掃除怡然邑養里人賢之未幾應祿死遺孤方七歲氏年二十五呼天搶地絕而復甦者再姑憐其少語之改適氏泣曰媳不死徒以老姑孺子故也乃躬親樵汲以奉姑養子血隨淚盡憔悴無復人狀如是者二年服闋季父孫某密謀嫁氏私受聘諷吉治裝將結諸無賴劫氏登車而自送之氏廉知之往哭夫墓歸而作食食姑與子飯畢投繯死君子曰王氏世爲儒家女讀書知大義若孫氏者一貧嫠婦耳而從容就義乃若此詩曰式遏寇虐無俾正敗氏有之焉

高陽孫之敬妻張氏

祁州戴五姐  
祁州李成姐

祁州寧超字妻焦氏

束鹿宋鄭氏  
安肅商

理姐

張氏者高陽孫之敬之妻也善事孀姑康熙三十二年拾薪於野  
遇惡人郭三黃三欲強污之堅拒不從被戕死邑令鄧某爲旌於  
朝祁州有戴五姐者戴進寶之女也家貧父耕母織僅給朝夕老  
而無子視女爲掌珠適麥秋父母皆力田女方晨炊鄰有張虎兒  
者覷其家無人戲而求狎女勃然怒舉刀斫之虎兒倉皇不得脫  
奪刀反刃女力盡身被數創腦被而死康熙五十七年旌寧超字  
妻焦氏亦祁州人歸寧母家無賴子胡八兒挑之氏怒詈胡以刀  
斫之旣殞復甦仍往詈之越十日乃死年二十一知州羅以桂作  
焦烈婦引彰之爲旌於朝李成姐亦祁州人李天美之女也幼許  
字郝廷柱乾隆三年女年十六習女紅於鄰人馬姆馬姆者武生  
趙文潤之佃婦也文潤適來馬家豔女色挑之女號啼鄰眾排闥  
入執文潤送於州州牧不爲理控之府太守倪贊衡鞫得其實論



文潤與馬氏如律且爲女合婚於郝並易廷柱之名曰嗣甲從其  
父成德請也郡之民聚觀者千人學政錢陳羣爲作紀事詩爭傳  
誦之東鹿宋銀工子婦鄭氏事孀姑以孝聞鄰之惡少覷鄭姿私  
登溷垣窺之鄭泣訴於姑姑曰彼凶人也戒勿張鄭哭泣不食乘  
間自經死邑令執惡少責而流之商理姐者安肅商昆之女也幼  
端重不好嬉戲城內宅前舊有坊女指以問母母曰是汝曾叔祖  
母節孝坊也女曰幾何年矣母曰久矣女曰年久而名存千百世  
且不朽也尋移居南關值秋穫女隨鄰婦拾遺穗過張姓地張姓  
子素無賴見而挑之女怒謂其母曰女爲人侮何顏立人世忿不  
食母鳴之衆將執之翼日女已易衣束帶投井死矣年十三初女  
生時母夢玉瓶盛朱盤中忽女童捧而投諸水曰勿憂寶物至是  
竟如夢乾隆三十年旌君子曰勿求生以害仁有殺身以成仁此

孔子所謂志士仁人者張氏諸人又何多讓焉詩曰無感我悅兮無使尤也吠推其志與日月爭光可也

肅寧宋氏五烈女

肅寧苗烈女

宋氏五烈女者肅寧人也父爲旗莊頭生女四女孫一有姿容莊主見而悅之召之侍寢五女義不辱一夕皆自縊明日縣宰往驗怵於勢不敢言葬而題其碣曰宋五烈女之墓康熙三十四年事也越四十餘年又有苗烈女者肅寧諸生苗維臣之孫女也性貞慧寡言尤精女紅年十七字同邑馬生于歸有期矣父謂女曰汝外祖母老且病當省視且依以刺繡無曠也以老嫗邢氏伴之其宅有僕人袁守福者瞞女姿乘夜攜利刃排闥入逼汚之女號呼徹中庭刑驚起斥守福守福殺之外祖母陳奔救復殺之傭人張光良聞聲急持械入守福砍之不中刃折復取莖刀支

解之呼女曰尙不從乎女罵益厲刃之死體無完膚時乾隆三年六月十八日也越日殮面凜凜如生時有司上其事詔旌其門爲建坊入祠戮守福屍祭之于大崑題其墓曰昔弔五女墓英風歎奇絕貌茲一彈丸復出閨中傑卓哉苗氏女禦暴剛且決皓月鑑清心飛霜點碧血其頭可以斷其體可以截其堅不可磨其白不可涅泰華竦其秀冰霜昭其潔竊效正氣歌拜手爲題碣君子謂宋五女之屈不獲伸有司之責也苗之事國法伸矣而連而及者三人有餘痛焉詩曰畏行多露言慎之不可不早也

### 交河董才姐

董才姐者交河董萬財之女也生而端重年十五待字於家適父母他出有宋八平窺女獨居踰牆入室女大呼倉卒以剪刀禦之八平虞事敗以刀刺其胸齒皆墮落女罵不絕口頃刻死康熙三



十四年三月二十七日也父母歸痛而厝之不敢鳴於官知縣徐  
烺夜半過其里聞鬼哭聲迹之數里至女瘞所時正溽暑啟視之  
面如生繫宋八平不刑而服論如法詩曰以赫厥靈女有之焉

### 豐潤金烈女

金烈女者豐潤谷砬之聘室也雍正八年砬以力學卒女年十五  
聞訃請於父奔喪入門哭盡哀登堂拜舅姑易服成禮擇伯氏子  
爲嗣理家有體能得堂上歡有司至者皆額其門至是守志已十  
有三載矣乾隆七年五月五日時祭畢乘間自縊以殉邑令徐崇  
熙往弔之坐女自盡室聞異香馥馥如蘭逾時不散又明年上其  
事於朝旌表如例詩曰有飶其香邦家之光此之謂也

香河朱某妻芮秉貞

天津邢文貴妻殷鳳娘  
左氏 天津徐某妻張氏

靈河樂某妻

芮秉貞者香河朱某之妻也少知書明大義朱素無賴其母亦不

謹於行雍正十三年于歸未匝歲有惡少數輩與朱閔飲姑命行酒氏不從雉經死劉之璋弔之以詩殷鳳娘者天津貧家女也幼孤兄國柱赤貧謀生外出有邢嫗者故娼也母周氏爲媒所賺以鳳娘許字其子邢文貴既知之恚而卒初邢嫗以穢行誘其長媳程而文貴前室于以不從姑所爲被出鳳娘年十六入門邢嫗復日夜逼之鳳娘不聽文貴私謂鳳娘曰我家衣食在是汝奚辭鳳娘拒益力以是日日遭笞罵嫂程復從容告之曰吾知汝志矣然我亦良家子誰願爲此者以遭挫折圖苟活耳且子不知于氏婦乎于族大人眾姑度不能制乃與決汝孤單徒一兄且貧何能爲耶是時氏自度無能脫拚一死以俟邢嫗益肆虐榜掠之不已復炮烙之炮烙之不已復以沸湯沃之郡守劉廉其事命縣尉往訊至則鳳娘給之曰瘡耳將驗之鳳娘曰吾一婦人病豈可裸體令

官府見乎再三詰之終不言姑與夫之惡未幾潰爛死縣宰往驗  
身無完膚訛實置邢嫗及文貴於法時乾隆七年正月二十一日  
也縣宰爲買棺葬之西郊四烈婦墓奔送數萬人查禮爲之哀辭  
曰河之流兮清且漣有美一人兮河之干惟鳩媒之無良兮棲鸞  
凰於荆棘嗟遇人之不淑兮攀芳洲而太息恥中葺之不可道兮  
寧九死而無言心匪席不可卷兮金百燬而愈堅喜父母之孔邇  
兮表貞風於煒管觀者爲之塞途兮淚潺湲而泣泣魂冥冥而得  
所歸兮從嫠女與靈妃雖髮膚之毀傷兮抱禮義而全歸登荒邱  
而憑弔兮歎珠焚與玉灼山之高水之長兮仰千秋之貞魄至嘉  
慶初有新河左氏者寧河樂某之妻也其姑暱惡少欲并汚之咱  
其姑以利姑許之適氏歸寧返謁姑方與惡少飲氏忿甚至夕待  
姑寢自經死姑丐鄰人之無賴者守其屍艷婦色欲淫之忽空中



有物擊之死又有張氏者天津徐某之妻也某無賴欲售氏氏告  
繼姑遂死楊慎恭以詩弔之君子曰氏可謂能自潔其身矣而爲  
親者諱殷鳳娘尤知道焉詩曰中菁之言不可道也所可道也言  
之醜也此之謂也

宛平高章侯女

高貞女者宛平高章侯一作頤侯之女也幼許嫁秦文照舅姑已前沒  
矣雍正五年文照死女請衰經代夫承重奉祖姑父母搯之不可  
遂歸秦氏時年二十二章侯兄弟三人相繼死家又中落女之父  
黨無可依者女庶姑李氏誓守志與同起卧者六年做衣菜邑隆  
冬常無綿處之泰然乾隆元年感疾卒卒之日命衣衾完者勿以  
殮悉盡之祖姑君子曰傳謂人之於天也以道受命若女其殆庶  
幾於所受者歟詩曰婉兮變兮季女斯饑此之謂也

安州張貞女  
雄縣孫貞女

張貞女者大學士張允隨之女也少許字安州陳惠榮子藩爲室及笄而藩死女聞訃請奔喪母慰之旣知其不可奪乃使告陳氏時藩叔父德華官京師命其妻往辭之女聞叔姑至縗而見號哭不絕聲叔姑相對嗚咽不能致一辭母曰兒旣欲歸陳此叔姑也以一哀忘敬可乎女卽收淚起問起居奉茶薜如事姑儀叔姑欲有言母曰止是其志決矣乃約日具車歸陳氏旣至郭外從者請假館更吉服女不可急驅入門哭而盡哀姑止之曰勉事我老人乃屏居一小室聚瓴甌爲坐卧具一老嫗侍左右卻稻米食其疏者姑委長家政與之金珠則曰此非嫠婦所宜佩也不如盡賣之易田以供祭其母思女趣歸甯女使人言於母曰兒非不念母顧義不忍三年中釋衰絰也以嗣子貴封恭人卒年四十有一道光

五年旌於朝後同治間有孫貞女者雄縣孫秀先之妹幼許字同里陳姓子未醮而夫亡女年甫十二請奔喪母阻之不可奪性婉順善事母衣食皆取給十指并自治喪具爲身後計有世族潛委禽母與兄陰許之閱其事屆期以告女撫地大號嚙臂以誓百端慰之佯止哀如平時夜分自縊家人急救之得不死母兄知其志之終不可易也遂聽之女冬夏設一床藉亂草截木爲枕毀妝握髮與人言終身不見齒一日疾革謂家人曰葬我何所其家未之答乃撫牀一慟而絕年四十一葬之侯山時同治十有一年也新城王樹枏弔之以詩其一曰孫家有女未及笄金翹峨髻琅玕姿香櫳寒鎖春煙重白晝飛霜入羅洞孤鸞一聲哀激雲隔簾驚墮芙蓉魂黯黯花光空血痕其二曰東家少年天上郎黃金飾屋珊瑚牀青鳥銜書道余美女聞不言矢以死夜半珠梁頽素塵尺練



啼寒月如水其三曰千年井水凝不波瑤池古雪寒峨峨弱指牽  
絲轉涼玉攢碧無言聲斷續哀鶻口血啼未乾四十流光春漸闌  
奇香一夕靄天半中有雙鶴青雲端君子曰孫氏之女年甫十二  
耳而執義不屈若此豈天之生是使獨與二女所處之境豐嗇不  
同而守志則一詩所謂女子善懷亦各有行者也

### 天津高爾信妻魏氏

魏氏者天津高爾信之妻也雍正十一年年十七歸爾信爾信僦  
屋官廩東與宋某庭宇相望某妻與氏有違言數搆之其姑明年  
氏母遣從子自銑迎氏歸適姑及爾信皆外出某妻走告其姑曰  
汝婦與人通入戶卽探囊金與之復嗾東西家無藉者數人闖入  
交鬩強解自銑衣衾立借券不得共證之氏呼自銑曰亟鳴之官  
若書券我卽死自銑暗弱急求脫執筆欲書氏望見引刀自剄眾

嚇自銑且誘之卒書券氏死因以券為徵有司莫辨也當自銑大辟既知其冤以矜疑繫獄乾隆元年赦免邑士朱紹夏孫坦為文以標白之屬桐城方苞為之傳苞曰烈婦遭怪變謂惟死可自明而即用其死以成獄辭徒以自銑之券耳人心之抗傲至此吁可畏哉古之聽訟獄者必悉其聰明致其忠愛以盡之疑獄汜與眾共之世有鳥獸行而能殺身以自明者乎自古婦人之義皆以死而彰魏氏則既死而猶暗鬱易曰日中見沫又曰載鬼一車聖人繫辭以為世戒也君子謂氏能以死昭其志詩曰彼譖人者亦已太甚此之謂也

天津金振妻丁氏

天津王廷錡妻劉氏

丁氏者天津金振之妻也振貧課子弟讀氏以女紅助之蓬戶湫隘每進食必以禮闈門內肅如也振無子氏撫繼女如己出屢勸

振置妾不應氏密以婢徐氏納焉生二女然卒無子而沒時乾隆元年八月也氏晝夜號泣不絕聲典衣鬻器以葬事畢卽不食妾與繼女力勸進食氏重違其意勉進醯粥數勺夜半伺妾女寢卽就柩前長跪自縊貧不克殯郡人爲捐貲葬之立碑紀其事後三十年有天津諸生王廷錡妻劉氏者寶坻劉少穆之女也乾隆三十六年年十九歸廷錡二載而沒氏自經以殉家人驚救獲甦其叔以繼子侍姑勗之氏曰叔休矣若兒者侍姑有伯守節無孤生則徒重親憂死則可全婦道與其作無益之未亡人何若遂從一之初志乎叔休矣其叔退而謂人曰是女之志已決亦命也夫未幾乳絕食死君子曰氏可謂視死如歸者矣詩曰彼蒼者天殲我良人如可贖兮人百其身身旣不能贖矣死又何惜焉

南皮張裕慧妻王氏



王氏者交河王某之女南皮諸生張裕慧之妻也年二十歸張克修婦職乾隆元年裕慧病篤氏潛禱割股療之不起家人察其志防之嚴氏佯爲不死狀踰月自經死年二十五視其壁上遺裕慧小像高尺餘眉目如生其迹非畫非墨氏不解畫又無人能爲追寫其貌者氏死親黨羣集觀莫測所自來河間紀昀謂此烈婦精誠之至極不爲異也神之所注氣卽聚焉氣之所聚神亦凝焉神氣凝聚象卽生焉象之所麗迹卽著焉生者之神氣動乎此亡者之神氣應乎彼兩相翕合遂結此形故曰緣心生象又至誠則金石爲開也其翁張景運著秋坪新語者也錄其事徵詩歌詠一時稱盛是年旌焉詩曰君子作歌維以告哀景運之謂也

任邱邊蘭珠

邊蘭珠者任邱邊某之女也許字靜海蕭氏子年十五未婚而夫

卒女請奔喪事姑父引經義折之女以從一對父不聽女乘間引  
刀自刎乃昇之蕭翌日始甦以貞節終其族叔邊連寶賦貞烈吟  
曰吾家女猶子自名爲蘭珠蘭珠年幾何十五頗有餘八歲學縫  
紉十歲誦詩書進止有儀則大義獨懷如借問許何族蕭氏有彼  
姝舉舉蕭氏子毛羽異凡雛譬彼珠與璣配此瑾與瑜兩美天所  
忌玉樹忽彫枯蘭珠不苟活誓欲捐其軀但念蕭有母無與其居  
諸匍匐欲奔赴百歲奉孀姑蘭珠啟阿父淚落連珠子兒身南指  
車兒心東流水南指有定向東流無回瀾矢作蕭氏鬼願父從兒  
言阿父得聞之中心大悲摧雜引古典籍欲以慰女懷遷葬與嫁  
殤周官所禁訶未嫁殉死壻相去有幾何旣嫁未廟見死歸女氏  
黨况乃未結褵越禮翻長往斬衰而往弔旣葬乃除之禮疏有明  
文遵此無復疑蘭珠仰頭答禮實如父說但以處中人豈爲我輩

設援禮便其私兒所不屑潔且云從一終從字當何起方其許字  
時久已相從矣豈必待從牢方爲從之始一言旣相許中路乃棄  
捐死棄無奈何生棄實罪愆蘭珠辨禮文滔滔如懸河時時誦詩  
句之死矢靡他阿父頓足言誓不相從許那於坎窗中顛擠我愛  
女阿女計未出仰天但悲號悲號未云已畢命昆吾刀引頸冒白  
刃一片血模糊滾滾桃花水迸落紅珊瑚舉室盡驚惶醫藥四奔  
驚阿女鐵作肝阿父面如土魂魄杳渺間將死幸未殊昇至蕭氏  
宅翌日乃息蘇雖云稍蘇息尙在人鬼間死也爲其易生也爲其  
難蘭珠殊無難性秉金石堅精誠貫千載不待相策鞭忝與風教  
責況屬吾猶子聊爲作此詩以待采風使君子曰一與之齊終身  
不改女知之素矣詩曰百歲之後歸於其室此之謂也

獻縣艾鎮妻劉氏



劉氏者河間諸生劉盡義之女獻縣舉人艾鎮之繼室也氏家故貧幼失恃兄嫂鞠之迫於孤苦不待督戒女職皆勤而精年二十餘會鎮喪耦求能敦實習勞苦可以爲巨室子孫法者遂以乾隆三年聘氏爲繼室氏事親畜下處妯娌皆當翁媪意六年九月鎮謁選且行以暴疾卒氏方甯於家聞之踉蹌歸長號數聲而止察其意若有變翁媪慰勉之不答旣殮且殯氏從容再拜言曰婦無狀福且薄失所天以累二老人然婦非家男婦又有兄弟姊姒可以事老人前子五人皆成立婦死無後憂敢丐婦身從夫於地下言罷哭失聲翁媪不許遣奴嚴防之氏佯爲無死狀其媪告翁曰可無憂婦爲其叔作履鞮矣越日諸子婦咸侍側獨不見氏往視之則盛服端坐已而嘔蓋已服砒矣急解救之婦不肯但曰無我苦然所服砒未經煨力緩故不得卽死輾轉牀蓐兩閱月至十二

月二日始絕體潰無完膚年二十有七邑人士上之當道奏旌其  
閭君子曰不畏義死不榮幸生丈夫之所難也氏以一弱息而致  
命遂志從容若此詩曰其儀一兮心如結兮此之謂也

大城孟黑子妻苑氏

苑氏者大城孟黑子之妻也僑居安瀾城安瀾者古之狼城口也  
永定河決其姑賣酒隄上欲陰召其婦以爲媒氏別居郵堡中不  
至姑怒窘辱之復偕無賴年少至氏舍飲婦色益厲不可犯姑暴  
怒氏知不免密綴上下衣沈於河時乾隆五年六月五日也其夫  
得其屍於武清箔甕口凡八日始殮竟體芳潔顏色如生高其偉  
蔡必達杭必成皆弔之以詩必成詩曰珠玉沈淵光不滅椒蘭被  
焚芳不歇苑家有女秉幽貞能與古人競奇烈十七結髮爲夫妻  
貧賤糟糠心亦怡蛾眉曼睩不自炫高堂日夕承歡愉阿姑藉婦

居奇貨移家故傍大隄住楊柳青旗新篳醜喚采遣作當壚婦行  
郎賈客手相牽姪女何曾工數錢閉門自勤維與織陌上徒迴驄  
馬鞭春風桃李花開落生性不尋花裏樂姑意拂然日見凌不許  
深閨守帷薄深閨慘淡暗傷情此身皎皎常分明願託微波表清  
潔捐生直比鴻毛輕君不見昔時海烈婦紉衣忍向江濤赴羞逐  
行雲巫峽陽甘心汨沒桑乾渡六月狂瀾暑雨俱何人舉網出貞  
姝沈埋八日葫蘆裏猶抱如瓊顏色殊吾聞匹婦強死能爲厲況  
乃精誠動天地人告九閻冤魄伸書名彤管垂禋祀我來尋渡狼  
城許爲弔貞姝沈玉處讀罷邯鄲絕妙辭石若有憑石能語是年  
大吏以聞旌焉詩曰人而無禮胡不遄死可謂善死者矣

獻縣黃貞女

任邱舒貞女

阜城寇貞女

靈津王貞女

黃貞女者楚人也幼字獻縣李某未嫁而李沒女誓死歸守三年



矣一夕夢李某迎次日往訣母未返而卒女家執古禮葬黃氏塋側其舅往哭之女墓忽自裂兩家歎異乃與李合葬焉紀昀賦詩曰總帷一息寄餘生三載親調厨下羹此念從來堪自信妾身誰道未分明延陵有劍心相許屬國吞氈志竟成特與人間存大節不關兒女有深情西風驚破夢依稀鬱鬱埋香事竟違地下應無鵲夜渡墳前忍使鳳孤飛延津寶劍終雙去合浦明珠解自歸誰與重翻新樂府古來會唱華山畿咸豐時又有任邱舒貞女阜城寇貞女靈津王貞女皆河間轄縣也舒貞女許字李祖培年十七未娶而祖培沒女聞訃涕泣不飲食衣編素欲往夫家父母慰之不從翁其鸞遂迎以歸事兩代翁姑以孝聞立族子奉錦爲嗣家徒壁立奉親教子守志四十餘年咸豐元年旌寇貞女字七姐學博寇瑞之女也幼許字李某子李子殤女年方十一未知也逾三

年父母爲議婚女始悟不食不語越數日竟死時咸豐十一年十月十五日也李請於寇迎其柩與子合葬焉王貞女者王福祥之女也許字同縣張慶山婚有期矣慶山死女聞之欲往弔父不可思奪而嫁女日夜號泣曰旣受張家聘矣卽爲張家婦誓不貳志父無如何乃給之曰張子已死汝難爲婦權爲其義女可也女曰旣爲義女必往省禮也父諾而送之夫家泣而拜曰今幸得侍舅姑矣遂不復歸以夫主藏內室朝夕祀之縣宰旌其門曰節勵冰霜君子曰女之生死不同其貞一也詩曰鬢彼兩髦實維我儀若貞女者祇知我儀焉而已

天津張懷清

張懷清者天津貢生張廷錡之女也生甫七歲聞父誦木蘭從軍詩欣然注聽父愛之以爲類已授之書輒解悟一日手烈女傳一

編父叩所願女舉孝女曹娥對父默然稍長習鍼術藝出羣女上  
廷錡家貧而性嗜飲女以女紅爲貰酒年十九許字同邑王埈婚  
有期矣一夕卒女聞之邑變母氏戒家人防之翼日晨起女言笑  
若平時傍午父兄俱外出母假寐女告嫂暨妹曰我入廚備午餐  
視厨中甕水涸呼老僕汲水滿甕復注水別屋釜中屬幼婢執爨  
火自入廚摘蔬引刀著案閣閣有聲少頃復至嫂妹所訊鹽米羸  
虛狀嫂妹益不疑女疾入廚久之甕水沸婢呼女不應往推門門  
閉大呼家人壞門入女已倒入甕死矣時乾隆十二年三月二十  
日也年二十有一廷錡趨歸哭曰嗟乎竟有是哉吾女自曩年授  
書時已爲今日識矣君子曰知仁勇三者備於一身矣善養父志  
近仁言動如恆近知從容赴義近勇詩曰其人如玉君子爲之莫  
生芻矣



臨榆郭烈女

郭烈女者臨榆郭泉之女也年二十許字灤州范氏子彬范故貧  
彬又以疾廢其姑憐女少議退婚父未之許女檢原聘釵環質之  
以奉姑薪膳又時時以指工助之或以爲不可女曰身許范氏何  
爲不可者越數歲彬疾不起其姑親往女家勸其改適女誓死不  
移姑還其判示決意會其父他出其母仍未之允也而姑退婚之  
志益堅女聞號慟誓致命然不露聲色如平常夜分挑鐙別室整  
衣投繯以死年二十七知縣程閏生刻石紀其事並請建坊旌焉  
君子曰舍生取義殺身成仁士君子之所難也女以一弱息力持  
於倫紀之關從容於生死之際可不謂賢乎且夫許字而未醮與  
既醮而寡者有閒也其姑以家貧子廢求寢前議至於再至於三  
與其父母或意有所輕重而潛生悔嫁之心者更有閒也而女之

立志堅貞不肯稍有依違如此此真所謂一與之盟終身不改者也古忠臣義士處艱難之際往往不顧其勢而必求其濟至萬不得已則以身殉之今女當姑之初議退婚也卽盡質原聘親執女工易錢帛以餉其姑是卽古人不顧其勢而必求有濟之心也及姑旣決絕然後萬不得已而出於一死其節烈之氣亦何減於忠臣義士哉詩曰旣不我嘉不能旋反視爾不臧我思不遠其女之謂也

### 棗強屈瑜妻劉氏

劉氏者棗強諸生劉貞之女同縣屈瑜之妻也不輕顰笑父母役以事不怠而處與儕輩接無疾言遽色將笄情益婉婉或爲稱述前媛節義大端輒泫然泣下道及不諱事則顰顙曰此狗彘行也污口污耳吾不願聞矣年十七歸瑜內外稱賢婦踰歲瑜疾將不

起父謂氏曰倘不諱奈何氏漫應曰父無慮女已辦矣及瑜病危氏亟呼曰君俟我君俟我且從君去矣一慟而絕母與家人救之甦曰女已去矣母又何苦女也乃強起治喪事姑憐氏少執其手泣曰苦哉婦若之何氏復漫應曰姑無苦婦已辦矣越二日投繯以殉詩曰我心傷悲兮聊與子同歸兮此之謂也

固安高萬基妻呂氏

寧河王寅清繼妻吳氏

呂氏者固安高萬基之妻也夫病祈天誓身代疾革割臂療之弗痊比沒誓從死以姑命勉起撫孤子越數月子復殤乃閉戶自經及殮面如生異香滿室里人奇之寧河諸生王寅清繼妻吳氏幼聰穎習詩書及笄歸寅清善事舅姑撫前室子如己出寅清病且篤氏置兩棺及沒氏泣曰二老事已畢子復成立吾無慮矣賦絕命詩三章其詞曰忙罷衣衾正五更殘燈昏暗月淒清朦朧淚眼



難成寢又聽鄰鷄報曉聲世人休說舍生難鳩酒權當至寶看到此機關宜認取雙眸一合寸心安思量已定莫思量越是思量義恐傷盡節原非奇異事且爲泉路理行裝遂仰藥以殉年三十詩曰死生契闊與子成說執子之手與子偕老二氏者可謂視死如歸者矣

東明曹三姐

同縣張黑妻童氏

曹三姐者東明農家女也美而嚴重足未嘗至戶外鄰有惡少窺其父母出治田往挑之不從惡少懼事洩會女理機杼卽持器擲殺之身無完膚縣宰王儒故良吏也往驗之不得主名以時值麥秋民率家居不外出閱保甲見某獨在亡曰殺人者必某也責司捕者限之期捕者至洪橋夜方半少憩橋上私祝曰某下隸不勝捕烈女有知願默助之祝甫畢忽一人自東南來倉皇呼曰澶州

坡安在捕給之曰來吾語汝比至執火照之卽惡少也其形似病狂者遂就縛論如法大吏疏其事於朝建坊入祠君子謂女死而能復讎詩曰彼何人斯其爲飄風胡不自北胡不自南其中若有使之者然烈女其神矣乎同縣張黑妻童氏者童六之女也夫蚤亡遺二子氏乞食度日一夕遇趙三於路逼之姦女怒與鬪咬趙指幾斷行人有王姓者馳馬過之趙遁走氏回家自縊死事聞置趙於法乾隆十九年事也

### 廣昌沈貞女

沈氏者廣昌沈福之女也幼字談姓爲養媳生長農家習勞苦勤操作得舅姑歡而性端謹未嘗輕言笑年十四姑命省舅氏返經雙廟有山西客民郝赫張生官者素無賴欺女幼弱將強暴之女堅拒哭且罵扼而斃之移屍河溝柳樹下藏焉兩姓以失女故訟

之官邑令李密訪之獲郝與張一訊而服女以乾隆二十二年三月二十日抗節死至是已四閱月矣肌膚不少變面如生總督方觀承聞於朝置郝張於法詔旌表之如例詩曰于以求之于林之下女之屍若有神護焉

通州趙傑女

寶坻王澤世女

密雲楊文瑛

趙氏者通州諸生趙傑之女庠生丁鼎之繼室也年十九未婿而鼎沒女聞耗奔喪孝事舅姑撫前室子成立乾隆二十四年旌邑人王庚王嶽申張維基爭爲詩美之寶坻貢生王澤世女幼許字單士一爲室婚有日矣士一遭母喪毀卒女請奔喪父母止之將投纆乃從其志入門縞素守節終身邑宰伍澤榮爲徵詩紀其事楊文瑛密雲楊翥女許字汪乾一爲室乾一前室徐其母之女姪也嘗割臂愈姑疾徐卒文瑛未婚而乾一死女聞訃欲自殺父母



防之嚴不得死繼念姑老稍稍進飲食往哭於汪而返屆葬期復臨其穴既葬而返逾歲寒食墓祭訖遂登拜堂姑不復歸乾一家故貧女躬操井日以養其姑乾一有從叔允輿者傷其志挈居京師周之終其身君子曰甚哉毛奇齡之論貞女也孔子曰求仁得仁又何怨亦各行其志耳詩曰穀則異室死則同穴此之謂也

天津周鼎妻龍氏

天津葉烈婦王氏

天津志廬妻邵氏

龍氏者河南汝寧府知府天津龍圖耀之女同里庠生周鼎之妻也鼎疾氏刲股和藥不瘳及卒氏自縊於柩側家人救之甦氏哀泣不已淚盡繼以血月餘絕粒而亡乾隆二十六年學使金德瑛扁以旌之後至咸豐四年天津有葉烈婦王氏者翁姑與夫相繼以疫沒氏縊以殉又有邵氏者志廬茂才之妻也結褵一載志廬卒逾四十九日氏自經於志廬死所一時文人俱賦詩哀之杭州

布衣吳彭年游幕中州其詩有蝴蝶有情同出夢鴛鴦到死不分  
飛之句志廬不知何許人姓名亦不著葉烈婦事僅有傳者君子  
曰婦人之守志非爲名也然繩樞甕牖之中至死而名不彰者何  
可勝道詩曰凡百君子莫肯用訊是不能不望於後之君子有風  
教之責者

天津孟氏吳氏兩妯娌

關維印妻劉氏

孟氏者天津大沽人也年二十四歸關容越三載生子經野甫一  
歲容卒翁繩武以家貧客奉天時祖姑殷氏姑吳氏俱在堂夫弟  
品年弱冠聘室吳氏未娶而病瘵氏代翁事祖姑代子事姑代兄  
撫弟代父撫孤子仰事俯畜一身兼之既翁老病益困品又亡經  
野七歲入鄉塾氏食糟糠鶉衣無絮竭力女紅結絨冠爲生計一  
日值歲除無薪米里黨皆代爲爨氏恬然安之是時年已三十九

矣而品妻吳貞女適來歸吳貞女者天津鄧善沽人年十七許字  
品越五年未嫁而品卒女聞之屏色服不御有來議婚者女告於  
母無他志母李病經年腰脇痛不能著牀榻女晝夜以手按摩之  
無倦容母卒視斂畢以首觸門扉幾絕兄嫂急止之女曰我之當  
死豈始今日哉隱忍苟活者以老母在耳今母已死誓相從地下  
矣兄嫂晝夜防護之詢可以不死者女曰關氏二老在使我往事  
之則可不死矣其兄姑應曰俟葬母後議之既葬兄終以歸關非  
計女尤其兄之誑已也則大慟不食兄遣使問繩武道女意繩武  
歎曰嗟乎賢哉雖然吾家貧無以養長媳孟氏苦節若而年艱辛  
之狀有不忍見聞者今女再來增予悲乎且余聞歸太僕之論曰  
女子未嫁而或爲其夫死及終身不改適者非禮也陰陽配偶天  
地之大義終身不適是乖陰陽之氣而傷天地之和也可爲我善



謝之使者復其兄女聞之曰我不知書惟知此心不容昧耳復不  
貪者累日繩武知其志之終不可奪也擇日議以彩輿迎之其兄  
欲爲治妝具女曰豈有未亡人而華服乘彩轎者乎至日素服青  
轎而歸於闕孟氏聞吳女之來也且悲且喜與女同居偕力以事  
舅姑居常非門內親不見非相內事不言挑燈共課經野讀日夜  
望其成而經野又病殤乃繼夫從兄哲之子經義爲孟氏嗣二人  
共撫育之乾隆甲午丙申間舅姑相繼死葬胥如禮女謂氏曰我  
今真可以死矣但我死誰伴汝者未幾有同姓關某者死其妻議  
再醮里中謠傳氏與女將改適二人聞之對泣曰人之多言不死  
之故也乘夜裂白布一幅爲二各執其一相對縊族婦覺之壞門  
入救之久乃甦二人大恚誓必死或喻之曰人言何足恤若因訛  
言而死反似有其意而聞之羞忿者盍俟久而自明乎二人始釋

然初氏之伯姑劉氏年十九歸關維印生子哲而維印死劉氏年二十三貧無產以鍼術佐其舅姑撫其夫兩弟兩妹而婚嫁之教子哲成立中乾隆甲科武舉人關氏兩世三賢而孟與吳尤所謂二人同心其利斷金者也詩曰鴟鴞鴟鴞既取我子無毀我室恩斯勤斯鬻子之閔斯此之謂也

### 元氏耿志明妻董氏

董氏者元氏耿志明之妻也志明沒誓死不嫁夫兄志道謀逐氏奪其田產潛許魯某氏不從訟之官誣以不節縣宰怒下之獄有敢稱氏枉者輒笞之命隸人促之嫁氏見事急乃給之曰妾將別適人必往夫墓祭之而後嫁隸人許之至墓上呼天痛哭久伏而不起往視之已自頸矣其姪董騰蛟邑諸生也鳴其冤於縣縣宰怙已過以姦殺姑母坐之時乾隆三十七年也自是邑大旱者數

年人多流亡死者君子曰孝婦含冤三年不雨古之人有明徵矣  
詩曰哀我填寡宜岸宜獄此之謂也

大興沈毓鳳妻史氏

史氏者大興史容正之女同里沈毓鳳之妻也性孝淑父且死屬  
其子友義善嫁之既歸毓鳳伉儷甚諧生二子一日歸寧感疾母  
延醫診之歸而告其夫毓鳳曰吾聞婦人出必壅蔽其面若婦人  
也烏得見男子史氏默然明日毓鳳又以語其父氏謂其侍嫗曰  
吾以婦人獲罪於吾夫且以告吾翁也何生爲遂自經死時乾隆  
四十年九月十五日也君子曰國語敬姜欲室文伯饗其宗老爲  
賦綠衣之三章其祭悼子宗不具不繹繹不盡飫則退然則婦人  
當祭與饗宗老具在得與男子賦且飫而孔子以爲別於男女之  
禮是男女之禮雖至叔嫂不進問者乃以居室無事時言之也禮



無婦人疾病之文然喪禮具載飲酒食肉疾止復初乃言男子疾病之禮之變婦人亦宜然者也若是則史氏之視疾無失禮矣而獨以舅與夫之有違言至於殺身以明其志亦可悲已詩曰薄言往愬逢彼之怒於氏又何尤焉

### 天津金讓妻章氏

章氏者沔陽知州南皮章天坦之女天津金讓之妻也父沒於官扶櫬歸中途宿旅店中遇盜十餘人氏居樓上叱問曰汝所利者財物耳幸勿驚吾母盡擲其箱篋於地盜鬨然而去其膽智如此氏性婉順而輕捷能跨猛馬控縱皆如意素通文史能爲詩既歸讓伉儷諧篤生一女名小玉未幾讓病瘵危氏侍之醫藥均無效夜跪大士前割左臂肉雜藥瀆進飲之立愈讓生母陳偵知之恣然告讓曰兒活矣幸善調攝汝妻割肉啖汝矣讓問氏強之解視

驚但病又作氏悲悼復割左臂以進卒不起含斂之日哭絕移時  
抵暮給婢抱女出自縊於室家人見戶闔久怪之窺窗大驚呼救  
姑以首觸門欲俱死夫兄破門入救之蘇自是晝夜防閑之居半  
載姑命歸靈以寬其哀歸南皮數日女病殤復返於金一日立中  
庭聞雁聲仰天而歎曰雁有歸時人無返日我何生爲因賦詩曰  
此身孤寄似浮雲忍見泥金舊嫁褰春雁又來人不返一天淚雨  
哭離羣未知鴻雁爲誰來嘹唳聲中百種哀只恐有書將不去雙  
飛何日到泉臺以淚和墨書壁間六日不食死時乾隆四十二年  
二月也君子曰氏沒五十餘年至道光壬午津人梅成棟始爲文  
以記其事烏虜世之湮沒不彰若氏者更可悲也詩曰予美亡此  
誰與獨處讀聞雁之詩其視葛生有餘痛焉

獻縣張天錫妻孟氏

孟氏者獻縣張天錫之妻也年十九夫亡撫孤子不育姑亦相繼  
沒歸家依母以居母又亡欲死之父曰從汝志不强也乃剪髮刺  
面以示不貳已聞父受某家聘自剄死馬龍駒弔之以詩曰張家  
小婦孟家女嫁未三年失鸞侶兒懷襁褓姑在堂撫兒不成姑亦  
亡煢煢寄食傍阿母兩家塵甑同淒涼父憐弱息心滋痛踵門日  
日求鸞鳳温言謂女好扶將莫漫啼饑與愁凍誰知女心堅不移  
猶幸母慈能護兒北堂忍痛萱花老陰遣孤鸞過別枝稽首椿庭  
無語泣空負昊天恩罔極祇知殉節報雙親笑赴泉臺志從一投  
纒躍并心何猛求死不死卒刎兒死不孝心勿傷願乞骸骨歸  
張郎君子曰氏之死可謂酷矣詩曰不諒人只雖然成其節者不  
得謂非其父也

天津梁貞女



梁貞女者天津灶戶梁進忠之養女也乾隆四十五年十月進忠負薪河干有抱女自官船下者授進忠曰此女生八月矣其父之官卒於舟母繼殞可善撫之進忠遂哺以爲女進忠有長女已嫁夫家貧無以爲生復歸母家性悍而險虐遇女父母弗能禁及女年十三陰與媒氏謀鬻之女知之曰奈何賤置我耶疇買我當以戶畀姊益銜之有袁進舉者業煮鹽落魄無偶且年將三十姊愆懇父母許之婚進舉將迎歸又陰阻之越三年進舉外出杳然無蹤跡有傳其已死者姊遂謀絕於袁袁母持婚書來女閉戶遙語曰吾志已定欲不義迫我惟死而已袁母知其不可奪而返姊赫然怒捽女髮加箠掠進忠不忍視毆其姊其姊赴水投繯擾不已父母愈不敢爭女受楚毒無悔怨年二十八父脛生疽危甚女剖股以進竟痊女不言家人亦無知之者是時姊虐之愈甚動絕飲

食袁母感女之志且憐之也遂迎歸焉越日父病姊亦病女歸事之如常父姊相繼沒女極力營葬之舅沒姑老夫弟幼弱女殫力鉞耨償負債佐饘粥復迎梁母來同居袁母年八十四梁母年七十七生養死葬皆身任之姊有子流離復召而鞠之長爲娶婦乾隆四十五年旌五十六年夫弟生子紹安撫之以後其夫曰吾事畢矣遂自經死有司葬之天津西門外五烈墳側君子謂女不怨天不尤人詩曰覲閔旣多受侮不少女可謂善受者矣

遵化王立妻孟氏

滄州某甲妻張氏

孟氏者遵化州民王立之妻也氏孳幼女歸寧中途遇山西柳庭傑酒傭也素無賴見氏遽曳其衣出謔語氏駭而詈之庭傑逸去氏至家面頰頽泚失常度嫂詰之氏曰不知誰氏子幾被辱言已而庭傑踉蹌過其門氏背裂手執指之曰是人來矣亟呼鄰人李

甲捕之庭傑拔所佩刀傷李及其嫂氏詈益厲庭傑怒刺其胸而殞鄰人麕至縛庭傑送之官訊得實伏法氏年二十九請於朝樹坊入祠又滄州某甲妻張氏者家貧值凶歲夫妻外出覓食至遵化夫他往失數日氏尋之抵豐潤日暮投於廟僧視其婦也拒之氏哭於廟門外有無賴崔璞者給之曰吾遵化人若尋夫吾導之行吾家去此近可少憩晨同若往可也氏不得已尾之行中途氏足繭藉地坐璞以手擦之褫其下衣氏奮臂揮之且哭且詈且呼璞恐聞於人扼其吭解氏帶縛兩手筆之垂絕乃解帶勒其項而死時乾隆五十五年也翌日里正以事聞於官訊如律而夫他往竟無耗後至滄詢氏里居及其夫名不可得詔監坊旌其墓設主人節孝祠祀焉君子曰氏一窮家婦耳而抗節不屈以死睢陽齒常山舌何以加茲詩曰靡有旅力以念穹蒼若二氏者可謂力弱



而心强者矣

故城張伉妻馬氏

馬氏者故城張伉之妻也于歸未逾年伉死是時舅老姑病弱叔未免懷家故有田十餘畝衣食懼不給氏毀飾勤操作紡績聲恆達旦鬻於市得資輒私蓄之鄰里詰之故不答數年舅沒姑徬徨無措氏曰無虞也盡出所蓄殯葬之無失禮姑卒亦如之葬畢氏竭力撫弱叔提攜教養至三年服除叔已克自立氏乃櫛髮總髻出縞衣素綦自束召夫之族戚拜而言曰妾夫死妾卽無生志奈舅老姑病叔弱妾不忍一死傷夫心乃竊誓柩前自任以代夫職今舅姑繼逝叔已成人吾事畢矣薄田故在儻不棄茲藐孤相與撫育而教誨之舅姑雖死亦瞑目矣言畢入室堅閉門竟自經死君子曰氏其知道矣乎詩曰克定厥家其諸異乎匹夫匹婦之爲

諒者矣

天津王貞女

王貞女者天津王祿朋之女番禺莊栗園次子某之妻也栗園官天津運同聘爲婦婚有期矣而子病沒女聞之請奔喪母禁之不可乃吉服往至則易素服哭於儀牀悲咽不自勝觀者皆哭失聲使婢告姑嫜曰朝夕禮讓先後爲之喪次人衆含殮不復視從此不出戶矣居數月無疾暝坐而死此嘉慶七年事也其翁哭之甚於哭子爲之徵詩凡數百篇張樹之詩曰吾師古循吏美錦鄭之僑膝上有佳兒少年意興豪二豎忽來侵藏在有與膏一病遂不起有魂莫爲招貞女名門媛幽香生蘭皋家門多不幸靈椿已先凋萱花雖云茂白髮復蕭蕭阿母聞壻死戒婢言毋譏貞女竊聞之哽咽不敢號羞顏請奔喪阿母心愈焦汝未見壻面掌珠豈忍

拋女子只三從禮經有明條從死三從無況汝未同牢勿彈寡女  
絲別有琴瑟調當思母衰老當念母劬勞速歸繡閣去勿使我心  
慄貞女前致詞說禮勿柱膠壻死服斬衰名分不可逃旣已膺凶  
服出嫁難免嘲不入別家門願矢冰雪操母知不可奪聽女登蘭  
輶傳呼新婦來喪家語嘈嘈新婦驟下車有燭不及燒吉拜向姑  
孀淚下綆縻交迴身入子舍一見魂魄銷與卽百年期相見只今  
朝布總翦笄鬢素衣易朱綃歸房不出戶戶限北山高數月坐化  
去貞魂歸碧霄異香從何來儼若焚芳椒地下與比肩攜手天津  
橋化作雙鴛鴦水上相游遨此事傳藝林人人獻長謠況我弟子  
行敢辭心塞茅貞女藉傳余余反幸所遭君子曰禮有之子有父  
母之喪致命女氏許諾而不敢嫁壻免喪女之父母使人請弗許  
而後嫁之壻在而嫁況已死乎禮必不如是之慎也豈書缺有間



歎抑釋之者失其義也後世閨門重節守義較古人爲尤烈蓋聖人禮教之入人深也詩曰鬢彼兩髦實維我特貞女者祇知死此而已

天津張起妻趙氏

趙氏者天津張起之妻也起以御車爲業母爲人傭氏獨居一子甫襁褓鄰人田科與兄田會素無賴科豔氏色一日飲氏同院張守亮以酒亂白事諧厚酬汝嘉慶十一年除夕前一夜科往氏家守亮啟門入氏方拊履調之咱以利氏怒詈科欲強污氏大聲呼持剪刀嚇之詈愈厲科連刺之且提其兒付守亮嚇之曰不從擲諸河氏益慘呼科取壁上繩環其頸斃之科移其屍河冰上科去守亮復私置氏室中里人告其姑姑往科家抱兒歸且問婦死狀科瞋目叱之明年二月張起歸欲鳴之官科丐皇保雲仰泉息

其事與之布暨錢且曰爲起代娶起將諾之矣氏舅不可訟諸縣  
縣宰拘科嚴訊之堅不承繫之獄科兄會控諸都察院上命英和  
往鞫之科狡展無確證思之久問田會曰幼兒孰得之河岸者曰  
小人子得祥早出見兒唬抱歸和曰爾子年幾何曰十餘齡矣和  
喜曰得之矣拘得祥至食以果餌因吐實奏上科論斬梟首守亮  
絞氏旌獎焉郡民稱快葬之日弔者遠近數千人皆唏噓泣下歎  
氏之烈云君子曰氏一貧家婦耳利誘之不變威劫之不變殺其  
子復不變孔子所謂殺身以成仁者與詩曰誰謂鼠無牙何以穿  
我墉言女之以禮自守不爲強暴所污也氏不尤皎皎者哉

### 長垣李烈婦

李氏者新河訓導長垣舉人李敘曾之女蕭縣縱渭鶚之妻也氏  
之伯父受牧秦州與渭鶚父司燭同官甘肅故締姻焉氏生七歲

喪母哀毀如成人事繼母以孝嫻內則女誠諸書年二十一歸於  
縱事舅姑如事父母舅卧疾三年藥餌不離側皆氏手煎和爲祈  
天不茹葷酒舅恃以無恙縱故素封涓鶚時已納誓爲兵馬司副  
指揮而篤志文學每夜讀氏操女紅佐之一鐙相對儼如師友嘉  
慶二十一年涓鶚病且篤氏泣曰夫子之病革矣若不諱請以身  
殉及卒視衣衾飯含如禮旣畢返而入於房俄出見舅姑中堂再  
拜言曰已矣兒不能復事舅姑矣舅姑高年多病兒又無子使兒  
一日生是益舅姑一日之痛也兒已吞金環將從亡人地下矣又  
曰兒父年五十乏子嗣繼母幸有身俟生男然後訃兒手製繡帶  
一具將奉爲母壽繼恐母見之悲已焚之矣家人環集咸垂泣嗚  
咽氏詞色自若與眾訣家人環守拯之自旦至夜不死謝眾假寐  
乘間遂自經年二十九翌日與夫同時歿焉君子曰壹與之齊終



身不改經義也至以死殉而從容出之則變而不失其經焉詩曰  
予美亡此誰與獨且此之謂也

曲陽崔貞女

東明邱貞女  
武強張貞女

正定蘇貞女

靈壽蘭貞女

崔貞女者曲陽焦太和之聘妻也年二十未嫁而太和死女請奔  
喪其祖母與父堅勿許繼母謂其偽訕笑之崔與焦閭相望女恐  
見奪乃乘間之夫家祖繼姑奇悍而嗇不欲增食指力絕之翁焦  
睿諸生也亦以未婚不為婦辭女泣曰昔年祖翁沒兒重服來弔  
兒母沒夫亦往弔非婦而何竟留不去士林嘉其志競為詩相褒  
睿彙成集付女藏之女奉夫木主於室昕夕瞻拜足不出戶恆紡  
績佐家計居六年繼姑厭之為蜚語激之去有王媒媪者為言某  
欲娶之繼姑知女性貞烈不可強遣乃竊其衣物與媪脅之女聞  
喟然歎曰我之來為名節也誣逼若此生何為夜易衣履懷所藏

貞烈上

三

詩冊先仰藥而後經於夫位前時嘉慶二十二年五月事比殮尸  
不變面色如生邑令萬鼎洋詳請旌表州人張樂田楊五奎爲之  
傳其後東明正定靈壽武強皆有貞女之事東明有邱貞女者邱  
國器之女也幼許字同邑李德光未及婚而奮光死女聞訃擲箸  
而起白其母以此身已許李矣義不獨生遂自經死事聞大吏給  
綽楔旌表令所司陳牲代祭之正定有蘇貞女者何守儀之聘妻  
也守儀病沒女年二十三聞訃謂其兄曰余聞之烈女不更二夫  
旣受聘名分已定今將終老於何氏矣且余少孤未遑事父母聞  
何氏有母在得而事之幸也兄勸止之不從乃往白於何而迎歸  
焉旣歸修婦職姑故挫折之無怨言事愈謹姑沒哀毀異常妣梁  
氏病且貧無婢僕春汲皆女身任之日用或不給忍饑茹痛不以  
告人其初歸也夫兄守仁以其幼子子之不數歲殤再繼再殤女

曰命也卒年五十靈壽有蘭貞女者蘭發甲之女也幼慧從兄讀  
嫻女誠識大義字行唐高瑜年十八婚有期矣而瑜死訃至女言  
於父母欲往奠父母斥之恚而退既聞瑜已葬復言於父母曰兒  
受高氏聘矣子死有老者在兒請往侍焉父母斥如前女百計求  
死其姊爲言之父母始允其請女椎髻布裳登車詣夫墓哭奠畢  
入門謁祖姑舅姑舉止皆中禮女躬操井臼奉盤匱祖姑病親侍  
湯藥未嘗頃刻離及沒哀毀異恆人見者爲之墮淚後撫夫從兄  
子爲嗣子殤哭之慟至咯血旣而其姒復有娠祝曰天不絕高氏  
當生男旣生果然又撫以爲子蓋至是守節已八年矣一日忽集  
家人以嗣子託舅姑曰新婦不孝不慈不能奉舅姑以終雞鳴當  
尋吾夫於地下矣屆時含笑而逝武強張貞女名三姐許字同邑  
任德正丙辰四月病疫卒女聞之戚然出涕舉止尙如常其嫂請



父母別議婚女艷然曰嫂誤矣吾已字人復何字爲且曰人死不必悲死者樂死也若見死而救之是傷死者之心矣旣又謂母曰今而後女不得復爲女矣逾二日伺父兄外出母嫂居別室女沐浴著新衣履從容投繯死年二十一君子曰女之貞同而所遭之遇不同若崔貞女者尤遇之至變者也詩曰好言自口莠言自口憂心愈愈是以有侮崔貞女之謂也

深州周成姐

同州王二姐

周成姐者深州武生周樹雲之女也年十六父外出母楊偕女及幼妹起姐家居母出視田禾鄰人李喜乘閒入女室欲污之女拒罵李怒持刀刳其頸須臾隕命起姐號呼驚走喜復斃之竊資而逃母歸鳴於官捕喜置之法時嘉慶二十五年七月十九日也知州張杰爲請於朝旌其閭復於周氏宗祠東偏建祠祀之是年十

一月州又有王二姐者年十八爲同族王得隆污逼力拒而死君子謂烈而死猶生也詩曰狂童之狂也且可痛也已

貞烈傳上

大清畿輔列女傳第四

方々傳四

三



貞烈傳下

大清畿輔列女傳第五

天津徐世昌撰

豐寧謝紹鳳妻徐氏

平泉州王興妻朱氏

徐氏者懷寧徐潤之女也年十二隨父宦秦中十九歸豐寧舉人謝紹鳳時紹鳳世父春臺令扶風潤令朝邑兩家世好也紹鳳既入贅常居甥館氏語紹鳳曰妾父母以愛女故重妾遠離雖然尊嫜在堂妾不克侍晨夕焉用婦爲道光元年力請於父母偕夫歸謝故會稽望族乾隆中遷豐寧父子昆弟世科第娣姒皆名家女氏至以孝以睦里黨無閒言紹鳳五上公車鬱鬱不得志氏慰之曰窮達命也虛名遲早何足重輕耶道光五年紹鳳遭痼疾不起氏忍死營葬事既禫卻飲食十餘日而死氏死之前六載有朱氏者平泉州外委王興之妻也年二十夫沒無子鬻衣殮之卽日經

死嘉慶二十三年知州福克金布爲合葬於署西偏立石紀之詩  
曰知我如此不如無生君子是以歎氏志之決也

天津毛凌臯妻朱氏

同縣孫泓妻程氏

朱氏者天津處士朱浩之女同里舉人毛凌臯之妻也凌臯病氏  
侍湯藥禱天求代割左腕肉以進稍愈復作又割右腕以進卒不  
起朱誓以身殉凌臯弟秩臯勸嫂撫孤爲重曲從之越數年一子  
一女先後殤氏哭之痛勢垂絕姑曰我老矣俟我百年後汝死未  
晚也氏遂留身奉姑孝順臻至道光四年五月姑沒氏周視含殮  
哭奠皆如禮復取叔之子爲夫後處分身後事已自縊於姑之柩  
旁年五十津人士莫不歎息爲請旌於朝天津又有程氏者紹興  
程鑰之女也字德輝幼從其父來天津遂家焉氏幼沈敏嘗讀書  
嘗取殘燭藏之佐夜讀既長明麗幽閒工詞翰秘不示人隨父客

懷慶得天津故人子孫泓見其秀而文也以德輝妻之初婚之夕  
夢吟梨花空自落之句惡其不祥夫妻靜好日以學問相砥礪對  
之若嚴師久之泓客夷門病沒無子氏誓以死從勺水不入口既  
念夫未有嗣強起返津明朝夕奉甘旨舅前綱紀家政秩然有禮  
法舅不知其子之亡也越六年泓弟明生子紹賢氏撫爲己子曰  
吾事畢矣乃作書告舅自明從死之志其略曰兒生不辰壞牆賈  
恨藐若寡鵠上累椿庭始以白首無期黃泉可卜顧殤子不嗣恐  
若敖餒而昔人言就死易立孤難兒何人斯敢圖其易哉今幸螟  
蛉類我夫無伯道之憾菽水娛歡親無史雲之憂春暉永報分合  
常依獨是生者託奉彤幃死者委諸黃壤舉案相莊之謂何而竟  
以幽明異視哉況梨花空落夢識初婚命薄自天分應早謝儻欲  
未亡人百年同穴不且貽夫子泉台有懸望之鰥耶興言及斯食



息都廢所願慈幃鞏固如岡如陵兒雖九泉埋骨三生含笑矣遂  
闔戶自經時年三十有三其夕室中有白氣竟丈觸窗而出一鳥  
赤如火迴翔戶內久之乃去生平詩稿前一日盡焚之存者兩齋  
幽蘭數章而已君子曰烈婦殉夫之志夙矣一則夫死子不能  
死子死姑在不敢死姑死而後死一則夫死無子不忍死夫弟生  
子取爲夫嗣而後死日抱死其夫之心畢吾所事而從容以就其  
志焉斯其所以難也詩曰之死矢靡他此之謂也

新城孔貞女

同縣劉貞女

孔貞女者新城諸生孔昭煥之女也年九歲許字同邑諸生劉精  
一子未幾劉子亡女聞之涕泣屏簪飾獨處一室雖家人不輕見  
父母異之及爲議婚則閉戶垂涕者累日數詰之乃曰父母以兒  
許劉氏終當歸劉不幸夫夭而堂上姑固在也父母察其志不可

奪告諸劉劉母無子喜得婦詹吉迎之女既至泣拜姑痛幾絕繼  
乃哭祭夫塚入門成服終三年親操井曰奉姑膳必敬必戒手滌  
帚褊無惰容婦惟知有姑而若不知其無夫姑惟知有婦而若不  
知其無子環堵蕭然晏如也當時士大夫多爲詩文紀其事任邱  
邊浴禮詩曰烈士許人惟一身貞女許人惟一心孔家有女年十  
五寸心直抵千黃金貞女居新安里貞女夫劉氏子桃夭未賦劉  
郎死貞女聞之心碎矣屏卻羅紉卸簪珥閉戶無聲面如紙血淚  
涔涔滴鉛水媒來議親女如不聞親來相詢女跪答言兒身寡兒  
志堅兒夫死兒姑存兒死非難高堂老姑形影單兒生非幸願與  
兒姑共形影素車一輛迎女歸下慰重泉枯骨冷女身雖嫁未嫁  
同白日青天助悲哽捧姑袂憑夫棺木棺不可開姑顏卽夫顏視  
兒猶女兒意足事姑猶母姑心歡朝廷旌獎身外事但祝老姑樂

壽終餘年吁嗟乎貞孝能兼世閒少填海冤禽何足道豈惟大義  
愧鬚眉直爲人倫樹功表君不見尼山峰高青窄寧離鸞夜舞慈  
烏樂凌寒開出女貞花千里罡風吹不落新城知縣周良卿曰性  
出於自然而無所勉強者天也行出於必然而無所顧慮者人也  
性出於自然行出於必然始終無所變易者天與人合而道立焉  
是道也於臣爲忠於子爲孝於女爲貞於婦爲節孔貞女而貞又  
婦而節者也不言節而言貞未成乎婦全其爲女也貞女不讀書  
明大義其天固然不知未嫁而夫亡夫亡而矢志以事姑則又人  
力副之非獨其天全也天人交盡而卒與道合此貞女之所以爲  
貞也新城又有孫廷玉未婚妻劉氏者固安劉鶴鳴之女也年十  
五廷玉卒女聞訃請奔喪父母未之許女以翦刺臂乘閒復自經  
母急救之知志不可奪乃送之孫服闋歸寧別父母至其家卒自



縊死嘉慶十七年旌君子謂二女者一生一死其趨一也詩曰無貳爾心此之謂也

文安李榮姑

婢陳春華

李榮姑者文安人不知其何出也有婢曰陳春華親如姊妹行榮姑幼字朱氏子隨父宦浙十餘年女待之年逾三十矣父母沒兒無賴不復存問女餽粥不給患痿痺仰婢十指爲活兒好博將鬻婢償債婢不從撻之女護婢並撻女血流狼藉不能堪女謂婢曰吾不忍與汝分離而死也夜半乃密綴衣禪啟門投河而死當時廣文梁石偃爲賦兩烈女行其辭曰友人手持烈女狀勸我試作烈女歌我無表揚風義如椽之大筆對此涕淚空滂沱文安叢爾縣馬頭寥落村輜轅不恆到奇事喧里門春華其名潁川氏質身隴西供役使主人有女字榮姑姊妹相看無異視榮姑幼字朱氏

姻朱郎隨仕江之濱錦字十年沈宦海綠窗卅載虛芳春不幸嬌  
姿邁痠疾翁姆就撫難起立那有然鬚視藥人同懷經歲無蹤跡  
堂前愛日沈虞淵榮姑從此愁粥餽但仰女紅度長日然箕煮豆  
仍相煎惟有女奴如其命十年不字扶姑病賣珠歸後問與居壓  
綫問時親侍奉朝夕低頭苦勸餐夜眠擁被寒同夢忽忽聲聞牆  
博債急索償謀奪執釁婢質錢賣絹郎薄言逢怒嘯如虎李陽老  
拳捶敗鼓病姑匍匐遮以身撲地梨花碎春雨大杖小杖何紛紛  
杜鵑泣血血染裙鄉鄰畏事各閉戶氣竭聲嘶如不聞婢在姑遲  
死婢去姑速亡與其齋恨各分張何如就死相頡頏既不能如薛  
家紅綫走堂堂又不能如俠女竊負偕遠颺匡門蹈海扶幼主吾  
將追逐參翱翔風詡詡兮雲憑憑天陰月黑楓林青當門巨浪如  
山傾水仙羽葆來相迎主兮婢兮同一哭回頭猶見繡閣燈熒熒

詰朝鄰人各驚絕奔集河干相指說主衣鮮好密密縫婢衣暗敝  
重重結想見從容就義時禮數不因造次滅可憐一水鎮空明生  
者何顏死者悅昔年我作錢塘游曹娥祠廟臨江頭歲時村巫奏  
絃管我亦躬薦蘋蘩羞干有餘載得匹儔兩兩貞烈傳千秋君子  
謂女於是乎知死所詩曰有女仳離條其歎矣條其歎矣遇人之  
不淑矣此之謂也

### 樂亭陰鳴岐妻李氏

李氏者小字印孃灤州李濂之女樂亭陰鳴岐之妻也幼隨其祖  
承志官滇南六歲授毛詩稍長讀涑水通鑑能解大義年二十一  
適樂亭陰鳴岐牀第互爲師友二年餘生一女鳴岐病疫而沒氏  
哀毀乘閒盡焚其所爲詩文雜稿夜侍姑坐舉止如常命之寢始  
歸室哺其女已謂僕婦曰且寢之別室余稍息片時勿吾擾也僕



婦抱女去既聞箱篋索索有聲推門入見氏方排整衣物勸之寢  
曰汝且去命卽寢矣時夜三鼓逾時見門隙燭光異常時趨視之  
門閉不得入穴窗見氏懸梁自縊驚呼家衆抉門入氣已絕矣儼  
妝如生人髻髮無一絲亂者其目矚北壁壁上書絕命詞一章道  
其必死志讀者皆流涕先是鳴岐死遣人之氏家訃喪其母董泣  
曰不日訃音當再至至是氏死星夜奔告其母董聞樂亭人來遽  
號哭曰吾兒死矣君子曰聞諸父老稱氏性情柔曼不異恆人及  
臨大節而從容剛決乃如此詩曰德音莫違及爾同死母氏其知  
之矣

遵化洪士俊妻王氏

王氏者遵化諸生王廷俊之女同州洪士俊之妻也年二十一于  
歸事孀姑如慈母夫婦尤靜好戚族賢之未幾士俊病篤氏日夜

扶持食不下咽目不交睫者數閱月奄奄一息氣不絕者如縷氏計無所出繕疏籲天期三日矢以身代祝未竟士俊頓甦及三日士俊病復作劇於前氏乃悟曰此神示我也至夕潛易衣束新履溺水甕中死面如生時道光四年五月十三日也年二十有五比殮異香經日不散士俊病果愈健如初又三十年乃卒詩曰信誓旦旦不思其反此之謂也

天津于維琛妻劉氏

同縣孫佑妻唐氏

朱元善妻陳氏

劉氏者天津劉容之女同邑于維琛之繼妻也母楊青年守志撫氏姊弟三人茕茕相依氏嫻禮則寡言笑于歸甫三月夫往開州業鹽筴六載未歸上事翁姑下撫前室遺子終日操作夜熬一鐙課子讀道光五年春夫輿疾歸氏憂慘無人色營求藥餌數十晝夜日飲杯勺僂然柴立及沒日夜哭不能成聲一日持火營爨姑

見其踉蹌行勸之少休甫就牀忽閉目血從喉湧出仆而氣絕蓋  
絕粒已七日矣年二十有八君子曰天津多烈女千戶孫佑妻唐  
氏朱元善妻陳氏夫亡皆絕食死可謂後先媲美矣詩曰我心蘊  
結兮聊與子如一兮此之謂也

天津李黑姑

李黑姑者天津王某之妻也女生而端麗知大義道光五年歸某  
某與人司庖性柔懦母悍而淫夫亡與孫二通孫二都轉役胥虎  
而冠者也見新婦豔之丐其姑爲媒姑曰若素貞靜容緩圖黑姑  
微聞之懼不免每歸告母與兄曰兒拚一死終不辱門戶貽父母  
羞言之兩泣其夫常司庖外出姑虐黑姑詈毆無虛日孫二復時  
時調戲之黑姑密縫上下衽衣牀頭蓄一刀自衛一日姑逐其夫  
出門晚移襪被來曰吾伴汝夜宿女心悸不能寐夜四鼓始朦朧



睡姑潛啟門延孫二人黑姑陡起拒之孫二強持其衣糾結不可  
解黑姑大呼姑塞其口氣且竭矣乃取枕畔刀自剗血殷牀褥聞  
氣未絕孫二與姑耳語曰伊已死幸無知者但言夫妻相嘴距自  
戕無他故也明日黑姑母及其兄來詢女得其實且曰天乎兒捨  
母去矣誰爲雪此恨者絕粒凡三日死控於邑宰蔣兆璠不爲理  
天津梅成棟糾梅社諸人葬之西郊烈女墳山陰張世光作啟徵  
詩賦者凡數十人李芳田詩云貞烈頻年出海門  
褒榮疊荷九重恩如何大節成完璧竟使奇冤到覆盆  
血染黃泉春草碧魂飛白刃海天昏女甥地下如相問  
阿舅于今尙淚痕芳田之女甥爲吳人驥孫女嫁宋氏子  
前數年夫死自縊吳氏事不著故附記於此成棟復爲文祭之曰維道光丁亥春二十九日謹采紫  
蘭之蕊酌素梅之漿設祭於貞烈李氏之靈曰嗚呼烈婦竟抱恨  
以死終無爲雪此冤者耶嗚呼烈婦霜肌冰骨竟埋沒於青苔黃  
壤而無爲旌其節而闡厥幽者耶烈婦自去歲六月至今日茹恨

二百有餘日矣其精爽之氣獨不能籲帝呼天仰訴司命之神使昭顯報以快人心耶生爲皎皎之英死無赫赫之靈胡吞聲瘖口竟默默以終耶果陰陽同軌雖鬼神森烈亦無奈此強暴何耶若然則山川社稷城隍之神徒歆血祀一無聞見與人世之素餐尸位縱惡養奸者何異耶抑遲速有候有所待而未發耶或者厚其惡重其毒報於異日而其蹟彌著耶往復尋思不得其由能不叩之毅魄貞魂而溯其泯漠不可知之故耶昔吾鄉殷烈婦鳳娘之死也湯火荼毒慘與氏等而絕口不言其夫姑之惡將毋烈婦與之同心而不忍彰其姑之穢而致之刑耶當時官刑鳳娘之夫以代其姑以正國典似轉不如今之悠悠者爲善成烈婦之志耶若然則宜爲祥風爲和日胡爲卜葬之日爲暴雨爲大雪冰花縞素掛於林木望之如嚴冬耶安知非憂慘悽慘之意鬱結而成此耶

否則陰森凜烈亦天意之蒼涼故於陽和之候而降此霏霏者示  
舒慘之反常耶嗚呼天意若可知若不可知烈婦若有靈若無靈  
事有無可如何而祇宜付之一痛者如此類是也布奠傾觴爰爲  
誄以哀之曰烈婦之血入地兮不化爲紫芝之秀則爲紅蘭之芳  
烈婦之氣騰天兮不爲慶雲之爛則爲白雪之光烈婦一死而丁  
沽之水兮潔如娥江烈婦一葬而九烈之塚兮峻於首陽烈婦之  
刃使凶徒爲之膽碎兮而蕩婦爲之骨僵烈婦之名節足以持名  
教兮而扶綱常使聞者爲之墮淚兮而談者爲之齒香雖千秋萬  
歲可以不滅兮精貫昊蒼光緒三年大吏以事聞建坊入祠去其  
死近五十年矣詩曰伐木掎矣析薪柅矣舍彼有罪余之佗矣縣  
宰之謂也

天津劉鐘妻王氏



王氏者天津王自明之女同縣劉鐘之繼妻也翁姑年逾八十餘翁性復怵急氏善體親志能博其歡道光七年夫病咯血卒之前數日生一女氏晝夜零泣侍夫旁鐘自知不起慰之曰鬻我衣物可得數百緡其善撫吾女氏曰君死我豈獨生有兄嫂在雙親無慮也鐘曰果如是吾不死矣及卒氏變服潛飲毒毒發輾轉靈牀前姑怒曰汝夫死便如此作惡耶氏叩頭不語少頃腸斷而卒翁夢中恍惚見子媳來謝恩醒聞變哭之慟曰天平奪我孝婦老朽將誰依哉聞者悲之士民鳴於縣爲請旌焉詩曰予美亡此誰與獨息氏之謂也

元氏王訓之妻劉氏

東明霍松坪妻李氏

劉氏者寧晉監生劉文宗之女元氏王訓之之妻也少喪母育於外家年十七歸訓之訓之病氏日夜禱於神乞身代如是者二年

卒不效及卒哭之哀仰藥不死屬續畢卜日將葬投纆死死時衣  
衰麻縫密不可開卽以是日合葬於訓之之墓道光十年旌越四  
十年東明霍松坪繼妻李氏亦殉夫死氏家貧年稚流寓於汴爲  
陶氏養女後從陶歸保陽年甫及笄嫁於霍時松坪爲河南州判  
年六十矣氏善相夫治家勤儉能以躬率下同治八年松坪感寒  
疾不起氏視含斂畢飲藥死蓋夫沒之再夕也附身衣物數月前  
已自備君子謂其善處死詩曰行與子逝兮此之謂也

武清田大成女

薊州王天元女

固安馮綸女

文安陳貞

田貞女者武清田大成之女也幼許字郭齊聖年十七未婚而齊  
聖卒訃至女失聲哭媒來反其聘女舉帷出曰若何爲者我有死  
而已聞者失色持聘物去越數日翁姑至女家見其母婉言謝絕  
之女遽入室易衣出拜翁姑將偕與俱姑佯言禮未備異日除舍

以迎之久之翁姑無逆女意母亦意變別與議婚已有成說矣女不言寢食如恆乘間取毒置衣袖中摘蒲萄雜而吞之救之不及遂絕越二十八載其叔田大慶始議以其夫兄之子玉山爲嗣與郭氏合窆焉王貞女者薊州生員王天元之女也生而莊靜許字蘇幹苑年十九婚有日矣幹苑以暴疾卒女請往治喪父母阻之不可奪既往蘇家憐其少勸之歸女曰旣入此門卽吾畢命處也若必歸惟有從亡人於地下耳翁姑勉從之女縞衣素履朝夕哭奠殯後侍舅姑恩養尤篤姑有次子尙襁褓姑多病氏代育之如親生翁姑相繼沒女晝夜悲號哀動鄰里人以勉撫幼弟爲言始節哀治事殯葬皆依古禮撫叔至成立蘇氏得再造焉道光七年旌於朝其後固安有馮貞女文安有陳貞女皆以光緒七年馮貞女者馮綸之女也幼許同里董福慶爲室光緒六年福慶餓死



女年二十居外家心動急歸父母告之故女聞泣不食者三日請於父母往奔喪董家赤貧翁往阻之曰子餓而斃矣復忍餓若女耶女卽出跪拜行見翁禮伏地哭不起翁不得已諾之翌日易衰服啟夫棺翦髮結之夫髮中入室拜翁姑躬操井臼勤紡績每日節食留啖其叔隆冬棲破屋只敗蓆一片朝夕僵卧鄰婦無得見其面者時邑人士醵錢謀爲女建坊立石其姑居女爲奇貨欲藉此得溫飽旣不獲如願則益虐使之女愈順受無戚色三年喪滿女瀉粉雜碎針咽之不死夜縊窗櫺而絕陳貞女者許字郭士華年二十一士華沒母欲別議婚而隱其耗踰年女始知一痛幾絕不食者三日母從其志卽進飲食過夫家成服以鍼紵養翁姑義士嚴作霖高其節助以百金女曰守吾分貧吾命也辭之吳中彥爲賦貞女詩傳於世君子曰女之守貞死不死一也死者激於一

時生者守之畢世蓋不死者其貞尤不可及焉詩曰靡不有初鮮克有終又曰庶幾夙夜以永終譽言終之難也吾於王陳尤有取焉

### 天津樊景恆妻王氏

王氏者天津國學生王松棟之女同里樊景恆之妻也幼柔慧父授以毛詩四書女誠能成誦尤者漢魏六朝詩年十三母卒哀毀異常人繼母愛之若己出道光二十三年歸景恆年甫十七治家政有條理事姑能博其歡善撫叔妹肴核果餌必先推食之衣服澣約必整潔暇則教之書字侍景恆夜讀漏嘗三四下二十四年景恆病疫沒氏號痛淚盡繼以血潛吞金約指家人亟以藥進氏曰夫死從子吾何從哉所謂未亡人者以有事親及撫孤之責也吾無子而叔又成立能事親矣烏用生吾爲但祈吾叔早生子嗣

兄後瞑目地下矣既又謂姑曰兒不孝不能常侍膝下翁遠宦楚  
北生無一日之奉而死又不得親訣斯爲恨耳遂絕水漿七日而  
卒年十八距其夫死僅十四日也卒時無痛苦狀含笑如睡無異  
生時時鄰有嫠婦聞之歎曰彼宦族耳無凍餒之患且年稚視死  
如歸我曹忍死半生果何爲也竟恚而死袁穀廉輓之以詩曰世  
無劉中壘誰記節烈婦烈婦王氏女樊門奉箕帚夫壻名景恆德  
器孝兼友晨織蘇蕙機夕春孟光曰賢聲遍閭黨贊歎及姑舅相  
期宜子孫伉儷占无咎不圖兩髦髡龍蛇厄陽九烈婦泣籲天請  
代減妾壽妾身無重輕郎身有父母玉樓忽赴召中道痛分手生  
死誓相隨此義豈容苟勺漿不下喉金環已入口腸中轉車輪有  
如飲鴆酒六親盡驚訊惜此姬美偶謂婦盛年華青鏡可獨守胡  
爲自戕生刀斷連絲藕新婦再拜言多謝意誠厚三良昔從死篇



什聖人取女子殉所天大義詎可負黃泉骨早埋碧血心堪剖是  
時天地黑悲風撼戶牖三日屍猶香精魂貫星斗津門十萬家望  
空共稽首煌煌綽楔旌芳名勒瓊玖作歌告輜軒此歌置座右滄  
桑或變遷烈婦永不朽君子謂氏蹈義而樂死詩曰鮮民之生不  
如死之久矣此之謂也

清苑姚景崇妾任氏

任氏者不知何許人清苑姚景崇之側室也咸豐三年景崇率山  
東曹縣髮賊林鳳翔竄河南人馬聲達曹境景崇倉猝集練勇三  
百趨伏柳家口北岸夜三鼓賊蠶擁至毀民舍結棟爲筏半渡伏  
起礮擊之賊多溺死反竄入山西邑賴以安初景崇聞賊勢盛攜  
朝服往誓死拒氏指其心誓曰如不測主以死報國妾必以死報  
主不獨生也事平景崇病歸里同治元年六月感疫卒氏觸棺痛

哭暈絕者再已入室檢夫遺物呈大婦至夜私紉其衣家人慮變防之無他異久乃知絕水漿已數日矣家人進糜環跪以請氏顰蹙爲一舉復俯地咯咯吐曰吾腹背粘貼若鐵石不能下粒旣目大婦曰生死皆吾主也幸善視後人因相持而泣餓九日扶媪強起至柩前焚楮作禮詣大婦謝恩返室聞號聲如吼急趨燭之死矣牀端設一布囊皆殉葬物彩帛一端巾棺餘寸許備緣棺也七年旌焉君子謂氏死而知禮詩曰誠不以富亦祇以異此之謂也

青縣周某妻謝氏

安肅蘇民生妻劉氏

謝氏者青縣謝天祥之女同里周某之妻也周落魄無行而性戾狠稍違言輒詈毆氏忍受之終日事博飲田宅蕩盡氏旣諫之不聽惟竭力奉姑隱其惡不使聞及姑卒營葬具而家益墮周亦外出不復返氏歸依其母母時傭於朱紹濂家因假館於朱以居氏

勤苦自將終年不粒食以織婦冠爲業人見其所食有非人所能  
堪者故家無尺寸之田而勤儉所餘常足以自給性耿介不肯輕  
貸於人偶有所需及期必償之民生一子一女御之嚴不爲姑息  
歲除子女食而忘拜氏責之子女皆惶恐謝罪氏終不食歎曰爾  
等競口腹忘長上死無日矣咸豐四年春周忽至改行食力相得  
甚歡居無何復外出患疫而卒其兄弟勸改適氏不聽而哭之幾  
喪明兄曰若某者尙足哭耶氏曰夫猶天也天可憾耶哭益哀十  
年十月女出字人有以蜚語譏氏者氏聞之恚甚誓以死自明十  
一年三月氏負麥造朱家曰以此償前貸請從此逝矣朱望之無  
人色蓋不食已數日矣詢知其故再三勸之不應繼以泣終不應  
二十一日投井而死年四十八朱紹濂祭之以文曰上有皇天兮  
下有黃泉促爾之命兮正以成爾之賢明明赫赫兮夫何恤乎人



言歎井水之不波兮懿鑠乎千年萬年君子謂氏死而名益彰詩曰涇以渭濁湜湜其汜此之謂也安肅鄭村有僕人蘇民生者娶劉氏爲繼妻歸四年生一子又四年民生病氏扶持牀褥下不寢不食徹三晝夜終不起氏誓死殉益不食舅始百計勸之不從卒餓而死鄭材出資爲之合葬焉並撫其子曰烈婦不可使無後也詩曰教誨爾子鄭氏之謂也

大城韓遇雲妻賈氏

同里崔玉堂妻張氏

賈氏者河間賈某之女大城韓遇雲之妻也咸豐四年粵匪至境獲氏欲犯之脅以刃不屈復甘言勸之氏怒叱曰狗彘子我恨非男子不能殺汝豈以青白軀從汝乎速殺我勿多言賊怒兵之至死罵不絕口同里崔玉堂妻張氏年二十二夫沒遺孤甫彌歲以紡績爲生十餘年足不出外戶子長教之讀母而兼師同治六年

馬賊犯境子戰沒氏大哭曰吾之不死者爲撫孤也今若此吾生奚爲遂入賊屯大罵死君子謂死而不辱其志詩曰父母生我我辰安在氏可謂不負所生者矣

望都任氏婢祥姑娘

祥姑娘者不知何許人也幼鬻於任氏任故望都大族家中墮子爲人庸得值奉母移家保定城中未幾任走廣平將別屬祥姑曰余妻不足恃老母幸善事之踰三年母疾篤祥姑函促之歸比至家母已卒任慟絕救之甦鬻產營母葬日夜哭泣而死祥姑盡與其衣飾易屋以殮其妻謀攜女他適祥姑力爭之始留女女甫四歲祥姑乞食以養鄉鄰感其義鳩資恤之祥姑遂奉雙柩歸里里之戚屬無識者惟主母二女在已嫁矣聞祥姑扶母兄柩至相持而治與齒姊妹行不敢以婢視也祥姑去其鄉二十年遭奇變矢

志不字奉佛終其身君子曰祥姑娘一弱婢耳而抱忠懷義舍命不渝雖古之仁人義士何以加茲詩曰采葑采菲無遺下體聞婢之風者可以興矣

獻縣劉肇竣妻唐孟端

唐孟端者湖北按察使遵義唐樹義之女貴州貴陽知府獻縣劉善年次子肇竣之妻也咸豐十一年肇竣亡女年十四聞耗痛哭仰藥欲身殉家人急救之得生自是毀容縞素垂十年後書年及其妻子相繼亡親屬無可依者女涕泣告母自誓無他志先是肇竣死其姑以肇竣從弟肇坦爲嗣肇坦生子歲餘卽襁送女家曰吾以慰吾嫂也光緒八年母病女割股肉和藥進不效哀毀成疾卒年二十七直隸總督李鴻章聞於朝旌焉初樹義殉國難女之叔翁其年亡叔姑沈亦殉夫而死女蓋聞之素矣詩曰我求懿德



吾於孟端見之焉

天津婁舉正妻王氏

笠山杜光泰妻周氏

王氏者天津王毓元之女同縣婁舉正之妻也同治二年年十七歸舉正事親相夫親黨無閒言九年舉正沒視殮後遂絕粒恐死不速私合約指金和鉛粉咽之家人急以湯藥進拒之曰苟偷生不特負夫約且使翁姑目睹未亡人時時興思子悲也負夫約不義益親悲不孝與其不孝生何若全義死遂含笑而逝年二十四明年入祀節孝祠沈兆雲爲之詩云有孤當撫孤無孤甘一死地下敬侍夫痛極翻心喜爲報姑嫜道應寬思子哀夜臺不寂寞免築望思臺與稱未亡人不如亡更好正命從一終年少如壽考光緒間清苑有周氏者河南知縣周元釗之女也元釗與笠山杜元勳同官河南爲莫逆交因以氏許字其子光泰光緒十八年于歸

歸之明年光泰回笠山應童子試暴疾而沒氏聞耗絕粒三日兄宗澤往慰之告以事親大義氏勉起奉翁姑翁病割股和藥以進不效而卒越六年姑復病沒親視含殮畢卽仰藥以殉時光緒二十五年七月三十日也檢遺物得寄其兄宗澤書曰妹誓死八年矣以老親故不忍重傷之今翁姑大事畢矣望兄善事老母毋以妹爲念敏勞之恩報之來世妹去矣勉旃自愛初氏往來大梁路中見旌節坊心羨之曰芳名不朽矣氏沒後宗澤爲請表於朝建坊旌之君子曰王氏夫死卽死周氏翁姑死而後死死之遲速不同亦各行其是而已詩曰亦各有行此之謂也

天津王兆霖妻金氏

天津王恩黻妻金氏

金氏者天津金筠之女同縣王兆霖之妻也兆霖家貧餬口異鄉同治四年病歸里氏三割股肉和藥以進不效而卒氏絕粒死越

六年天津王恩徽妻金氏亦絕粒殉其夫金氏金榮之女也恩徽家素封中落隨夫旅河南恩徽卒氏誓自裁繼以夫無後伯叔又遠隔因鬻釵珥扶柩歸絕粒旬日而亡楊光儀弔之以詩曰夫何相隨飛於異鄉兮抱枯枝而不芳惟黃鵠之忽寡兮羌悲來其無方待歸其骸骨兮道阻且長又苦無衆雛兮誰與相將獨銜之而北征兮望沽水之茫茫脊鴿飛其見求兮翩乃睇於北邙螟蛉視其似我兮涕汎瀾而盈眶羣雌粥粥相勸慰兮焉識余之衷腸雲漠漠兮風淒淒余室毀兮毛羽摧悵遺翮其仙去兮今與同歸君子謂金氏多烈婦詩曰昭茲來許此之謂也

棗強盧貞女

盧貞女者棗強盧氏女也許字段永林同治六年永林死女年十九聞之泣隨其母之夫家弔哭之至則乞爲夫制服不肯去母與



姑未之許女矢死不移及葬臨穴奮而入救之出族戚里黨皆感泣勸其代夫職養姑乃起從姑歸姑張亦節婦也家貧姑婦二人相依爲命服既除一日母誑其歸許字焦氏嫁有日矣女聞之馳歸姑家自是遂不復歸寧母氏同治九年縣令扁其閭君子曰昔明歸熙甫著貞女論以爲不合禮經予觀禮孔子告曾子曰取女有吉日而女死壻齊衰而弔既葬而除之夫死亦如之夫夫死可弔則亦可守死不去矣聖人不言者不敢強人以所難也然則果有能爲其難能者聖人顧不深取之哉詩曰死生契闊與子成說既有成說矣非夫婦而何

### 肅寧苗烈女

苗烈女者肅寧苗浚池之女也幼字同里劉氏子未及嫁適同治七年捻匪起浚池攜女逃曰如不幸遇賊我死義爾死節未幾賊

大至浚池持械出鬪中數創既絕而女赴井死逾日出屍亭亭立井中面如生衣履髮飾皆無損君子曰婦女遇變死耳不死必受辱辱而生不如節而死也女素有孝名其父好任俠重節義女之不辱正其所以孝也與詩曰無忝爾所生此之謂也

南樂藍姑

同縣張姑

藍姑者南樂太學生藍克明之女也幼許字同縣郭培元年十七未嫁而夫沒家人祕不使聞及知之則已數月矣泣白父母請歸郭氏再三勸諭之志益堅迫之則不食求死卒從其志乃易素服歸夫家知縣張延緒賜玉一方鐫節孝字曰堅貞之志惟玉可方願此女生以佩死以殉也女善事舅姑躬勤紡績夫弟生子遂撫之爲夫嗣焉同縣又有張姑者段家瑞之聘妻也家瑞年十二病亡女時年十五以家貧童養夫家誓不再醮一日省父聞父納王

某聘深夜馳歸夫家遂絕其父往來女善事姑姑愛之如己出知縣恭寅扁旌其門給之金俾供養贍君子曰兩姑皆貧家女而行潔其身乃如此詩曰如圭如璋令聞令望此之謂也

天津金慶蘭妻周氏

同縣楊葆廉妻張氏

門世祺妻張氏

周氏者天津周培之女同縣金慶蘭之妻也幼事父孝有弟八齡病曰女念父老祇一兒禱神願代弟女果眇一目弟尋愈年逾三十歸慶蘭慶蘭客長安病沒誓從死姑年八旬餘慰之曰兒亡有婦在婦亡吾何所依耶氏忍死事姑三年姑沒遂絕粒死年四十一時同治七年正月也楊光儀為賦金烈婦詩其辭曰秋池菱芙蓉夜窗啼慈烏霜天正淒絕腸斷淚已枯烈婦貴死節孝婦能養姑寒潭印秋月生死無殊途吾邑有賢婦生小嫻禮儀結褵隨夫壻不怨季女飢夫壻客長安遷延屢經年一旦來惡耗矢志歸黃



泉阿母前致詞嗟吾已垂暮縱無襁褓兒豈遂棄吾去婦聞益悲  
酸欲語淚不止阿母無次男母在何敢死忍痛遷入房依常備甘  
旨不願母心悲但願母心喜飲泣背孤燈縱補勞十指晨昏幸無  
恙終當相料理驚風動高枝夕陽無幾時萱花遽萎落偷生復何  
爲妾心古井水妾命機上絲勺飲不入口今死故未遲阿姊得聞  
之入門泣相語吾亦未亡人相憐賴有汝汝乃自爲謀更誰其甘  
苦阿弟跪進食乃復爲姊言一死明大義誰敢謂不然阿姑猶未  
殯幸無絕粥饋阿姊與阿弟痛惜如一身婦乃含淚謝無爲兒女  
仁總帷響悲風朝日慘不紅環視各無語井竈黃塵封忍飢越三  
五就義何從容貞魂依阿母母柩猶在堂堂左列楮帛堂右羅酒  
漿堂前設几席香燭舍芬芳一一婦所置兒者淚盈眶婦職於此  
盡重爲泉壤光泉壤見夫婿相見永相將阿母顧而笑此樂人間

無非是人間無偏覺地下好願化連理枝生植墓門道上有百尺  
條下有徑寸草仰答三春暉春暉更不老張氏者天津諸生張麗  
生之女同里太學生楊葆廉之妻也孝尊嫜和娣姒家無閒言夫  
沒誓死殉姑命婢僕嚴防且勉以事親大義氏忍死抑哀代夫盡  
子職且十年光緒十七年姑病沒氏曰吾可以死矣遂絕粒死樂  
亭史夢蘭亦輓之以詩曰郎無子女妾有尊嫜郎今已矣尊嫜在  
堂尊嫜在堂年已邁子死二老將奚賴欲殉不殉心徬徨恐節無  
虧孝或礙阿翁痛子中道徂阿姑咀痛稱孀姑黃鵠歌中鵠並寡  
青鸞鏡裏鸞同孤蟲聲咽寒砌鐙影暗空闌與姑同室形影俱姑  
心無恫妾心娛甘旨供罔缺杖履親爲扶病侍湯藥沒殯葬十年  
拮据手口瘖昔未殉夫爲事姑今姑又逝復奚圖甘心絕粒辦一  
死殉夫殉姑無差殊況以婦職代子職黃泉相聚應歡呼南國有

貞姬東海有孝婦誰則節全孝復全惟有斯人兩無負後七年天津從九張恩慶女嫁同邑門世祺越五年世祺病氏每夜籲天乞身代侍之三年如一日見夫病不可治誓從死人勸之則曰翁姑尚有子無庸余代盡夫職也邾下無兒亦無庸余兼父教也再勸之不復辨既亦不再言光緒二十四年世祺沒氏親視含歛訖仰藥以殉年二十有五是年旌於朝君子曰婦嫁不得事姑古人謂之不幸姑死而後死氏之志尤可矜也詩曰無父母貽羅孝之至也

天津李夢齡妻梅氏

梅氏者字寶元永平訓導天津梅成棟之女同里李夢齡之妻也幼聰慧知詩書尤工鍼黹年十七于歸事翁姑聯親族溫恭淑慎以賢孝稱翁姑沒家日零賴十指生活者三十年夫儻易無節既



失業屢以死詐恐其家人氏婉慰之不聽自度終不可挽曰婦不能相其夫婦之罪也同治七年四月十三日夢齡又以死相嚇氏曰此速我死也遂取其所蓄毒服而死年四十八君子曰吾觀後漢周都妻趙氏之事竊歎古今人若出一轍也詩曰及爾偕老老使我怨氏之怨尤可傷矣

### 滄州蘭貞女

蘭貞女者滄州諸生蘭德春之女也幼許字漢軍旗李斌敏爲室同治八年斌敏病沒來告喪女年十八吞金及鉛粉斷鍼俱不死家人防守嚴乃絕粒母哭勸之不答兩目直視母不下一淚相持至八九日扶掖不能起時母見女不食亦不食伯母泣曰汝母弱多病今爲汝故食不下咽者數日矣汝母爲汝死汝居何等耶女放聲哭引漿入口謝母然每餐不過一盞蓋陰冀以羸弱斃也如

是者二年有問名者女輒涕泣爲之廢食母佯謝遣媒去旣而女卧病或累日不起其父心憂之謂其母曰兒不悟奈何陰遣諸子道古今事解說之卒不變戚友聞之踵門來議婚女方盥見婢僕偶語詰之女微哂曰此爲我矣急起取刀截右耳落鏡旁流血霑衣襟盆水盡赤刀猶在手也小妹見之大聲呼母母色變良久始定哭謂女曰吾當成汝志勿自苦傅藥裹瘡收刀去女病創三日愈晨起候母母未盥女左手捧一盞血右手提一耳下氣怡聲婉詞謝母曰母勿驚昨得半鑷截左耳兒心快矣母知女百折不回始與其父定謀封兩耳報季請成女志季許諾卜日來迎瀕行有日女請曰事變無常乞賜匕首脫有不虞得速死餘無所需也母流涕許之遂以十年三月適季見廟成禮臨穴奠哭盡哀暈絕者三觀者數千人皆感泣且曰得婦如此敏格不死矣敏格者斌敏

字也初女聞夫喪後素服十六月至是反喪始服白如初喪禮斌  
敏之未亡也頗得嗣母歡嗣母亦以己生子視之斌敏死嗣母悲  
思不能已女來歸事姑如事母姑心愛之復如斌敏時女朝夕侍  
姑側飲食起居躬自調護不假手婢僕暇則爲姑講演古事迹方  
言爲娛雖至夜深促之不退姑忘其無兒焉伯翁餘慶高尚士也  
嗚其事於京得旌表女歸告父母曰兒事平平濫達天聽重兒罪  
矣兒罔識大義覲顏視息苟活三年者祇以持服未終爲夫報母  
耳九泉待我久當往從之父諭以姑在堂不得以死貽親憂女默  
然居母家十七日賦絕命詞有云南陌郎君墳夫婦得相見郎死  
報親難代視二載膳歸侍姑歡笑倍他日是晚在姑室絮談久屢  
促之去去卽閉戶焚香再拜令侍姆先寢伏案作書天微明侍姆  
聞室中有鼓樂聲驚起告女三呼不應呼姑來扶起視之則女已



服毒死矣附棺諸物悉置身旁七首亦在側帳閒置一匣啟之得  
所親書女論語一冊柏舟葛生三詩手錄古今貞烈事迹數十紙  
扇一柄書文天祥正氣歌程子視聽言動四箴旁置一裏寫全歸  
二字開封視之則當年所割兩耳也侍姆見之泣曰前兩月主母  
命我以此置諸棺疑爲戲耳不意竟有今日也因以前夕作書事  
告族眾檢視乃自言志並別訣親屬也字畫端整數千言無錯誤  
者翌日始斂羣蠅不集左右數十里人咸異之時同治十二年六  
月十七日也君子謂女才而有奇節詩曰如金如錫如圭如璧女  
之謂也

天津孟傅謀妻龐氏

同縣張文靜妻梅氏

平遠楊國昌妻

龐氏者天津孟傅謀之妻也同治九年年二十四歸傅謀越三載  
傅謀疾卒氏絕粒十日投甕以殉年二十七距夫沒僅十二日耳

初氏有姑許字北倉趙氏子未聘夫亡矢志守貞者也傅謀之族  
姪孟繼坤弔之以詩曰我家節母蔣何張本支上有武與王七世  
邊孺人閒雅工文章何期今日更有烈婦龐烈婦居趙家莊適孟  
氏來南倉夫名傅謀世芸緗家貧竟無宿春糧婦曰噫嘻我以甘  
旨奉高堂十指鍼巧繡鴛鴦機聲軋軋鳴寒霜葬姑旣畢願始償  
癸酉孟冬日念七夫子無端命盡今日回憶日前侍夫疾焚香告  
天身可代心可質天不相人不使同室凭棺一慟淚雨溢吁嗟乎  
懸梁無帛引決無刃惟有絕粒堪自任家人勸諭耳不聞長者踞  
求食少進豈知餓已十日氣如縷甘心覓死以身殉越日薄暮半  
掩蓬戶一甕清泉是其死所僅防人見畏人阻願早從夫歸地府  
不待斷腸心更苦維時仲冬十月初去夫死日半月無娶將四載  
歲念七剝下未有兒呱呱一死遂與大義符同時殉夫有梅氏者

天津貢生鹽大使張文靜之妻也氏善事姑撫妯娌氏子女如所生同治十三年文靜病沒氏理斂事畢仰藥死年三十八陳氏者天津監生陳恩源之女也同治十三年嫁山東縣丞平遠楊國昌爲室國昌客陽穀病而患曰氏侍湯藥半載不效而沒視含殮畢吞金以殉年二十一張氏者天津張漣之女也歸同縣郭鴻儀光緒七年鴻儀病故氏服粉毒死年二十五大吏均疏旌於朝君子曰氏可謂當仁不讓者矣詩曰淑人君子其德不猶此之謂也

武邑魏某妻常氏

常氏者武邑魏某之妻也幼字於魏夫無行父母欲爲改字女不可旣歸魏盡婦職未幾夫病沒女閉門投繯姑救之得不死逾半載姑亦卒氏與家人訣歸母家母知其志防之嚴久之氏忽怡色對母言笑如常時母喜不復防乘閒投井死海鹽俞煥珪輓之以



詩曰常烈婦居昌城字魏氏武邑人當其未嫁夫家貧夫家貧夫無賴屢作穿踰跡屢敗禁之不可制不能習以爲常恬不怪女家父母爲女憂得婿如此蛾眉羞不若捨此他覓鸞鳳傳父以商母母以問女女聞言淚如雨低頭前致詞哽咽不成語夫家蕭索兒罪愆締緣他姓兒何顏兒聞古語夫爲天一醮再醮何取焉母也天只兒唯母恃母欲嫁兒兒必死母曰若然兒其勿悔擇期爲爾營鵲巢爾年已長難久待女旣嫁夫如初勸之誠之不改圖日日益與羣小俱夫家猶有母與兄母兄訓教均不行均不行益狂悖母兄怒極恐相累縛而撻之無完膚一息奄奄甚矣憊夫之身體母所遺母欲死之何敢愛夫爲撻傷痛不可當呻吟轉側血溢牀婦兮日日奉藥湯自維涼德夫罹殃禱天願以身代僵無何夫病居膏盲夫將死矣呼婦來爾爲予婦誠以哀我死爾勿徒傷悲鏡

中顏色爾未衰逝其去此尋良媒女聞言心如擣夫言非我心名  
節詎草草生前不得共白頭誓向黃泉共偕老夫既卒矣心如割  
矣哀我嫠人難獨活矣不能獨活非死不可日之夕矣闔雙扇仰  
面屋樑吾死所夫也徐行姑以待我婦欲長與孀姑辭婦猶未死  
姑已知開門解婦頸上索婦甦見姑涕交頤姑曰汝勿爾汝死我  
誰依我年已若木將朽景逼桑榆烏可久汝姑待我蓋棺後容汝  
從容泉路走婦曰諾敬待姑二十四旬姑竟死姑其死矣婦益孤  
堂前姑已無地下猶有夫出與兄嫂辭不復夫家居兄嫂問婦胡  
爲乎歸婦告兄嫂雙淚垂背延殘喘爲姑在今姑已死生何爲從  
來人命事最重若死夫家恐速訟死後官非累嫂兄泉下有知心  
抱痛嫂執婦手兄遮婦道志已堅牢不可拗別兄嫂歸母家出門  
登彼歸寧車行行達母所悲緒如夢麻俯觀門外井傍視籬邊花

風光未改人事變沾膺涕淚紛交加入門兮心悲傷登堂兮拜翁  
娘翁娘問女兮歸何意女告翁娘兮將繼夫亡夫家非兒所兮此  
地爲兒生死之家鄉翁娘知女志莫移日夕使人邏守之婦歸十  
數日畢命無時期甫閉門十日視甫理繩十手指日復一日皆如  
此婦兮日日面淚洗一朝女忽改容顏上堂去其翁娘餐女色稍  
霽翁娘心乃安女忽謂母顏鞮然自兒適魏氏一歲曾無一日歡  
紅顏日易老歲月去不還理我蛺蝶裙整我翡翠環翁娘爲我覓  
佳偶誰能耐此衾稠寒翁娘聞言悅不已退省其私色殊喜防守  
日漸疏如是日又幾一日中庭日正永渾舍午眠皆未醒女啟門  
臨井稽首謝親恩戚戚心悲哽井水清漣不見底攫身一躍沒不  
起不死於繩死於水吁嗟烈婦常已矣烈婦之度何從容烈婦之  
志何決絕爲姑暫活爲夫亡婦也雙兼孝與節烈婦心繞指鐵烈



婦身當頭月繞指鐵千錘萬折堅不屈當頭月千秋萬古光不滅  
我聞烈婦事作詩表貞烈婦生何時死何日我未能知且從闕君  
子謂氏不以美惡易心生死易節詩曰采采芣苢薄言采之采采  
芣苢薄言有之古之賢婦何多讓焉

大城蕭林妻馬氏

同縣沈廣維妻張氏

葉宜春妻邢氏

馬氏者大城農家女也于歸蕭氏子數年而夫死無子矢志養姑  
不他適戚黨稱其孝有李某者聞氏賢欲聘為子婦媒以金帛啗  
其父其父給女歸婚有期矣氏知之託以祭夫墓歸家誓死不從  
李某怒訟之官氏謂姑曰婦初心欲與姑同存亡今已矣稍緩須  
臾身名俱敗矣遂投繯死未幾大城又有張氏邢氏之事張氏者  
沈廣維之妻也年十七于歸七日廣維謂之曰吾家奇窮株守非  
計也吾將外出謀生計孀母在堂奉養之事吾以託汝矣氏諾之

晝采薪夜紡績躬操作者十餘年姑憐之曰吾兒死生不可知汝  
其他適勿以吾故苦苦也氏泣曰婦去姑誰依餓死分也兒豈以  
生死易心者久之其父以壻不歸將再醮之氏拒之曰夫去時屬  
兒養老母已諾之矣舍親不孝背夫不義不孝不義何以生爲氏  
自是與母家絕而父母竟私許婚屆期母僞病賺女歸及至始知  
之見勢急佯笑曰父母愛兒兒無不從命者何防之甚也父母信  
之適他出氏潛吞砒石恐死不能見其姑也乃逃歸甫至村毒發  
不能行匍匐至姑前大哭曰兒所願者夫在外有時榮歸耳卽不  
歸亦惟姑生則生姑死則死無他志也今爲勢迫不能事姑矣兒  
死願姑自愛勿過傷姑驚問故始以逼嫁服毒事告之言訖鼻口  
血出而卒親戚族黨其哀之爲立嗣而葬焉邢氏葉宜春之妻也  
宜春故有疾年十八于歸日夜侍藥餌日不交睫年餘宜春沒氏

慟不欲生既恐傷翁姑心始強起事翁姑家貧日雜糠粃而食恬如也富室某聞其賢欲聘之使鄰媪說氏曰汝無子煢煢無所依且以子之年何往而不得徒自苦奚爲也氏曰吾有翁姑在非無所依也藉云無依吾知守志而已媪知不可奪某益賢之復說其父母父母諾之氏不知也屆期始告氏氏絕粒旬日泣拜翁姑曰兒之不卽死者以有翁姑在今如此命也言已遂絕年十九君子曰貧賤不易其志富貴不淫其心修士猶歎之况婦女乎三氏之視死如歸從容不迫乃若此可以立人紀矣詩曰父兮母兮畜我不卒胡能有定報我不述言不循義理也

大城馬廷梅妻駱氏

駱氏者大城馬廷梅之妻也賢明有識廷梅嘗僱一傭其族弟也氏謂之曰翁不幸早沒姑老且病操家事者惟夫與妾耳傭人宜



擇篤厚者某素無行不可用也廷梅曰某矮而跛何能爲氏曰某目動而旁覷心已肆矣畜之必爲毒廷梅不聽某至氏以禮嚴御之久之某以叔嫂故言語漸無忌氏告其夫請去之會年饑辭之不卽去一日廷梅往於田某入氏室欲污之脅以刀氏大罵不屈某怒而刃之死時同治十三年也姑自外至見之呼鄰黨集而圍之某知不能脫以刀自刺死君子謂氏臨難不苟免詩曰肆戎疾不殄烈假不瑕此之謂也

### 大城劉任二貞女

劉貞女者大城拔貢生劉某之女也許字馬其注年十八未嫁其注卒女謂父曰大人以兒許馬氏是兒爲馬氏婦也兒願一履馬氏庭事其父母庶可以見其注地下矣父多其志而以其少未之許也女毀妝哀泣誓絕粒死家人解之曰女子從一而終謂夫已

嫁而有夫者也未聞未嫁而可以言守者子未有一何言從女曰不然未嫁之夫卽已嫁之夫無二夫也無二則一矣父母知其志不可奪輿送夫家縗麻而哭諸室夫家故貧女事翁姑勤苦無怨色簞笠紡績終年未嘗履畿木年七十卒任貞女者大城歲貢生任聯第之女也聯第好義有文行世稱杏田先生爲女相攸許字青縣劉氏子女生而端莊靜一寡言笑慎行止家人無見其喜愠形於色者晨昏侍母側母劉授以女誡諸書時其父已卒女事母益謹凡母所欲不待言皆奉之如其意同治十三年年及笄歸有日矣而劉氏子病死訃音至淚垂盈睫默不言母微窺之戚然語女曰汝生二十年未嘗斯須離膝下此天使兒常侍吾也女泣曰兒亦誓終身侍母矣女最工女紅尤友於姊妹諸幼甥衣飾皆精心裁製母以此益憐愛之如是者五年有議婚者女知之輒泣問

其母曰天使兒長依膝下母已許兒矣母也天只不諒人只何也  
 母遂不復言光緒三年冬媒復來議婚女恐奪其志忽忽不欲生  
 適其妹方病女恐重傷母心也晝夜佐其母視妹疾歲將除妹愈  
 逾年元旦易新衣賀歲言笑逾平時母大喜女告人曰承老母一  
 日之歡庶減吾一日終天之恨耳自是遂不食母勸之輒權詞以  
 對實終不食也死之前一日與母言通宵無倦容終不忍作訣別  
 語視天將曉始泣然曰今不能長依膝下矣母宜自愛無思兒死  
 而有知必報德來世也言畢端坐而逝蓋不食者已十九日矣年  
 二十四君子曰王蠋不仕而死節齊稱爲忠臣龔勝不仕而死節  
 漢稱爲義士獨女子未嫁而守者世或病之夫女雖未嫁夫婦之  
 分已明定之矣其視草莽之臣蓋尤有進焉守之死之誰曰不宜  
 詩曰許人尤之眾穉且狂今之爲苛論者皆許人之見也



南皮慕貞女

慕昌淮字壽荃翰林院侍講蓬萊慕榮幹之女也生而聰穎十餘歲賦航海圖詩蒼古有奇氣事父母有至性母患顛疾女朝夕代其勞嗜學博涉傳記尤喜讀史其外祖母陳氏讀書知大義喜與女過從每言及古今人物臧否死生大節不少假借而父母前訥訥然沈默若無能者年十八許字南皮張元來光緒元年元來舉於鄉父望子通籍後始完婚遷延且十載元來以疾死時榮幹方視學陝西計至祕不使女知女亦微覺之不哭亦不言見父意有不怡反用他詞慰藉之試竣還京逾歲女年已二十有八距元來死三年矣有定興翰林某方失偶聞女之賢遣冰至榮幹以問女女不答再問則云願事父母以終再三諭之無言而退命自理嫁衣觀其意女忻然無難色將以六月十六日受某氏聘前一日爲

母王誕辰女內外掃除集百戲宴賓戚盛服捧觴爲父母壽是夜  
酒散父母命之寢依依然不忍去旣聞更鼓聲曰時至矣卽起趨  
出徘徊復返顧良久微歎而去是夜大雷雨遲明女奴過後園見  
空室有人影微露其衣稍近知女自縊矣大驚呼榮榦倉皇起急  
趨斷其縋延醫視心脈尙未絕灌之藥不入時某氏聘適至榮榦  
恍然悟曰止此女尙能活邪死矣復何言遂具衣飾歛之都察院  
給事中潤惠卹純嘏爲之請得旨旌於朝南皮張氏聞之以柩爲  
請將合葬元來之墓榮榦許之從女志也初女死後家人啟其篋  
得遺書數紙痛言不獲終事親復爲別親詩四章又一章則其絕  
筆也其外祖母聞而傷之爲書唁其父並述女之言曰人生若朝  
露庸福蠶壽與草木同腐惟瑰行奇節爲不死耳其他語多類是  
女工書畫喜吟詠所爲詩凡千餘首死之夕盡焚之其存者則寄

外祖母詩一卷所謂古餘薌閣遺詩也君子曰女可謂從容踴義者矣詩曰心之憂矣其誰知之其誰知之蓋亦勿思若父母者其亦不思之甚矣

### 灤州苗翠

苗翠者灤州苗甲之女也甲妻醜而食必精饌始下咽家益貧數年貨悉罄其妻生二女而美長已適人次卽女亦許字矣歲及臘妻與女衣皆未著綿甲無策也妻倩媒改鬻其女一日晡時有車隆隆至門二三男子負錢擲於室甲妻笑迎之市酒脯使女炊之欸客女竊聞其人談笑覺有異久之母喚女無應者母曰殆矣急尋之得於井中死矣面如生甲聞之與妻絕遠出不復歸其妻輒轉嫁數夫所至之家輒敗云君子曰女可謂涅而不緇者矣詩曰以保明其身此之謂也



天津三王氏

同縣李運昌妾徐氏

天津三王氏者一爲騎都尉劉恩蔭之側室年十九歸恩蔭劉家故素封恩蔭以不善治家失業恚而沒氏卽日仰藥以殉時光緒九年八月二十日也年二十五一爲國學生章文瀾之側室年十八歸文瀾光緒十年七月文瀾卒氏親至含斂次日仰藥以殉年三十九一爲山東知縣貢生辛榮之側室光緒十一年十二月榮病沒逾年正月氏仰藥死先是章文瀾妾王氏殉夫死榮以語王王心許之至是與釵珥延僧誦經畢卽於是夜殉焉年四十一三氏者皆旌於朝君子謂三氏不謀而合詩曰是則是效此之謂也同時天津有徐氏者貢生李運昌之側室也年十八侍運昌恭謹端厚有禮法戚黨稱其賢光緒十八年運昌病沒逾月氏絕粒以殉君子曰天津尙節烈豈習俗使然與然清之末季節烈之事多

出於女子亦可愧已

天津鄭廣義妻劉氏

劉氏者天津劉紹棠之女也幼許字大沽鄭起子廣義廣義八歲股生疽十年不愈起以其子廢告婦家請絕婚父母諾之以語氏曰許嫁而死猶當守之況未死乎病廢命也宜速其娶女將侍疾固勸之不可卒歸鄭廣義病不能人性尤戾屢撻氏氏燂湯敷藥抑搔扶持十年如一日無倦無悔而事舅姑尤孝謹其舅語人輒道其賢未幾廣義死起素以操舟爲業家苦貧風氏使改適氏泣不答衣綳飲糗服旣除姑使歸甯陰屬其父母勸改嫁且告以家寒又乏嗣無可守氏不應勸之亟則曰女歸時豈不知壻病廢且瀕死者今改志何如初不歸耶女生死爲鄭家婦請從此逝不復來矣遂返其舅潛爲之議婚迎有期矣始告之氏不言亦不愠

舅姑喜不疑其有他期至氏沐浴更衣履談笑如常夜侍舅姑寢  
御藥死姑微聞聲起視之已僵矣面如生衣服無少汗者年三十  
三光緒十一年正月十六日也直隸總督李鴻章奏旌於朝入祠  
祀之君子謂氏能始終其志詩曰不念昔者伊余來暨其父母舅  
姑之謂也

通州白楷妻沈汝可

沈汝可字潔媛白水知縣通州白楷之妻甘肅甘州知府桐鄉沈  
壽曾之女也生四歲隨其祖旺生官磁州地震屋圮乳媪抱匿几  
下得不死稍長隨父任甘州其翁適守西安相得也乃以氏歸楷  
氏故工爲詩文兼通岐黃術于歸後事舅姑愛之如己出戚黨皆  
稱賢同治二年楷權知咸寧值同亂圍城月餘楷日夕登陴誓死  
守氏躬執爨食士卒卒完其城方危急時氏率其女及子婦皆紉



布密纏其身曰城破則後院中井卽死所矣時城中乏饌或言某家藏金可強取之氏曰有無不可知卽有之強取非義也然楷卒以此忤上官及楷沒子曾烜以知府分浙江氏喜曰吾浙產得拜先人邱壟吾願畢矣光緒二十六年七月抵江會拳民亂作兩宮西幸長安氏方飯聞之投箸而泣曰嗟乎一至此歟吾家世受國恩吾一老寡婦受封極品年逾七十遭此大變尙忍偷生人世乎遂不復食賦絕命詩以忠孝戒子孫數日不死又服毒乃絕年七十四二十八年禮部奏聞建坊入祠旌之俞樾曰庚子之變京師以死難旌者無慮數千人而婦女居其半夫家陷危城躬膺鋒鏑斷脰絕吭一瞑雖奇節猶恆情也氏聞變於數千里外從容七箸之間百折不撓竟成其志嗚呼難矣詩曰顧瞻周道中心弔分若氏者可謂憂心周道者矣

河閒裘瑋妻宗氏

宗氏者內閣中書任邱宗樹桐之女河閒裘瑋之妻也聰明柔婉寡言笑而至性過人長兄不惠仲兄病羸既娶而沒晨昏之職氏身任之事無缺失父才高性剛困於時鬱鬱不自得善怒多病氏委曲將順能當父心家人皆恃之免呵責既歸裘氏數月姑沒躬操家事宏纖皆舉兩妣愧弗如光緒三十三年隨舅祖諤於商邱官所聞父卒長兄病狂又喪其子亟思歸省慰其母未幾而夫又疾卒歸葬有日矣氏自經死年二十五河南大府疏於朝旌焉其兩叔父皆官京師聞之哭曰孝哉吾每思女之事其父不知涕之何自也其母則曰死大善則又痛之深矣詩曰遭家不造氏之謂也

南皮張氏兩烈女

張氏兩女者南皮人也家赤貧其父紹庭攜妻金氏及三子兩女移居天津西門外千福寺旁長女名立姑年十七次女名春姑年十四紹庭傭工自給一日失其業夫妻相對泣有王寶山者與紹庭素相識慰問之且曰泣無益若以兩女許人得聘金負可償也乃爲媒以春姑字戴富有長子爲室旣而紹庭死寶山乘閒又謂金曰汝家食指繁請以立姑歸戴童養之庶省一人之食戴妻復詣金氏約共居金遂攜女主其家久之見戴所爲大悔恨戴日謀逐金而教春姑學度曲及狎邪諸事金急謀攜女歸戴曰汝次女實許吾次子其長者更許吾長子矣閉兩女於室遂交鬩鄰人鳴諸官直金氏戴更僞爲判書上愬審判廳而使其黨證之審判官依所言謂法當兩女俱戴有讞旣定母女相持而泣呼天者再然無以禦戴之橫也旣而寶山與富有合謀訂期強娶金謂女曰事



急矣屆時吾當以一命爭之二女曰父亡弟幼設不幸誰撫諸弟者是重女罪也女等自有計乃相與私約食燐藥求死毒發母始知之呼號乞救鄰人覓藥強立姑服力拒之碎杯於地又強春姑服立姑謂之曰我輩服毒求死也求死而服解藥負初心矣兩女遂宛轉俱死時丙辰三月十七日也殯之日執紼者相屬於道凡數千百人大吏朱家寶旌其門曰冰玉雙清君子謂氏貞而能固詩曰雖速我訟亦不女從此之謂也

### 任邱王蒲

王氏者名蒲任邱王守恆之女同里周崇垣之妻也幼穎異動容皆中禮父母家素貧依外舅以居鍼繡之暇輒教之讀尤喜聞忠孝節義事人咸異之年十九適崇垣嫁時其父母以奩資薄恐爲姻黨輕氏曰人之輕我與否視兒之賢與不賢不盡在嫁奩之厚

薄也設兒不賢雖有珠玉錦繡又豈不爲吾親辱哉旣成禮篤於  
伉儷尤善事舅姑家人皆敬愛之乙卯四月崇垣在河閒中學校  
遭疾歸勢甚劇氏百計調護至廢寢餐藥餌輒親嘗後進夜則焚  
香籲天乞身代皆不效而卒氏痛哭絕而復蘇者再謂其姑曰婦  
人以夫爲天天旣失生何補今而後不復能盡孝養矣言罷哭失  
聲其姑知其有死志語家人防護之夫斂之夕氏縊於別室家人  
爭持之不果死夫葬後絕粒二日家人大恐因勸使歸寧俾其父  
母勸慰之氏至母家不復悲言笑如平時其父母心竊喜歷數日  
忽謂其父母曰曩之欲死而不卽死者以麥秋在邇恐誤農事也  
今已暇矣兒必死勿阻我且勿悲兒行心之所安而已父母大痛  
以義責之曰若知有夫婦不知有父母乎兒果死兒爲不孝矣氏  
曰兒死父母痛或有已時兒不死則此後皆吾親觸目傷心之日

父母之痛寧有窮期邪死固非孝不死更爲不孝之大矣兒計之已熟勿徒苦我無謂也乃舉嘗所儲書畫楮墨分貽諸兄弟姊妹自是復絕粒父母知不可挽悲益慟舅姑聞之來奔視環泣勸慰卒不顧不食七日強起登車詣墓祭其夫家人扶掖下一慟而絕時五月十九日也年二十君子曰匹夫不可奪志氏有之焉詩曰我心蘊結兮聊與子如一兮此之謂也

貞烈傳下終

大清畿輔列女傳第五



万女集五

三

才藝傳

大清畿輔列女傳第六

天津徐世昌撰

盧龍蔡琬

蔡琬者字季玉綬遠將軍盧龍蔡毓榮之女高文良公其倬之繼妻也初吳三桂寵姬有八面觀音者與圓圓同稱國色吳亡歸毓榮生琬明豔嫻雅淹貫羣書其倬章疏移檄多出其手裁號爲閨中良友其倬撫蘇州與總督不合卓然孤立屢爲所傾陷嘗詠白燕詩得有色何曾相假借之句琬應聲代對之曰不羣仍恐太分明蓋規之也琬素工詩著有蘊真軒小草沈德潛別裁集稱其擲地有聲張裕華序則謂其事姑相夫訓子皆至賢孝身處崇高跬步守禮法友愛任恤有古丈夫風焉君子曰琬之母一吳家姬耳而生女賢明若此可謂出淤泥不染者矣詩曰委委佗佗如山如

河氏有之焉

天津藥樟妻王氏

王氏者靜海副貢生王麟之女天津藥樟之妻也性慈祥寬厚喜讀書日手朱子格言曰平生事此矣工詩恆不欲人知曰婦道無成何敢弄筆墨廢婦人正業乎于歸前居南城藥庫火壞人家牆屋盡室狂奔氏閉門不出飛石墮榻上氏負牆而立無懼容樟耆吟咏親朋唱酬無虛日不知氏能詩也後於棄紙中得刺窗詩一絕云蓬窗何用碧紗籠聊度金針一望通寄語小蟲休漫入此閒止許透清風因詰之始知爲氏作康熙六年樟客柳州姑沒貧不能葬氏日減半日餐納之蒲滿中買地以葬樟久客不返氏爲長律促之歸教其三子皆成名立本尤能文舉乾隆癸卯鄉薦氏母卒哀痛異常人嘗爲除服詩二篇讀者泣下有從堂姑者適于常



饗飧不繼時氏輒依時餽問姑怪詰之曰吾常使兒至汝家捫竈冷故知不飯耳次子立敬以武舉人爲武昌衛千總迎氏養署中旋病痢不服藥賦一絕而卒著有南遊草一卷詩曰威儀抑抑德音秩秩無怨無惡率由羣匹氏之謂也

### 故城祕王伊繼妻何氏

何氏者故城祕王伊之繼妻也王伊字莘農康熙間以詩名於時氏亦工詩著有歷亭吟藁然性淡靜不欲以詩自炫教子有家法子孫襲其教者多以學行稱至今弗衰光緒二十一年其裔孫重刊其詩集武強賀濤爲之序曰人之才知無閒男女一也自先王以禮爲閑定內外之位女子不得與外事雖有術略斂而抑之循循焉從政於門內凡所稱技能藝業有用於世而可藉以成名者一不得有所閑習文學其尤難者也非夫稟質獨優而性能好之

鮮克有稱於世其見於傳記諸子及歷朝史家所錄代不過數人  
後世摻訪前代遺文苟有所流傳雖至陋無不采而登之而  
女子之廁其間者乃僅千百之一二歐陽公集古今金石上下數  
千年間其爲女子手書者一人而已豈其才之獨絀將由事非所  
重習而能之者少雖習而能之而故揜匿之而弗使傳邪大河以  
北風氣質樸女子從事於文學者益鮮然幸而有傳之者其可愛  
惜而寶貴之宜何如也君子謂氏之詩假物善懷有風人之旨詩  
曰穆如清風吾於氏見之焉

滄州左方肅妻張貞範

張貞範者號堅樸道人滄州國子監典簿張延緒之女康熙辛卯  
舉人山東樂安縣知縣左方肅之妻也性高潔喜讀書垂髫從父  
授書通大義稍長讀老萊接輿婦傳歎曰世固有若爾人真可作

高山景行矣所居室清潔無纖塵慕陶靖節之爲人顏其居曰靜  
寄齋能自鐫小印畫仿倪迂獨不肯爲詩及于歸始相唱和孝事  
公姑佐夫教子尤有儀則晚年好靜終日閉目默坐間爲小詩似  
頌似偈遣興而已詩曰毋金玉爾音而有遐心氏有之焉

元城陳朝蔭妻竇氏

竇氏者敘州府知府大名竇日嚴之女元城諸生陳朝蔭之妻也  
性聰慧尤喜爲詩年十二母卒依父以居愛之如男兒十七于歸  
朝蔭陳故元城望族朝蔭補博士弟子風標玉立有聲庠序間夫  
妻倡和伉儷尤篤越三載忽病歿氏年二十號痛誓死其父勸之  
曰孀姑在堂此良人未了事汝死則孀姑失養良人之目不瞑矣  
遂勉起事姑居一室同起居未幾姑又亡氏仰天大痛曰天乎毒  
我乃如此甚耶仍誓死其父再三慰之勸其撫嗣子曰爾家兩代



無親生子陳氏鬼不可餒也初夫叔氏無子以朝廕後之至是乃就本生舅姑以居焉舅俠士也好賓客善結納所交皆當世顯貴人飲食謙衍無虛日家稍不給女出簪珥助之步搖條脫衿褙褫褫又盡鬻之以佐其用數年陳氏產告匱惟土室三楹破榻一具而已又數年本生舅卒其父迎之歸疽發於背卒年四十女性純孝囊無一錢必竭力供祀事温良和易雖僕婢未嘗加惡聲生平無他者惟喜讀書終歲鬻鬻無歡容偶哦詩獲一佳句則欣然色喜所著有貞匳閣詩一卷詩餘一卷其父刊之藏於家君子謂氏貞孝而文詩曰獨寐寤歌永矢弗過此之謂也

天津查為仁妻金氏

女調鳳 女宋貞娘

容端

綺文

嚴月瑤

侍

金至元者天津諸生大中之女解元查為仁之妻也字載振一字含英夙嫻內則不苟訾笑幼穎悟者學讀書通大義書算琴管皆

精妙稱能品爲仁以事下請室九年始出成婚禮伉儷慕篤夫妻  
唱和詩積成卷帙名曰松陵集自著芸書閣集二卷清拔孤秀濟  
南趙執信序而傳之其古意云倚熏籠兮倦繡日遲遲兮春晝步  
庭除兮延伫折花枝兮獨歛鶯百啭兮將闌柳飛花兮欲殘恨流  
光兮難縮掩羅袖兮汎瀾沒後佟蔗村姬人豔雪輓之云美人自  
古如名將不許人間見白頭士林頌之爲仁女調鳳字鳴祥容端  
字淑正綺文字麗言皆工文翰嚴月瑤者字閨娟爲仁長子善長  
之妻詩尤工絕侍女宋貞娘亦能詩今所傳者皆次韻爲仁水西  
莊落成之作查氏一門風雅天津他族罕有及之者詩曰追琢其  
章金玉其相查氏有焉天津又有許雪棠者不知何人之女也過  
時不嫁工詩文爲仁有別業庭前海棠冒雪盛開其和詩聞傳於  
時汪西瀨津門雜事詩有云不櫛書生不畫眉傳來豔絕海棠詩

若教玉秤稱才子壓倒樓頭舊婉兒謂雪棠也

天津梅成棟妻金氏

同縣趙西姑 張筠

金沅者字芷汀號問梅女史天津詩人金玉岡之從孫女梅成棟之妻也性婉順通禮則奉尊嫜以孝聞姑沒隨亡病中留題小像二章成棟爲繪問梅圖一時題詠殆徧云天津閨秀又有趙西姑張筠皆詩人也西姑趙楚之女幼通毛詩古樂府詩有父風未聘而卒筠字竹方張靖之女嫁繆共位夫妻唱酬如良友靖無子授浦江知縣卒於官筠親視含斂隻身三千里扶父柩返葬孤舟往返錢塘江中大風雪屢瀕於危嘗繪長江風雨圖亦女中奇士也君子曰天津詩人後先輝映名門之女多事詩書耽吟詠彬彬乎有士君子之行焉金沅梅花四詩品格高逸其閨閣中之和靖乎詩曰倡予和女蓋其所漸者遠矣



## 天津佛女

佛女者不知何氏之女也世爲天津望族父善畫母朱好佛茹素  
姪女時夢六士持金環一投諸懷曰寶之此孤環也世無其偶已  
而生女聰明秀慧甫三齡日識字數百長而秀骨玉顏皎若冰雪  
父母珍愛之性好潔誓不嫁親強之女曰女之嫁猶男子之仕也  
士不盡仕女豈盡嫁乎兒有異性不樂與俗人居且親老矣兒無  
兄弟倘適人堂上益寂寥寡歡若匹非其人且重爲父母憂曷留  
兒以娛二老餘年乎父母重違其意姑聽之家故藏書富女日夜  
披覽久之能爲文詩尤工絕每侍親食畢輒閉戶拈詩哀然成帙  
然不肯炫於人嘗有句云新詩草就無人贈閒向梅花樹下吟其  
風趣可想未幾父母相繼病歿女扶持湯液含斂絞衾哀動路人  
觀者皆泣下嘆有子弗如也終喪後家業日零刺繡賣之自給親

舊罕睹其面者其所刺花鳥如生間刺所自爲詩句視所資足數  
日餐卽緇經跌坐焚香垂簾而已詩人梅成棟嘗丐其乳媪以詩  
囊求刺女題二絕云紡得春雲一綫長包羅風月入絲囊他年補  
袞朝天上探取明霞五色章驢背尋詩竹杖挑天涯吟遍路迢迢  
定知風雪梅花裏獨負寒香過灞橋且告之曰梅君老於詩龕久  
矣勿留其值梅得之過望一日女晨起靚妝膜拜大士前取所著  
詩卷焚火焚之徐謂乳媪曰我去矣幸瘞我兩親墓旁語畢端坐  
而逝闔室聞旃檀氣君子曰其在屯之六二所謂不字之貞者也  
方諸男子則蠶之上九不事王侯而高尚其志者與詩曰衡門之  
下可以棲遲泌之洋洋可以樂飢可爲佛女歌之矣

灤州王廷勳妻竇蘭軒

同州李希彬妻鄭淑  
同縣李綸妻李氏

遷安高順貞  
樂亭張山妻

宋氏

竇氏者字蘭軒灤州武舉人王廷勳之繼室也廷勳習騎射恂恂  
謹飭有儒風夫婦相莊以靜好稱於時子庚舉人官山東知縣孫  
汝訥進士官東昌知府皆氏教之成詩尤工麗著有蘭軒詩草廷  
勳之族人王昌稱其詩有空谷幽蘭孤芳自賞之意爲序之行世  
姊蓮溪弟桂園皆能詩有詩庭合集藏於家豐潤鄭淑字苻洲父  
武精詩畫氏依左右詩詞皆得其家法年十七歸灤州翰林李希  
彬年二十卒著有琴亭女史殘稿遷安有高順貞者字德華詩人  
高繼珩之女也幼聰慧五六歲時從其父兄問字讀毛詩女誡及  
唐宋諸大家集皆能領悟後遂以詩鳴適江西劉垂蔭嘗寄其父  
詩有兩地有親垂白髮故鄉何處買青山之句傳誦一時著有疊  
翠軒詩集同時遷安舉人李綸妻李氏樂亭諸生張山妻宋氏皆  
善詩君子曰造物忌才女子殆尤甚焉若竇蘭軒者可謂才福兼



備者矣詩曰彼美淑姬可與晤歌此之謂也

大興方履錢繼妻呂氏

呂氏者字琴姜大興方履錢之繼妻也翁聯聚官閩縣知縣以禱  
雨致疾卒遺夫弟三人撫之均成立呂故聰慧善爲文工駢體尤  
精佛典常爲法苑珠林序爲時所稱誦其辭曰式仰駿迦首崇調  
御青蓮煥相之辰紫山寄莊之始髻湧百寶睫照四天吉祥之瓶  
廣納赤宙智慧之藥俯接黔毗莫不因妙以立覺藉寂以探機設  
教止乎一慈建諦俟其頓悟上行所屆微言已伸復以三界昏寢  
六賊攀緣鼠入角而焉通狼守齋而易毀於是轉意珠之朗揚慈  
水之瀾吐奧旨以拔迷根積雕談而搯險樹芬逾薈蔔夢發優曇  
雖四十九齡未拈般若之義而三十二士各示依趣之階無說無  
聞天花早墮非堅非久蠟印自傳白馬剎刹羽林之使初歸神龜

肇年洛陽之求益備乃使九垂大典西辭乎流沙八梵頌音東詹  
平震旦自迦葉口授之文菩薩淨行之品覩驪龍而豎指逢飢虎  
以施身請雨有經移山著論至於辨意長者成貝字之篇善思童  
子效琅函之誥成敷精業婉迪羣蒙加以前皇黼辰喜闡勝因儒  
生綺毫樂爲釋用梁帝重雲之講旣耀南區姚氏草堂之集實隆  
北學曇柯之所宣譯羅什之所發明彥和燭髮編定林之經藏小  
山潔願獲開善之香匳由是綈裘繁臻金繩密約莊情束影之詞  
啟繆開賢之制足以躒靈飛之綠檢杭聖籍之丹籤列橫連疊淨  
烟散竹語夫博涉從事斯難索彼菁華惜徒莫憶乃有沙門釋道  
世者植蹤唐代應詔西明學通內外誼合教宗擬彌天之道安爲  
方袍之平叔愍夫眞如易明法匠難遭遂乃綜覽義林穴穿奧蹟  
舉其綱紐明其指歸闢八藏之鍵挈一裘之領大乘小乘之別幽

顯俱詳語業意業之關源流可溯如酥就熟億轉不凝如水散泡  
千沫共見百篇之目既析四禪之用皆純若其敬攝旃檀聿宣慧  
炬日精入口炫白淨之宮月愛舒光孕青霄之座鐵豬受矢玉象  
扶輪獨守心王不離智食富樓那之姓氏標若星躔波頭摩之劫  
壽羅於紋掌欲使維衛威神感而卽應尼乾邪計見而輒摧此則  
僧祇之本律亦讚述之願海也因以湔濯塵冥解脫頑固七珍勤  
表五濁泛陳以蓮舌爲振鐸以紺素爲長桴汲汲苦言悵悵淒韻  
逆風熱熾懲導慾之心行廁畫瓶泯惜身之念四蛇引於鼻耳二  
鼠逼於腎腸凡諸怖畏足起信心倘使鉢露能濡自無酸酷幡雲  
獲蔭豈遇煇煨敲骨剔髓之誠濟生非恡掬土雇花之細得報靡  
窮巨障裂而長空明深痾蠲而凡劫盡此猶禦寒之設諾拯渴之  
蘇陀福利之階斯爲最要至若曲辨情靈富該圖史縉英彬蔚麗



篆紛綸事多集夫佚文語每秀於天拔鵲園異跡香散驚精馬苑  
餘輝華飛瓔珞求黃練於安慧神漢浮來夢白服於曇延夜光照  
徹興公銘頌遜此芳塵休文碑狀媿其妍製多聞親授阿難爲之  
展軫揔持強記摩詰于焉避席信可以梯航眾品肴核橫書獵藻  
者珍比青箱饋貧者非徒黑學宜其千禩不刊三教傳錄者也世  
所行舊槧本曾經明人竄改妄析爲百二十卷全與新書藝文志  
著錄百卷不符以致簡葉違錯章段崩離字句之間亦多脫誤邢  
子才之一適非可例觀賈慧遠之五論難期闔合披卷尋覽能無  
慨然清信女士董申林虞山蔣伯生大令之造室也生善女號天  
仙人子珉膏飶齒石黛修蛾悅意馳稱妙音作眷懸金九十日爭  
譽便娟裁車五百丸皆名歡喜琉璃硯匣不犯綺詞迷迭薰鑪潛  
持密教因披臧本用勘此書始知萬厯之訛曾非憚上之矢丹鉛

既匝緇論悉明遊發宏心謀資眾悅同時名閨淑儀大善知識咸分華鬢襄助錢梨共得百人費凡千鎰校讐審察鏤造精嚴以道光七年春月葉訂訖功福不唐捐美冠諸蘊阿育建塔受夙世之慈緣瞿夷獻花遘閻浮之良匹寶髻尊宿之前六門開示優婆塞夷之侶四諦顯揚竟令佉樓半字易旁行倒住之風脂那全勝播辨物類名之訓成一切種智爲三界導師具此淨因超於戒垢天銀闕下鶴女無遇事之經水香園中鹿母迎善見之律十重緹褶偕慧日而齊暉五色霞牋垂法濤而愈永興言褒讚略敘毗尼心塵未離空懷彤管心田被潤欲丐青苔雖來旨之勉酬慙覺緣之終蔽氏之夫履錢博學者古能爲六朝文與楊芳燦董方立齊名氏蓋有所授之也詩曰妻子好合如鼓瑟琴呂氏有焉

正定何鴻受妻子氏

于氏者正定何鴻受之側室也生具神力精技術平居和易若不勝衣雖其家無知者會夏日製糞菜曝於院重數百斤大雨暴至家人呼眾升之階眾至而甕已移至階上矣詢知氏所為始大驚異嘗有盜警氏結束出謂家人曰勿懼此小盜妾足禦之語甫畢已騰身上屋脊往來矯捷如飛盜皆驚散初氏歸時有革屨二刀一履鐵底緣底以革繩綴錐數十長二寸勒繩則錐森然前豎刀重十餘斤鋒甚銛問何攜此答以先人遺物不忍棄至是乃知其素所用也人傳為百人敵云君子曰氏武勇懷絕技而循循守閨禮墮然若無能者或謂其嫡妻遇之虐而終身無怨言可謂勇而知禮矣詩曰孔武有力其力可嘉也其德尤不可及也

大興劉尹玉 子婦劉己未

劉尹玉字季瑜大興劉位坦之女貴筑黃彭年之繼室也位坦有

才藝



學行官辰州知府與彭年父輔辰善彭年喪偶以氏歸之爲繼室  
氏耽文史嫻繪事結褵之夕彭年酒卧氏據案作畫以壁懸張穆  
詩聯有唐人陶然共醉菊花杯之句因作菊花杯圖逾年庭中碧  
桃重開竝蒂結實二十四雙彭年取以名齋使氏圖之歎曰古人  
言根之喪者不再華萎謂並蒂者生氣已分不如其一也賦詩相  
警勸咸豐三年挈家歸黔舟泊茅灘彭年步岸上獲奇石四周雲  
繞中微凹背文如水波礮之爲硯氏寫雲波石硯圖庚申返保定  
居古蓮花池氏圖十二勝景見者歎爲絕技氏風韻高邁然性至  
孝嘗手錄博野尹會一母夫人年譜自勵委婉和順躬勤操作刀  
匕筆札案上常相雜彭年病割臂以進及姑病亟再割臂和藥飲  
之病少瘥姑沒悲痛致疾同治元年奉姑柩入蜀道卒年三十有  
六光緒六年以孝行旌於朝初尹玉之兄銓福官刑部主事兄妹

相友愛欲聯姻及彭年奉詔人都適銓福病痿痺其女己未年甫  
十二齡侍疾牀前彭年戲語之曰我家有薄田茅舍爾願往乎女  
曰願惡衣疏食爾能安乎曰能銓福喜與彭年曰女已心許矣請  
踐約遂字於國璋國璋者彭年之四子也銓福卧病三年己未侍  
湯藥滌厠踰未嘗頃刻離父沒兄弟不相能己未時時調解之內  
外無閒言年十七來歸性篤孝事舅惟謹飲食必親調以進光緒  
十四年舅任蘇藩患風疾夫病瘡己未日夜扶事無晷時聞呼聲  
趨進至折右趾不知痛也嘗禱於天願誦金剛經十藏爲舅祈福  
疾乃瘳由是日日跪誦兩股受寒溼遂不良於行夫疾久不愈己  
未刺指血和藥進瘡遂止十六年舅卒於鄂己未方娠哀毀幾不  
起甲午中東之戰國璋需次津沽己未質釵釧率子女北上家人  
阻之不可曰儻不測以死繼之及抵津戰事日棘國璋命遠避己

未曰君不去惟有共生死耳卒不行國璋久官直隸有能名其令  
高邑高陽博野清豐清苑諸縣內政一以委之己未以勤儉率家  
人有干以私者輒呵止之曰此非婦人所預也庚子變起國璋正  
權清豐勢甚急或勸之暫避汴中己未謂國璋曰君有守土之責  
我有相夫之義設有變君殉國我殉夫他非所知也且吾一去則  
民心動搖是速之亂也其明識大義如此氏性嚴正喜危坐兒女  
輩有箕踞跛倚衣襟不整潔者必嚴誡之病劇時延美國女醫猶  
端坐不肯卧診己未知書善刺繡多鈎搨漢碑及古專瓦當文字  
其初來歸時姑遺二女皆親爲撫育及長授之書躬督課之教子  
女嚴慈兼盡命長子樹成游學日本曰成名視此行勿自暴也又  
使次子靖成回湘侍其伯母疾曰汝已爲伯父後事汝母猶事吾  
也易簣之時猶致書諄諄戒之不使其病也生平好施與有病



者製藥濟之而布衣疏食不改寒素侍夫宦游數十年囊笥無餘  
資而先人文字拳拳保存曰此傳家之寶也三十一年卒年四十  
七己未字梳孫又號道原其歸之明年蓮開並頭家人以爲賀己  
未述其姑碧桃瑞事因名其室曰碧桃吟館云君子曰孔子讀妻  
子好合之詩曰父母其順矣乎吾於黃氏姑媳見之矣詩曰辰彼  
碩女令德來教好合之謂也

### 文安張嵩山妻葛氏

葛氏者文安張嵩山之妻也年二十一夫亡守節三十一年氏知  
書工吟詠嘗爲自悼詩四篇傳誦於時詩曰連理雙雙並蒂栽南  
枝纔放北枝摧總然哭向東皇訴樹老根枯喚不回十年泉路渺  
無音苦節斑筠淚點深數畝薄田蕭瑟盡秋風茅屋夜沉沉春衣  
典盡無餘粟野菜挑來始舉薪惟有無情天上月夜深偏照未亡

人長夏清和夜卧遲夕陽西墜鳥棲枝花閒吟詠何情緒總是淒涼慘淡時君子謂其志潔其音哀詩曰嘯歌傷懷此之謂也

### 任邱李麗煥

李麗煥字陶吟任邱李蘇辰之長女長治知縣武安白昶之繼室也氏端靜淑慎幼承庭訓三歲授以書輒成誦長益肆力群籍尤喜爲詩于歸後夫妻唱和有若良友光緒二十五年昶任霍州知州氏相偕之治所畫出其篋中藏稿屬其夫付梓工未就以疽疾卒若預知者然年二十七歲今所傳者有劍芝閣詩鈔四卷其弟忠沆爲序而行之詩曰彼美淑姬可以寤語此之謂也

### 天津陸文輔

陸文輔者字闡哉天津陸牖如之女也同治六年女生而穎悟津俗兒生周歲例以彩盤雜置好惡諸物使兒擇取以驗其志女獨

取書筆父母咸異之稍長習女紅教之讀書聰慧異常人性復純  
孝年十餘母疾數載時父外出祖父母又老邁女晝夜侍湯藥暇  
則誦說部以博祖父母歡叔母張者孀居守志女與同起卧有爲  
女議聘者女哭竟夜問之曰女亦子也獨不可侍親至終老乎再  
勸之哭益失聲乃罷議既而母病劇族人勸其父納遣室延似續  
父不肯指女曰吾有子矣何復子爲女曰如此女罪重矣跪請之  
不起遂許之乃納陳氏連生二子光緒十三年母卒女跪靈前誦  
金剛經七日夜誦畢誓投繯以殉戚黨知之責以大義且謂上有  
老親下有稚弟父常外出不克久家居陸氏重任系於汝一死非  
所以盡孝也乃泣血斷髮誓不嫁既祖父母相繼沒喪殯之事皆  
躬爲摒擋而陳氏又以積勞致疾彌留時呼二子至前曰汝兄弟  
無母有姊在事汝姊當如事我我死瞑目矣自是乃以教育兩弟



1573356

文粹

為己任兩弟就外傳歸後必燈下親為溫昌講肄之庚子拳匪之  
 亂攜兩弟避他鄉猶督之不稍怠未幾父又沒家無一錢女以鍼  
 芻謀生計冬寒手裂血泔泔出而未嘗輟工平生好瀏覽新籍尤  
 精算術謀之族中創女學私塾自督教之天津女學之盛自女始  
 也後為官立普育諸女學教授以疾卒年四十有九君子謂女才  
 而有德詩曰展如之人兮邦之媛也此之謂也

列女傳八終

大清畿輔列女傳第六

201-782



21101000161208